

ANG SIMBAHAN NI JESUKRISTO SA MGA SANTOS SA ULAHING MGA ADLAW • NOBYEMBRE 2011

Liahona



**Mga Pakigpulong
sa Kinatibuk-ang
Komperensya**

**Unom ka Bag-ong mga
Templo Gipahibalo**



Pagkat-on gikan sa mga Kasulatan, ni Nancy Crookston

Ang Ginoo mitudlo, “Kamo nagasusi sa mga kasulatan, kay nagahunahuna man kamo nga pinaagi niini makakaplag kamo sa kinabuhing dayon: Ngani kini mao ang nagapanghimatuod kanako” (Juan 5:39).

Mga Sulod sa Nobyembre 2011

Volume 14 • Numero 11

SESYON SA SABADO SA BUNTAG

- 4 Sa Atong Pagkita og Usab
Presidente Thomas S. Monson
- 6 Ang Gahum sa Kasulatan
Elder Richard G. Scott
- 9 Personal nga Pagpadayag ug Pagpamatuod
Barbara Thompson
- 11 Ang Panahon Moabut
Elder L. Whitney Clayton
- 14 Pagbuhat sa Sakto nga Butang sa Sakto nga Panahon, sa Walay Paglangan
Elder José L. Alonso
- 16 Tambag ngadto sa mga Kabatan-onan
Presidente Boyd K. Packer
- 19 Kamong Importante ngadto Kaniya
Presidente Dieter F. Uchtdorf

SESYON SA SABADO SA HAPON

- 23 Ang Pagpaluyo sa mga Opisyal sa Simbahan
Presidente Henry B. Eyring
- 24 Ang mga Kasingkasing sa mga Anak Mobati
Elder David A. Bednar
- 28 Mga Bata
Elder Neil L. Andersen
- 31 Oras sa Pagpangandam
Elder Ian S. Arden
- 33 Mas Maayo nga Mohangad
Elder Carl B. Cook
- 35 Katubanan
Elder LeGrand R. Curtis Jr.
- 38 Ang Balaanong Gasa sa Paghinulsol
Elder D. Todd Christofferson
- 41 Ang Hingpit nga Gugma Nagahingilin sa Kahadlok
Elder L. Tom Perry

SESYON SA PRIESTHOOD

- 44 Apil Kitang Tanan
Elder Jeffrey R. Holland
- 47 Ang Gahum sa Aaronic Priesthood
Bishop Keith B. McMullin
- 50 Ang Oportunidad sa Kinabuhi
Elder W. Christopher Waddell
- 53 Pagsangkap pinaagi sa Pamaagi sa Ginoo
Presidente Dieter F. Uchtdorf

- 56 Pagpangandam sa Priesthood: "Nagkinahanglan Ko sa Inyong Tabang"
Presidente Henry B. Eyring
- 60 Magmaisugon sa Pagbarug nga Mag-inusara
Presidente Thomas S. Monson

SESYON SA DOMINGGO SA BUNTAG

- 68 Usa ka Saksi
Presidente Henry B. Eyring
- 71 Nagahulat sa Ginoo: Matuman ang Imong Kabubut-on
Elder Robert D. Hales
- 74 Ang Basahon ni Mormon—Basahon gikan sa Dios
Elder Tad R. Callister
- 77 Higugmaa ang Iyang Inahan
Elaine S. Dalton
- 79 Ang Importansya sa Pangalan
Elder M. Russell Ballard
- 82 Barug sa Balaan nga mga Dapit
Presidente Thomas S. Monson

SESYON SA DOMINGGO SA HAPON

- 86 Mga Pakigsaad
Elder Russell M. Nelson
- 90 Mga Pagtulun-an ni Jesus
Elder Dallin H. Oaks
- 94 Pagtudlo subay sa Paagi sa Espiritu
Matthew O. Richardson
- 96 Bahandi sa Simbahan ang mga Misyonaryo
Elder Kazuhiko Yamashita
- 98 Pilia ang Kinabuhing Dayon
Elder Randall K. Bennett
- 101 Ang Pribilehiyo sa Pag-ampo
Elder J. Devn Cornish
- 104 Ang mga Awit nga Dili Nila Makanta
Elder Quentin L. Cook
- 108 Hangtud sa Sunod Natong Panagkita
Presidente Thomas S. Monson

KINATIBUK-ANG MITING SA RELIEF SOCIETY

- 109 Unsay Akong Gipanghinaut nga Masabtan sa Akong Apo nga mga Babaye (ug Apo nga mga Lalaki) mahitungod sa Relief Society
Julie B. Beck

- 114 Ang Gugma nga Putli Dili Gayud Mopakyas
Silvia H. Allred
- 117 Hupot ngadto sa mga Pakigsaad
Barbara Thompson
- 120 Ayaw Ko Paghikalimti
Presidente Dieter F. Uchtdorf
- 64 General Authorities sa Ang Simbahan ni Jesukristo sa mga Santos sa Ulahing mga Adlaw
- 124 Indeks sa mga Istorya sa Komperensya
- 125 Mga Pagtulun-an alang sa Atong Panahon
- 125 Kinatibuk-ang mga Kapanguloan sa Auxiliary
- 126 Mga Balita sa Simbahan



Summary sa Ika-181 nga Tunga sa Tuig nga Kinatibuk-ang Komperensya

SABADO SA BUNTAG, OKTUBRE 1, 2011, KINATIBUK-ANG SESYON

Nagdumala: Presidente Thomas S. Monson. Conducting: Presidente Henry B. Eyring. Pangbukas nga Pag-ampo: Elder Gary J. Coleman. Panapos nga pag-ampo: Elder Lowell M. Snow. Ang musika gidalit sa Tabernacle Choir; Mack Wilberg ug Ryan Murphy, mga direktor; Richard Elliott ug Andrew Unsworth, organista: “The Morning Breaks,” *Hymns*, nu. 1; “With Songs of Praise,” *Hymns*, nu. 71; “We Ever Pray for Thee,” *Hymns*, nu. 23, arr. Wilberg, wala mamantala; “Redeemer of Israel,” *Hymns*, nu. 6; “I Am a Child of God,” *Children’s Songbook*, 2–3, arr. Murphy, wala mamantala; “Press Forward, Saints,” *Hymns*, nu. 81, arr. Wilberg, wala mamantala.

SABADO SA HAPON, OKTUBRE 1, 2011, KINATIBUK-ANG SESYON

Nagdumala: Presidente Thomas S. Monson. Conducting: Presidente Dieter F. Uchtdorf. Pangbukas nga Pag-ampo: Elder Won Yong Ko. Panapos nga pag-ampo: Elder Bradley D. Foster. Ang musika gidalit sa Primary choir gikan sa Pleasant View ug North Ogden, Utah; Vanja Y. Watkins, direktor; Linda Margetts, organista: “God’s Daily Care,” *Hymns*, nu. 306, and “I Thank Thee, Dear Father,” *Children’s Songbook*, 7, medley arr. Watkins, wala mamantala; “Families Can Be Together Forever,” *Hymns*, nu. 300, arr. Watkins, wala mamantala; “Praise to the Man,” *Hymns*, no. 27; “My Heavenly Father Loves Me,” *Children’s Songbook*, 228–29, and “I Know My Father Lives,” *Hymns*, nu. 302, pub. Jackman, medley arr. Watkins, wala mamantala.

SABADO SA GABII, OKTUBRE 1, 2010, SESYON SA PRIESTHOOD

Nagdumala: Presidente Thomas S. Monson. Conducting: Presidente Dieter F. Uchtdorf. Pangbukas nga Pag-ampo: Elder Richard G. Hinckley. Panapos nga pag-ampo: Elder Koichi Aoyagi. Ang musika gidalit sa Melchizedek Priesthood choir gikan sa Pleasant Grove, Utah; Justin Bills, direktor; Clay Christiansen, organista: “Rise Up, O Men of God,” *Hymns*, nu. 324, arr. Staheli, pub. Jackman; “I Need Thee Every Hour,” *Hymns*, nu. 334, arr. Bills, wala mamantala; “Rejoice, the Lord Is King!” *Hymns*, nu. 66; “Come, Ye Children of the Lord,” *Hymns*, nu. 58, arr. Bills, wala mamantala.

DOMINGGO SA BUNTAG, OKTUBRE 2, 2011, KINATIBUK-ANG SESYON

Nagdumala: Presidente Thomas S. Monson. Conducting: Presidente Dieter F. Uchtdorf. Pangbukas nga Pag-ampo: Elder Paul K. Sybrowsky. Panapos nga pag-ampo: Elder James B. Martino. Ang musika gidalit sa Tabernacle Choir; Mack Wilberg, direktor; Andrew Unsworth ug Clay Christiansen, organista: “Lead Me into Life Eternal,” *Hymns*, nu. 45; “Guide Us, O Thou Great Jehovah,” *Hymns*, nu. 83, arr. Wilberg, wala mamantala; “Consider the Lilies,” Hoffman, arr. Lyon, pub. Jackman; “We Thank Thee, O God, for a Prophet,” *Hymns*, nu. 19; “I’ll Go Where You Want Me to Go,” *Hymns*, nu. 270, arr. Wilberg, wala mamantala; “I Believe in Christ,” *Hymns*, nu. 134, arr. Wilberg, wala mamantala.

DOMINGGO SA HAPON, OKTUBRE 2, 2010, KINATIBUK-ANG SESYON

Nagdumala: Presidente Thomas S. Monson. Conducting: Presidente Henry B. Eyring. Pangbukas nga Pag-ampo: Elder F. Michael Watson. Panapos nga pag-ampo: Elder Gregory A. Schwitzer. Ang musika gidalit sa Tabernacle Choir; Mack Wilberg ug Ryan Murphy, mga direktor; Bonnie Goodliffe ug Linda Margetts, mga organista: “Arise, O God, and Shine,” *Hymns*, nu. 265, arr. Wilberg, wala mamantala; “I Feel My Savior’s Love,” *Children’s Songbook*, 74–75, arr. Cardon, wala mamantala; “Now Let Us Rejoice,” *Hymns*, nu. 3; “Lord, We Ask Thee Ere We Part,” *Hymns*, nu. 153, arr. Wilberg, wala mamantala.

SABADO SA GABII, SEPTYEMBRE 24, 2011, KINATIBUK-ANG MITING SA RELIEF SOCIETY

Nagdumala: Presidente Thomas S. Monson. Conducting: Julie B. Beck. Pangbukas nga Pag-ampo: Barbara C. Bradshaw. Panapos nga pag-ampo: Sandra Rogers. Ang musika gidalit sa Relief Society choir gikan sa Eagle Mountain ug Saratoga Springs, Utah; Emily Wadley, direktor; Bonnie Goodliffe ug Linda Margetts, mga organista: “The Morning Breaks,” *Hymns*, nu. 1, arr. Wilberg, wala mamantala; “Sweet Is the Work,” *Hymns*, nu. 147, arr. Manookin, pub. Jackman; “Hark, All Ye Nations!” *Hymns*, nu. 264; “Now Let Us Rejoice,” *Hymns*, nu. 3.

MAANAA ANG MGA PAKIGPULONG SA KOMPERENSYA

Sa pag-access sa mga pakigpulong sa kinatibuk-ang komperensya sa daghang mga pinulongan, bisitaha ang conference .lds.org o languages.lds.org. Dayon pagpili og pinulongan. Sa kasagaran sulod sa duha ka bulan human sa komperensya, ang audio recordings anaa sa mga sentro sa pagpang-apud-apod.

MGA MENSAHE SA HOME UG VISITING TEACHING

Sa mga mensahe sa home ug visiting teaching, palihug pagpili og pakigpulong nga labing makatubag sa mga panginahanglan niadtong inyong gibisitahan.

SA HAPIN

Atubangan: Gilitratohan ni John Luke. Sa luyo: Gilitratohan ni Les Nilsson.

LITRATO SA KOMPERENSYA

Mga talan-awon sa kinatibuk-ang komperensya sa Siyudad sa Lake City gilitratohan nila Craig Dimond, Welden C. Andersen, John Luke, Christina Smith, Cody Bell, Les Nilsson, Weston Colton, Sarah Jensen, Derek Israelsen, Danny La, Scott Davis, Kristy Jordan, ug Cara Call; sa Brazil ni Barbara Alves, David McNamee, ug Sandra Rozados; sa Canada ni Laurent Lucuix; sa El Salvador ni Josué Peña; sa England ni Simon Jones; sa Japan ni Jun Aono; sa Mexico ni Monica Mora; sa Philippines nila ni Wilmor LaTorre ug Ann Rosas; sa South Africa ni Rob Milne; sa Sweden ni Anna Peterson; ug sa Uruguay ni Manuel Peña.



Magasin sa Ang Simbahan ni Jesukristo sa mga Santos sa Ulahing mga Adlaw nga giimprinta sa Cebuano

Ang Unang Kapangulohan: Thomas S. Monson, Henry B. Eyring, Dieter F. Uchtdorf

Korum sa Napulog Duha ka mga Apostoles:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Editor: Paul B. Pieper

Mga Adviser: Keith R. Edwards, Christoffel Golden Jr., Per G. Malm

Tigdumalang Direktor: David L. Frischknecht

Direktor sa Editoryal: Vincent A. Vaughn

Direktor sa Grapiks: Allan R. Loyborg

Tigdumalang Editor: R. Val Johnson

Mga Luyo-luyo sa Tigdumalang Editor:

Jenifer L. Greenwood, Adam C. Olson

Kauban mga Editor: Susan Barrett, Ryan Carr

Mga Kawani sa Editorial: Brittany Beattie, David A. Edwards, Matthew D. Flitton, LaRene Porter Gaunt, Carrie Kasten, Jennifer Maddy, Lia McClanahan, Melissa Merrill, Michael R. Morris, Sally J. Odekir, Joshua J. Perkey, Chad E. Phares, Jan Pinborough, Paul VanDenBerghe, Marissa A. Widdison, Melissa Zenteno

Tigdumalang Direktor sa Art: J. Scott Knudsen

Direktor sa Art: Scott Van Kampen

Tigdumala sa Produksyon: Jane Ann Peters

Mga Senior nga Tigdesinyo: C. Kimball Bott, Thomas S. Child, Colleen Hinckley, Eric P. Johnsen, Scott M. Mooy

Mga Kawani sa Desenyo ug Produksyon: Collette Nebeker

Aune, Howard G. Brown, Julie Burdett, Reginald J. Christensen, Kim Fenstermaker, Kathleen Howard, Denise Kirby, Ginny J. Nilson

Prepress: Jeff L. Martin

Direktor sa Pag-imprinta: Craig K. Sedgwick

Direktor sa Pagpang-apud-apod: Evan Larsen

Paghubad: Francisco M. dela Cruz

Ipadala ang subskripsyon, mga pangutana, ug mga taho ngadto sa *Dateline Philippines* sa *Liahona*, The Church of Jesus Christ of Latter-day Saints, Temple Drive, Greenmeadows Subdivision, Quezon City 1110, Metro Manila, Philippines o sa P. O. Box 1505, Ortigas Center, Emerald Avenue, Pasig 1600, Metro Manila, Philippines. Numero sa telepono 635-9183. Presyo sa subskripsyon sa Pilipinas, P86.40 matag tuig, P4.00 matag gula, gawas sa mga espesyal nga isyu.

Isumiter ang mga manuskrito ug mga pangutana online sa liahona.lds.org; kon ipadala ngadto sa *Liahona*, Room 2420, 50 East North Temple Street, Salt Lake City, UT 84150-0024, USA; o i-e-mail sa: liahona@ldschurch.org

Ang *Liahona* (usa ka termino sa Basahon ni Mormon nga nagpasabot nga "kompas o direktor" gimantala sa Albanian, Armenian, Bislama, Bulgarian, Cambodian, Cebuano, Chinese, Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swedish, Tagalog, Tahitian, Thai, Tongan, Ukrainian, Urdu, ug Vietnamese. (Ang kasagad magkalahi sa pinulongan.)

© 2011 sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. Giimprinta sa Tinipong Bansa sa Amerika.

Ang teksto ug biswal nga materyal diha sa *Liahona* mahimong kopyahan alang sa sulagma, dili pangkomersyo nga paggamit sa simbahan o panimalay. Ang biswal nga materyal dili mahimong kopyahan kon kini adunay mga pagdili diha sa linya sa kredito sa maong artwork. Ang mga pangutana kinahanglan ipadala ngadto sa Intellectual Property Office, 50 East North Temple Street, Salt Lake City, UT 84150, USA; e-mail: cor-intellectualproperty@ldschurch.org.

For Readers in the United States and Canada:

November 2011 Vol. 14 No. 11. LIAHONA (USPS 311-480) Cebuano (ISSN 1096-5114) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.



ANG MGA MAMULONG SA

ALPABETO NGA PAGKAHAN-AY

Allred, Silvia H., 114
Alonso, José L., 14
Andersen, Neil L., 28
Ardern, Ian S., 31
Ballard, M. Russell, 79
Beck, Julie B., 109
Bednar, David A., 24
Bennett, Randall K., 98
Callister, Tad R., 74
Christofferson, D. Todd, 38
Clayton, L. Whitney, 11
Cook, Carl B., 33
Cook, Quentin L., 104
Cornish, J. Devn, 101
Curtis, LeGrand R., Jr., 35
Dalton, Elaine S., 77
Eyring, Henry B., 23, 56, 68
Hales, Robert D., 71
Holland, Jeffrey R., 44
McMullin, Keith B., 47
Monson, Thomas S., 4, 60, 82, 108
Nelson, Russell M., 86
Oaks, Dallin H., 90
Packer, Boyd K., 16
Perry, L. Tom, 41
Richardson, Matthew O., 94
Scott, Richard G., 6
Thompson, Barbara, 9, 117
Uchtdorf, Dieter F., 19, 53, 120
Waddell, W. Christopher, 50
Yamashita, Kazuhiko, 96

INDEKS SA HILISGUTAN

Aaronic Priesthood, 47
Amahan, mga, 77
Basahon ni Mormon, 6, 50, 68, 74
Bata, mga, 28
Biblia, 74, 90
Bili sa kaugalingon, 19, 120
Couple Missionary, mga, 44
Diosnong kinaiya, 19
Ehemplo, 41, 60, 77, 90, 96
Espiritu Santo, 6, 9, 16, 33, 47, 82, 94
Family history, 24
Gugma, 53, 77, 96, 120
Gugma nga putli, 68, 109, 114
Hingpit nga kalipay, 38, 120
Hugot nga pagtuo, 28, 33, 71, 101, 104
Jesukristo, 35, 41, 74, 79, 90, 101
Kabatan-onan, 16, 24, 44, 47, 50, 77
Kabubut-on, 98
Kaisug, 33, 60
Kalamboan sa Simbahan, 11, 41
Kalisdanan, 71, 104
Kaminyoon, 28
Kasulatan, mga, 6, 74
Katubsanang, 35
Katungdanan, 47, 56
Kinatibuk-ang komperensya, 4, 23, 108
Langitnong Amahan, 108
Misyonaryo nga buhat, 11, 41, 44, 50, 79, 96
Moralidad, 16
Pag-ampo, 82, 101
Pagdumala sa panahon, 31
Paghinulsol, 16, 35, 38, 44

Pagkadisipulo, 109
Pagkaginikanan, 28, 77
Pagkakabig, 68, 96
Pagkamasulundon, 33, 38, 86, 90
Pagkamay-tulubagon, 98
Pagkat-on, 94
Paglahutay, 68, 71
Paglaum, 19, 71
Pagpa-aktibo, 14, 35, 50
Pagpadayag, 6, 9, 16, 82
Pagpahiuli, 11
Pagpamatuod, 9, 60, 68, 74, 82
Pagpangandam, 50, 56, 96
Pagpaningkamot sa kaugalingon, 53
Pagserbisyo, 14, 47, 50, 53, 56, 68
Pagtudlo, 94
Pag-ula, 33, 35, 38, 90
Pailub, 71
Pakigsaad, mga, 86, 117
Pamilya, 28, 77
Panagna, 11
Pangalan sa Simbahan, 79
Prayoridad, mga, 28, 31
Priesthood, 24, 47, 56, 60, 86, 109
Relief Society, 109, 114
Sakripisyo, 50, 120
Sumbanan, mga, 44, 60, 77, 82
Tagsa-tagsa nga bili, 19, 120
Teknolohiya, 24, 31
Templo ug buhat sa templo, mga, 4, 24, 41, 109, 117
Visiting teaching, 109, 114
Welfare, 53
Young Women, 77



Ni Presidente Thomas S. Monson

Sa Atong Pagkita og Usab

Akong pag-ampo nga unta mapuno kita sa Espiritu sa Ginoo samtang naminaw kita sa mga mensahe karon ug ugma ug makakat-on niadtong mga butang nga buot sa Ginoo nga atong mahibaloan.

Pagkanindot, mga kaigsoonan, sa pag-abiabi kaninyo sa Ika-181 nga Tunga sa Tuig nga Kinatibuk-ang Komperensya sa Ang Simbahan ni Jesukristo sa mga Santos sa Ulahing mga Adlaw.

Kini nga komperensya nagtimaan sa 48 ka tuig—hunahunaa kana, 48 ka tuig—sukad ako gitawag sa Kurom sa Napulog Duha ka mga Apostoles ni Presidente David O. McKay. Oktubre kadto sa 1963. Ingon og imposible nga daghang katuigan ang nanglabay sukad niana.

Kon kita nagkapuliki, ang panahon dali kaayong molabay, ug ang miaging unom ka bulan labut gyud ko niana. Usa sa pinakanindot nianang panahona mao ang oportunidad nga ako mopahinungod pag-usab sa Templo sa Atlanta Georgia niadtong Mayo 1. Giubanan ako ni Elder ug Sister M. Russell Ballard, Elder ug Sister Walter F. González, ug Elder ug Sister William R. Walker.

Atol sa selebrasyon sa kultura nga giulohan og “Habagatang mga

Kahayag,” nga gipahigayon pagkagabii sa wala pa ang pagpahinungod pag-usab, nanan-aw kami sa 2,700 ka batan-ong mga lalaki ug mga babaye gikan sa tibuok distrito sa templo nga nagpasundayag. Kadto usa sa labing



nindot nga mga programa nga akong nakita ug nakapabarug sa manan-aw og kadaghan alang sa masipang pakpak.

Sa sunod nga adlaw ang templo gipahinungod pag-usab sa duha ka sesyon, diin ang Espiritu sa Ginoo nakig-uban namo.

Sa ulahing bahin sa Agosto, si Presidente Henry B. Eyring mipahinungod sa Templo sa San Salvador El Salvador. Giubanan siya ni Sister Eyring ug nila ni Elder ug Sister D. Todd Christoffer-son, Elder ug Sister William R. Walker, ug Sister Silvia Allred sa kinatibuk-ang kapangulohan sa Relief Society ug sa iyang bana, si Jeffry. Mireport si Presidente Eyring nga kadto usa ka labing espirituhanong hitabo.

Sa ulahing bahin niining tuiga, si Presidente Dieter F. Uchtdorf ug Sister Uchtdorf mobiyahe kauban sa ubang mga General Authority ngadto sa Quetzaltenango, Guatemala, diin siya mopahinungod sa atong templo didto.

Ang pagtukod og mga templo nagpadayong walay hunong, mga



kaigsoonan. Karon akong pribilehiyo sa pagpahibalo sa daghang bag-ong mga templo.

Una, mahimo bang mosulti ako nga walay tinukod nga building sa Simbahan nga labaw ka importante kay sa templo. Ang mga templo mga dapit diin ang mga relasyon gibugkos nga molungtud hangtud sa mga kahangturan. Mapasalamaton kita sa daghang mga templo sa tibuok kalibutan ug alang sa panalangin niini sa kinabuhi sa atong mga miyembro.

Sa ulahing bahin sa miaging tuig ang Provo Tabernacle sa Utah County grabing nadaot sa sunog. Kining talagsaon nga building, gimahal sa daghang mga Santos sa Ulahing mga Adlaw, naguba nga ang mga bongbong lang sa gawas ang nahibilin. Human sa makuting pagtuon, nakahukom mi sa pagtukod niini pag-usab sa pagpreserbar sa hingpit ug pagpahiuli sa gawas nga bahin, nga mahimong ikaduhang templo sa Simbahan sa siyudad sa Provo. Ang templo karon sa Provo mao ang usa

sa labing nagkapuliki sa Simbahan, ug ang ikaduhang templo didto makatabang sa nagkadaghang matinud-anong mga miyembro sa Simbahan nga nagtambong sa templo gikan sa Provo ug sa naglibut nga mga komunidad.

Malipayon usab akong mopahibalo sa mosunod nga lokasyon: Barranquilla, Colombia; Durban, South Africa; Kinshasa sa Democratic Republic sa Congo; ug Star Valley, Wyoming. Dugang pa, mopadayon kita sa plano sa pagtukod og templo sa Paris, France.

Ang detalye niini nga mga templo ihatag sa umaabut sama sa dapit tukuranan ug ubang gikinahanglang pagtugot nga makuha na.

Akong nasulti sa miaging mga komperensya ang kauswagan nga atong nahimo sa pagbutang og mga templo nga maduol sa atong mga miyembro. Bisan tuod og kini andam nga maggamit sa daghang mga miyembro sa Simbahan, aduna pay mga dapit sa kalibutan diin ang

mga templo layo kaayo sa atong mga miyembro nga sila dili maka-bayad sa biyahe aron makaadto. Sa ingon sila dili makaambit sa sagrado ug mahangturong mga panalangin nga ihatag sa templo. Sa pagtabang niini, kita adunay gitawag og General Temple Patron Assistance Fund [Kinatibuk-ang Pundo nga Tabang sa Patron sa Templo]. Kini nga pundo naghatag og usa ka higayong pagbisita sa templo niadtong kinsa dili makaadto sa templo ug gani naghandum og maayo niana nga oportunidad. Si bisan kinsang ganahan nga mohatag niini nga pundo makasulat lamang diha sa impormasyon sa naandang contribution slip nga ihatag sa bishop kada bulan.

Karon, mga kaigsoonan, akong pag-ampo nga unta mapuno kita sa Espiritu sa Ginoo samtang naminaw kita sa mga mensahe karon ug ugma ug makakat-on niadtong mga butang nga buot sa Ginoo nga atong mahiba-loan. Kini akong pag-ampo sa pangalan ni Jesukristo, amen. ■



Ni Elder Richard G. Scott

Sa Korum sa Napulog Duha ka mga Apostoles

Ang Gahum sa Kasulatan

Ang mga kasulatan susama sa gagmayng kahayag nga modan-ag sa atong hunahuna ug mohatag og giya ug inspirasyon gikan sa kahitas-an.

Kadtong mobarug dinhi sa pulpito inig komperensya mobati sa gahum sa inyong mga pag-ampo. Nagkinahanglan mi niini, ug kami nagpasalamat kaninyo alang niini.

Ang atong Amahan sa Langit nakasabut nga aron kita makahimo sa gitinguha nga kalamboan sa atong mortal nga pagsulay, kita kinahanglan nga moatubang sa lisud nga mga hagit. Ang uban niini ingon og malisud kaayo. Mihatag Siya og mga himan sa pagtabang nato nga magmalampuson sa mortal nga pagsulay. Usa ka set niini nga himan mao ang mga kasulatan.

Sa katuigan, ang Amahan sa Langit midasig og pinili nga mga lalaki ug babaye sa pagpangita og solusyon, pinaagi sa giya sa Espiritu Santo, sa makapalibug kaayong mga problema sa kinabuhi. Iyang gidasig kadtong awtorisado nga mga sinugo sa pagrekord sa solusyon isip matang sa handbook alang sa Iyang mga anak nga may hugot nga pagtuo sa Iyang plano sa kalipay ug sa Iyang Hinigugmang Anak, si Jesukristo. Andam na natong magamit kini nga giya pinaagi sa bahandi nga atong gitawag og sumbanan nga mga basahon—nga

mao, ang Daan ug Bag-ong Tugon, ang Basahon ni Mormon, ang Doktrina ug mga Pakigsaad, ug ang Perlas nga Labing Bililhon.

Tungod kay ang mga kasulatan namugna man gikan sa dinasig nga mga komunikasyon pinaagi sa Espiritu Santo, lunsay kini nga mga kamatuoran. Dili kinahanglan nga mabalaka kita sa kabalido sa mga konsepto nga anaa sa sumbanang mga basahon tungod kay ang Espiritu Santo mao man ang instrumento nga miaghat ug midasig niadtong mga indibidwal nga mirekord sa mga kasulatan.

Ang mga kasulatan susama sa gagmayng kahayag nga modan-ag sa atong hunahuna ug mohatag og giya ug inspirasyon gikan sa kahitas-an. Mahimo kining yawe sa pag-abli sa dalan sa komunikasyon uban sa atong Amahan sa Langit ug sa Iyang Hini-gugmang Anak, si Jesukristo.

Ang mga kasulatan naghatag og kalig-on sa awtoridad sa atong pamahayag kon tukma ang pagkagamit niini. Mahimo kining matuod nga mga higala nga magamit sa bisan unsa o bisan asa. Anaa kini kanunay kon gikinahanglan. Ang paggamit

niini nagsangkap og pundasyon sa kamatuoran nga ikapasabut pinaagi sa Espiritu Santo. Ang pagkat-on, pagpamalandong, pagsiksik, ug pag-memorya sa kasulatan sama ra sa pagdugang og mga higala, mga hiyas, ug mga kamatuoran nga masaligan bisan kanus-a, bisan asa sa kalibutan.

Talagsaong gahum moabut gikan sa pagmemorya og mga kasulatan. Ang pagmemorya og kasulatan mao ang paghulma og bag-ong pakighigala. Sama sa pagdiskobre og bag-ong tawo nga makatabang panahon sa panginahanglan, makahatag og inspirasyon ug kahupayan, ug mahimong tinubdan sa kadasig sa gikinahanglan nga kausaban. Sama pananglit, ang pasalig sa pagmemorya niini nga salmo para nako nahimong tinubdan sa gahum ug panabut:

“Iya sa Ginoo ang yuta, ug ang pagkapuno niana; ang kalibutan, ug sila nga mga nanagpuyo niini.

“Kay siya ang nagtukod niana sa ibabaw sa kadagatan, ug gipalig-on niya sa ibabaw sa katubigan.

“Kinsa ang mosaka ngadto sa bungtod sa Ginoo? O kinsa ba ang motin-dog sa iyang dapit nga balaan?

“Siya nga malinis og mga kamot, ug may usa ka putli nga kasingkasing; siya nga wala magbayaw sa iyang kalag ngadto sa kabakakan, ug wala makapanumpa sa malimbongon.

“Siya magadawat og panalangin gikan sa Ginoo, ug pagkamatarung gikan sa Dios sa iyang kaluwasan” (Mga Salmo 24:1–5).

Ang pagpamalandong sa kasulatan nga sama niana makahatag og talagsaong direksyon sa kinabuhi. Ang mga kasulatan makapalig-on nga pundasyon. Makahatag kini og lapad nga tinubdan sa andam nga mga higala nga makatabang kanato. Ang namemorya nga kasulatan mao ang higalang molahutay nga dili magkahuyang sa paglabay sa panahon.

Ang pagpamalandong sa usa ka tudling sa kasulatan mahimong yawe nga makaabli sa pagpadayag ug giya ug inspirasyon sa Espiritu Santo. Ang kasulatan makahupay sa nahasol nga kalag, makahatag og kalinaw, pag-laum, ug pagpahiuli sa pagsalig sa



abilidad sa usa ka tawo sa pagbuntog sa mga hagit sa kinabuhi. Kini dunay kusog nga gahum nga moayo sa emosyonal nga mga hagit kon dunay hugot nga pagtuo sa Manluluwas. Makapadali kini sa pisikal nga pagkaayo.

Ang mga kasulatan makahatag og lain-lain pagpasabut sa managlahing panahon sa atong kinabuhi, sumala sa atong panginahanglan. Ang kasulatan nga kadaghan na natong nabasa makahatag og bag-ong kahulugan nga makapalagsik ug puno sa panglantaw kon kita mag-atubang og bag-ong hagit sa kinabuhi.

Sa personal nga paagi giunsa ninyo paggamit ang mga kasulatan? Markahan ba ninyo ang inyong kopya? Butangan ba ninyo og mga sulat ang kilid aron makahinumdom sa espirituhanong giya o sa usa ka kasinatian nga nagtudlo kaninyo og lawom nga leksyon? Inyo bang gigamit ang tanang sumbanan nga basahon, lakip ang

Daang Tugon? Nakakaplag ko og bililhong mga kamatuoran sa mga pahina sa Daang Tugon nga importanting mga sagol sa plataporma sa kamatuoran nga naggiya sa akong kinabuhi ug buhat isip kapanguhaan dihang akong gisulayan ang pagpakigbahin sa mensahe sa ebanghelyo ngadto sa uban. Niana nga rason, akong gipangga pagayo ang Daang Tugon. Nakakita ako og bililhong mga alahas sa kamatuoran nga nagkatap sa tanang pahina. Sama pananglit:

“Ug si Samuel miingon, Ang Ginoo may dako bang kalipay sa mga halad nga sinunog ug sa mga halad, maingon sa pagtuman sa tingog sa Ginoo? Ania karon, ang pagsugot labi pang maayo kay sa halad, ug ang pagpamati kay sa tambok sa mga laking karnero” (1 Samuel 15:22).

“Sumalig ka sa Ginoo sa bug-os mong kasingkasing; ug ayaw pagsalig sa imong kaugalingong salabutan.

“Sa tanan nimong mga dalan ilha siya, ug siya magamando sa imong mga alagianan.

“Ayaw pagpakamaalamon sa imong kaugalingong mga mata: kahadlokan mo ang Ginoo, ug pahalayo gikan sa dautan. . . .

“Anak ko, ayaw pagtamaya ang pagkastigo sa Ginoo; ni magsubo ka sa iyang pagbadlong:

“Kay kinsa kadto nga gihigugma sa Ginoo iyang ginabadlong; maingon sa usa ka amahan sa anak nga iyang gikahimut-an.

“Malipayon ang tawo nga makakaplag sa kaalam, ug ang tawo nga makakab-ot sa pagsabut” (Mga Proverbio 3:5–7, 11–13).

Ang Bag-ong Tugon usa usab ka tinubdan sa bililhong kamatuoran:

“Si Jesus miingon ngadto kaniya, Higugmaa ang Ginoo nga imong Dios sa tibuok mong kasingkasing, ug sa tibuok mong kalag, ug sa tibuok mong salabutan.

“Mao kana ang dako ug unang sugo.

“Ug ang ikaduha sulosama ra nga mao kini, Higugmaa ang imong sili-angan sama sa imong kaugalingon.

“Niining duha ka mga sugo nagasukad ang tibuok nga kasuguan ug ang mga propeta” (Mateo 22:37–40).

“Ug ang Ginoo miingon, Simon, Simon, tan-awa, gipangayo kamo ni Satanas, sa pagbaton kaninyo, aron iya kamong alig-igon ingon sa trigo:

“Apan nangamuyo ako alang kanimo, nga unta dili makabsan ang imong pagsalig; ug sa mahibalik na ikaw kanako, lig-ona ang imong mga igsoon.

“Ug si Pedro miingon kaniya, Ginoo, andam ako sa pag-unong kanimo, sa bilangggoan, ug sa kamatayon.

“Si Jesus mitubag kaniya, sultihan ko ikaw, Pedro, nga karong adlaw ang manok dili motugaok, hangtud ikalimod mo sa makatulo ang imong pagpakaila kanako. . . .

“Unya dihay usa ka babayeng sulogoon nga nakakita kaniya sa naglingkod siya nga nahayagan sa kalayo, ug samtang nagtutok siya kaniya, miingon, Kining tawhana usab uban kaniya.

“Apan kini gipanghimakak niya, nga nag-ingon, Babaye, wala ako ma-kaila kaniya.

“Taudtaud dihay lain nga nakakita kaniya, ug miingon, Ikaw usab kauban nila. Apan si Pedro mitubag, Oy tawo, dili baya ako.

“Ug sa paglabay sa may usa ka takna diha nay lain usab nga nanghi-matuod sa hilabihan, nga nag-ingon, Sa pagkatinuod kining tawhana usab uban kaniya: kay Galileanhon man siya.

“Apan si Pedro mitubag, Tawo, am-bot kon unsa kanang imong giingon. Ug dihadiha, samtang nagsulti pa siya, mitugaok ang manok.

“Ug ang Ginoo milingi, ug mitutok kang Pedro. Ug si Pedro nahinumdom sa pulong sa Ginoo, sa iyang pag-ingon kaniya, Sa dili pa motugaok ang manok, igalimod mo ako sa makatulo.

“Ug siya miguwa, ug mihilak sa hilabihang kasakit” (Lucas 22:31–34, 56–62).

Nasakitan ko pag-ayo sa gibuhay ni Pedro niadto nga okasyon.

Kini nga kasulatan gikan sa Dok-trina ug mga Pakigsaad mipanalangin gayud sa akong kinabuhi: “Ayaw pagtinguha sa pagpahayag sa akong pulong, apan unaha ang pagbaton sa akong pulong, ug unya ang imong dila makasulti; unya, kon ikaw mag-tinguha, ikaw makabaton sa akong Espiritu ug sa akong pulong, oo, ang gahum sa Dios ngadto sa pagkabig sa mga tawo” (D&P 11:21).

Sa akong panghukom, ang Basahon ni Mormon nagtudlo sa kamatuoran uban sa lahi nga katin-aw ug gahum. Sama pananglit:

“Ug karon ako manghinaut nga kamo magpaubos, ug magmasinug-tanon ug magmalumo; sayon nga hangyoon; puno sa pailub ug mai-nantuson; mapugnganon sa tanan nga mga butang; makugihon sa paghupot sa mga sugo sa Dios sa tanan nga mga panahon; mangayo alang sa bisan unsa nga mga butang nga kamo nag-kinahanglan, sa espirituhanon ug sa temporal; kanunay nga magpasalamat ngadto sa Dios alang sa bisan unsa nga mga butang nga kamo midawat.

“Ug tan-awa nga kamo adunay

hugot nga pagtuo, paglaum, ug gugma nga putli, ug unya kamo kanu-nay puno sa maayo nga mga buhat” (Alma 7:23–24).

Ug lain pa:

“Ug ang gugma nga putli mainantu-son, ug mabination, ug dili masinahon, dili manghambog, dili mangita alang sa iyang kaugalingon, dili dali nga masuko, dili maghunahuna sa dautan, ug dili maglipay diha sa pagkadautan apan maglipay diha sa kamatuoran, mainantuson sa tanan nga mga butang, matuohon sa tanan nga mga butang, molaum sa tanan nga mga butang, ug molahutay sa tanan nga mga butang.

“Busa, akong hinigugma nga mga kaigsoonan, kon kamo walay gugma nga putli, kamo walay kapuslanan, kay ang gugma nga putli dili mopakyas. Busa, unong ngadto sa gugma nga putli, nga mao ang labing mahinung-danon sa tanan, kay ang tanan nga mga butang gayud mapakyas—

“Apan ang gugma nga putli mao ang tiunay nga gugma ni Kristo, ug kini molahutay sa kahangturan; ug bi-san kinsa nga makaplagnan nga aduna niini sa katapusan nga adlaw, kini makaayo uban kaniya.

“Busa, akong hinigugma nga mga kaigsoonan, pag-ampo ngadto sa Ama-han uban sa tibuok kusog sa kasingka-sing, nga kamo unta mapuno niini nga gugma, diin siya mitugyan diha sa ta-nan kinsa tinuod nga mga sumusunod sa iyang Anak, nga si Jesukristo; aron mahimo kamo nga mga anak sa Dios; nga kon siya moabut kita mahisama kaniya, kay kita makakita kaniya nga mao gihapon; nga kita mahimo nga makabaton niini nga paglaum; aron mahimo kita nga putli ingon nga siya putli” (Moroni 7:45–48).

Ang akong pinalanggang asawa, si Jeanene, ganahan kaayo sa Basahon ni Mormon. Sa iyang kabatan-on, isip tin-edyer, nahimo kining pundasyon sa iyang kinabuhi. Kadto mao ang pagpanudlo sa iyang pagpamatuod ug pagpanudlo atol sa iyang full-time nga pagserbisyo og misyon sa amihanang kasadpan sa Estados Unidos. Sa di-hang kami miserbisyo og misyon didto sa Cordoba, Argentina, kusganon si-yang miawhag sa paggamit sa Basahon

ni Mormom sa among paningkamot sa pag-proselyte. Si Jeanene nagpama-tuod sayo sa iyang kinabuhi nga kad-tong nagbasa kanunay sa Basahon ni Mormon mapanalanginan og dugang nga porsyon sa Espiritu sa Ginoo, mas dakong tinguha sa pagsunod sa Iyang mga sugo, ug lig-ong pagpamatuod sa kabalaan sa Anak sa Dios.¹ Kay ako wala masayud kon pila ka tuig, samtang nagkaduol ang katapusan sa tuig, siya akong makita nga hilom nga naglingkod, mainampingong mihuman sa tibuok Basahon ni Mormon usa pa ka higayon sa dili pa matapos ang tuig.

Niadto 1991 gusto kong mohatag og espesyal nga gasa sa Pasko sa akong pamilya. Sa pagrekord sa katumanan niana nga tinguha, naka-sulat sa akong personal nga journal: “Alas 12:38 sa kaadlawon, Miyerkules, Disyembre 18, 1991. Bag-o lang kong nahuman sa akong audio recording sa Basahon ni Mormon alang sa akong pamilya. Usa kini ka kasinatian nga nakadugang sa akong pagpamatuod niining balaan nga buhat ug milig-on sa akong tinguha nga mas mapamilyar sa mga pahina niini aron makakat-on gikan niini nga mga kamatuoran sa kasulatan nga gamiton sa akong pagserbisyo sa Ginoo. Ganahan kaayo ko ini nga basahon. Akong ipamatuod uban sa akong kalag nga kini tinuod, nga kini giandam alang sa pagpana-langin sa Balay sa Israel, ug sa tanan nga lain-laing mga bahin nga nagka-tag sa tibuok kalibutan. Ang tanan nga magtuon sa mensahe uban sa pagpaubos, sa hugot nga pagtuo nga magatuo kang Jesukristo, masayud sa katinuod niini ug makakaplag og bahandi nga maghatag kanila og da-kong kalipay, kalinaw, ug kalampusan niining kinabuhia. Akong ipamatuod ngs sagrado kini kaayo, nga kini nga basahon tinuod.”

Unta ang matag usa kanato maka-dawat mismo sa daghang mga pana-langin gikan sa pagtuon sa kasulatan, ako nag-ampo, sa pangalan ni Jesu-kristo, amen. ■

MUBO NGA SULAT

1. Tan-awa sa Gordon B. Hinckley, “A Testimony Vibrant and True,” *Liahona*, Ago. 2005, 6.



Ni Barbara Thompson

Ikaduhang Magtatambag sa Kinatibuk-ang
Kapangulohan sa Relief Society

Personal nga Pagpadayag ug Pagpamatuod

Kon kita matinud-anong mosunod sa mga sugo ug mangayo diha sa hugot nga pagtuo, ang mga tubag moabut sa kaugalingong paagi sa Ginoo ug sa Iyang panahon.

Daghang tuig na ang milabay niadtong estudyante pa ko sa kolehiyo, naminaw ko sa kinatibuk-ang komperensya sa radyo tungod kay kami walay TV sa among gamay nga apartment. Ang mga mamumulong sa komperensya nindot kaayo, ug ako nalipay sa kusog nga pagbati gikan sa Espiritu Santo.

Akong nahinumduman ang usa ka General Authority nga namulong mahitungod sa Manluluwas ug sa Iyang pangalagad ug unya kinasingkasing nga mipamatuod, ang Espiritu Santo mipamatuod ngari sa akong kalag nga iyang gisulti ang kamatuoran. Niana nga higayon ako walay pagduda nga ang Manluluwas buhi. Wala usab akong pagduda nga ako nakasinati og personal nga pagpadayag nga mipamatuod ngari nako “nga si Jesukristo mao ang Anak sa Dios.”¹

Otso anyos ko sa dihang gibunyagan ug gikumpirmahan ug gidawat ang gasa sa Espiritu Santo. Kini usa ka nindot kaayo nga panalangin

apan kini nagkaimportante samtang nagkadako ko ug nasinati ang gasa sa Espiritu Santo sa daghang mga paagi sukad niadtong.

Kasagaran samtang kita nagtubo gikan sa pagkabata ngadto sa pagkahingkod ug ngadto sa pagkahamtong, kita dunay mga hagit ug kasinatiang maagian diin maoy hinungdan nga atong masayran nga kita nagkinahanglan sa balaang panabang pinaagi sa Balaang Espiritu. Kon moabut ang mga kalisdanan, kita makapangutana sa atong kaugalingon, “Unsa ang tubag sa akong problema?” ug “Unsaon nako pagkahibalo kon unsay buhaton?”

Kanunay nakong mahinumduman ang asoy sa Basahon ni Mormon mahitungod ni Lehi nga nagtudlo sa iyang pamilya sa ebanghelyo. Siya mipakigbahin uban kanila og daghang mga pagpadayag ug mga pagtulun-an sa mga butang nga mahitabo sa ulahing mga adlaw. Si Nephi nangayo sa giya sa Ginoo aron makasabut sa hingpit

sa mga pagtulun-an sa iyang amahan. Siya nabayaw, napanalanginan, ug nadasig nga iyang nasayran nga ang mga pagtulun-an sa iyang amahan tinuod. Kana nakahimo ni Nephi sa pagsunod gayud sa mga sugo sa Ginoo ug sa pagpuyo og matarung nga kinabuhi. Nadawat niya ang personal nga pagpadayag aron makagiya kaniya.

Sa laing bahin, ang iyang mga kaigsoonan naglantugi sa usag usa tungod kay wala nila masabti ang mga pagtulun-an sa ilang amahan. Niana si Nephi nangutana og importante kaayo nga pangutana: “Nangutana na ba kamo sa Ginoo?”²

Ang ilang tubag huyang: “Kami wala; kay ang Ginoo wala magtug-an sa ingon nga butang nga mahibaloan ngari kanamo.”³

Gipahimudsan ni Nephi ang higayon sa pagtudlo sa iyang mga igsoon kon unsaon pagdawat og personal nga pagpadayag. Miingon siya: “Wala ba kamo mahinumdom sa mga butang diin gisulti sa Ginoo?—Kon dili kamo mopatig-a sa inyong mga kasingkasing, ug mangayo kanako pinaagi sa hugot nga pagtuo, motuo nga kamo makadawat, uban sa kakugi sa paghupot sa akong mga sugo, sa pagkatinuod kini nga mga butang ipahibalo nganha kaninyo.”⁴

Ang paagi sa pagdawat og personal nga pagpadayag sa tinuod tataw. Kinahanglan natong tinguhaon ang pagdawat og pagpadayag, dili kita magpatig-a sa atong mga kasingkasing, ug dayon mangayo kita pinaagi sa hugot nga pagtuo, tinuod nga motuo nga atong madawat ang tubag, ug dayon matinud-anong mosunod sa mga sugo sa Dios.

Ang pagsunod niini nga sumbanan wala magpasabut nga sa matag higayon nga kita mangutana sa Dios, ang tubag moabut dayon uban sa tanang detalye kon unsa ang buhaton. Hinoon, kini nagpasabut nga kon kita matinud-anong mosunod sa mga sugo ug mangayo diha sa hugot nga pagtuo, ang mga tubag moabut sa kaugalingong paagi sa Ginoo ug sa Iyang panahon.

Sa bata pa ko nagtuo ko nga ang personal nga pagpadayag o mga

tubag sa mga pag-ampo moabut ingon og madungog nga tingog. Sa tinuod, ang pipila ka mga pagpadayag moabut pinaagi sa pagkadungog sa aktwal nga tingog. Apan, akong nakat-unan nga ang Espiritu nagsulti sa daghang mga paagi.

Sa Doktrina ug Mga Pakigsaad, seksyon 6, nagpasabut sa daghang mga paagi nga kita makadawat og pagpadayag:

“Ikaw nagpakisayud kanako, ug tan-awa, sa makadaghan nga ikaw nagpakisayud ikaw nakadawat og panudlo sa akong Espiritu.”⁵

“Ako milamdag sa imong panumduman.”⁶

“Wala ba Ako magsulti og kalinaw nganha sa imong hunahuna mahitungod niini nga butang?”⁷

Sa ubang mga kasulatan daghan pa ang atong nakat-unan mahitungod sa pagdawat og pagpadayag:

“Ako mosulti kanimo diha sa imong hunahuna ug sa imong kasingkasing, pinaagi sa Espiritu Santo, nga moabut diha kanimo ug nga mopuyo diha sa imong kasingkasing. Karon, tan-awa, kini mao ang espiritu sa pagpadayag.”⁸

“Ako mohimo sa imong dughan nga moinit diha sulod kanimo; busa, imong mabati nga kini husto.”⁹

“Ako mohatag nganha kanimo sa akong Espiritu, nga mohatag og kahayag sa imong hunahuna, nga mopuno sa imong kalag uban sa hingpit nga kalipay.”¹⁰

Sa kasagaran ang personal nga pagpadayag moabut samtang kita nagtuon sa mga kasulatan, naminaw ug nagsunod sa tambag sa mga propeta ug sa ubang mga lider sa Simbahan, ug naninguha sa pagpuyo og matitud-anon, matarung nga mga kinabuhi. Usahay ang inspirasyon moabut gikan sa usa ka bersikulo sa kasulatan o gikan sa usa ka linya sa pakigpulong sa komperensya. Tingali ang inyong tubag moabut kon ang mga bata sa Primary nagkanta og maanindot nga awit. Kining tanan mga matang sa pagpadayag.

Sa unang mga adlaw sa Pagpahiuli, daghang mga miyembro ang maku-gihong nangayo og pagpadayag ug napanalanginan ug nadasig sa pagkahibalo kon unsay buhaton.



Si Sister Eliza R. Snow gihatagan og responsibilidad sa propeta nga si Brigham Young sa pagtabang og awhag ug pagtudlo sa mga sister sa Simbahan. Siya “mitudlo nga ang tinagsa nga mga babaye makadawat og inspirasyon aron mogiya kanila sa personal nilang kinabuhi, sa ilang mga pamilya, ug sa ilang mga responsibilidad sa Simbahan. Siya miingon: ‘Sultihi ang mga sister sa pag-adto ug sa pagbuhat sa ilang mga katungdanan, diha sa pagpaubos ug kamatinud-anon ug ang Espiritu sa Dios maanaa kanila ug sila panalanginan sa ilang mga paghago. Papangitaa sila og kaalam imbis gahum ug makaangkon sila sa tanang gahum sa kaalam nga anaa kanila nga ilang magamit.’”¹¹

Gitudloan ni Sister Snow ang mga sister sa pagtinguha og giya gikan sa Espiritu Santo. “Miingon siya nga ang Espiritu Santo ‘nagtagbaw ug mopuno sa matag pangandoy sa tawhanong kasingkasing, ug mopuno sa tanang kahaw-ang. Kon ako mapuno sa Espiritu, . . . ang akong kalag matagbaw.’”¹²

Si Presidente Dieter F. Uchtdorf mitudlo nga ang “pagpadayag ug pagpamatuod dili kanunay moabut uban sa dakong gahum. Alang sa kadaghanan, ang pagpamatuod moabut sa hinay-hinay—ginagmay kada higayon.” Mipadayon siya sa pag-ingon: “Matinguhaon kita nga mangita sa kahayag sa personal nga inspirasyon. Mangamuyo kita sa Ginoo sa pagtuga sa atong hunahuna ug kalag sa kidlap sa pagtuo nga makahimo kanato sa pagdawat ug pag-ila sa balaanon nga

pagpangalagad sa Balaang Espiritu.”¹³

Ang atong mga pagpamatuod makalig-on kanato samtang nag-atubang kita sa mga hagit matag adlaw sa atong kinabuhi. Ubang mga tawo nakigbisog sa malisud nga mga problema sa panglawas; ang uban nagsinatig og pinansyal nga mga problema; ang uban adunay mga hagit sa ilang kaminyoon o sa ilang mga anak; ang uban nag-antus sa kamingaw o wala makab-ot nga mga pangandoy ug damgo. Ang atong pagpamatuod, uban sa atong hugot nga pagtuo ni Gi-noong Jesukrito ug sa atong kahibalo sa plano sa kaluwasan, nga nagtabang nga atong malampasan kining mga panahon sa pagsulay ug kalisud.

Diha sa basahon nga *Anak nga mga Babaye sa Akong Gingharian*, kita makabasa kabahin ni Sister Hedwig Biereichel, usa ka babaye sa Germany kinsa nag-antus og tumang kaguol ug kawad-on atol sa Ikaduhang Gubat sa Kalibutan. Tungod sa iyang gugma ug manggihatagon nga kinaiya, ug bisan sa iyang kagalingong dako nga panginahanglan, siya andam nga mipakigbahin sa iyang pagkaon uban sa gigutom nga binilanggo sa gubat. Sa wala madugay, dihang gipangutana kon giunsa niya sa “paghupot sa pagpamatuod panahon [niadto] nga mga pagsulay,” siya mitubag, “Wala ako maghupot og pagpamatuod latas niadto nga mga panahon—ang pagpamatuod ang naghupot kanako.”¹⁴

Tungod kay kita adunay lig-on nga pagpamatuod wala magpasabut nga kanunay kining ingon niana. Kinahanglan nga atong amumohon ug lig-unon kini aron kini adunay igong gahum sa pagsangga kanato. Kana usa ka katarungan kon ngano nga kita “nagtigum kanunay”—aron kita makaambit sa sakrament, makabag-o sa atong mga pakigsaad, ug “maamumahan pinaagi sa maayo nga pulong sa Dios.” Ang maayong pulong sa Dios mao ang naghupot kanato “sa kanunay nga mabinantayon ngadto sa pag-ampo, mosalig lamang diha sa mga maayo nga buhat ni Kristo, kinsa mao [ang] tigpasiugda ug ang tighingpit sa [atong] hugot nga pagtuo.”¹⁵

Si Elder David A. Bednar mitudlo kanato: “Samtang kamo sa husto nagsiksik ug naggamit sa espiritu sa pagpadayag, nagsaad ako nga kamo ‘magsunod diha sa kahayag sa Ginoo’ (Isaias 2:5; 2 Nephi 12:5). Usahay ang espiritu sa pagpadayag molihok diha-diha dayon ug sa hilabihan, sa uban nga mga panahon sa hinay ug inanay, ug sa kasagaran sa malumo nga kamo mahimo nga dili gani makamatikod niini. Apan sa walay pagsapayan sa sumbanan diin kini nga panalangin nadawat, ang kahayag nga gihatag niini mosanag ug mopatubo sa inyong kalag, molamdag sa inyong salabutan (tan-awa sa Alma 5:7; 32:28), ug motudlo ug mopanalipod kaninyo ug sa inyong pamilya.¹⁶

Ang Ginoo nagtinguha sa pagpanalangin kanato og paggiya, kaalam, ug direksyon sa atong mga kinabuhi. Siya nagtinguha sa pagbu-bu sa Iyang Espiritu ngari kanato. Usab, alang sa personal nga pagpadayag kinahanglang magtinguha ta sa pagdawat niini, dili kita magpagahi sa atong mga kasingkasing, ug mangayo kita sa hugot nga pagtuo, sa tinuoray nagtuo nga kita makadawat og tubag, ug dayon makugihong magsunod sa mga sugo sa Dios. Dayon samtang kita mangita sa mga tubag sa atong mga pangutana, mopanalangin Siya kanato uban sa Iyang espiritu. Kalabut niini ako mopamatuod diha sa pangalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 46:13.
2. 1 Nephi 15:8.
3. 1 Nephi 15:9.
4. 1 Nephi 15:11; tan-awa usab sa bersikulo 10.
5. Doktrina ug mga Pakigsaad 6:14.
6. Doktrina ug mga Pakigsaad 6:15.
7. Doktrina ug mga Pakigsaad 6:23.
8. Doktrina ug mga Pakigsaad 8:2-3.
9. Doktrina ug mga Pakigsaad 9:8.
10. Doktrina ug mga Pakigsaad 11:13.
11. *Anak nga mga Babaye sa Akong Ginghamarian: Ang Kasaysayan ug Buhat sa Relief Society* (2011), 54.
12. *Anak nga mga Babaye sa Akong Ginghamarian*, 55.
13. Dieter F. Uchtdorf, “Inyong Potensyal, Inyong Pribilehiyo,” *Liahona*, Mayo 2011, 60.
14. Tan-awa sa *Anak nga mga Babaye sa Akong Ginghamarian*, 94.
15. Moroni 6:4-6.
16. David A. Bednar, “Ang Espiritu sa Pagpadayag,” *Liahona*, Mayo 2011, 90.



Ni Elder L. Whitney Clayton
Sa Kapangulohan sa Seventy

Ang Panahon Moabut

Uban ninyo, nagbarug ko sa katingala niini nga buhat nga nag-uswag sa milagroso, kahibulungan, ug sa dili mapugngan nga paagi.

Miserbisyo ako isip usa ka batan-ong misyonaryo nga pipila ka bulan sa sentral nga mga dapit sa Lima, Peru. Agig resulta, akong gitabok ang Plaza de Armas sa Lima sa makadaghan. Ang Government Palace, ang opisyal nga pinuyanan ug opisina sa presidente sa Peru, nag-atubang sa plasa. Ang akong mga kompanyon ug ako miimbitar og mga tawo sa plasa, sa pagpamati sa gipahiuli nga ebanghelyo. Kanunay kong naghunahuna kon sama sa unsa kaha ang pagsulod sa palasyo, apan ang hunahuna sa pagbuhat niana ingon og dili gayud mahitabo.

Sa miaging tuig, si Elder D. Todd Christofferson sa Korum sa Napulog Duha, uban sa pipila, ug ako nakighimamat ni Alan Garcia, ang presidente kaniadto sa Peru, didto sa Government Palace. Gipakita kami sa matahum nga mga lawak niini ug maabiabihong gidawat ni Presidente Garcia. Ang akong kahibulong isip batan-ong misyonaryo mahitungod sa palasyo natubag sa paagi nga wala gayud damha nga posible niadtong 1970.

Ang mga butang nausab didto sa Peru sukad sa akong pagkamisyonaryo, ilabi na alang sa Simbahan. Dihay mga 11,000 ka mga miyembro sa Simbahan kaniadto ug usa lamang

ka stake. Karon adunay labaw pa sa 500,000 ka mga miyembro ug hapit 100 ka mga stake. Sa mga lungsod diin dihay gagmay lamang nga mga grupo sa mga miyembro, aktibong mga stake ug nindot nga mga meetinghouse karon nagpanindot sa yuta. Sama nga mga butang ang nahitabo sa daghang mga nasud sa tibuok kalibutan.

Kining talagsaong pagtubo sa Simbahan angay og katin-awan. Atong sugdan uban sa panagna sa Daang Tugon.

Si Daniel usa ka Hebreohanong ulipon sa Babelonia. Gihatagan siya og oportunidad sa paghubad sa damgo ni Hari Nabucodonosor. Mihangyo si Daniel sa Dios sa pagpadayag kaniya sa damgo ug ang hubad niini, ug ang iyang pag-ampo gitubag. Gisultihan niya si Nabucodonosor, “Adunay usa ka Dios sa langit nga mopadayag sa mga tinago, ug siya nagpahibalo kang hari Nabucodonosor sa mga butang manghitabo sa ulahing mga adlaw. . . . Ang mga panan-awon sa imong ulo sa ibabaw sa imong higdaanan, mao kini.” Miingon si Daniel nga ang hari nakakita og makalilisang nga imahe nga dunay ulo, torso, mga bukton, mga bitiis, ug mga tiil. Usa ka bato gisapsap gikan sa bukid nga walay mga kamot ug inanay nga nagtubo ang gidak-on. Ang bato minglapdos



- ang Simbahan molukop sa Amerika ug molukop sa kalibutan

tingali ingon og kataw-anan mga 170 na ka tuig ang milabay. Ang gamay nga pundok sa mga tumutuo, nanginabuhi sa walay nagpuyo nga yuta sa Amerika ug namalhin sa pag-eskapo sa pagpanggukod ingon og dili pundasyon sa hugot nga pagtuo nga molatas sa internasyonal nga mga utlanan ug motuhop sa mga kasingkasing sa tanang dapit.

Apan kana mao gyud ang nahitabo. Tuguti ko sa paghatag og ehemplo.

Sa Adlaw sa Pasko 1925 sa Buenos Aires, si Elder Melvin J. Ballard mipahinungod sa tibuok kontinente sa Habagatang Amerika alang sa pagsangyaw sa ebanghelyo. Pagka Agosto 1926 pipila ka mga kinabig nabunyagan. Sila ang unang mga miyembro sa Ang Simbahan ni Jesukristo sa mga Santos sa Ulahing mga Adlaw nga nabunyagan sa tanang Habagatang Amerika. Kadto 85 ka tuig na ang milabay, mahimong buhi pa ang kadaghanan kanila nga naminaw sa komperensya karon.

Adunay 23 ka mga stake sa Zion sa Buenos Aires karon, uban sa dinose-nang mga stake ug napulo ka liboang mga miyembro sa Simbahan diha sa mga siyudad ug mga lungsod sa tibuok Argentina. Karon adunay labaw sa 600 ka mga stake ug minilyon nga mga miyembro sa Simbahan sa tibuok Habagatang Amerika. Samtang kita nagtan-aw, ang gingharian sa

sa larawan, nagdugmok niini, “ug ang bato nga naglapdos sa larawan nahimong usa ka dakong bukid, ug gipuno niini ang tibuok kalibutan.”

Mipasabut si Daniel nga ang larawan nagrepresentar sa umaabut nga politikal nga mga gingharian ug “sa mga adlaw nianang [kadtong umaabut] mga haria, ang Dios sa langit magatukod og usa ka gingharian, nga dili gayud malumpag: . . . apan kini magadugmok” ug magaut-ut niining tanan nga mga gingharian. “Ug kini molungtad sa walay katapusan.”¹

Moadto kita karon sa mas bag-ong mga panahon. Si anghel Moroni unang mipakita ni Joseph Smith niadtong 1823 ug misulti niya “nga ang Dios adunay ipabuhat [kaniya]; ug nga ang [iyang] ngalan pagagamiton alang sa maayo ug sa dautan diha sa tanan nga mga kanasuran, mga kaliwatan, ug mga pinulongan.”² Ang mensahe ni Moroni tingali nakapahingangha gayud ni Joseph, nga 17 anyos pa lang.

Niadtong 1831, ang Ginoo miingon kang Joseph nga ang mga yawe sa gingharian sa Dios nahimo na usab nga “gitugyan ngadto sa tawo sa yuta.” Misulti siya nga ang “ebanghelyo [mahimong] mokaylap ngadto sa mga kinatumyan sa yuta, ingon sa bato nga gipikas gikan sa bukid nga walay gigamit nga mga kamot . . . , hangtud kini mopuno sa tibuok yuta,”³ sama gyud sa gisulti ni Daniel kang Nabucodonosor.

Niadtong 1898, si Presidente Wilford Woodruff mibalik og istorya sa iyang kasinatian isip bag-ong miyembro sa 1834 sa miting sa priesthood duol sa Kirtland. Siya misaysay: “Ang Propeta mitawag sa tanan nga naghupot sa Priesthood nga magpundok ngadto sa gamay nga eskwelahan nga

kahoy didto. Gamay kini nga balay, tingali mga 14 pye [4.3 m] kwadrado. . . . Sa nagkapundok na kami ang Propeta mitawag sa mga Elder sa Israel . . . sa pagpamatuod niini nga buhat. . . . Sa dihang nahuman na sila ang Propeta miingon, ‘Mga kaigsoonan nalig-on ako pag-ayo ug natudloan sa inyong mga pagpamatuod karong gabhiona, pero gusto kong mosulti ninyo sa atubangan sa Ginoo, nga kamo walay nahibaloan mahitungod sa padulngan niini nga Simbahan ug gingharian kay sa usa ka bata sa sabakan sa iyang inahan. Wala kamo makasabut niini. . . . Gamay ra nga mga Priesthood ang inyong nakita karong gabhiona, pero kini nga Simbahan molukop sa Amihanang ug Habagatang Amerika—molukop kini sa kalibutan.’”⁴

Kini nga panagna nga:

- ang gingharian sa Dios sama sa usa ka bato nga gisapsap gikan sa bukid nga molukop sa kalibutan;
- ang pangalan nga Joseph Smith mailhan sa kalibutan; ug

Montevideo, Uruguay



Dios nagpuno sa kontinente, ug ang pangalang Joseph Smith gimantala pinaagi kanato ug pinaagi sa iyang mga kaaway diha sa mga nasud tingali wala niya madunggi sa panahon sa iyang kinabuhi.

Adunay dul-an sa 3,000 ka mga stake sa Simbahan sa tibuok kalibutan karon, gikan sa Boston ngadto sa Bangkok ug Mexico City ngadto sa Moscow. Kita nagkaduol sa 29,000 ka mga ward ug mga branch. Sa daghang mga nasud adunay dugay na nga mga stake, uban sa mga miyembro kansang mga katigulangan mga kinabig. Sa uban, gagmay nga mga grupo sa bag-ong mga miyembro nagmiting sa gamay nga mga branch sa Simbahan sa inabangan nga balay. Kada tuig ang Simbahan nagkaanam og kadaghan sa tibuok kalibutan.

Kini mga panagna mahitungod sa pagpuno sa kalibutan ug nabantug sa tibuok kalibutan: Dili katuohan? Tingali. Daw dili mahitabo? Sa walay pagduhaduha. Imposible? Sa pagkatinuod dili. Kini nahitabo na nga atong nasaksihan.

Naobserbahan ni Presidente Gordon B. Hinckley:

“Ginaingon nga sa usa ka higayon ang adlaw wala gayud mosalop sa British Empire. Kana nga gingharian nagkagamay na karon. Pero tinuod nga ang adlaw wala gayud mosalop diha sa buhat sa Ginoo ingon nga kini nagtandog sa mga kinabuhi sa mga tawo sa tibuok kalibutan.

“Ug kini mao lang ang sinugdanan. Gamay pa kaayo ang atong natandog sa ibabaw. . . Ang atong buhat walay giilang mga utlanan. . . Kadtong mga nasud nga karon kanato sirado moabut ang panahon nga moabli ra.”⁵

Karon atong makita ang katumanan sa panagna diha sa Basahon ni Mormon nga nagkaduol na:

“Ug . . . mahinabo nga ang mga hari motak-um sa ilang mga ba-ba; kay kana nga wala pa ikasulti ngadto kanila sila makakita; ug kana nga wala nila madungog sila makasabut.

“Kay niana nga adlaw, tungod kanako ang Amahan mobuhat og usa ka buhat, nga mahimo nga usa ka mahinungdanon ug usa ka kahibulungan nga buhat taliwala kanila.”⁶



Salvador, Brazil

Kini nga buhat sa Ginoo mahinungdanon ug kahibulungan, apan kini nagpaingon sa unahan nga sa tinud-anay wala mamatikdi hapit sa daghang politikal, kultura ug edukasyonal nga mga lider sa katawhan. Kini nagpalambo og nagkahiusang kasingkasing ug pamilya sa matag higayon, sa hilum ug sa kaligdong, ang sagra-dong mensahe nagpanalangin sa mga tawo bisan asa.

Usa ka bersikulo diha sa Basahon ni Mormon naghatag og yawe sa milagrosong pagtubo sa Simbahan karon: “Ug dugang pa, ako moingon nganha kaninyo, nga ang panahon moabut diin ang kasayuran sa usa ka Manluluwas mokaylap sa matag nasud, kaliwat, pinulongan, ug mga katawhan.”⁷

Ang atong labing importante nga mensahe, nga kita balaan nga gihatagan og awtoridad ug gisugo sa pagdala bisan asa sa kalibutan, mao nga adunay usa ka Manluluwas. Siya nabuhi sa kinatung-an sa panahon. Siya mitubos sa atong mga sala, gilansang sa krus, ug nabanhaw. Kanang dili hitupngan nga mensahe, nga atong gipahayag uban sa awtoridad sa Dios, mao ang tinuod nga rason sa pagtubo niini nga Simbahan.

Ako mopamatuod nga Siya nagpakita uban sa Iyang Amahan ngadto ni Joseph Smith. Ubos sa direksyon sa Amahan, giestablisar Niya ang Iyang ebanghelyo pag-usab dinhi sa yuta. Mipadala siya og mga apostoles, mga propeta, ug mga yawe sa priesthood nganhi sa yuta pag-usab. Naggiya

Siya sa Iyang Simbahan pinaagi sa usa ka buhing propeta, si Presidente Thomas S. Monson. Ang Iyang Simbahan mao kanang bato nga gisapsap gikan sa bukid nga walay mga kamot nga mopauswag ngadto sa tibuok kalibutan.

Kita mapasalamaton ni Joseph Smith, ug nagtan-aw uban sa kahibulong samtang ang iyang pangalan gitahud ug, oo, gani labaw nga gisaway og maayo sa tibuok kalibutan. Apan atong hingpit nga giila kining gamhanan nga buluhaton sa ulahing mga adlaw dili mahitungod kaniya. Kini mao ang buluhaton sa Makagagahum nga Dios ug sa Iyang Anak, ang Prinsipe sa Kalinaw. Ako mopamatuod nga si Jesukristo mao ang Manluluwas, ug uban ninyo, nagbarug ko sa katingala niini nga buhat nga naguswag sa milagroso, kahibulungan, ug sa dili mapugngan nga paagi. Sa pagkatinuod, “ang panahon moabut diin ang kasayuran sa Manluluwas . . . mokaylap sa matag nasud, kaliwat, pinulongan, ug mga katawhan.” Mopamatuod ako Kaniya, ang Manluluwas sa tanang katawhan, ug niining buhat sa pangalan ni Jesukristo, amen. ■

MUBO NGA MGA SULAT

1. Daniel 2:28, 35, 44; tan-awa usab sa mga bersikulo 1–45.
2. Joseph Smith—Kasaysayan 1:33.
3. Doktrina ug mga Pakigsaad 65:2.
4. *Mga Pagtulun-an sa mga Presidente sa Simbahan*: Wilford Woodruff (2004), 27–28.
5. Gordon B. Hinckley, “Ang Kahimtang sa Simbahan,” *Liahona*, Nob. 2003, 7.
6. 3 Nephi 21:8–9.
7. Mosiah 3:20.



Ni Elder José L. Alonso
Sa Seventy

Pagbuhat sa Sakto nga Butang sa Sakto nga Panahon, sa Walay Paglangan

Ang Manluluwas . . . mihatag nato og talagsaong ehemplo sa dili paghulat sa pagpangalagad niadtong nawad-an og kalipay ug kamaya.

Sa atong panahon daghang tawo ang nagpuyo taliwala sa kaguol ug dakong kalibog. Wala sila makakita og tubag sa ilang mga pangutana ug wala matubag ang ilang mga panginahanglan. Ang pipila nawad-an sa kalipay ug kamaya. Ang mga propeta namahayag nga ang tinuod nga kalipay makita sa pagsunod sa ehemplo ug sa mga pagtulun-an ni Kristo. Siya ang atong Manluluwas, Magtutudlo, ug ang hingpit nga ehemplo.

Ang Iyang kinabuhi mao ang pagserbisyo. Kon kita nagserbisyo sa atong silingan, nagtabang kita sa nanginahanglan. Niining paagiha atong makit-an ang mga solusyon sa atong mga kalisdanan. Samtang kita nagsunod sa Manluluwas, nagpakita kita sa atong gugma sa atong Langitnong Amahan ug sa Iyang Anak, nga si Jesukristo, ug kita mas mahisama Kanila.

Si Haring Benjamin namulong sa

bili sa serbisyo, namulong nga kon kita “anaa sa pag-alagad sa [atong] mga isigkatawo [kita] anaa lamang sa pag-alagad sa [atong] Dios.”¹ Ang tanan adunay mga oportunidad nga moserbisyo ug mopakita og gugma.

Si Presidente Thomas S. Monson mihangyo nato “sa pagluwas” ug pagserbisyo sa uban. Miingon siya: “Kita makakaplag nga kadtong atong giserbisyoan, kinsa mibati sa impluwensya sa Magtutudlo tungod sa atong paghago, ingon og dili makapasabut sa kausaban nga miabut sa ilang kinabuhi. Adunay tinguha sa pag-alagad nga matinud-anon, sa paglakaw nga mapaubsanon, ug sa pagpuyo sama sa Manluluwas. Sa pagkadawat sa ilang espirituhanon nga panabut ug nakakita sa mga saad sa kahangturan, sila mipalanog sa mga pulong sa buta nga tawo nga gipahiuli ni Jesus ang panan-aw, nga miingon,

‘Usa ka butang akong nasayran, nga ako buta, karon ako nakakita.’”²

Matag adlaw kita adunay oportunidad sa pagtabang ug pagserbisyo—pagbuhat sa sakto nga butang, sa sakto nga panahon, sa walay paglangan. Hunahunaa ang daghang tawo nga naglisud nga makatrabaho o nasakit, nag-inusara, nga naghunahuna nga sila nawad-an na gyud sa tanan. Unsay inyong matabang? Hunahunaa ang usa ka silingan, nagpasinguwan kay nagguba ang iyang sakyanan, ngayo sa inyong tabang. Unsay angay itabang kaniya? Kanus-a kini angay buhaton?

Nakahinumdom ko niadtong nangadto mi sa akong pamilya sa downtown sa Siyudad sa Mexico aron mopalit og sinina sa among duha ka anak. Bata pa kaayo to sila. Ang among kinamagulangang anak mga duha pa lang ka tuig, ug ang manghud usa pa ka tuig. Ang kadalanan napuno sa mga tawo. Samtang namalit mi, naggunit sa among mga anak, mihunong mi og kadiyot kay adunay git-an-aw, ug sa wala damha, nawala ang among kinamagulangang anak! Wala mi kabantay, apan wala na siya namo. Sa walay paglangan, gipangita namo siyag maayo. Hilabihan kaming nangita kaniya, ug nabalaka na pag-ayo, basin dili na gyud siya namo makit-an. Sa among hunahuna nangamuyo kami sa Langitnong Amahan sa pagtabang namo nga makit-an siya.

Wala madugay nakit-an ra namo siya. Didto siya, inosenteng nagtan-aw sa mga dulaan sa bintana sa tindahan. Amo siyang gigakos ug gihagkan, ug misaad nga bantayan og maayo ang among mga anak aron dili na gayud to mausab. Among nakat-unan nga sa pagluwas sa among anak nga lalaki, wala kami magkinahanglan og mga miting sa pagplano. Mibuhat lamang kami, sa pagpangita sa nawala. Nakat-unan usab namo nga ang among anak wala gani masayud nga nawala siya.

Mga kaigsoonan, tingali adunay daghan diha nga, sa pipila ka rason, nawala sa atong panan-aw ug wala masayud nga nawala diay sila. Kon kita maglangan, mawala sila kanato sa hangtud.

Sa daghan nga nanginahanglan sa atong tabang, dili kinahanglan nga magmugna og bag-ong mga programa o magbuhat og mga lihok nga komplikado o mahal. Sila nagkinahanglan lang sa atong determinasyon sa pagserbisyo—sa pagbuhat sa sakto nga butang sa sakto nga panahon, sa walay paglangan.

Sa dihang ang Manluluwas mipakita sa mga tawo diha sa Basahon ni Mormon, Siya mihatag nato og talagsa-ong ehemplo sa dili paghulat sa paghupay niadtong nawad-an og kalipay. Sa natudloan na ang katawhan, Iyang nakita nga wala nila masabti ang tanan Niyang mga pulong. Siya midapit kanila sa pagpauli sa ilang balay ug sa pagpamalandong sa mga butang nga Iyang gisulti kanila. Siya miingon kanila sa pag-ampo ngadto sa Amahan ug mangandam sa ilang kaugalingon sa pagbalik inigka-buntag, kon Siya mobalik aron pagtudlo kanila.³

Sa Iyang pagtapos, mitan-aw Siya sa pundok sa katawhan ug nakita nga sila naghilak, kay gusto nila nga Siya magpabilin pa kanila.

“Ug siya miingon ngadto kanila: Tan-awa, ang akong kasingkasing napuno sa kapuangod diha kaninyo.

“Aduna ba kamo dihay mga masakiton? Dad-a sila ngari. Aduna ba kamo dihay mga bakol, o mga buta, o mga pungkol, o mga angol, o mga sanglahon, o mga dili makalihok, o kadto nga mga bungol, o kadto nga gitakbuyan sa tanan nga mga matang sa sakit? Dad-a sila ngari ug Ako moayo kanila, kay Ako adunay kalooy diha kaninyo; ang akong kasingkasing napuno sa kalooy.”⁴

Ug ilang gidala ang ilang mga masakiton ngadto Kaniya, ug Siya miayo kanila. Ang pundok sa katawhan miluhod sa Iyang tiilan ug misimba Kaniya ug mihalok sa Iyang mga tiil, “hangtud nga ang iyang mga tiil naligo sa ilang mga luha.” Dayon Siya misugo kanila nga ang ilang gagmayng mga bata kinahanglang dad-on ngadto Kaniya, ug Siya mipanalangin kanila sa tinagsa-tagsa.⁵ Kana ang panig-ingnan nga gihatag sa Manluluwas kanato. Ang Iyang gugma alang sa tanan, apan Siya wala gayuy nataligam-an.



Nasayud ko nga ang atong Langitnong Amahan mahigugmaon, masinabtanon, ug mapailubon. Ang Iyang Anak, si Jesukristo, nahigugma usab kanato. Sila nagtabang kanato pinaagi sa Ilang mga propeta. Ako nakakat-un nga adunay dakong kaluwasan sa pagsunod sa mga propeta. “Ang pagluwas” nagpadayon pa gihapon. Si Presidente Monson miingon: “Ang Ginoo nagpaabut sa atong paghuna-huna. Siya nagpaabut sa atong paglihok. Siya nagpaabut sa atong mga paghago. Siya nagpaabut sa atong mga pagpamatuod. Siya nagpaabut sa atong debosyon.”⁶

Kita adunay responsibilidad ug talagsaong oportunidad. Adunay daghan nga nanginahanglan nga makasinati pag-usab sa nindot nga mga pagbati sa kalipay ug kamaya pinaagi sa pagkaaktibo sa Simbahan. Kana nga kalipay nagagikan sa pagdawat sa mga ordinansa, paghimo og sagra-dong mga pakigsaad, ug pagtuman niini. Ang Ginoo nagkinahanglan nato sa pagtabang kanila. Buhaton nato ang sakto nga butang sa sakto nga panahon, sa walay paglangan.

Ako mopamatuod nga ang Dios buhi ug mao ang atong Amahan. Si Jesukristo buhi ug mihatag sa Iyang kinabuhi aron kita makabalik sa presensya sa atong Langitnong Amahan. Nasayud ko nga Siya mao ang atong Manluluwas. Nasayud ko nga ang Ilang walay kinutuban nga kalooy padayong gipakita. Ako mosaksi nga si Presidente Thomas S. Monson mao ang Ilang propeta ug kini mao lamang ang tinuod nga Simbahan sa ibabaw sa yuta. Nasayud ko nga si Propeta Joseph Smith mao ang propeta sa Pagpahiuli. Ako mopamatuod nga ang Basahon ni Mormon pulong sa Dios. Naghatag kini kanato sa giya ug mga panig-ingnan nga angayng sundon aron mas mahisama sa Dios ug sa Iyang Pinalangga nga Anak. Ako namahayag sa pangalan sa atong Ginoong Jesukristo, amen. ■

MUBO NGA MGA SULAT

1. Mosiah 2:17.
2. Thomas S. Monson, “To the Rescue,” *Liahona*, Hulyo 2001, 57, 58.
3. Tan-awa sa 3 Nephi 17:1–3.
4. 3 Nephi 17:6–7; tan-awa usab sa bersikulo 5.
5. Tan-awa sa 3 Nephi 17:9–12, 21.
6. Thomas S. Monson, *Liahona*, Hulyo 2001, 58.



Ni Presidente Boyd K. Packer

Presidente sa Korum sa Napulog Duha ka mga Apostoles

Tambag ngadto sa mga Kabatan-onan

Bisan pa man sa pagsupak, pagsulay, ug pagtintal, dili kamo kinahanglang mapakyas o mahadlok.

Mamulong ako sa kabatan-onan sa personal kay sa akong gihimo sa kasagaran, mo-tandi sa akong kabatan-on sa inyong kabatan-on.

Bililhon gyud mo kaayo. Nakakita ko ninyo sa daghan kaayong mga nasud ug sa matag kontinente. Mas maayo pa mo kay kanamo niadtong batan-on pa mi. Mas nasayud pa mo sa ebanghelyo. Mas hingkod pa mo ug mas matinud-anon.

Ako karon 87 anyos na. Tingali maghunahuna mo, nga sa akong pangedaron unsay akong matampo sa inyong kinabuhi. Miagi nako kon asa kamo karon ug nahibalo kon asa kamo paingon. Apan wala pa mo kaabut kon asa ako karon. Mokutlo ko og pipila ka linya sa usa ka walay paglubad nga balak:

Ang tigulang nga uwak nagkaluya na.

Ang batan-ong uwak abtik pa.

Unsay wala pa mahibaloi sa batan-ong uwak

Ang tigulang nga uwak daghan og nasayran.

Sa pagkasayud sa mga butang ang uwak nga tigulang

Mao gihapon ang agalon sa uwak nga batan-on.

Unsay wala pa mahibaloi sa tigulang nga uwak?

—Unsaon paglupad nga paspas.

Ang batan-ong uwak molupad sa taas, sa ubos,

Ug magtuyok-tuyok sa luya nga tigulang nga uwak

Unsay wala mahibaloi sa paspas nga batan-ong uwak?

—Kon asa ang padulngan.¹

Dili sinulat ni Wordsworth apan wala gihapoy paglubad nga balak!

Sa tanang nanghitabo sa kalibutan, sa pagkunuhod sa moral nga mga sumbanan, kamong mga batan-on nagdako sa teritoryo sa kaaway.

Atong nasayran gikan sa mga kasulatan nga may gubat sa langit ug nga si Lucifer nakigbatok ug, uban sa iyang sumusunod, “gitambog ngadto sa yuta.”² Determinado siya sa pagbalda sa plano sa atong Langitnong Aman ug nagtinguha sa pagkontrolar sa mga hunahuna ug lihod sa tanan. Kini nga impluwensya espirituhanon, ug siya “anaa sa tanan nga bahin niini nga yuta.”³

Apan bisan pa man sa pagsupak, pagsulay, ug pagtintal, dili kamo kinahanglang mapakyas o mahadlok.

Dihang 17 anyos pa ko, hapit na mogradwar sa high school nga kasarangan ra kaayo nga estudyante nga may mga kahuyang, sa akong hunahuna, tanan sa among palibut nausab usa ka Dominggo sa buntag niana. Pagkasunod adlaw gipatawag kami ngadto sa high school auditorium. Sa entablado may lingkuranan nga may gamayng radyo. Ang prinsipal mipatingog sa radyo. Amo dayong nadungog ang tingog ni Presidente Franklin Delano Roosevelt samtang iyang gipahibalo nga ang Pearl Harbor gibombahan. Ang Estados Unidos nakiggubat sa Japan.

Wala madugay kana nga talanawon nasubli. Tingog na usab ni Presidente Roosevelt, niining higayuna nagpahibalo nga ang among nasud nakiggubat sa Germany. Ang Ikaduhang Gubat miulbo na sa tibuok kalibutan.

Diha-diha ang among kaugmaon wala nay kasiguroan. Wala kami masayud kon unsay anaa sa umaabut. Mabuhi pa ba kami aron maminyo ug makabaton og pamilya?

Karon adunay “mga gubat ug mga hungihong sa mga gubat, ug ang tibuok yuta [n]agkaguliyang.”⁴ Kamo, among kabatan-onan, mahimong mobati og kawalay kasiguroan ug kawalay seguridad sa inyong kinabuhi. Ganahan kong motambag ug motudlo ug mohatag ninyo og pasidaan sa pipila ka mga butang nga buhaton ug dili angayng buhaton.

Ang plano sa ebanghelyo mao “ang mahinungdanon nga laraw sa kalipay.”⁵ Ang pamilya mao ang sentro niana nga plano. Ang pamilya nagdepende sa takus nga paggamit niadtong mga gahum sa paglalang og kinabuhi nga anaa sa inyong lawas.

Sa “Ang Pamilya: Usa ka Pama-hayag ngadto sa Kalibutan,” usa ka dinasig nga dokumento nga giisyu sa Unang Kapangulohan ug sa Korum sa Napulog Duha ka mga Apostoles, atong nahibaloan nga sa kinabuhi nga wala pa dinhi sa yuta “ang tanan

nga mga tawo—lalaki ug babaye—gilalang diha sa hitsura sa Dios. Ang matag usa hinigugmang espiritu nga anak nga lalaki o babaye sa langitnong mga ginikanan, ug, sa ingon, matag usa adunay mga kinaiya sa pagkadios ug kalagmitan nga mahimong usa ka dios. Ang pagkalalaki ug pagkababaye usa ka mahinungdanon nga kinaiya [ug namugna sa kinabuhi nga wala pa dinhi sa yuta]. . . .

“ . . . Kami sa dugang mopahayag nga ang Dios misugo nga ang sagrado nga mga gahum sa paglalang pagagamiton lamang tali sa lalaki ug babaye, kinsa legal nga naminyo isip bana ug asawa.”⁶

Ang dakong silot nga napahamtang ngadto ni Lucifer ug sa iyang mga sumusunod mao nga sila gihikawan nga makabaton og mortal nga lawas.

Daghan sa mga pagtintal nga inyong sagubangon, sigurado nga mao ang labing grabe, adunay kalabutan sa inyong lawas. Wala lang kamo hatagi og gahum sa paglalang og mga lawas alang sa bag-ong kaliwatan, apan kamo usab adunay kabubut-on.

Si Propeta Joseph Smith nagtudlo, “Ang tanang mga tawo kinsa adunay mga lawas adunay gahum niadtong wala.”⁷ Busa ang matag buhi nga tawo nga may pisikal nga lawas sa tinud-anay may gahum batok sa kaaway. Mag-antus kamo og mga pagtintal tungod sa inyong pisikal nga kahimtang, apan kamo may gahum batok niya ug sa iyang mga anghel.

Sa paggradwar namo sa high school, daghan sa among mga kauban sa klase miadto sa gubat, ang pipila nila wala na gyud makabalik. Ang nahabilin namo sa wala madugay mosulod na sa militar. Wala mi masayud sa among kaugmaon. Makalahutay kaha mi sa gubat? May maabtan pa kaha mi inigbalik namo?

Kay nakasigurado ko nga kuhaon gyud ko sa army, miapil ko sa air force. Wala madugay didto na ko sa Santa Ana, California, alang sa preflight training.

Wala pa koy lig-on nga pagpamatuod nianang higayuna nga ang



ebanghelyo tinuod, apan nasayud ko nga ang akong mga magtutudlo sa seminary, sila ni Abel S. Rich ug John P. Lillywhite, nasayud nga kadto tinuod. Ako silang nadunggan nga mipamatuod, ug mituo ko nila. Naghunahuna ko sa akong kaugalingon, “Magdepende una ko sa ilang mga pagpamatuod hangtud nga makabaton ko og akoa.” Mao gyud to ang akong gibuhat.

Nakadungog ko sa patriyarkal nga mga panalangin apan wala pa makadawat niini. Sa matag stake may giordinahan nga patriyark nga may espiritu sa pagpanagna ug espiritu sa pagpadayag. Awtorisado siya nga mohatag og personal ug pribado nga mga panalangin niadtong moduol kinsa girekomendar sa ilang mga bishop. Misulat ko sa akong bishop alang sa usa ka recommend.

Si J. Roland Sandstrom mao ang naordinahan nga patriyark nga nagpuyo sa Santa Ana Stake. Wala siyay nahibaloan mahitungod nako ug wala pa gyud makakita nako kaniadto, apan gihatagan ko niya sa akong panalangin. Niini ako nakakaplag og mga tubag ug panudlo.

Bisan tuod nga ang patriyarkal nga mga panalangin pribado kaayo, mopakigbahin ko og mubo nga kinutlo gikan sa akong panalangin: “Ikaw pagagiyaan pinaagi sa mga hunghong sa Balaang Espiritu ug ikaw pagapasidan-an sa mga kakuyaw. Kon mopatalinghug ka niining

mga pasidaan, ang atong Langitnong Amahan mopanalangin nimo aron ikaw mahiusa pag-usab sa imong mga minahal sa kinabuhi.”⁸

Kana nga pulong nga *kon*, bisan og gamay ra nga pagkasulat, daw ingon kini ka dako sa tibuok papel. Mapanalanginan ako nga makabalik gikan sa gubat *kon* mosunod ko sa mga sugo ug *kon* mopatalinghug ko sa mga aghat sa Espiritu Santo. Bisan tuod nga kana nga gasa gihatag ngari nako atol sa bunyag, wala pa ko masayud kon unsa ang Espiritu Santo o kon sa unang paagi ang aghat molihok.

Ang gikinahanglan nakong masayran bahin sa mga aghat akong nakita sa Basahon ni Mormon. Akong nabasahan nga ang “mga anghel mamulong pinaagi sa gahum sa Espiritu Santo; busa, sila namulong sa mga pulong ni Kristo. Busa, . . . pagbusog sa mga pulong ni Kristo; kay tan-awa, ang mga pulong ni Kristo magtug-an kaninyo sa tanan nga mga butang nga inyong buhaton.”⁹

Tingali ang usa ka butang nga mahinungdanon kaayo nga akong nakat-unan sa pagbasa sa Basahon ni Mormon mao nga ang tingog sa Espiritu moabut sama sa usa ka *pagbati* imbis usa ka tingog. Kamo makakaton, sama nako, sa “pagpaminaw” ni-ana nga tingog nga *mabati* imbis nga *madungog*.

Si Nephi mibadlong sa iyang magulang nga igsoong mga lalaki, nag-ingon, “Kamo nakakita og usa ka anghel, ug siya namulong nganha kaninyo; oo, kamo nakadungog sa iyang tingog matag karon ug unya; ug siya nakapamulong nganha kaninyo sa usa ka hinay nga hinagawhaw nga tingog, apan kamo ingon sa walay *pagbati*, mao nga kamo dili *makabati* sa iyang mga pulong.”¹⁰

Ang ubang mga kritiko miingon nga kining mga bersikulo sayop tungod kay *makadungog* kamo og mga pulong; dili kamo *mobati* niini. Apan kon nasayud kamo sa espirituhanong komunikasyon, nasayud mo nga ang pinakamaayong pulong nga mohulagway kon unsay nahitabo mao ang pulong nga *pagbati*.

Ang gasa sa Espiritu Santo, kon kamo mouyon, mogiya ug manalipod, ug gani mokorihir sa inyong mga lihok. Usa kini ka espirituhanong tingog nga mosantup sa inyong hunahuna samtang ang panabut o pagbati ibutang sa inyong kasingkasing.

Si propeta Enos miingon, “Ang tingog sa Ginoo midangat sa akong hunahuna.”¹¹ Ug ang Ginoo misulti kang Oliver Cowdery, “Tan-awa, Ako mosulti kanimo diha sa imong hunahuna ug sa imong kasingkasing, pinaagi sa Espiritu Santo, nga moabut diha kanimo.”¹²

Wala paabuta nga moagi mo niining kinabuhia nga dili masayop, apan dili mo makahimo og dagkong sayop nga wala mapasidan-i daan pinaagi sa mga aghat sa Balaang Espiritu. Kini nga saad magamit sa tanang mga miyembro sa Simbahan.

Ang uban makahimo og grabe nga mga sayop, molapas sa mga balaod sa ebanghelyo. Karon ang panahon sa pagpahinumdom ninyo sa Pag-ula, paghinulsol, ug hingpit nga kapasayloan aron kamo maputli pag-usab. Ang Ginoo miingon, “Tan-awa, siya kinsa naghinulsol sa iyang mga sala, ang mao gipasaylo, ug Ako, ang Ginoo, dili na mahinumdom kanila.”¹³

Kon ang kaaway mohimo kaninyong binilanggo tungod sa sala, pahinumduman ko kamo nga anaa ninyo ang yawe nga moabli sa pultahan sa bilanggoan gikan sa sulod. Mahimo mong hugasan aron malimpyo pinaagi sa maulaong sakripisyo sa Manluluwas nga si Jesukristo.

Tingali maghunahuna mo nga sa panahon sa problema dili mo angayang luwason kay nakahimo mo og mga sayop, dako o gamay, ug naghunahuna nga karon nahisalaag na mo. Dili *gyud na* tinuod! Ang paghinulsol lang ang makaayo kon unsay nakapasakit. Apan ang paghinulsol *maka* ayo kon unsay nakapasakit, bisan unsa pa kini.

Kon nakahimo mo og mga butang nga dili unta angay, o kon nakigkauban mo sa mga tawo nga nagganoy ninyo sa sayop nga padulngan, mao kana ang panahon sa pagpakita sa



inyong pagka-gawasnon, sa inyong kabubut-on. Paminawa ang tingog sa Espiritu, ug dili kamo mahisalaag.

Moingon ko pag-usab nga ang kabatan-onan karon gipadako diha sa teritoryo sa kaaway nga adunay nagkakunhod nga sumbanan sa moralidad. Apan isip sulugoon sa Ginoo, ako mosaad nga kamo mapanalipdan ug maprotektahan gikan sa pagpangataki sa kaaway *kon* mopatalinghug mo sa mga aghat nga gikan sa Balaang Espiritu.

Pagsinina og tarung; pagmatinahun sa pagsulti; paminaw sa makadasiag nga musika. Likayi ang tanang pagka-imoral ug mga binuhatan nga makadaut sa pagkatawo. Kontrolaha ang inyong kinabuhi ug mandoi ang inyong kaugalingon nga magmatinudanon. Tungod kay nagdepende gyud

Leicester, England



mi ninyo, mapanalanginan mo sa taglsaong paagi. Ang inyong mahigugmaong Langitnong Amahan kanunay nga nagbantay ninyo.

Ang kalig-on sa akong pagpamatuod nausab sukad nga akong gibati nga magsalig una sa mga pagpamatuod sa akong mga magtutudlo sa seminary. Karon magsalig ko sa uban kon molakaw ko tungod sa pangidaron ug polio sa pagkabata pa nako apan dili gikan sa pagduha-duha sa mga butang nga espirituhanon. Ako nakahimo sa pagtuo, sa pagsabut, ug sa pagkasayud sa bililhong kamatuoran sa ebanghelyo ug sa Manluluwas nga si Jesukristo.

Isip usa sa Iyang linain nga mga saksi, ako mopamatuod nga ang resulta niining gubat nga nagsugod sa kinabuhi sa wala pa dinhi sa yuta sigurado. Si Lucifer mapildi.

Naghisgut kita ganina bahin sa mga uwak. Kamong batan-ong mga uwak dili kinahanglang magpataka lang og lupad, nga dili sigurado sa dalan nga padulngan. Naa kadtong nahibalo sa agianan. “Sa pagkatinuod ang Ginoong Dios dili magabuhat sa bisan unsa, gawas kon ang iyang tinago ipadayag niya sa iyang mga alagad ang mga manalagna.”¹⁴ Ang Ginoo miorganisar sa Iyang Simbahan diha sa baruganan sa mga yawe ug mga konseho.

Sa kapangulohan sa Simbahan naa ang 15 ka mga lalaki nga gipaluyohan isip mga propeta, mga manalagna, ug mga tigpadayag. Matag usa sa Unang Kapangulohan ug Korum sa Napulog Duha ka mga Apostoles naghupot sa tanang mga yawe sa priesthood nga kinahanglang alang sa pagdumala sa Simbahan. Ang senior nga Apostol usa ka propeta si Presidente Thomas S. Monson, kinsa mao lang ang awtorisado sa paggamit sa tanang mga yawe.

Ang mga kasulatan nagkinahanglang nga ang Unang Kapangulohan ug Korum sa Napulog Duha maglihok diha sa mga konseho ug ang mga desisyon sa konseho kinahanglang magkahiusa. Ug mao gyud na ang nahitabo. Kami nasayud nga ang Ginoo mogiya sa dalan ug magtinguha lang sa pagbuhat

sa Iyang kabubut-on. Kami nasayud nga mibutang Siya og dakong pagsalig ngari namo, sa tagsa-tagsa ug sa kinatibuk-an.

Kinahanglan gyud mong magkat-on nga “mosalig sa Ginoo sa bug-os mong kasingkasing; ug ayaw pagsalig sa imong kaugalingong salabutan.”¹⁵ Kinahanglan mong masaligan ug mopalibut sa inyong kaugalingon og mga higala nga nagtinguha nga mahimong ingon niana.

Usahay matintal mo sa paghuhuna sama nako sa matag karon ug unya sa akong kabatan-on: “Tungod sa dagan sa mga panghitabo, matapos na ang kalibutan. Ang katapusan sa kalibutan mahitabo sa dili pa nako mahuman ang kinahanglan nakong humanon.” Dili baya! Makapaabut ka sa pagbuhat niini sa husto—magminyo, makabaton og pamilya, makakita sa inyong mga anak ug mga apo, basin mga apo pa sa tuhod.

Kon inyong sundon kini nga mga baruganan, kamo pagabantayan ug kamo mismo masayud pinaagi sa mga aghat sa Espiritu Santo kon asa moadto, kay “pinaagi sa gahum sa Espiritu Santo kamo mahimo nga masayud sa kamatuoran sa tanan nga mga butang.”¹⁶ Ako mosaad nga kini mahitabo ug mopanalangin kaninyo, atong talagsaong mga batan-on, sa ngalan ni Jesukristo, amen. ■

MUBO NGA MGA SULAT

1. John Ciardi, “Fast and Slow,” *Fast and Slow: Poems for Advanced Children and Beginning Parents* (1975), 1. © 1975 ni John L. Ciardi. Gigamit nga may pagtugot sa Houghton Mifflin Harcourt Publishing Company. Tanang mga katungod gigahin.
2. Pinadayag 12:9; tan-awa usab sa Doktrina ug mga Pakigsaad 76:25–26.
3. Doktrina ug mga Pakigsaad 52:14.
4. Doktrina ug mga Pakigsaad 45:26.
5. Alma 42:8.
6. “Ang Pamilya: Usa ka Pamahayag ngadto sa Kalibutan,” *Liahona* Nob. 2010, 129.
7. *Mga Pagtulun-an sa mga Presidente sa Simbahan: Joseph Smith* (2007), 253.
8. Patriyarkal nga panalangin ni Boyd K. Packer, gihatag ni J. Roland Sandstrom, Ene. 15, 1944.
9. 2 Nephi 32:3.
10. 1 Nephi 17:45; empasis gidugang.
11. Enos 1:10.
12. Doktrina ug mga Pakigsaad 8:2.
13. Doktrina ug mga Pakigsaad 58:42.
14. Amos 3:7.
15. Mga Proverbio 3:5.
16. Moroni 10:5.



Ni Presidente Dieter F. Uchtdorf

Ikaduhang Magtatambag sa Unang Kapangulohan

Kamo Importante ngadto Kaniya

Ang Ginoo naggamit og timbangan nga lahi kaayo sa kalibutan aron pagtimbang sa bili sa usa ka kalag.

Si Moises, usa sa bantugang mga propeta nga nailhan sa kalibutan, gipadako sa anak sa Paraon ug migahin og 40 ka tuig sa iyang kinabuhi sa halangdong panimalay sa Ehipto. Nasayud gayud siya sa kanindot ug katahum sa karaang gingharian.

Mga tuig ang milabay, sa tumoy sa bukid, layo kaayo sa kanindot ug kahalangdon sa gamhanang Ehipto, si Moises mibarug sa atubangan sa Dios ug nakigsulti Kaniya nawong sa nawong sama sa usa ka tawo nga nakigsulti sa iyang higala.¹ Atol niana nga pagbisita, ang Dios mipakita ni Moises sa binuhat sa Iyang mga kamot, naghatag kaniya og daklit nga pagtan-aw sa Iyang buhat ug himaya. Sa dihang ang panan-awon natapos, si Moises natumba sa yuta sulod sa daghang oras. Sa dihang ang iyang kalig-on nahibalik na, dunay butang nga iyang naamgohan nga, sa iyang tibuok katuigan sa gingharian sa Paraon, wala mosantup sa iyang hunahuna sukad.

“Ako nasayud,” miingon siya, “nga ang tawo walay bili.”²

Kita Ubos Kay sa Atong Gituohan

Kon kita mas daghang mahibaloan kabahin sa universe, mas masabtan

nato—bisan gamay nga bahin—unsay nasayran ni Moises. Ang universe dako kaayo, mysteryoso, ug mahimayaon nga kini dili masabtan sa tawhanong hunahuna. “Mga kalibutan nga dili maihap Ako milalang,” ang Dios miingon kang Moises.³ Ang pagka-katingalahan sa panganod sa kagabhion matahum nga pagpamatuod niana nga kamatuoran.

Adunay pipila ka mga butang nga mipuno nako nianang daghang katingalahan samtang naglupad sa ngitngit nga kagabhion tabok sa kagabatan ug kontinente ug nagtan-aw sa akong bintana sa eroplano sa dili maihap nga kidlap sa minilyon ka bitoon.

Ang mga astronomo misulay sa pag-ihap sa gidaghanon sa mga bitoon sa universe. Usa ka grupo sa mga scientist mibana-bana nga ang gidaghanon sa bitoon nga maabut sa atong teleskopyo mas daghan og 10 ka pilo kay sa tanang mga lusok sa kabalasan sa mga baybayon ug mga disyerto sa kalibutan.⁴

Kini nga konklusyon adunay talagsaong pagkasusama sa pamahayag sa karaang propeta nga si Enoch: “Kon kini mahimo nga ang tawo makaihap sa mga butang sa yuta, oo, minilyon

nga mga yuta sama niini, kini dili usa ka sinugdanan sa gidaghanon sa imong mga gilalang.”⁵

Kon ikonsiderar ang kadaghan sa gilalang sa Dios, dili ikatingala nga ang bantugan nga si Haring Benjamin mitambag sa iyang katawhan sa “kanunay magpabilin sa inyong panumduman, ang pagkahalangdon sa Dios, ug ang inyong kaugalingon nga pagkawalay hinungdan.”⁶

Kita Mas Taas Kay sa Atong Gituohan

Apan bisan kon ang tawo walay bili, mipuno kini kanako sa katingala ug kahibulong sa paghunahuna nga “ang bili sa mga kalag mahinungdanan sa panan-aw sa Dios.”⁷

Ug samtang magtan-aw kita sa kadako sa universe ug moingon, “Unsa ra man ang tawo kon itandi sa kanindot sa gilalang?” Ang Dios mismo nag-ingon nga kita ang hinungdan nga Iyang gilalang ang universe! Ang Iyang buhat ug himaya—ang katuyoan niining nindot nga universe—mao ang pagluwas ug paghimaya sa katawhan.⁸ Sa laing pagkasulti, ang kalapad sa kahanagturan, ang mga himaya ug mga misteryo sa walay kinutuban nga gidak-on ug panahon tanan gimugna alang sa kaayohan sa ordinaryo nga mortal sama ninyo ug nako. Ang atong Langitnong Amahan milalang sa universe aron atong makab-ot unta ang atong potensyal isip Iyang mga anak.

Kini ang kalainan sa tawo: itandi ngadto sa Dios, ang tawo walay bili; apan kita ang tanan alang sa Dios. Kon itandi sa walay kinutuban nga paglalang kita morag walay bili, kita adunay tinipik sa mahangturong kalayo nga nagdilaab sulod kanato. Kita adunay dili masabtan nga saad sa kahimayaan—mga kalibutan nga walay katapusan—nga makab-ot ra nato. Ug dako ang tinguha sa Dios sa pagtabang nato nga makab-ot kini.

Ang Kabuang sa Garbo

Ang banggiitang tiglingla nasayud nga ang usa sa iyang epektibo nga mga himan sa pagpahisalaag sa mga anak sa Dios mao ang pagpakita sa kinaubsan sa kalainan sa tawo. Ngadto

sa uban, siya mopakita sa ilang magar-buhong mga kalagmitan, modasig nila ug moawhag nila sa pagtuo sa pantasya sa kaimportante sa ilang kaugalingong ug pagkadili-mabuntog. Mosulti siya nila nga sila nakalampas na sa ordinaryo ug nga tungod sa abilidad, katungod sa pagkatawo [birthright], o sosyal nga kahimtang, lahi sila sa komon nga kinaiya sa tanan nga naglibut kanila. Siya modala nila sa konklusyon nga tungod niana dili sila magpaubos sa balaod ni bisan kinsa ug dili magpasamok sa problema ni bisan kinsa.

Si Abraham Lincoln giingon nga ganahan sa balak nga mabasa:

O ngano nga ang espiritu sa tawo mapagarbuhon?

*Sama sa usa ka paspas molupad nga meteor, sa usa ka nagdagan nga kapanganuran, Sa usa ka kilat, sa usa ka nabungkag nga kabaluran, Ang tawo mamatay aron mopahulay sa iyang lubnganan.*⁹

Ang mga disipulo ni Jesukristo nakasabut nga kon itandi sa kahanagturan, ang atong kinabuhi dinhi sa yuta “mubo nga higayon” lang sa hugna ug panahon.¹⁰ Nasayud sila nga ang tinuod nga bili sa usa ka tawo wala kaayoy kalambigitan sa unsay gihtagag bili sa kalibutan. Nasayud sila nga makatumpi-tumpi kamo sa mga kwarta sa tibuk kalibutan ug dili kini makapalit sa usa ka pirasong tinapay didto sa tindahan sa langit.

Kadtong “makapanunod sa gingharian sa Dios”¹¹ mao kadtong mahimong “ingon sa usa ka bata, manunuton, maaghup, mapainubsanon, mapailubon, puno sa gugma.”¹² “Kay ang matag usa nga magapahitaas sa iyang kaugalingon igapaubos; apan ang magapaubos sa iyang kaugalingon igapahitaas.”¹³ Kana nga mga disipulo nakasabut usab “nga kon kamo anaa sa pag-alagad sa inyong mga isigkatawo kamo anaa lamang sa pag-alagad sa inyong Dios.”¹⁴

Wala Kita Kalimiti

Laing paagi nga si Satanas moinglingla mao ang pagpawala sa kadasig.

Mosulay siya sa pag-focus sa atong panan-aw sa atong pagkawalay pulos hangtud nga magsugod na kita sa pagduhaduha nga kita adunay dakong bili. Mosulti siya nato nga sobra ra kita ka walay hinungdan para mamatikdan sa uban, nga kita nakalimtan—ilabi na sa Dios.

Akong ipakigbahin kaninyo ang personal nga kasinatian nga tingali makatabang niadtong mibati nga walay pulos, nakalimtan, o nag-inusara.

Daghang tuig ang milabay mitambong ko sa pagbansay sa mga piloto sa Air Force sa Estados Unidos. Layo kaayo ko sa akong panimalay, usa ka batan-ong sundalo nga West German, natawo sa Czechoslovakia, nagtubo sa East Germany ug naglisud sa paglitok og Iningles. Klaro nakong nahinumduman ang akong biyahe paingon sa training base sa Texas. Nagsakay ko og eroplano, naglingkod tupad sa usa ka pasahero nga klaro kaayog Southern accent. Dili kaayo nako masabtan ang iyang gisulti. Gani naghunahuna ko kon natudloan ba ko og sayop nga pinulongan. Nahadlok kong naghunahuna nga makigkompetensya ko sa gikagubtan nga unang mga dapit sa pagbansay sa pagka-piloto batok sa mga estudyante nga Iningles og sinulitihan.

Pag-abut nako sa air base sa gamayng lungsod sa Big Spring, Texas, nangita ko ug nakakaplag og branch sa mga Santos sa Ulahing mga Adlaw, nga adunay pipila ka buotang mga miyembro nga nagpundok sa giabangan nga mga lawak sa air base mismo. Ang mga miyembro nagtukod pa lang og gamayng meetinghouse nga magsilbing permanenteng luna para sa Simbahan. Niadtong panahona ang mga miyembro ang kasagarang motrabaho sa bag-ong mga building.

Matag adlaw motambong ko sa akong pagbansay sa pagka-piloto ug magtuon og maayo kutob sa akong mahimo ug dayon mogahin sa akong libre nga oras sa pagtrabaho sa bag-ong meetinghouse. Didto akong nakat-unan nga ang dos por kwatro dili diay usa ka sayaw kondili usa ka piraso nga kahoy. Nakat-unan usab nako ang importante nga kahanas sa pagpaningkamot nga dili maigo ang



akong kumagko sa pagdukdok sa lansang.

Nakagahin ko og daghan kaayong oras sa pagtrabaho sa meetinghouse nga ang presidente sa branch—kinsa usa usab sa among flight instructor—mipahayag og kabalaka nga tingali kinahanglan kong mogahin og dugang nga oras sa pagtuon.

Ang akong mga higala ug kaubanan nga estudyante nga mga piloto miapil usab og mga kalihokan sa libreng mga oras, bisan sa akong hunahuna maayong isulti kini nga pipila niadto nga mga kalihokan wala nahaum sa pamphlet karon nga *Alang sa Kalig-on sa mga Kabatan-onan*. Sa akong bahin, nalingaw ko sa aktibong pag-apil niining gamayng branch sa kasadpan sa Texas, nagpraktis sa akong bag-ong nakat-unan nga kahanas sa pagpamanday, ug nagpalambo sa akong Iningles samtang akong gituman ang akong mga calling sa pagtudlo sa elders quorum ug sa Sunday School.

Nianang panahona, ang Big Spring, bisan pa man sa pangalan niini, usa ka gamay, dili importante, ug wala mailhi nga dapit. Ug kanunay ko nga mobati

sa samang paagi bahin sa akong kaugalingon—dili importante, wala mailhi, ug medyo nag-inusara. Bisan pa man, wala gayud ako maghunahuna kon ang Ginoo nakalimot ba nako o kon makit-an ba ko Niya didto. Nasayud ko nga dili mahinungdanon sa Langitnong Amahan kon asa ko, unsa ang akong ranggo sa akong klase sa pagbansay sa pagka-piloto, o unsay akong calling sa Simbahan. Ang mahinungdanon Kaniya mao nga akong gihimo ang akong labing maayo, nga Siya akong gihigugma, ug andam ko sa pagtabang niadtong anaa sa akong palibut. Nasayud ko nga kon akong gihimo ang labing maayo nga akong mahimo, mamaayo ra ang tanan.

Ug ang tanan maayo ra.¹⁵

Ang Maulahi Mao ang Mag-una

Ang Ginoo wala magsapayan kon atong igahin ang atong panahon sa pagtrabaho og marmol nga hawanan o payag nga pasungan. Nasayud Siya kon asa kita, bisan unsa pa ka ubos ang atong mga kahimtang. Siya mogamit—sa Iyang kaugalingong paagi ug sa Iyang balaang katuyoan—niadtong nahigugma Kaniya.

Ang Dios nasayud nga ang pipila sa mahinungdanong mga tawo nga nabuhi sukad mao kadtong dili gayud makita sa rekord sa kasaysayan. Sila ang bulahan, mapaubsanong mga tawo nga nagsunod sa ehemplo sa Manluluwas ug naggahin sa panahon sa ilang kinabuhi sa paghimog mga kaayohan.¹⁶

Usa sa maong magtiayon, mga ginikanan sa akong higala, mipakita nako og maayong ehemplo niini nga baruganan. Ang bana nagtrabaho sa tunawanan og puthaw sa Utah. Atol sa paniudto mokuha siya sa iyang kasulatan o magasin sa Simbahan ug magbasa. Dihang ang ubang mga trabahante nakakita niini, ila siyang gibugalbugalan ug mihagit sa iyang gituohan. Sa higayon nga buhaton nila kini, mosulti siya nila nga may pagkamabination ug pagsalig. Wala niya tuguti ang ilang walay pagrespeto nga makapasuko o makasagmuyo niya.

Mga tuig ang milabay usa sa mas bokal nga tigbugalbugal nasakit. Sa wala pa siya mamatay mihangyo siya nga kining mapaubsanong tawo mamulong sa iyang haya—nga iyang gibuhat.

Kining matinud-anong miyembro sa Simbahan walay sosyal nga kahimtang o katigayunan, apan nakaimpluwensya gayud siya sa tanang nakaila niya. Namatay siya sa industriyal nga aksidente samtang mihunong aron tabangan ang laing trabahante nga natanggong sa snow.

Sulod sa usa ka tuig ang iyang biyuda kinahanglang mopaubos og operasyon sa utok, nga maoy nakai-ngon nga dili na siya makalakaw. Apan ganahan ang mga tawo nga mogahin og panahon uban niya kay maminaw siya. Siya makahinumdom. Siya nagpakabana. Kay dili makasulat, gimemorya niya ang mga numero sa telepono sa iyang mga anak ug mga apo. Mahigugmaon siyang mohinumdom sa mga birthday ug mga anibersaryo.

Kadtong mobisita niya mobiya nga mobati og mas maayo bahin sa kinabuhi ug sa ilang kaugalingon. Sila mobati sa iyang gugma. Sila nasayud nga siya nagpakabana. Wala gayud siya moreklamo apan naggahin sa iyang



mga sugo, usa ka adlaw makasinati kamo sa mga saad nga gipadayag kang Apostol Pablo: “Ang wala makita sa mata, ni madungog sa dalunggan, ni mosantop sa kasingkasing sa tawo, ang gikatagana sa Dios alang kanila nga nahigugma kaniya.”²²

Mga kaissoonan, ang labing gamhanang Nilalang sa universe mao ang Amahan sa inyong espiritu. Siya naka-ila kaninyo. Siya nahigugma kaninyo sa hingpit.

Ang Dios nagtan-aw kaninyo dili lang isip mortal nga nilalang sa gamayng planeta nga mabuhi sa mubong panahon—Siya nagtan-aw kaninyo isip Iyang anak. Siya nagtan-aw kaninyo isip ang nilalang nga kamo makahimo ug giplanohan nga mahimo. Siya gusto nga kamo masayud nga kamo importante ngadto Kaniya.

Hinaut nga kita motuo, mosalig, ug mopahiangay sa atong kinabuhi aron makasabut kita sa atong tinuod nga mahangturong bili ug potensyal. Hinaut mahimo kitang takus sa bilihong mga panalangin nga giandam sa atong Langitnong Amahan alang kanato mao ang akong pag-ampo sa pangalan sa Iyang Anak, bisan si Jesukristo, amen. ■

MUBO NGA MGA SULAT

1. Tan-awa sa Moises 1:2.
2. Moises 1:10.
3. Moises 1:33.
4. Tan-awa sa Andrew Craig, “Astronomers Count the Stars,” BBC News, Hulyo 22, 2003, <http://news.bbc.co.uk/2/hi/science/nature/3085885.stm>.
5. Moises 7:30.
6. Mosiah 4:11.
7. Doktrina ug mga Pakigsaad 18:10.
8. Tan-awa sa Moises 1:38–39.
9. William Knox, “Mortality,” sa James Dalton Morrison, ed., *Masterpieces of Religious Verse* (1948), 397.
10. Doktrina ug mga Pakigsaad 121:7.
11. 3 Nephi 11:38.
12. Mosiah 3:19.
13. Lucas 18:14; tan-awa usab sa mga bersikulo 9–13.
14. Mosiah 2:17.
15. Si Dieter F. Uchtdorf migradwar nga nag-una sa iyang klase.
16. Tan-awa sa Mga Buhat 10:38.
17. Mateo 18:4; tan-awa usab sa mga bersikulo 1–3.
18. Doktrina ug mga Pakigsaad 1:23.
19. Doktrina ug mga Pakigsaad 1:19.
20. 1 Mga Taga-Corinto 1:27.
21. Tan-awa sa Mga Hebreohanon 13:5.
22. 1 Mga Taga-Corinto 2:9.

panahon sa pagpanalangin sa kinabuhi sa uban. Usa sa iyang mga higala miingon nga kini nga babaye usa sa pipila ka tawo nga iyang nailhan nga tinuod nga nagpakita sa gugma ug kinabuhi ni Jesukristo.

Kining magtiayon una siguro nga moingon nga dili kaayo sila importante niini nga kalibutan. Apan ang Ginoo naggamit og timbangan nga lahi kaayo sa kalibutan aron pagtimbang sa bili sa usa ka kalag. Siya nakaila niining matinud-anong managtiayon; Siya nahigugma nila. Ang ilang mga binuhatan mga buhing pagsaksi sa ilang lig-ong pagtuo Kaniya.

Kamo Importante ngadto Kaniya

Mga kaissoonan, tingali tinuod nga ang tawo walay bili kompara sa kadako sa universe. Usahay mobati tingali kita nga dili importante, dili makita, nag-inusara, o nakalimtan. Apan hinumdumi kanunay—kamo importante ngadto Kaniya! Kon nagduda gayud kamo niana, hunahunaa kining upat ka balaang mga baruganan:

Una, ang Dios nahigugma sa mapaubsanon ug maaghup, kay sila mao ang “labing dako sa gingharian sa langit.”¹⁷

Ikaduha, gisalig sa Ginoo “ang kahingpitan sa [Iyang] ebanghelyo [nga] mahimo tingali ikapahayag pinaagi sa mahuyang ug yano ngadto sa mga lumulupyong sa kalibutan.”¹⁸ Iyang gipili “ang mahuyang nga mga butang sa

kalibutan [nga] moabut ug mopukan sa gamhanan ug mga malig-on”¹⁹ ug aron sa pagpakaulaw “sa mga kusgan.”²⁰

Ikatulo, bisan asa pa kamo nagpuyo, bisan unsa pa ka ubos ang inyong kahimtang, unsa pa ka kulang ang inyong trabaho, unsa ka limitado ang inyong mga abilidad, unsa ka ordinaryo ang inyong pamustura, o unsa ka gamay ang inyong calling sa Simbahan, kamo nakita sa inyong Langitnong Amahan. Siya nahigugma kaninyo. Siya nasayud sa inyong mapaubsanong kasingkasing ug sa inyong buhat sa gugma ug kamabination. Kon magkauban, kini makamugna og malungtarong pagpamatuod sa inyong kamatinud-anon ug pagtuo.

Ikaupat ug katapusan, palihug sabta nga unsay inyong nakita ug nasinati karon dili maoy mahitabo hangtud sa hangtud. Dili kamo mobati og kamingaw, kaguol, kasakit, o kasagmuyo hangtud sa hangtud. Kita adunay matinud-anong saad sa Dios nga dili gayud Siya makalimot ni mosalikway niadtong nahigugma Kaniya.²¹ Pagbaton sa paglaum ug pagtuo niana nga saad. Pagkat-on sa paghigugma sa inyong Langitnong Amahan ug magmahimong Iyang disipulo sa pulong ug buhat.

Pagmasaligon nga kon molahutay lang kamo, motuo Kaniya, ug magpabilang matinud-anon sa pagtuman sa



Gipresentar ni Presidente Henry B. Eyring
Unang Magtatambag sa Unang Kapangulohan

Ang Pagpaluyo sa mga Opisyales sa Simbahan

Gisugyot nga atong paluyohan si Thomas Spencer Monson isip propeta, manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga Adlaw; si Henry Bennion Eyring isip Unang Magtatambag sa Unang Kapangulohan; ug si Dieter Friedrich Uchtdorf isip Ikaduhang Magtatambag sa Unang Kapangulohan.

Kadtong uyon mahimong mopakita niini.

Kadtong supak, kon aduna, mahimong mopakita niini.

Gisugyot nga kita mopaluyo kang Boyd Kenneth Packer isip Presidente sa Korum sa Napulog Duha ka mga Apostoles, ug ang mosunod isip sakop niana nga korum: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, ug Neil L. Andersen.

Kadtong uyon, palihug ipakita kini. Si bisan kinsa nga mosupak mahimong mopakita niini.

Gisugyot nga atong paluyohan ang

mga magtatambag sa Unang Kapangulohan ug ang Napulog Duha ka mga Apostoles isip mga propeta, manalagna, ug tigpadayag.

Ang tanang uyon, palihug ipakita kini.

Ang dili uyon, kon aduna, sa samang paagi.

Si Elder Claudio R. M. Costa gi-release isip sakop sa Kapangulohan sa mga Korum sa Seventy.

Kadtong moapil namo sa paghatag og pasalamat, palihug ipakita kini.

Gisugyot nga atong paluyohan si Elder Tad R. Callister isip sakop sa Kapangulohan sa mga Korum sa Seventy.

Ang tanang uyon, palihug ipakita kini.

Kadtong supak, kon aduna.

Gisugyot nga atong i-release si Elder Gary J. Coleman, Richard G. Hinckley, Yoshihiko Kikuchi, Carl B. Pratt, ug Cecil O. Samuelson isip mga sakop sa Unang Korum sa Seventy ug itudlo sila isip emeritus nga mga General Authority.

Gisugyot nga atong i-release sila si Elder Won Yong Ko, Lowell M. Snow, ug Paul K. Sybrowsky isip mga sakop sa Ikaduhang Korum sa Seventy.

Kadtong buot nga moapil kanamo sa pagpasalamat niining mga Kaigsoonan sa ilang maayo kaayo nga serbisyo, palihug ipakita kini.

Sila si Elder Ralph W. Hardy Jr., Jon M. Huntsman Sr., Aleksandr N. Manzhos, ug J. Willard Marriott Jr. gi-release isip mga Area Seventy.

Gisugyot nga sila hatagan og pasalamat sa ilang maayo kaayo nga pagserbisyo.

Ang tanan nga uyon, palihug ipakita kini.

Gisugyot nga atong paluyohan ang ubang mga General Authority, mga Area Seventy, ug kinatibuk-ang mga kapangulohan sa auxiliary ingon nga naglangkob karon.

Kadtong uyon, palihug ipakita kini.

Ang supak mahimong mopakita niini.

Presidente Monson, sa akong naobserbahan, ang pagbotar sulod sa Conference Center nagkahiusa sa pagpaluyo sa mga sugyot nga gihimo.

Salamat, mga kaigsoonan, sa inyong mapaluyohong boto, sa inyong hugot nga pagtuo, debosyon, ug mga pag-ampo. ■





Ni Elder David A. Bednar

Sa Korum sa Napulog Duha ka mga Apostoles

Ang mga Kasingkasing sa mga Anak Mobati

Akong dapiton ang kabatan-onan sa Simbahan sa pagkat-on ug pagsinati sa Espiritu ni Elijah.

Sa atong pagtuon, pagkat-on, ug pagsunod sa ebanghelyo ni Jesukristo, ang han-ay sa mga panghitabo makatabang kanunay. Ikonsiderar, pananglit, ang leksyon nga atong nakat-unan mahitungod sa espirituhanong prayoridad sa pagkahan-ay sa dagko nga panghitabo nga nahitabo sa dihang ang kahingpitan sa ebanghelyo sa Manluluwas gipahiuli sa ulahing mga adlaw.

Sa Sagrado nga Kakahoyan, si Joseph Smith nakakita ug nakig-istorya sa Amahan sa Kahangturan ug ni Jesukristo. Uban sa lain pang mga butang, nasayran ni Joseph ang tinuod nga kinaiya sa Dios nga Kapangulohan ug sa nagpadayon nga pagpadayag. Kining halangdon nga panan-awon nagsugod sa “tukma nga panahon” (Mga Taga-Efeso 1:10) ug mao ang mahinungdanong panghitabo sa kasaysayan sa kalibutan.

Mga tulo ka tuig ang milabay, agig tubag sa tinud-anay nga pag-ampo niadtong gabii sa Septyembre 21, 1823, ang lawak ni Joseph nalukop sa kahayag hangtud nga kini “sama na sa udtong-tutok” (Joseph Smith—Kasaysayan 1:30). Usa ka personahe ang mitungha sa kiliran sa iyang higdaanan,

misangpit sa ngalan sa batan-ong lalaki ug miingon nga “siya usa ka sinugo nga gipadala gikan sa atubangan sa Dios . . . ug nga ang iyang ngalan mao si Moroni” (bersikulo 33). Siya misulti ni Joseph mahitungod sa pag-abut sa Basahon ni Mormon. Ug dayon si Moroni mikutlo gikan sa basahon ni Malaquias sa Daang Tugon, nga may gamayng kausaban diha sa pinulongan nga gigamit sa Bersyon sa King James:

“Tan-awa, Ako mopadayag nganha kaninyo sa Pagkapari, pinaagi sa kamot ni Elijah ang propeta, sa dili pa moabut ang mahinungdanon ug makalilisang nga adlaw sa Ginoo.

“. . . Ug siya motanom sa mga kasingkasing sa mga anak sa mga saad nga gihimo ngadto sa mga amahan, ug ang mga kasingkasing sa mga anak mobati ngadto sa ilang mga amahan. Kon dili pa ingon niini, ang tibuok kalibutan pagalaglagon sa hingpit sa iyang pag-abut” (mga bersikulo 38, 39).

Ang mga instruksyon ni Moroni ngadto sa batan-ong propeta sa katapusan naglangkob og duha ka mahinungdanong tema: (1) ang Basahon ni Mormon ug (2) ang mga pulong ni Malaquias nga nanagna sa tahas ni Elijah sa Pagpahiuli “sa tanang

gisulti sa Dios pinaagi sa ba-ba sa iyang mga balaang propeta sukad pa sa karaang kapanahonan” (Mga Buhat 3:21). Sa ingon, ang pasiuna nga mga panghitabo sa Pagpahiuli nagpadayag og tukma nga pagsabut bahin sa Dios nga Kapangulohan, naghatag og gi-bug-aton sa kaimportante sa Basahon ni Mormon, ug naglantaw sa buhat sa kaluwasan ug kahimayaan alang sa mga buhi ug sa mga patay. Kining makapadasig nga han-ay sa mga panghitabo makatabang sa espirituhanon nga butang nga mahinungdanon kaayo ngadto sa Dios.

Ang akong mensahe nag-focus diha sa pangalagad ug sa Espiritu ni Elijah nga gipanagna ni Moroni sa iyang unang mga instruksyon ngadto ni Joseph Smith. Nag-ampo ko og maayo alang sa tabang sa Espiritu Santo.

Ang Pangalagad ni Elijah

Si Elijah usa ka propeta sa Daang Tugon kinsa pinaagi kaniya dagkong mga milagro ang nahimo. Iyang gisilyohan ang kalangitan ug wala moulan sa karaang Israel sulod sa 3 ka tuig ug tunga. Iyang gipadaghan ang pagkaon ug lana sa biyuda. Iyang gibuhi ang batang lalaki gikan sa kamatayon, ug iyang gipakanaog ang kalayo gikan sa langit agig paghagit sa mga propeta ni Baal. (Tan-awa sa 1 Mga Hari 17–18.) Sa katapusan sa mortal nga pangalagad ni Elijah, siya “mikayab ngadto sa langit pinaagi sa usa ka alimpulos” (2 Mga Hari 2:11) ug nabalhin sa pagkahimaya [translated].

“Kita nakakat-on gikan sa pagpadayag sa ulahing mga adlaw nga si Elijah naghupot sa gahum sa pagbugkos sa Melchizedek Priesthood ug mao ang katapusang propeta nga naghupot niini sa wala pa si Jesukristo” (Bible Dictionary, “Elijah”). Si Propeta Joseph Smith mipasabut, “Ang espiritu, gahum, ug tawag ni Elijah mao, nga kamo adunay gahum sa paghupot sa yawe . . . sa kahingpitan sa Melchizedek Priesthood . . . ; ug sa . . . pag-angkon . . . sa tanang mga ordinansa nga anaa sa gingharian sa Dios” (*Mga Pagtulun-an sa mga Presidente sa Simbahan: Joseph Smith* [2007], 376; empasis gidugang). Kining sagrado



nga awtoridad sa pagbugkos mahinungdanon aron mahimong balido ang mga ordinansa sa priesthood ug pagaihon dinhi sa yuta ug sa langit.

Si Elijah mipakita uban ni Moises didto sa Bukid sa Transpigurasyon (tan-awa sa Mateo 17:3) ug mihatag niini nga awtoridad ngadto nila ni Pedro, Santiago, ug Juan. Si Elijah mipakita pag-usab uban ni Moises ug sa lain pa niadtong Abril 3, 1836, didto sa Templo sa Kirtland ug mihatag sa sama nga mga yawe ngadto nila ni Joseph Smith ug Oliver Cowdery.

Ang kasulatan nagrekord nga si Elijah ang propeta mibarug atubangan nila ni Joseph ug Oliver ug miingon:

“Tan-awa, ang panahon miabut na sa hingpit, nga gipamulong pinaagi sa ba-ba ni Malaquias—nga nagpamatuod nga siya [Elijah] kinahanglan nga ipadala, sa dili pa moabut ang mahinungdanon ug makalilisang nga adlaw sa Ginoo—

“Sa pagpabalik sa mga kasingkasing sa mga amahan ngadto sa mga anak, ug ang mga anak ngadto sa mga amahan, basin pa unya ang

tibuok yuta pagahampakon uban sa usa ka tunglo—

“Busa, ang mga yawe niini nga kapaigoan gitugyan ngadto sa inyong mga kamot; ug pinaagi niini kamo masayud nga ang mahinungdanon ug makalilisang nga adlaw sa Ginoo duol na, gani diha sa mga pultahan” (D&P 110:14–16).

Ang pagpahiuli sa awtoridad sa pagbugkos pinaagi ni Elijah niadtong 1836 mahinungdanon sa pag-andam sa kalibutan alang sa Ikaduhang Pag-anhi sa Manluluwas ug nagpasiugda og hilabihan nga nagkadaghan ug tibuok kalibutan nga kadasig sa pagsiksik sa family history.

Ang Espiritu ug Buhat ni Elijah

Si Propeta Joseph Smith miingon: “Ang pinakadakong responsibilidad niini nga kalibutan nga gibutang sa Dios kanato mao ang pagsiksik sa atong mga patay. . . Tungod kay gikinahanglan nga ang gahum sa pagbugkos maanaa sa atong mga kamot aron sa pagbugkos sa atong mga anak ug sa atong mga patay alang sa kahingpitan

sa dispensasyon sa mga panahon—usa ka dispensasyon aron sa pagtagbaw sa mga saad nga gihimo ni Jesukristo sa wala pa ang katukuran sa kalibutan alang sa kaluwasan sa tawo. . . Sukad niini, ang Dios miingon, ‘Akong ipadala kaninyo si Elias ang manalagna’” (*Teachings: Joseph Smith*, 475).

Si Joseph mipasabut og dugang:

“Unsa ang katuyoan sa [pagbalik ni Elijah]? o unsaon kini pagpatuman? Ang mga yawe itugyan, ang espiritu ni Elijah moabut, ang Ebanghelyo i-establisar, ang mga Santos sa Dios pundukon, ang Zion pagatukuron, ug ang mga Santos motungas ingon nga mga manluluwas sa Bukid sa Zion [tan-awa sa Abdias 1:21].

“Apan unsaon nila nga mahimong mga manluluwas sa Bukid sa Zion? Pinaagi sa pagtukod sa ilang mga templo . . . ug pagpadayon ug pagdawat sa tanan nga mga ordinansa . . . alang sa ilang tanan nga mga katigulangan kinsa namatay . . . ; ug dinhi niini ang kadena nga nagbugkos sa mga kasingkasing sa mga amahan ngadto sa mga anak, ug sa mga anak ngadto sa mga amahan, nga natuman ang misyon ni Elijah” (*Teachings: Joseph Smith*, 472–73).

Si Elder Russell M. Nelson mi-tudlo nga ang Espiritu ni Elijah “usa ka pagpakita sa Espiritu Santo nga naghatag og pagsaksi sa balaanong kinaiya sa pamilya” (“A New Harvest Time,” *Ensign*, Mayo 1998, 34). Kining talagsaong impluwensya sa Espiritu Santo nagdasig sa mga tawo sa pag-ila, pagrekord, ug paghinumdom sa ilang mga katigulangan ug mga sakop sa pamilya—kaniadto ug karon.

Ang Espiritu ni Elijah nakaapekto sa mga miyembro ug dili mga miyembro sa Simbahan. Apan, isip mga miyembro sa gipahiuli nga Simbahan ni Kristo, kita adunay responsibilidad nga pakigsaad sa pagsiksik sa atong mga katigulangan ug paghatag kanila sa makaluwas nga mga ordinansa sa ebanghelyo. “Sila kon wala kita dili mahimong hingpit” (Mga Hebreohanon 11:40; tan-awa usab sa *Teachings: Joseph Smith*, 475). Ug “ni kita kon wala ang atong mga patay mahingpit” (D&P 128:15).



Tungod niini nga mga rason kita naghimo sa pagsiksik sa family history, nagtukod og mga templo, ug nagpahigayon sa mahinungdanon nga mga ordinansa. Tungod niini nga mga rason si Elijah gipadala aron sa pagpahiuli sa awtoridad sa pagbugkos nga nagbugkos dinhi sa yuta ug didto sa langit. Kita mao ang mga tinugyanan sa Ginoo sa buhat sa kaluwasan ug kahimayaan nga makapugong kon “ang tibuok yuta [pag]hampakon uban sa usa ka tunglo” (D&P110:15) inigbalik Niya pag-usab. Kini ang atong katungdanan ug talagsaong panalangin.

Usa ka Pagdapit ngadto sa Bag-o nga Kaliwatan

Nagdapit ko sa atensyon sa mga batan-on ug mga anak sa bag-ong kaliwatan sa pagpasabut nako og maayo sa kaimportante sa Espiritu ni Elijah sa inyong kinabuhi karon. Ang akong mensahe para sa tibuok Simbahan—apan ilabi na kaninyo.

Daghan ninyo tingali naghunahuna nga ang buhat sa family history alang lang sa mga edaran. Apan wala koy nasayran nga limitado sa edad nga gihulagway diha sa kasulatan o sa lagda nga gipahibalo sa mga lider sa Simbahan nga naglimitar niining importante nga serbisyo ngadto sa mga edaran. Kamo anak nga mga lalaki ug mga baya sa Dios, mga anak sa pakigsaad,

ug mga tigtukod sa gingharian. Dili kinahanglan nga maghulat pa kamo nga matigulang aron tumanon ang inyong responsibilidad sa pagtabang sa buhat sa kaluwasan alang sa tawhanong pamilya.

Gihatag sa Ginoo sa atong panahon ang talagsaon nga mga kapanguhaan aron kamo makakat-on ug ganahan niini nga buhat nga gidasig sa Espiritu ni Elijah. Pananglitan, ang Family-Search usa ka koleksyon sa mga rekord, mga kapanguhaan, ug mga serbisyo sayon nga ablihan gamit ang personal nga mga computer ug nagkalain-laing mga gamit, gihimo aron sa pagtabang sa mga tawo sa pagdiskubre ug pagrekord sa ilang family history. Kini nga mga kapanguhaan anaa usab sa mga family history center sa atong mga building sa Simbahan sa tibuok kalibutan.

Dili kini sulagma nga ang Family-Search ug uban nga mga gamit nia na sa panahon nga ang kabatan-onan pamilyar kaayo sa mga teknolohiya sa impormasyon ug komunikasyon. Ang inyong mga tudlo maayo na kaayo mo-text ug mo-tweet aron mapaspas ug mapalambo ang buhat sa Ginoo—dili lang aron makakontak dayon sa inyong mga higala. Ang mga kahanas ug abilidad nga makita sa kadaghanan sa atong kabatan-onan karon usa ka pagpangandam sa pagtabang sa buhat sa kaluwasan.

Akong dapiton ang kabatan-onan sa Simbahan sa pagkat-on ug pagsinati sa Espiritu ni Elijah. Ako moawhag kaninyo sa pagtuon, sa pagsiksik sa inyong mga katigulangan, ug sa pag-andam sa inyong kaugalingon sa pagpahigayon og proxy nga bunyag sa balay sa Ginoo alang sa *inyong* kaliwatan nga namatay na (tan-awa sa D&P 124:28–36). Ug awhagon ko kamo sa pagtabang sa ubang tawo sa pag-ila sa ilang mga family history.

Kon motuman mo niini nga pagdapit uban sa pagtuo, ang inyong kasingkasing mobati sa inyong mga amahan. Ang saad nga gihimo ngadto nila ni Abraham, Isaac, ug Jacob matisok diha sa inyong mga kasingkasing. Ang inyong patriyarkal nga panalangin, uban sa pamahayag niini sa kaliwatan, mosumpay ninyo ngadto sa mga amahan ug mahimong mas mahinungdanon alang kaninyo. Ang inyong gugma ug pasalamat alang sa inyong mga katigulangan motubo. Ang inyong pagpamatuod ug pagkakabig ngadto sa Manluluwas mahimong lig-on ug malungtaron. Ug ako mosaad nga kamo panalipdan batok sa grabe nga impluwensya sa yawa. Samtang kamo moapil ug mohigugma niining balaan nga buhat, kamo panalipdan sa inyong kabatan-on ug sa tibuok ninyong kinabuhi.



Mga ginikanan ug mga lider, palihug tabangi ang inyong mga anak ug kabatan-onan sa pagkat-on ug pagsinati sa Espiritu ni Elijah. Apan palihug ayaw himoang labihan ka pormal kini nga paningkamot o mohatag og sobra ka detalyado nga impormasyon o pagbansay. Dapita ang mga batan-on sa pag-explore, pag-eksperimento, ug pagkat-on nga sila lang (tan-awa sa Joseph Smith—Kasaysayan 1:20). Bisan kinsa nga batan-on makahimo sa unsay akong gisugyot, gamit ang mga module nga anaa sa lds.org/familyhistoryyouth. Ang korum sa Aaronic Priesthood ug mga kapangulohan sa klase sa Young Women makatabang og maayo sa tanang kabatan-onan nga mahibalo niining nag-unang kapanguhaan. Nagkadugang ang panginahanglan sa mga batan-on nga mahimong tigkat-on kinsa molihok ug sa ingon makadawat og dugang nga kahayag ug kahibalo pinaagi sa Espiritu Santo—ug dili lang walay pagpakabana nga mga estudyante nga kinahanglan pang pagaaghaton (tan-awa sa 2 Nephi 2:26).

Mga ginikanan ug mga lider, mahibulong lang kamo kon unsa kapasas ang inyong mga anak ug kabatan-onan sa Simbahan nga mahanas pag-ayo sa paggamit niini. Gani, makat-on kamo og importante nga leksyon gikan niining mga batan-on bahin sa epektibong paggamit niining kapanguhaan. Ang kabatan-onan dako kaayo og matabang sa mga edaran nga dili komportable o mahadlok sa teknolohiya o dili pamilyar sa FamilySearch. Kamo usab mag-ihap sa daghan ninyong panalangin kon ang mga batan-on mogahin og dakong panahon sa buhat sa family history ug pagserbisyo sa templo ug gamay ra nga panahon sa mga video game, mag-surf sa Internet, ug mag-Facebook.

Sila si Troy Jackson, Jaren Hope, ug Andrew Allan mga tighupot sa Aaronic Priesthood nga gitawag sa usa ka dinasig nga bishop sa pagtinabangay og tudlo sa klase sa family history sa ilang ward. Kining batan-ong mga lalaki nagrepresentar sa daghan kaayo kaninyo sa ilang kadasig sa pagkat-on ug tinguha sa pagserbisyo.



Miingon si Troy, “Sa una moadto ko sa Simbahan ug molingkod ra didto, apan karon akong naamgohan nga kinahanglan kong mopauli ug maghimo og usa ka butang. Makahimo kitang tanan og family history.”

Si Jaren mireport nga samtang nagkat-on siya og dugang mahitungod sa family history, nakaamgo siya “nga kini dili lamang mga pangalan apan tinuod nga mga tawo. Mas naghinaminam ko kalabut sa pagdala sa mga pangalan ngadto sa templo.”

Ug mikomentaryo si Andrew, “Nahimo kong interesado sa family history nga may gugma ug kadasig nga wala nako mahibaloi nga akong maangkon. Samtang nangandam ko matag semana sa pagtudlo, kanunay ko nga giaghat sa balaang Espiritu sa paghimo ug pagsulay sa uban nga mga pamaagi nga gitudlo sa leksyon. Kaniadto, ang family history usa ka makahadlok nga butang. Apan sa tabang sa Espiritu nakatuman ko sa

akong calling ug nakatabang sa daghang tawo sa among ward.”

Akong minahal nga batan-ong mga kaigsoonan, ang family history dili lang makapadasig nga programa o kalihokan nga gipasiugdahan sa Simbahan; apan, kini usa ka mahinungdanon kaayo nga bahin sa buhat sa kaluwasan ug kahimayaan. Giandam kamo alang niini nga adlaw ug aron sa pagtukod sa gingharian sa Dios. Ania kamo dinhi sa yuta karon aron sa pagtabang niining mahimaya-ong buhat.

Ako mopamatuod nga si Elijah mibalik dinhi sa yuta ug mipahiuli sa sagrado nga awtoridad sa pagbugkos. Ako mosaksi nga unsay bugkoson dinhi sa yuta mahimong mabugkos didto sa langit. Ug ako nasayud nga ang kabatan-onan sa bag-o nga kalawatan adunay mahinungdanon nga bahin niining dakong buluhaton. Ako mopamatuod sa sagradong pangalan ni Ginoong Jesukristo, amen. ■



Ni Elder Neil L. Andersen

Sa Korum sa Napulog Duha ka mga Apostoles

Mga Bata

Mopamatuod ako sa talagsaong panalangin sa mga anak ug sa kalipay nga ilang madalit kanato niining kinabuhia ug sa kahangturan.

Samtang kita motan-aw sa mga mata sa usa ka bata, atong makita ang isigkaanak sa Dios nga lalaki o babaye kinsa atong kauban sa kinabuhi sa wala pa dinhi sa yuta.

Usa kini ka talagsaong pribilehiyo sa bana ug asawa kinsa makapanganak aron makahatag og mortal nga lawas alang niining espiritung mga anak sa Dios. Nagatuo kita sa mga pamilya, ug nagatuo kita sa mga anak.

Kon ang usa ka bata matawo sa usa ka bana ug asawa, nagtuman sila og bahin sa plano sa atong Langitnong Amahan sa pagdala og mga anak dinhi sa yuta. Ang Ginoo miingon, “Mao kini ang akong buhat ug ang akong himaya—ang pagpahinabo sa pagkaimortal ug sa kinabuhi nga dayon sa tawo.”¹ Sa dili pa ang imortalidad, kinahanglan nga dunay mortalidad.

Ang pamilya gi-orden sa Dios. Ang mga pamilya maoy sentro sa plano sa Langitnong Amahan dinhi sa yuta ug hangtud sa kahangturan. Human gikasal si Adan ug si Eva, ang kasulatan nag-ingon: “Ug gipanalanginan sila sa Dios, ug ang Dios miingon kanila, Sumanay, ug dumaghan kamo, ug pun-on ninyo ang yuta.”² Sa atong panahon ang mga propeta ug mga apostoles namahayag, “Ang unang sugo nga gihatag sa Dios ngadto ni

Adan ug Eva mao ang mahitungod sa posibilidad alang kanila isip bana ug asawa nga mahimong mga ginikanan. Kami mopahayag nga ang sugo sa Dios alang sa Iyang mga anak sa pagdaghan ug pagpuno sa yuta nagpabilin nga ipatuman.”³

Kini nga sugo wala kalimti o gipadaplin lang sa Ang Simbahan ni Jesukristo sa mga Santos sa Ulahing mga Adlaw.⁴ Among gipahayag ang dakong pasalamat tungod sa hugot nga pagtuo nga gipakita sa mga bana ug asawa (ilabi na sa atong mga asawa) sa ilang kaandam nga makabaton og mga anak. Kanus-a gustong magkaanak ug pila ka buok anak mga pribado nga desisyon nga himoon tali sa bana ug asawa ug sa Ginoo. Sagrado kini nga mga desisyon—mga desisyon nga kinahanglang buhaton uban sa sinserong pag-ampo ug buhaton uban sa hugot nga pagtuo.

Mga tuig nang milabay, si Elder James O. Mason sa Seventy mipaambit niini nga istorya ngari nako: “Ang pagkatawo sa among ikaunom nga anak usa ka kasinatian nga dili makalimtan. Samtang akong gitutukan kining matahum, bag-ong anak nga babaye didto sa nursery mga gutlo pa lang sa iyang pagkatawo, klaro nakong nadungog ang tingog nga nag-ingon,

‘Aduna pay mosunod, ug lalaki unya kini.’ Nagbinugo, dali kong mibalik sa kilid sa luya kaayo nakong asawa ug gisultihan siya sa maayong balita. Bati kaayo kadto nga tayming sa akong bahin.”⁵ Tuig human sa laing tuig ang mga Masons nagpaabut sa ikapito nila nga anak. Tulo, upat, lima, unom, pito ka tuig ang milabay. Sa katapusan, human sa walo ka tuig ang ilang ikapitong anak natawo—gamayng bata nga lalaki.

Sa miaging Abril, si Presidente Thomas S. Monson mipahayag:

“Diin kanhi ang mga sumbanan sa Simbahan ug mga sumbanan sa katingban hapit nahiangay, karon aduna nay halapad nga kal-ang taliwala kanato, ug kini mas nagkadako pa. . . .

“Ang Manluluwas sa katawhan mihulagway sa Iyang kaugalingon nga anaa sa kalibutan apan dili iya sa kalibutan. Kita usab mahimong anaa sa kalibutan apan dili iya sa kalibutan samtang atong isalikway ang sayop nga mga konsepto ug sayop nga mga pagtulun-an ug magpabiling matinuoron nianang gisugo sa Dios.”⁶

Daghang tingog sa kalibutan karon ang mibaliwala sa importansya sa pagbaton og anak o nagsugyot sa paglangay o paglimit sa mga anak sa pamilya. Ang akong mga anak nga babaye bag-o lang nga mi-refer kanako sa usa ka blog nga sinulat sa usa ka Kristiyanong inahan (dili sa atong tinuohan) nga may lima ka anak. Mikomentaryo siya: “[Ang magdako] niini nga kultura, lisud kaayo ang pagkuha og biblikal nga panglantaw sa pagkainahan. . . . Ang mga bata dili makaabut og college. Siguradong dili makasuroy sa mga dapit sa kalibutan. Walay kahigayunan sa paggawas inig kagabii aron maglingaw-lingaw. Dili makahimo sa pagpanindot sa lawas sa gym. Dili makatrabaho sa gipangandoy ninyong trabaho.” Siya dayon midugang: “Ang pagkainahan dili usa ka kalingawan, usa kini ka tawag. Dili kamo mangolekta og mga bata kay nakita ninyong mas nindot sila kay sa mga stamp. Dili kini usa ka butang nga isingit lang kon may panahon. Mao kana nganong gihatagan kamo og panahon sa Ginoo.”⁷

Ang pagbaton og gagmayng mga bata dili sayon. Daghang adlaw nga malisud gyud. Usa ka batan-ong inahan misakay sa bus uban sa pito ka anak. Ang drayber sa bus nangutana, “Imo ba kining tanan anak, inday? O nagpiknik lang?”

“Akoa kining tanan anak,” mitubag siya. “Ug dili kini piknik!”⁸

Sama sa kalibutan nga kanunayng mangutana, “Imo ba kining tanan anak?” salamat sa pagmugna sulod sa Simbahan og sanktwaryo alang sa mga pamilya, diin kita nagatahud ug nagtabang sa mga inahan nga may mga anak.

Sa matarung nga amahan, walay pulong nga ikapaigo sa pagpahayag sa pasalamat ug gugma nga iyang gibati alang sa iyang asawa sa dili ma-subay nga gasa sa pagpahimugso ug pag-atiman sa ilang mga bata.

Si Elder Mason dunay laing kasi-natian mga semana pa lang human sa iyang kaminyoon nga nakatabang kaniya nga unahon ang iyang mga res-ponsibilidad sa pamilya. Siya miingon:

“Si Marie ug ako nangatarungan nga aron makapadayon ko sa akong pag-eskwela sa pagkadoktor giki-nahanglan nga magpadayon siya og trabaho. Bisan og dili kini ang [gusto] namong buhaton, ang pagbaton og mga anak unya na lang. [Samtang nagtan-aw sa magasin sa Simbahan didto sa balay sa akong mga ginika-nan] nakakita ko og artikulo ni Elder Spencer W. Kimball, nga kaniadto sa Korum sa Napulog Duha, [naghatag og gibug-aton] sa mga responsibilidad inubanan sa kaminyoon. Sumala pa ni Elder Kimball, usa sa sagradong responsibilidad mao ang pagsanay ug pagpuno sa yuta. Ang balay sa akong mga ginikanan [duol ra] sa Church Administration Building. Dali kong miadto sa mga opisina, ug 30 minutos human mabasa ang iyang artikulo, didto na ko naglingkod atbang sa lamesa ni Elder Spencer W. Kimball.” (Dili na kini sayon karon.)

“Mipasabut ko nga gusto kong ma-himo nga doktor. Walay laing kapilian kon dili ang pagpugong sa pagbaton og mga anak. Si Elder Kimball mapal-ilubong naminaw ug dayon mitubag



sa hinay nga tingog, ‘Brother Mason, gusto kaha sa Ginoo nga supakon nimo ang usa sa iyang importante nga mga sugo aron lang mahimo kang doktor? Uban sa tabang sa Ginoo, makapanganak kamo ug mahimo gihapon kang doktor. Asa man ang imong hugot nga pagtuo?’

Si Elder Mason mipadayon: “Ang una namong anak natawo wala dangti og usa ka tuig human niadto. Ako ug si Marie mitrabaho og maayo ug ang Ginoo miabli sa mga bintangana sa langit.” Ang mga Masons gipanalangi-nan og duha pa ka anak sa wala pa siya mogradwar sa pagkadoktor upat ka tuig human niadto.⁹

Sa tibuok kalibutan, mao kini ang panahon sa walay kasiguroan nga ekonomiya ug pinansyal. Sa miaging Abril nga kinatibuk-ang komperensya, si Presidente Thomas S. Monson mi-ingon: “Kon kamo nabalaka kabahin sa pinansyal nga pagsangkap alang sa asawa ug sa pamilya, akong mopasa-lig ako kaninyo nga walay angayang ikaulaw nianang magtiayon nga kina-hanglang magdaginot ug magtigum. Kasagaran sa atol niining mahagiton nga panahon nga kamo mas mag-kasuod samtang nagkat-on kamo sa

pagsakripisyo ug paghimo og lisud nga mga desisyon.”¹⁰

Ang midulot nga pangutana ni El-der Kimball nga “Asa man ang imong hugot nga pagtuo?” nagdala kanamo ngadto sa balaang mga kasulatan.

Dili didto sa Tanaman sa Eden nga si Adan ug Eva nanganak sa ilang ka-magulangan. Sa pagbiya sa tanaman, “si Adan [ug Eva] nagsugod sa pagti-kad sa yuta. . . . Si Adan nakigdulog sa iyang asawa, ug siya [nanganak] . . . mga anak nga lalaki ug mga babaye, ug [pinaagi sa hugot nga pagtuo] nag-sugod ang ilang pagsanay ug pagpuno sa yuta.”¹¹

Dili didto sa ilang panimalay sa Jerusalem, nga may mga bulawan, pilak, ug bililhong mga butang, diin si Lehi ug si Sariah, pinaagi sa hugot nga pagtuo, nanganak sila ni Jacob ug Joseph. Didto kadto sa kamingawan. Si Lehi namulong kabahin sa iyang anak nga si Jacob nga “akong kamagula-ngan nga anak sa mga adlaw sa akong kalisdanan didto sa kamingawan.”¹² Si Lehi miingon kang Joseph, “Ikaw na-tawo sa kamingawan sa [among] mga kasakit; oo, sa mga adlaw sa [among] labing dako nga kasubo ikaw gihi-mugso sa imong inahan.”¹³



Davao, Philippines

Sa basahon sa Exodo usa ka lalaki ug babaye nagminyo ug, pinaagi sa hugot nga pagtuo, nanganak og batang lalaki. Walay gipakitang timaan sa atubangang pultahan sa pagpahibalo sa iyang pagkatawo. Siya ilang gitago tungod kay ang Faraon misugo nga ang matag bag-ong natawo nga Israelite nga lalaki kinahanglan nga “itambog sa suba.”¹⁴ Nahibalo kamo sa tibuok istorya: ang bata mapinangaong gipahimutang sa gamayng bukag nga hinimo sa sagbut, gibutang sa suba, gibantayan sa iyang igsoon, nakit-an sa anak nga babaye sa Faraon, ug giatiman sa kaugalingon niyang inahan isip iyang nurse. Ang bata gibalik ngadto sa anak sa Faraon, kinsa miila kaniya nga iyang anak ug mitawag kaniya og Moises.

Sa pinakaganahan kaayo nga istorya sa pagkatawo sa usa ka bata, walay nursery nga gidekorasyonan o may desinyo nga kuna—pasungan lamang alang sa Manluluwas sa kalibutan.

Sa “pinakamaayong mga panahon [ug]. . . sa pinakabati nga mga panahon,”¹⁵ ang matuod nga mga Santos sa Dios, naglihok pinaagi sa hugot nga pagtuo, wala gayud makalimot,

mosalikway, o mobaliwala sa “sugo sa Dios . . . sa pagdaghan ug pagpuno sa yuta.”¹⁶ Nagpadayon kita sa hugot nga pagtuo—sa pagtuman sa mga desisyon kon pila kabuok ang gusto nga anak ug kanus-a man gustong manganak anaa ra tali sa bana ug asawa ug sa Ginoo. Dili gayud kita maghukom sa usag usa niini nga butang.

Ang pagpanganak usa ka sensitibo nga hilisgutan nga mahimong sakit kaayo alang sa matarung nga mga babaye kinsa walay oportunidad nga maminyo ug makabaton og pamilya. Kamo nga dungganang mga babaye, ang atong Langitnong Amahan nahibalo sa inyong mga pag-ampo ug tinguha. Mapasalamaton kaayo kami sa inyong talagsaong impluwensya, lakip na ang pagtabang uban sa mahigugmaong mga kamot sa mga bata nga nanginahanglan sa inyong suporta ug kalig-on.

Ang pagpanganak usa usab ka subo nga hilisgutan alang sa matarung nga mga magtiayon kinsa nagminyo ug wala gayud makaanak sumala sa ilang gipaabut o alang sa bana ug asawa nga nagplano sa paghimo og dakong pamilya apan gipanalanginan og gamay ra nga pamilya.

Dili nato kanunay mapasabut ang mga kalisdanan sa atong mortalidad. Usahay ang kinabuhi ingon og dili gayud makiangayon—ilabi na kon ang atong pinakatinguha mao ang paghimo gayud sa unsay gisugo sa Ginoo. Isip sinugo sa Ginoo ako mo-paniguro kaninyo nga kini nga saad sigurado: “Ang matinud-anong mga miyembro kansang mga kahintang wala motugot kanilang makadawat sa mga panalangin sa mahangtulong kaminyoon ug pagkaginikanan niining kinabuhia makadawat sa tanang gisaad nga mga panalangin sa kahangturan, [samtang] gihuptan nila ang mga pakigsaad nga ilang gihimo ngadto sa Dios.”¹⁷

Si Presidente J. Scott Dorius sa Peru Lima West Mission miasoy kanako sa ilang istorya. Siya miingon:

“Si Becky ug ako naminyo sulod sa 25 ka tuig nga wala makabaton [o makasagop] og mga anak. Namalhin kami sa makadaghang higayon. Ang pagpaila sa among kaugalingon sa bag-ong mga kahintang usa ka bakikaw ug usahay sakit. Ang mga miyembro sa ward nahibulong kon nganong kami [walay] mga anak. Dili lamang sila ra ang nahibulong.

“Sa dihang gitawag ako nga bishop, ang mga miyembro sa ward [mipahayag] sa kahingawa nga ako walay kasinatian sa mga bata ug mga tin-edyer. Nagpasalamat ko nila sa ilang pagsuporta ug mihangyo kanila nga tugutan akong makapraktis sa pagpatubo og mga bata diha sa ilang mga anak. Mapinangaon silang mitugot.

“Naghulat kami, nakaangkon og panglantaw, ug nakakat-on sa pagpailub. Human sa 25 ka tuig nga kaminyoon, usa ka milagro nga masuso miabut sa among kinabuhi. Misagop kami sa dos anyos nga si Nicole ug dayon ang bag-ong natawo nga si Nikolai. Ang wala kaila namo karon modayeg sa among matahum nga mga apo. Mangatawa kami ug moingon, ‘Sila among mga anak. Nagpuyo kami sa kinabuhi nga paatras.’”¹⁸

Mga kaissoonan, kinahanglan nga dili kita maghukom sa usag usa niining sagrado ug pribado nga responsibilidad.

“Ug gikuha [ni Jesus] ang usa ka gamayng bata . . . nakugos niya kini [ug] miingon . . .

“Bisan kinsa nga tungod sa akong ngalan magadawat sa usa ka gamayng bata nga ingon niini, magadawat kanako: ug bisan kinsa nga magadawat kanako, magadawat . . . kaniya nga mao ang nagpadala kanako.”¹⁹

Pagkatalagsaong panalangin ang anaa kanato nga makadawat og mga anak sa Dios nga lalaki ug babaye diha sa atong panimalay.

Magmapainubsanon kita ug magmainampon sa tinguha sa pagsabut ug pagdawat sa mga sugo sa Dios, matinahuron nga maminaw sa tingog sa Iyang Balaang Espiritu.

Ang mga pamilya mao ang sentro sa mahangturong plano sa Dios. Mopamatuod ako sa talagsaong panalangin sa mga anak ug sa kalipay nga ilang madalit kanato niining kinabuhia ug sa kahangturan, sa pangalan ni Jesukristo, amen. ■

MUBO NGA MGA SULAT

1. Moises 1:39.
2. Genesis 1:28.
3. “Ang Pamilya: Usa ka Pamahayag ngadto sa Kalibutan,” *Liahona* Nob. 2010, 129.
4. Sumala sa tinuig nga American Community Survey, nga gipagawas sa U. S. Census Bureau, “Ang Utah mao gihapon ang nasud nga maoy pinakadaghang pamilya, taas og fertility rate, pinakaubos og median age, pinakabata og edad kon magminyo, ug pinakadaghang mga inahan nga anaa sa panimalay” (“Who Are Utahns? Survey Shows We’re Highest, Lowest, Youngest,” *Salt Lake Tribune*, Sept. 22, 2011, A1, A8).
5. E-mail nga nadawat gikan ni James O. Mason, Hunyo 25, 2011.
6. Thomas S. Monson, “Gahum sa Priesthood,” *Liahona*, Mayo 2011, 66, 67.
7. Rachel Jankovic, “Motherhood Is a Calling (and Where Your Children Rank),” Hulyo 14, 2011, desiringgod.org.
8. Tan-awa sa “Jokes and Funny Stories about Children,” thejokes.co.uk/jokes-about-children. Php.
9. E-mail nga nadawat gikan ni Elder James O. Mason, Hunyo 29, 2011.
10. Thomas S. Monson, *Liahona*, Mayo 2011, 67.
11. Moises 5:1, 2.
12. 2 Nephi 2:1.
13. 2 Nephi 3:1.
14. Exodo 1:22.
15. Charles Dickens, *A Tale of Two Cities* (Signet Classic, 1997), 13.
16. *Liahona*, Nob. 2010, 129.
17. *Handbook 2: Administering the Church* (2010), 1.3.3.
18. E-mail gikan ni Presidente J. Scott Dorius, Ago. 28, 2011.
19. Marcos 9:36–37.



Ni Elder Ian S. Ardern
Sa Seventy

Oras sa Pagpangandam

Kinahanglan atong gamiton ang atong oras sa mga butang nga labing importante.

Ang ikawalo nga kapitulo sa *Isangyaw ang Akong Ebanghelyo* nagpokus sa atong atensyon sa maalamong paggamit sa oras. Sa sinugdanan nga paragraph, si Elder M. Russell Ballard nagpahinumdom nato nga kita kinahanglan nga mohimo og mga tumong ug magkat-on unsaon sa pag-master sa mga teknik sa pagkab-ot niini (tan-awa sa *Isangyaw ang Akong Ebanghelyo: Usa ka Giya sa Misyonaryo nga Pangalagad* (2004), 177–78). Ang pag-master sa mga teknik nga gikinahanglan sa pagkab-ot sa atong mga tumong naglakip nga mahimong master manedyer sa atong oras.

Ako mapasalamaton sa ehemplo ni Presidente Thomas S. Monson. Sa tanan nga iyang gibuhath isip propeta sa Dios, iyang gisiguro, sama sa gibuhath sa Manluluwas, nga adunay igong panahon sa pagbisita sa masakiton (tan-awa sa Lucas 17:12–14), sa pagbayaw sa kabus sa espiritu, ug nga mahimong sulugoon sa tanan. Ako mapasalamaton usab sa ehemplo sa daghan pa kinsa mihatag sa ilang panahon sa pagserbisyo sa ilang isig ka tawo. Ako mopamatuod nga ang paghatag sa atong panahon sa pagserbisyo sa uban makapahimuot sa Dios

ug sa ingon makapaduol nato ngadto Kaniya. Ang atong Manluluwas magmatinud-anon sa Iyang pulong nga “siya kinsa matinud-anon ug maalamon diha sa panahon pagaiphon nga takus sa pagpanunod sa mga mansyon nga giandam alang kaniya sa akong Amahan” (D&P 72:4).

Ang oras dili gayud baligya; ang panahon usa ka butang nga dili, bisan unsaon nimog paninguha, mapalit sa bisan asa nga tindahan bisan pa pila. Apan kon ang oras maalamong gigamit, ang bili niini dili masukod. Sa gihatag nga adlaw kitang tanan gigahinan, walay bayad, sa samang gidaghanon sa minuto ug oras nga gamiton, ug dili madugay atong mahiba-loan, sama sa pamilyar nga kanta nga nagtudlo, “ang panahon manglabay; dili na mobalik” (“Improve the Shining Moments,” *Hymns*, nu. 226). Ang atong panahon kinahanglang gamiton sa maalamon. Si Presidente Brigham Young miingon, “kitang tanan nakautang sa Dios alang sa abilidad sa paggamit sa panahon nga mapahimuslan ug siya maningil kanato sa higpit nga pagsubay sa paggamit nga atong gihimo niini nga abilidad” (*Mga Pagtulun-an sa mga Presidente*

sa *Simbahan: Brigham Young* [1997], 331).

Sa kadaghan natong buluhaton, kinahanglang makat-on kita sa paghimo og prayoridad sa pagpahaum sa atong mga tumong o risgo nga mabantang sa hangin sa paglangay-langay ug mapadpad sa pag-usik sa kalihokan ngadto sa lain. Gitudloan kita og maayo mahitungod sa mga prayoridad sa Ginoong Magtutudlo sa dihang Siya mideklarar sa iyang Wali sa Bukid, “Busa, ayaw pangita sa mga butang niini nga kalibutan apan paninguha kamo sa pagtukod og usa ka gingharian sa dios, Ug sa pagpatunhay sa iyang pagkamatarung, ug kining tanan nga mga butang idugang nganha kaninyo” (Mateo 6:33, footnote a; gikan sa Hubad ni Joseph Smith, Mateo 6:38). (Tan-awa usab Dallin H. Oaks, “Pokus ug Prayoridad,” *Liahona*, Hulyo 2001, 99–102.)

Si Alma naghisgot sa mga prayoridad sa dihang siya mitudlo nga “kini nga kinabuhi nahimo nga usa ka panahon sa pagsulay; usa ka panahon sa pagpangandam sa pagsugat sa Dios” (Alma 12:24). Unsaon sa paggamit sa buhong nga kabilin sa oras sa pagpangandam sa pagsugat sa Dios nagkinahanglan og giya, apan sigurado nga atong ibutang ang Ginoo ug ang atong mga pamilya sa ibabaw sa lista. Si Presidente Dieter F. Uchtdorf mipahinumdom kanato nga “diha sa mga relasyon sa pamilya ang *gugma* sa tinuod gispelling og *o-r-a-s*” (“Kabahin sa mga Butang nga Labing Mahinungdanon,” *Liahona*, Nob. 2010, 22). Ako mopamatuod nga ang tabang gitinguha pinaagi sa pagkamainampon ug pagkasinsero, ang atong Langitnong Amahan motabang nato sa paghatag og gibug-aton nianang nagkinahanglan sa atong oras labaw sa tanan.

Ang pobre mogamit sa oras nga suod nga ig-agaw sa pagkatapulan. Sa atong pagsunod sa sugo nga “mohunong sa pagkatapulan” (D&P 88:124), kinahanglang atong siguroon nga ang pagka-busy matandi sa pagkamakugihon. Pananglit, nindot kaayo nga adunay komunikasyon nga magamit dayon, apang siguroon nato nga dili kita magpalabi og gamit sa

komunikasyon. Akong namatikdan nga ang uban nalit-ag sa bag-ong adiksiyon nga kinahanglan og daghang panahon—nga nakapaulipon nato sa pirming pagtan-aw ug pagpadala sa sosyal nga mga mensahe ug sa ingon naghatag nato og dili maayo nga impresyon nga pagka-busy ug makugihon.

Adunay daghan nga maayo sa atong sayon nga paggamit sa komunikasyon ug impormasyon. Akong nakita nga kini makatabang sa pagpangita og mga artikulo, mga pakigpulong sa komperensya, mga rekord sa katigulangan, ug pagdawat og mga e-mail, pahinumdom sa Facebook, tweets, ug mga text. Kining mga butanga mga maayo, dili kita makatugot niini nga makapadaplin niadtong mga butang nga labing importante. Pagkasubo kon ang telepono ug computer uban sa kakomplikado niini makapawala sa kayano sa sinsero nga pag-ampo ngadto sa mahigugmaong Amahan sa Langit. Kinahanglang dali kita makaluhod sama sa pag-text.

Ang electronic nga mga dula ug cyber nga pag-ilaila dili malungtarung ikapuli alang sa tinuod nga mga higala kinsa makahatag og madasigong gakus, kinsa makaampo alang nato ug nagtinguha sa atong kaayohan. Mapasalamaton kaayo ko nga makakita sa korum, klase, ug sa mga sakop sa Relief Society nga magtinabangay sa usag usa. Usa sa mga okasyon nga nasabtan nako pag-ayo unsay gipasabut ni Apostol Pablo sa dihang siya miingon, “Kamo karon dili na mga langyaw ug mga dumuloong. Kondili mga katagilungsod sa mga balaan” (Mga-Taga Efeso 2:19).


Nasayud ako nga ang atong dakong kalipay moabut kon kita nahiangay ngadto sa Ginoo (tan-awa sa Alma 37:37) ug niadtong mga butang nga makahatag og mahangturong ganti kay sa daghang mga oras sa status updates, Internet farming, ug catapulting angry birds sa semento nga mga bongbong. Moawhag ko kaninyo sa pagsalikway niadtong mga butang nga nagkawat sa atong bililhong oras ug determinado nga mahimong ilang agalon, kay sa pagtugot niini pinaagi

sa ilang makaadik nga matang nga mahimo natong agalon.

Aron makabaton sa kalinaw nga gi-hisgutan sa Manluluwas sa (tan-awa sa Juan 14:27), kinahanglang ihalad nato ang atong oras ngadto sa mga butang nga mas importaante, ug ang mga butang sa Dios ang mas importante. Sa atong pagduol sa Dios pinaagi sa sinsero nga pag-ampo, pagbasa ug pagtuon kada adlaw sa mga kasulatan, mamalandong unsay atong nabasahan ug nabati, ug dayon gamiton ug sundon ang mga leksyon nga nakat-unan, mas makapaduol kita ngadto Kaniya. Ang saad sa Dios mao nga kon kita magsiksik nga makugihon gikan sa labing maayong mga basahon “[Siya] mohatag [kanato] og kahibalo pinaagi sa iyang Balaan nga Espiritu” (D&P 121:26).

Si Satanas motintal nato sa dili pagtarung og gamit sa atong oras pinaagi sa tinakuban nga paglingla. Bisan og ang mga tintasyon moabut, mitudlo si Elder Quentin L. Cook nga ang “mga Santos kinsa mosunod sa mensahe sa Manluluwas dili mahisalaag sa malinglahon ug malaglagon nga mga pangandoy” (“Santos Ka Ba?” *Liahona* Nob. 2003, 96). Si Hiram Page, usa sa Walo ka mga Saksi sa Basahon ni Mormon nagtudlo nato

Salvador, Brazil



sa bililhon nga leksyon mahitungod sa mga paglingla. Siya adunay bato ug pinaagi niini narekord ang iyang gituohan nga mga pinadayag alang sa Simbahan (tan-awa sa D&P 28). Gikorhian si Hiram, ang istorya nag-ingon nga ang bato gikuha ug gidugmok aron kini dili na makalingla.¹ Modapit ako ninyo sa pag-ila sa mga lingla sa pag-usik sa atong oras sa atong kinabuhi nga kinahanglan natong dugmukon. Kinahanglan kita nga magmaalamon sa atong paghukom sa pagsiguro nga ang pagsukod sa oras sakto nga pagkabalanse aron malakip ang Ginoo, pamilya, trabaho, ug maayo nga makalingaw nga mga kalihokan. Daghan na ang nakadiskobre, adunay nagkadugang nga kalipay sa kinabuhi kon atong gamiton ang atong oras sa pagpangita niadtong mga butang nga “mahiyason, matahum, o maayo og dungog o dalaygon” (Mga Artikulo sa Hugot nga Pagtuo 1:13).

Ang oras dali kaayong molihok sa hagtik sa orasan. Karon usa ka maayo nga adlaw, samtang ang orasan sa pagkamortal mohagtik, sa pagribyu unsay atong gibuhay sa pagpangandam sa pagsugat sa Dios. Ako mopamatuod nga dakong mga ganti alang niadtong mogahin og oras dinhi sa mortalidad sa pagpangandam alang sa pagka-imortal ug kinabuhing dayon. Sa pangalan ni Jesukristo, amen. ■

MUBO NGA SULAT

1. Tan-awa sa Provo Utah Stake kinatibuk-ang hilisgutan, Abr. 6, 1856, vol. 10 (1855–60), Church History Library, Salt Lake City, 273 (spelling, punctuation, ug capitalization gibag-o): “Si Father [Emer] Harris miingon nga ang Apostol miingon nga kita kinahanglan nga makig-away batok sa mga kaharian ug mga gahum sa ambungang mga dapit. Si Bro. Hiram Page nakakalot gikan sa yuta og itum nga bato [ug] gisulod sa iyang bulsa Sa pag-abut niya sa balay, gitan-aw niya kini. Nagdala kini og sentence diha sa papel sa pagbagay kini. Human dayon sa pagsulat niya sa usa ka sentence, lain nga sentence migula diha sa bato, hangtud nasulat niya ang 16 ka pahina. Si Bro. Joseph gisultihan sa hitabo. Usa ka tawo nangutana ni Joseph kon kini husto ba. Siya miingon nga wala siya mahibalo, apan nag-ampo siya ug nakadawat og pagpadayag nga ang bato iya sa yawa. Unya nadugmok kini ug ang mga sinulat nasunog. Kini buhat sa gahum sa kangitngitan. Amen.”



Ni Elder Carl B. Cook
Sa Seventy

Mas Maayo nga Mohangad

Kon kita, sama ni Presidente Monson, mogamit sa atong hugot nga pagtuo ug mohangad sa Dios alang sa panabang, kita dili mabug-atan sa mga palas-anon sa kinabuhi.

Human sa makapoy nga adlaw sa hapit na matapos ang akong unang semana isip General Authority, ang akong briefcase napuno pag-ayo ug ang akong hunahuna nabalaka sa pangutana “Unsaon ko kaha sa pagbuhay niini?” Mibiya ako sa opisina sa Seventy ug misulod sa elevator sa Church Administration Building. Samtang nagpaubos ang elevator, nagduko ako ug nagtutok sa salog nga blangko ang hunahuna.

Miabli ang pultahan ug usa ka tawo misulod, apan wala ako mohangad. Sa pagsira sa pultahan, akong nabatian ang usa ka tawo nga nangutana, “Unsay imong gitan-aw diha sa ubos?” Nailhan ko kadto nga tingog—kang Presidente Thomas S. Monson.

Dali akong mihangad ug mitubag, “Ah, wala.” (Sigurado ako nga kadtong alisto nga tubag mihatag og pagsalig sa akong mga abilidad!)

Apan iyang nakita ang akong seryoso nga panagway ug ang akong bug-at nga briefcase. Siya mipahiyum ug mahigugmaong misugyot, samtang nagtudlo sa langit, “Mas maayo nga mohangad!” Samtang nagpaubos pa kami og usa pa ka andana,

siya malipayong mipasabut nga siya paingon ngadto sa templo. Sa dihang nanamilit siya kanako, ang iyang pasiplat nga pagpanamilit misulti pag-usab sa akong kasingkasing, “Karon, hinumdumi, mas maayo nga mohangad.”

Sa among pagbulag, ang mga pulong sa kasulatan misulod sa akong hunahuna: “Tuo sa Dios, tuo nga siya mao . . . ; tuo nga siya aduna sa tanan nga kaalam, ug tanan nga gahum, sa langit ug sa yuta.”¹ Samtang ako naghunahuna sa gahum sa Langitnong Amahan ug ni Jesukristo, nakaplagan sa akong kasingkasing ang kahupayan nga akong gipangita sa kawang gikan sa salog nianang nagkaubos nga elevator.

Sukad niadtong nakapamalandong ako niini nga kasinatian ug sa tahas sa mga propeta. Nabug-atan ako ug ako nagduko. Samtang ang propeta misulti, mitan-aw ako kaniya. Iyang gi-usab ang direksyon sa akong atensyon sa paghangad ngadto sa Dios, diin ako mamaayo ug malig-on pinaagi sa Pagula ni Kristo. Mao kana ang gibuhay sa mga propeta alang kanato. Sila naggiya kanato ngadto sa Dios.²

Mopamatuod ako nga si Presidente Monson dili lamang usa ka propeta, manalagna, ug tigpadayag; siya usab talagsaon nga ehemplo sa nagsunod sa baruganan sa paghangad. Sa tanang mga tawo, makapamati siya nga nabug-atan pag-ayo pinaagi sa iyang mga responsibilidad. Bisan pa niana, siya naggamit og dakong hugot nga pagtuo ug napuno uban sa pagsalig, kaalam, ug gugma alang sa tanan. Ang iyang kinaiya mao ang “makahimo” ug “mohimo.” Nagsalig siya sa Ginoo ug nagsalig Kaniya alang sa kalig-on, ug ang Ginoo nanalangin kaniya.

Ang kasinatian nagtudlo kanako nga kon kita, sama ni Presidente Monson, mogamit sa atong hugot nga pagtuo ug mohangad sa Dios alang sa panabang, kita dili mabug-atan sa mga palas-anon sa kinabuhi. Kita dili mobati nga dili makahimo sa unsay gitawag nga atong buhaton o kinahanglang buhaton. Kita malig-on, ug ang atong kinabuhi mapuno sa kalinaw ug hingpit nga kalipay.³ Kita makaamgo nga kasagaran sa atong gikabalak-an dili mahangturon ang hinungdan—ug kon kini mao, ang Ginoo motabang kanato. Apan kinahanglan nga kita adunay hugot nga pagtuo sa paghangad ug kaisug sa pagsunod sa Iyang direksyon.

Nganong kini usa ka hagit ang kanunay nga paghangad diha sa atong mga kinabuhi? Tingali kita kulang sa hugot nga pagtuo nga ang ingon ka yano nga buhat makasulbad sa atong mga problema. Sama pananglit, sa dihang ang mga anak sa Israel gipaak sa makahilo nga mga bitin, si Moises gisugo sa pagpataas og usa ka bitin nga tumbaga diha sa usa ka tukon. Ang bitin nga tumbaga nagrepresentar kang Kristo. Kinsa kadtong mihangad sa bitin, sama sa gitambag sa propeta, nangaayo.⁴ Apan daghan ang wala mohangad, ug sila nangamatay.⁵

Si Alma miuyon nga ang rason nga ang mga Israelita wala mohangad ngadto sa bitin tungod kay sila wala motuo nga ang pagbuhay niini makaayo kanila. Ang mga pulong ni Alma atong magamit karon:

“O akong mga kaigsoonan, kon kamo mamaayo pinaagi lamang sa pagpunting sa inyong mga mata



aron kamo mamaayo, dili ba kamo motan-aw diha-diha, o kamo magpatig-a lamang sa inyong mga kasingkasing diha sa walay pagtuo, ug magtinapulan . . . ?

“Kon mao, kaalaot sa inyong dangatan; apan kon dili mao, diha niana ipunting ang inyong mga mata ug sugdi ang pagtuo sa Anak sa Dios, nga siya moanhi sa pag-ula sa iyang dugo alang sa iyang mga katawhan, ug nga siya mag-antus ug mamatay aron sa pagtubos sa [atong] mga sala; ug nga siya mobangon pag-usab gikan sa mga patay.”⁶

Ang awthag ni Presidente Monson sa paghangad usa ka pasumbingay aron paghinumdom ni Kristo. Samtang kita naghinumdom Kaniya ug nagsalig sa Iyang gahum, kita makadawat og kalig-on pinaagi sa Iyang Pag-ula. Kini mao ang paagi diin kita mahupay sa atong mga kabalaka, palas-anon, ug pag-antus. Kini mao ang paagi diin kita mapasaylo ug mamaayo sa kasakit sa atong mga sala. Kini mao ang paagi diin kita makadawat sa hugot nga pagtuo ug kalig-on sa paglahutay sa tanang mga butang.⁷

Bag-ohay lang si Sister Cook ug ako mitambong og komperensya sa mga babaye sa South Africa. Human kami maminaw sa pipila ka makapadadig nga mensahe sa paggamit sa Pag-ula diha sa atong mga kinabuhi, ang presidente sa Relief Society sa stake midapit sa tanan sa pag-adto sa gawas. Kaming tanan gihatagan og helium balloon. Siya mipasabut nga ang among balloon nagrepresentar sa bisan unsa nga palas-anon, pagsulay, o kalisud nga nagpugong sa atong mga kinabuhi. Sa pag-ihap og tulo, among gibuhian ang among mga balloon, o ang among “mga palas-anon.” Samtang

kami mihangad ug mitan-aw sa among mga palas-anon nga milupad, dihay madungog nga “Ahhhh.” Kadtong yano nga buhat sa pagbuhay sa among mga balloon naghatag og talagsaong pahinumdom sa dili mahulagway nga kalipay nga naggikan sa paghangad ug paghunahuna kabahin ni Kristo.

Dili sama sa pagbuhay sa helium balloon, ang espirituhanong paghangad dili usa lamang ka higa-yon nga kasinatian. Kita nagkat-on gikan sa pag-ampo sa sakrament nga kita sa kanunay mohinumdom Kaniya ug mohupot sa Iyang mga sugo, aron kita makabaton sa Iyang Espiritu uban kanato matag adlaw sa paggiya kanato.⁸

Sa dihang ang mga anak sa Israel naglatagaw sa kamingawan, ang Ginoo migiya sa ilang panaw matag adlaw samtang sila naghangad Kaniya alang sa direksyon. Diha sa Exodo atong mabasa, “Ug ang Dios milakaw nga nag-una kanila pinaagi sa usa ka haligi nga panganod, aron sa pagmando kanila sa dalan, ug sa kagabhion pinaagi sa usa ka panganod sa kalayo, sa pag-iwag kanila.”⁹ Ang Iyang paggiya makanunayon, ug akong ihatag kaninyo ang akong mapainubsanong pagsaksi nga ang Ginoo makahimo sa sama alang kanato.

Busa unsaon Niya sa paggiya kanato karon? Pinaagi sa mga propeta, apostoles, ug mga lider sa priesthood ug pinaagi sa mga pagbati nga moabut kanato human nato ibu-bu ang atong kasingkasing ug mga kalag ngadto sa Langitnong Amahan diha sa pag-ampo. Siya naggiya kanato samtang kita nagbiya sa mga butang sa kalibutan, naghinulsol, ug nag-usab. Siya naggiya kanato samtang kita nagsunod sa Iyang mga sugo

ug maningkamot nga mas mahisama Kaniya. Ug Siya naggiya kanato pinaagi sa Espiritu Santo.¹⁰

Aron magiyahan sa panaw sa kinabuhi ug adunay makanunayon nga pakig-uban sa Espiritu Santo, kita kinahanglan nga dunay “mapatalinghugon nga igdulungog” ug “matinanawong mata,” nga nakadirekta sa itaas.¹¹ Kita kinahanglang mosunod sa giya nga atong nadawat. Kita kinahanglang mohangad ug mobuhat. Ug samtang kita nagbuhat, nasayud ako nga kita magmaya, kay ang Dios gusto nga kita malipay.

Kita mga anak sa Langitnong Amahan. Siya gusto nga mahimong kabahin sa atong mga kinabuhi, sa pagpanalangin kanato, ug sa pagtabang kanato. Siya moayo sa atong mga samad, mopauga sa atong mga luha, ug motabang kanato diha sa dalan sa pagbalik ngadto sa Iyang presensya. Samtang kita naghangad Kaniya, Siya mogiya kanato.

Ang Dios kahayag; unsay kahadlokian? Adlaw ug gabii siya ang kauban. . . . Kalipay ug awit siya. Adlaw ug gabii siya kanako . . . naggiya.¹²

Ako mopamatuod nga ang atong mga sala mapasaylo ug ang atong palas-anon mogaan samtang kita mohangad kang Kristo. “Ato siya nga hinumduman, . . . ug dili iduko ang atong mga ulo,”¹³ kay, sama sa gisulti ni Presidente Monson, “Mas maayo nga mohangad.”

Ako mopamatuod nga si Jesus mao ang atong Manluluwas ug Manunubos sa pangalan ni Jesukristo, amen. ■

MUBO NGA MGA SULAT

1. Mosiah 4:9.
2. Tan-awa sa 2 Nephi 25:23, 26.
3. Tan-awa sa Mosiah 24:15.
4. Tan-awa sa Numeros 21:8–9.
5. Tan-awa sa 1 Nephi 17:41.
6. Alma 33:21–22; tan-awa usab sa mga bersikulo 19–20.
7. Tan-awa sa Alma 36:3, 17–21; 3 Nephi 9:13.
8. Tan-awa sa Doktrina ug mga Pakigsaad 20:77.
9. Exodo 13:21.
10. Tan-awa sa 2 Nephi 9:52; 31:13; Doktrina ug mga Pakigsaad 121:46.
11. Proverbio 20:12.
12. “The Lord Is My Light,” *Hymns*, no. 89.
13. 2 Nephi 10:20.



Ni Elder LeGrand R. Curtis Jr.
Sa Seventy

Katubsanan

Pinaagi kang Kristo, ang mga tawo makahimo ug makausab sa ilang kinabuhi ug makabaton og pagtubos.

Adunay nagkalainlaing mga pangalan nga gigamit alang ni Ginoong Jesukristo. Kining mga pangalan nakahatag nato og panabut sa lainlaing aspeto sa maulaong mision sa Ginoo. Pananglitan, ang titulo nga “Manluluwas.” Kitang tanan nahibalo sa kahulugan sa maluwas kay matag usa nato nakasulay na nga maluwas gikan sa usa ka butang. Isip mga bata, ang akong igsoong babaye ug ako nagdula sa sapa sakay sa gamayng sakayan dihang sa walay paghunahuna mibiya kami sa luwas nga dapit nga kadulaan ug nadala sa sulog ngadto sa wala mahibaloing peligro sa ubos. Agig tubag sa among paghilak, ang among amahan mitabang, miluwas namo sa kakuyaw sa sapa. Kon maghunahuna ko og pagluwas, makahunahuna ko niana nga kasinatian.

Ang titulo nga “Manunubos” makahatag og susamang mga panabut. “Ang pagtubos” mao ang pagpalit o pagpalit og balik. Isip legal nga butang, ang kabtangan matubos pinaagi sa pagbayad nga data-datahan o sa mga utang. Sa panahon sa Daang Tugon, ang balaod ni Moises nakahatag og laing mga paagi nga ang mga sulugoon ug kabtangan mapalingkawas, o matubos, pinaagi sa pagbayad og kwarta (tan-awa sa Levitico 25:29–32, 48–55).

Usa ka nailang gigamit nga pulong sa kasulatan nga *tubos* naglambigit sa pagpalingkawas sa mga anak sa Israel gikan sa ilang pagka-ulipon sa Ehipto. Human niana nga pagpalingkawas, si Moises miingon nila: “Apan tungod kay ang Ginoo nahigugma kaninyo, . . . mao nga gikuha kamo [Niya] pinaagi sa kamot nga kusgan, ug gitubos niya kamo gikan sa balay sa kaulipnan, gikan sa kamot ni Paraon nga hari sa Ehipto” (Deuteronomio 7:8).

Ang tema kabahin ni Jehova nga mitubos sa katawhan sa Israel gikan sa pagka-ulipon gibalik-balik og kadaghan diha sa mga kasulatan. Sa kasagaran gihimo kini aron pagpahinumdom sa katawhan bahin sa kaayo sa Ginoo sa pagpalingkawas sa mga anak sa Israel gikan sa mga Ehiptohanon. Apan gibuhat usab kini aron pagtudlo nila nga adunay lain, mas importante, nga pagtubos alang sa Israel. Si Lehi nagtudlo: “Ug ang Mesiyas moanhi sa kahingpitan sa panahon, nga aron siya motubos sa mga katawhan gikan sa pagkapukan” (2 Nephi 2:26).

Ang salmista misulat: “Apan pagalukat sa Dios ang akong kalag gikan sa gahum sa lubnganan” (Salmo 49:15).

Ang Ginoo namahayag pinaagi kang Isaias: “Gipapas ko, ingon sa mabaga nga panganod, ang imong kalapasan, ug, ingon sa usa ka panganod, ang



*Gugma, kalooy, magkita
Unsa ka balaan!*
("Unsa ka Dako sa Kaalam ug sa
Gugma," *Mga Himno ug mga Awit
sa mga Bata*, nu. 19).

Si Presidente Boyd K. Packer nagtudlo: "Adunay usa ka Manunubos, Tigpataliwala, nga nagbarug nga andam ug makahimo sa pagtagbaw sa mga gikinahanglan sa kaangayan ug mohatag og kalooy niadtong mahinulsulon" ("The Mediator," *Ensign*, Mayo 1977, 56).

Ang kasulatan, literatura, ug ang mga kasinatian sa kinabuhi puno sa mga istorya sa pagtubos. Pinaagi kang Kristo, ang mga tawo makahimo ug makausab sa ilang kinabuhi ug makabaton og pagtubos. Ganahan ko niining mga istorya sa pagtubos.

Aduna koy higala nga wala magsunod sa mga pagtulun-an sa Simbahan sa iyang kabatan-on. Dihang young adult na siya, nakaamgo siya kon unsay nawala niya tungod sa wala pagsunod sa ebanghelyo. Naghinulsol siya, nag-usab sa iyang kinabuhi, ug mipahinugod sa iyang kaugalingon sa matarung nga kinabuhi. Usa ka adlaw, mga katuigan na human sa among panag-uban sa kabatan-on, ako siyang nahimamat sa templo. Ang kahayag sa ebanghelyo midan-ag sa iyang mga mata, ug akong nabantayan nga usa na siya ka mapahinuguron nga miyembro sa Simbahan nga misulay sa pagsunod sa ebanghelyo sa hingpit. Kana usa ka istorya sa pagtubos.

Nakainterbyu ko kausa og babaye para bunyagan nga nakahimo og grabe nga sala. Atol sa interbyu ako siyang gipangutana kon nakasabut ba siya nga kinahanglang dili na niya usbon kana nga sala. Sa dakong emosyon sa iyang mga mata ug sa iyang tingog, siya miingon, "O presidente, dili na ko himoon kana nga sala pag-usab. Kana ang rason nga gusto kong magpabunyang—aron malimpyo ko sa mga epekto nianang grabe nga sala." Kana usa ka istorya sa katubsan.

Sa akong pagbisita sa mga kompetensya sa stake ug ubang miting sa milabayng katuigan, akong gidala ang panawagan ni Presidente Thomas S.

imong mga sala: Bumalik ka kanako; kay gilukat ko na ikaw" (Isaias 44:22).

Ang katubsan nga gipasabut niining tulo ka kasulatan, siyempre, mao ang Pag-ula ni Jesukristo. Mao kini ang "madagayaong pagtubos" nga gihatag sa atong mahigugmaong Dios (Salmo 130:7). Dili sama sa pagtubos ubos sa balaod ni Moises o sa moderong legal nga kasabutan, kini nga pagtubos dili moabut pinaagi sa "mga butang nga madugta, ingon sa salapi ug bulawan" (1 Pedro 1:18). "Diha [ni Kristo] kita may katubsan pinaagi sa iyang dugo, may kapasayloan alang sa atong mga paglapas, sumala sa kadagaya sa grasya sa Dios" (Mga Taga-Efeso 1:7). Si Presidente John Taylor nagtudlo nga tungod sa sakripisyo sa Manunubos, "ang utang nabayran, ang katubsan nahimo, ang pakigsaad natuman, ang kaangayan natagbaw, ang pagbuot sa Dios nahimo, ug ang tanang gahum . . . anaa na sa mga kamot sa Anak sa Dios" (*Mga Pagtulun-an sa mga Presidente sa Simbahan: John Taylor* [2001], 54).

Ang mga epekto niini nga pagtubos naglakip sa pagbuntog sa pisikal nga kamatayon alang sa tanang mga anak sa Dios. Nagpasabut, nga ang temporal nga kamatayon nabuntog ug ang

tanang mabanhaw. Laing aspeto niini nga pagtubos pinaagi ni Kristo mao ang kadaugan batok sa espirituhanong kamatayon. Pinaagi sa Iyang pag-antus ug kamatayon, si Kristo mibayad sa mga sala sa tanang katawhan sa kondisyon sa indibidwal nga paghinulsol.

Sa ingon, kon maghinulsol kita, mapasaylo kita sa atong mga sala, ang bugti gibayaran pinaagi sa atong Manunubos. Maayo kini nga balita alang kanatong tanan, "sanglit nakasala man ang tanan, ug nakabsan sa himaya sa Dios" (Mga Taga-Roma 3:23). Kadtong labihang nahisalaag gikan sa mga dalan sa pagkamatarung nagkinahanglan gayud niini nga pagtubos, ug kon hingpit sila nga maghinulsol, ila kanang maangkon. Apan kadtong nagtrabaho og maayo aron magpuyo og maayong kinabuhi nagkinahanglan usab gayud niini nga pagtubos, kay walay usa nga makaadto sa presensya sa Amahan kon wala ang tabang ni Kristo. Sa ingon, kining mahigugmaong pagtubos nagtugot sa mga balaod sa kaangayan ug kalooy nga matagbaw diha sa kinabuhi sa tanang maghinulsol ug mosunod kang Kristo.

*Kadako, ug kahimaya,
Laraw's kahuwasan*

Monson sa pagluwas sa dili kaayo aktibo nga mga miyembro sa Simbahan. Sa usa ka komperensya sa stake gisaysay nako ang istorya bahin sa usa ka dili kaayo aktibo nga miyembro nga mibalik sa hingpit nga pagkaaktibo human ang iyang bishop ug ubang mga lider mibisita niya, misulti niya nga gikinahanglan siya, ug mitawag niya sa pagserbisyo sa ward. Ang tawo sa istorya wala lang modawat sa tawag apan miusab sa iyang kinabuhi ug mga naandang buhat ug nahimong hingpit nga aktibo sa Simbahan.

Usa nako ka higala diha sa kongregasyon diin akong gisulti kana nga istorya. Ang iyang panagway klaro nga nausab samtang ang istorya gisaysay. Mi-e-mail siya nako pagkasunod adlaw nga nagsulti nako sa iyang emosyonal nga reaksyon sa istorya kay ang istorya sa pagbalik sa pagkaaktibo sa iyang ugangang lalaki susama gayud sa akong gisaysay. Iya kong gisultihan nga isip resulta sa susama nga pagbisita sa bishop ug pagdapit nga moserbisyo sa Simbahan, ang iyang ugangang lalaki mitimbang-timbang sa iyang kinabuhi ug sa iyang pagpamatuod, mihimo og dakong kausaban sa iyang kinabuhi, ug midawat sa tawag. Kanang naaktibo og balik nga tawo karon aduna nay 88 ka kaliwatan nga aktibong mga miyembro sa Simbahan.

Sa usa ka miting pipila ka adlaw ang milabay akong gisaysay ang duha ka istorya. Pagkasunod adlaw nakadawat ko og laing e-mail nga gisugdan og “Mao usab kana ang istorya sa akong amahan.” Kana nga e-mail, gikan sa usa ka presidente sa stake, misaysay kon sa unsang paagiha ang iyang amahan gidapit nga moserbisyo sa Simbahan, bisan tuod nga dili siya aktibo ug adunay pipila ka naandang buhat nga kinahanglang usbon. Iyang gidawat ang pagdapit, ug sa maong higayon, naghinulsol, sa katapusan miserbisyo isip presidente sa stake ug dayon presidente sa misyon, ug mipahimutang sa pundasyon alang sa iyang mga kaliwatan nga mahimong matinud-anong mga miyembro sa Simbahan.



Pipila ka semana ang milabay gisaysay nako ang tulo ka istorya sa laing komperensya sa stake. Human sa miting, usa ka tawo ang miduol nako ug misulti nako nga *dili* kana mao ang istorya sa iyang amahan. Kadto *iyang* istorya. Iya kong gisultihan sa mga panghitabo nga nakapahinulsol ug nakapabalik niya sa hingpit nga pagkalambigit sa Simbahan. Nakadungog ko og sunod-sunod nga mga istorya sa katubsan.

Bisan tuod nga dili gayud kita makabayad sa Manunubos sa unsay Iyang gibayad alang nato, ang plano sa katubsan nagkinahanglan sa atong pinakamaayong mga paningkamot sa hingpit nga paghinulsol ug pagbuhat sa kabubut-on sa Dios. Si Apostol Orson F. Whitney misulat:

*Manhuluwas, Manunubos sa kalag ko,
Kansang gamhanang kamot gihingpit ako,
Kansang katingalahang gahum kanako nag-amuma*

Ug gipuno sa tam-is ang pait ko nga kupa!

*Unsa ako ka mapasalamaton,
O Dios sa Israel nga maloloy-on.*

*Dili gayud ako makabayad nimo,
Ginoo,
Apan makahigugma ako kanimo.*

*Ang Imong putli nga pulong,
Dili ba kini ang kalipay ko,
Maadlaw, ug magabii ang damgo?
Mga ngabil ko mosangyaw,
Kinabuhi ko sa kabubut-on mo moaninaw.*

*(“Savior, Redeemer of My Soul,”
Hymns, nu. 112)*

Akong ihatag ang akong pagpamatuod bahin sa gahum sa Pag-ula ni Kristo. Kon kita maghinulsol ug moduol kaniya, makadawat kita sa tanang mga panalangin sa kinabuhing dayon. Nga kita unta mobuhat sa ingon, modawat sa atong kaugalingong istorya sa pagtubos, mao ang akong pag-ampo sa pangalan ni Jesukristo, amen. ■



Ni Elder D. Todd Christofferson

Sa Korum sa Napulog Duha ka mga Apostoles

Ang Balaanong Gasa sa Paghinulsol

Pinaagi lamang sa paghinulsol nga atong maangkon ang maulaong grasya ni Jesukristo.

Ang Basahon ni Mormon naglangkob sa asoy sa tawo nga ginganlan og Nehor. Sayon sabton kon nganong si Mormon, sa paghiusa sa usa ka libo ka tuig nga mga rekord sa Nephite, naghunahuna nga importante nga apilan og gamay mahitungod niining tawhana ug ang malungtarong impluwensya sa iyang doktrina. Si Mormon nagtinguha sa pagpasidaan nato, nahibalo nga kini nga pilosopiya motumaw og balik sa atong panahon.

Si Nehor unang nahisgutan mga 90 ka tuig sa wala pa matawo si Kristo. Nagtudlo siya “nga ang tanan nga mga katawhan kinahanglan maluwas sa katapusan nga adlaw, . . . kay ang Ginoo milalang sa tanan nga mga tawo, ug usab mitubos sa tanan nga mga tawo; ug, sa katapusan, ang tanan nga mga tawo kinahanglan makaangkon og kinabuhi nga dayon” (Alma 1:4).

Mga 15 ka tuig ang milabay, si Korihor miabut taliwala sa mga Nephite nga nagsangyaw ug nagpakatip sa doktrina ni Nehor. Girekord sa Basahon ni Mormon nga “siya Anti-Kristo, kay siya misugod sa pagsangyaw ngadto sa mga katawhan batok sa mga panagna . . . mahitungod sa pag-anhi

ni Kristo” (Alma 30:6). Ang mensahe nga gisangyaw ni Korihor mao “nga walay pag-ula nga gihimo alang sa mga sala sa mga tawo, apan ang matag tawo makasinati niini nga kinabuhi sumala sa panglihok sa tawo; busa matag tawo mouswag sumala sa iyang kinaadman, ug nga ang matag tawo makadaug sumala sa iyang kusog; ug bisan unsa ang buhaton sa tawo dili kalapasan” (Alma 30:17). Kining mini nga mga propeta ug ang ilang mga sumusunod “wala motuo sa paghinulsol sa ilang mga sala” (Alma 15:15).

Sama sa panahon nila ni Nehor ug Korihor, nagpuyo kita sa panahon nga hapit na moabut si Jesukristo—sa atong sitwasyon mao ang panahon sa pagpangandam sa Iyang Ikaduhang Pag-anhi. Ug sa samang paagi, ang mensahe sa paghinulsol kasagaran dili gayud dawaton. Ang uban nag-ingon nga kon adunay Dios, Siya wala untay mga pangayoon nato (tan-awa sa Alma 18:5). Ang uban karon nag-ingon nga ang usa ka mahigugmaong Amahan mopasaylo sa tanang sala pinaagi sa yano nga pagkumpisal, o kon aduna man gayuy silot sa sala, “ang Dios molatigo kanato uban sa pipila ka mga latos, ug sa katapusan

kita maluwas diha sa gingharian sa Dios” (2 Nephi 28:8). Ang uban, sama ni Korihor, mihimakak sa pagkaanaa ni Kristo ug sa pagkaanaa sa sala. Ang ilang doktrina mao nga ang mga hiyas, mga sumbanan, ug gani ang kamatuoran pareho ra. Mao nga, bisan unsay bation sa tawo nga saktong alang kaniya dili mahimong hukman sa uban nga sayop o sala.

Kon tan-awon ang ingon nga mga pilosopiya morag nindot kay nagtugot nato sa pagtugyan ngadto sa mga gana o tinguha bisan unsa pa ang mga sangputanan. Pinaagi sa paggamit sa mga pagtulun-an nila ni Nehor ug Korihor, makarason ug makapangatarungan kita sa bisan unsang butang. Kon ang mga propeta moabut nga magsangyaw og paghinulsol, kini “makapasagmuyo sa makasasala.” Apan sa tinuod ang panawagan sa propeta angayang dawaton sa kalipay. Kon walay paghinulsol walay tinuoray nga pag-uswag o paglambo sa kinabuhi. Ang pag-pakaaron-ingon nga walay sala dili makapaminus sa kabug-at ug kasakit. Ang pag-antus alang sa sala kon kini lang dili makapausab sa bisan unsang butang alang sa mas maayo. Ang paghinulsol lamang ang modala ngadto sa mas maayo nga kinabuhi. Ug, siyempre, pinaagi lamang sa paghinulsol nga atong maangkon ang maulaong grasya ni Jesukristo ug kaluwasan. Ang paghinulsol usa ka balaang gasa ug kinahanglan nga adunay pahiyom sa atong mga nawong kon kita maghisgut niini. Motudlo kini nato ngadto sa kagawasan, pagsalig, ug kalinaw. Imbis mopakgang sa pagmaya, ang gasa sa paghinulsol mao ang hinungdan sa tinuod nga pagmaya.

Ang paghinulsol posible lamang tungod sa Pag-ula ni Jesukristo. Ang Iyang walay katapusang sakripisyo ang “modala og mga kahigayunan sa mga tawo nga sila mahimo nga makabaton og hugot nga pagtuo ngadto sa paghinulsol” (Alma 34:15). Ang paghinulsol mao ang gikinahanglan nga kondisyon, ug ang himaya ni Kristo mao ang gahum diin “ang kalooy motagbaw sa mga gipangayo sa kaangayan” (Alma 34:16). Ang atong pagsaksi mao kini:

“Kami nahibalo nga ang kapaa-ngayan [o kapasayloan sa mga sala] pinaagi sa grasya sa atong Ginoo ug Manluluwas nga si Jesukristo makiangayon ug tinuod;

“Ug kami nahibalo usab, nga ang pagbalaan [o pagkalimpyo gikan sa mga epekto sa sala] pinaagi sa grasya sa atong Ginoo ug Manluluwas nga si Jesukristo mao ang makiangayon ug tinuod, ngadto sa tanan kinsa nahigugma ug nag-alagad sa Dios sa ilang tibuok nga mga gahum, mga hunahuna, ug kusog” (D&P 20:30–31).

Ang paghinulsol halapad nga hilisgutan, apan karon gusto kong mohisgut og lima lamang ka aspeto niining mahinungdanong baruganan sa ebanghelyo nga akong gilauman nga makatabang.

Una, ang pagdapit sa paghinulsol usa ka pagpahayag sa gugma. Sa dihang ang Manluluwas “misugod sa pagwali, nga nag-ingon, Paghinulsol kamo: kay ang gingharian sa langit haduol na” (Mateo 4:17), kadto usa ka mensahe sa paghigugma, nagdapit sa tanan nga mahimong sarang aron mokuyog Kaniya “ug motagamtam sa mga pulong sa kinabuhi nga dayon niini nga kalibutan, ug kinabuhi nga dayon [mismo] sa kalibutan nga moabut” (Moises 6:59). Kon kita dili modapit sa uban sa pag-usab o kon kita wala momando og paghinulsol sa atong kaugalingon, pakyas kita sa mahinungdanong katungdanan nga kita obligado ngadto sa usag usa ug sa atong kaugalingon. Ang ginikanan nga motugot ra sa ilang mga anak nga makasala, ang walay pagpakabana nga higala, ang mahadlokong lider sa Simbahan sa tinuoray mas nagpakabana sa ilang kaugalingon kay sa kaayohan ug kalipay niadtong ila untang matabangan. Oo, ang tawag sa paghinulsol usahay gitan-aw nga dili matugtanon o makapasilo, ug gani gikasilagan, apan giniyahan sa Espiritu, sa tinuoray kini usa ka buhat sa tiunay nga pagpangga (tan-awa sa D&P 121:43–44).

Ikaduha, ang paghinulsol nagpasabut og paningkamot nga mausab. Bugal-bugal kini sa pag-antus sa Manluluwas sa Tanaman sa Getsemani



ug didto sa krus nga kita magdahum nga Siya kinahanglang mousab nato ngadto sa pagkamatarung nga walay tinud-anay nga pagpaningkamot sa atong bahin. Hinoon, atong tinguhaon ang Iyang grasya nga mohingpit ug moganti sa atong labing maku-gihon nga paningkamot (tan-awa sa 2 Nephi 25:23). Tingali sama sa atong pag-ampo alang sa kalooy, kita kinahanglang mag-ampo alang sa panahon ug oportunidad sa pagbuhat ug pagpaningkamot ug pagbuntog sa sala. Sigurado gayud nga ang Ginoo mopanalangin sa tawo nga nagtinguha nga takus nga moatubang sa hukmanan, kinsa determinadong naningkamot matag adlaw nga pulihan ang kahuyang og kalig-on. Ang tinuod nga paghinulsol, tinuod nga kausaban mahimong magkinahanglan og balik-balik nga pagsulay, apan adunay butang nga makapalunsay ug makapabalaan niana nga paningkamot. Ang balaang pagpasaylo ug pag-ayo hilum nga moabut niana nga kalag, kay sa pagkatinuod, “ang hiyas mohigugma sa hiyas; ang kahayag mounong ngadto sa kahayag; [ug] ang kalooy adunay kapuangod sa kalooy ug moangkon sa iyang kaugalingon” (D&P 88:40).

Pinaagi sa paghinulsol kanunay natong mapalambo ang atong kapasidad sa pagsunod sa celestial nga balaod, kay atong masayran nga “siya kinsa dili makahimo sa pagsunod sa balaod sa celestial nga gingharian dili makalahutay sa celestial nga himaya” (D&P 88:22).

Ikatulo, ang paghinulsol nagpasabut nga dili lamang biyaan ang sala apan mopasalig nga magmasulundon. Ang Bible Dictionary namahayag, “Ang paghinulsol nagkahulugan nga mopahibalik sa iyang kasingkasing ug kabubut-on ngadto sa Dios, [ingon man usab] mobiya sa sala nga sagad natong nahimo.”¹ Usa sa pipila ka mga ehemplo niini nga pagtulun-an sa Basahon ni Mormon makita sa mga pulong ni Alma ngadto sa usa sa iyang anak nga mga lalaki:

“Busa ako mosugo kanimo, akong anak, agi og pagtahud sa Dios, nga ikaw makapugong gikan sa imong mga kadautan;

“Nga ikaw mobalik sa Ginoo uban sa tibuok nimo nga hunahuna, gahum, ug kusog” (Alma 39:12–13; tan-awa usab sa Mosiah 7:33; 3 Nephi 20:26; Mormon 9:6).

Sa atong pagdangup sa Ginoo aron makompleto ang paghinulsol, kinahanglang naglakip kini og wala nay lain pa kondili ang pakigsaad sa pagkamasulundon ngadto Kaniya. Kanunay kita nga maghisgut niini nga pakigsaad isip pakigsaad sa bunyag kay kini gipakita pinaagi sa pagbunyang sa tubig (tan-awa sa Mosiah 18:10). Ang bunyag mismo sa Manluluwas, naghatag og ehemplo, nagmatuod sa Iyang pakigsaad sa pagsunod sa Amahan. “Apan bisan pa sa iyang pagkabalaan, siya mipakita ngadto sa mga katawhan nga, sumala sa unod siya nagpaubos sa iyang kaugalingon atubangan sa Amahan, ug nagsaksi

sa Amahan nga siya magmasulundon ngadto kaniya sa paghupot sa iyang mga sugo” (2 Nephi 31:7). Kon wala kini nga pakigsaad, ang paghinulsol dili mahingpit ug ang mga sala dili mapasaylo.² Sa halandumon nga pagpahayag ni Propesor Noel Reynolds, “Ang pagpili nga maghinulsol usa ka pagpili sa pagsunog sa mga taytayan sa matag direksyon [determinado] sa pagsunod sa hangtud sa *usa* lamang ka dalan, sa *usa* ka agianan nga nagpaingon ngadto sa kinabuhing dayon.”³

Ikaupat, ang paghinulsol nagkinahanglan og tinuoray nga katuyoan ug kaandam sa pagpadayon, bisan sa mga kasakit. Ang pagsulay sa paghimog listahan sa piho nga mga lakang sa paghinulsol mahimong makatabang sa uban, apan mahimo usab kining modala ngadto sa paagi nga wala sa hunahuna, listahan lang sa mga lakang sa paghimo nga walay tinuod nga pagbati o kausaban. Ang tinuod nga paghinulsol dili pagpakaaron-ingnon. Ang Ginoo mihatag og duha ka mahinungdanong mga kinahanglanon: “Pinaagi niini kamo masayud kon ang usa ka tawo naghinulsol sa iyang mga sala—tan-awa, siya mokumpisal kanila ug mobiya kanila” (D&P 58:43).

Ang pagkumpisal ug pagbiya gamhanan nga mga konsepto. Labaw pa kini sa pag-ingon lang og “Giangkon ko kini; Pasayloa ko.” Kini usa ka lawom, sakit usahay nga pag-angkon sa sayop ug kalapasan ngadto sa Dios ug sa tawo. Ang kasubo ug pagmahay ug mapait nga mga luha kasagaran maguban sa pagkumpisal sa usa ka tawo, ilabi na kon ang iyang mga binuhatan mao ang hinungdan sa kasakit ngadto sa laing tawo, o labing pait, nagtukmod sa uban sa pagpakasala. Mao kining dakong kasakit, kining panglantaw sa mga butang ingon nga kini mao nga nagtukmod sa tawo, sama ni Alma, sa pagtuaw, ‘O Jesus, ikaw nga Anak sa Dios, malooy ka kanako, kinsa ania sa apdo sa kapaitan, ug ako giliyokan sa walay katapusan nga mga kadena sa kamatayon’ (Alma 36:18).

Pinaagi sa hugot nga pagtuo sa maloloy-ong Manunubos ug sa Iyang gahum, ang posibleng kawalay

paglaum mausab ngadto sa paglaum. Ang kasingkasing ug tinguha sa usa ka tawo mausab, ug ang kanhi makadani nga sala mahimong mag-anam kalaw-ay. Ang desisyon sa pagsalikway ug pagbiya sa sala ug paghiuli, ingon ka hingpit kutob sa mahimo, sa kadaut nga iyang nahimo bation na karon nianang bag-o nga kasingkasing. Kining lig-ong determinasyon sa dili madugay motubo ngadto sa pakigsaad sa pagsunod sa Dios. Human sa paghimo niana nga pakigsaad, ang Espiritu Santo, ang mensahero sa balaang grasya, magdala og kahupayan ug kapasayloan. Ang usa ka tawo madasig sa pagpahayag og usab sa gipahayag ni Alma, “Ug, unsa nga hingpit nga kalipay, ug unsa ka kahibulongan nga kahayag ang akong nakita; oo, ang akong kalag napuno sa hingpit nga kalipay labaw sa akong kasakit!” (Alma 36:20).

Bisan unsa nga kasakit nga gikinahanglan sa paghinulsol layo ra kay sa pag-antus nga gikinahanglan sa pagtagbaw sa kaangayan alang sa mga sala nga wala mahinulsuli. Ang Manluwas namulong og gamay kabahin sa unsay Iyang giantus aron pagtagbaw sa gipangayo sa kaangayan ug pag-ula alang sa atong mga sala, apan Siya mihimo niining mapadayagon nga pamahayag:

“Kay tan-awa, Ako, ang Dios, nagantus niini nga mga butang alang sa tanan, nga sila unta dili mag-antus kon sila maghinulsol;

“Apan kon dili sila maghinulsol sila kinahanglan gayud nga mag-antus sama kanako;

“Kansang pag-antus nakapahimo sa akong kaugalingon, gani ang Dios, ang labing halangdon sa tanan sa pagkurrog tungod sa kasakit, ug sa pag-agas sa dugo sa matag lungag sa panit, ug sa pag-antus sa lawas ug sa espiritu—ug buot nga Ako unta dili moinom sa mapait nga kopa” (D&P 19:16–18).

Ikalima, bisan unsa pa man kasakit ang paghinulsol, kini matabunan sa hingpit nga kalipay sa pagpasaylo. Sa usa ka pakigpulong sa kinatibuk-ang komperensya nga giulohan og “The Brilliant Morning of Forgiveness,” si Presidente Boyd K. Packer mihatag

niini nga analohiya:

“Niadtong Abril sa 1847, si Brigham Young nangulo sa unang grupo sa mga pioneer paggawas sa Winter Quarters. Sa samang higayon, 1,600 ka milya [2,575 km] ngadto sa kasadpan, ang luya nga mga nakasugakod sa Grupo ni Donner nahisalaag padulhog sa Kabukiran sa Sierra Nevada paingon sa Sacramento Valley.

“Sila nakasinati sa grabeng kabugnaw nga natanggong sa gitagakan sa mga snow sa ubos sa kinatumyan sa bukid. Dili katuohan nga adunay mabuhi sa kagutom sulod sa mga adlaw ug mga semana ug mga bulan ug dili mahulagway nga pag-antus.

“Apil kanila mao ang kinse anyos nga si John Breen. Sa gabii sa Abril 24, milakaw siya paingon sa Rancho sa mga Johnson. Katuigan ang milabay si John misulat:

“‘Gabii na kaayo nga miabut kami sa Rancho sa mga Johnson, mao nga una ko kining nakita pagka-ugma na sa buntag. Maayo ang panahon, ang yuta napuno sa berde nga mga sagbot, ang mga langgam nanag-awit gikan sa tumoy sa kakahoyan, ug ang panaw natapos na. Dili ko hapit makatuo nga nabuhi pa ko.

“‘Ang talan-awon nga akong nakita nianang buntaga daw dili mawala sa akong hunahuna. Kasagaran sa mga panghitabo dili na mahinumduman, apan kanunay nakong makitan ang kampo duol sa Rancho sa mga Johnson.’”

Miingon si Presidente Packer. “Sa sinugdanan naglibog gyud ko sa iyang pamahayag nga ‘kasagaran sa mga panghitabo dili na mahinumduman.’ Unsang paagiha nga ang dugayng mga bulan sa grabe nga pag-antus ug kasubo mawala sa iyang hunahuna? Unsang paagiha nga kadtong grabe ka makalilisang nga tingtugnaw mapulihan og usa ka maanindot nga kabuntagon?”

“Human sa dugang nga pagpamalandong kabahin niini, nakahukom ko nga dili diay kini makalibog. Nakakita ko og susuma nga butang nga nahitabo sa mga tawo nga akong kaila. Nakakita ko og usa ka tawo nga nakasinati og taas nga tingtugnaw sa

pagpakasala ug espirituhanong kagutom nga nagpaingon sa kabuntagon sa kapasayloan. Sa dihang ang kabuntagon miabut, sila nakakat-on niini:

“Tan-awa, siya kinsa naghinulsol sa iyang mga sala, ang mao gipasaylo, ug Ako, ang Ginoo, dili na mahinumdom kanila’ [D&P 58:42].”⁴

Ako mapasalamatong moila ug mopamatuod nga ang dili masabtan nga pag-antus, kamatayon ug Pagkabanhaw sa atong Ginoo “mopahinabo sa mga kasabutan sa paghinulsol” (Helaman 14:18). Ang balaang gasa sa paghinulsol mao ang yawe sa kalipay niining kinabuhia ug human niini. Gamit ang mga pulong sa Manluluwas ug sa dakong pagpaubos ug gugma, ako modapit kaninyo sa “paghinulsol: kay ang gingharian sa langit haduol na” (Mateo 4:17). Nasayud ko nga sa pagdawat niini nga pagdapit, makakaplag kamo og hingpit nga kalipay karon ug sa kahangturan. Sa pangalan ni Jesukristo, amen. ■

MUBO NGA MGA SULAT

1. Bible Dictionary, “Repentance.”
2. Ang Basahon ni Mormon naghisgot kanunay “pagpabunyag ngadto sa paghinulsol” (tan-awa sa Mosiah 26:22; Alma 5:62; 6:2; 7:14; 8:10; 9:27; 48:19; 49:30; Helaman 3:24; 5:17, 19; 3 Nephi 1:23; 7:24–26; Moroni 8:11). Si Juan Bautista migamit sa sama nga mga pulong (tan-awa sa Mateo 3:11), ug si Pablo namulong kabahin sa “bautismo sa paghinulsol” (Mga Buhat 19:4). Ang pulong makita sa Doktrina ug mga Pakigsaad usab (tan-awa sa Doktrina ug mga Pakigsaad 35:5; 107:20). Ang “bunyag sa o ngadto sa paghinulsol” nagpasabut lamang sa kamatuoran sa bunyag nga ang pakigsaad niini sa pagkamasulundon mao ang lintunganay sa paghinulsol. Pinaagi sa hingpit nga paghinulsol, lakip na ang bunyag, ang usa ka tawo takus sa pagpandong sa mga kamot alang sa gasa sa Espiritu Santo, ug pinaagi sa Espiritu Santo nga ang tawo makadawat sa bunyag sa Espiritu (tan-awa sa Juan 3:5) ug kapasayloan sa mga sala: “Kay ang ganghaan diin kamo kinahanglan nga mosulod mao ang paghinulsol ug bunyag pinaagi sa tubig; ug unya mosunod ang kapasayloan sa inyong mga sala pinaagi sa kalayo ug sa Espiritu Santo” (2 Nephi 31:17).
3. Noel B. Reynolds, “The True Points of My Doctrine,” *Journal of Book of Mormon Studies*, vol. 5, no. 2 (1996): 35; empasis gidugang.
4. Boyd K. Packer, sa Conference Report, Okt. 1995, 21; tan-awa usab sa “The Brilliant Morning of Forgiveness,” *Ensign*, Nob. 1995, 18.



Ni Elder L. Tom Perry

Sa Korum sa Napulog Duha ka mga Apostoles

Ang Hingpit nga Gugma Nagahingilin sa Kahadlok

Kon kamo mosanong sa pagdapit sa pagpakigbahin sa inyong mga gituohan ug mga pagbati kabahin sa gipahiuli nga ebanghelyo ni Jesukristo, ang diwa sa gugma ug kaisug mao ang kanunay ninyong kauban.

Presidente Monson, kaming tanan naghinam-hinam sa kulbahinam nga mga balita kalabut sa pipila ka bag-ong mga templo. Ilabi na kakulbahinam alang sa akong daghang mga paryente diha sa estado sa Wyoming.

Ang Simbahan adunay gihimong usa ka butang sa tibuok kalibutan kon ang usa ka bag-ong templo matukod nga ingon og komon nga tradisyon sa Estados Unidos ug Canada—kita magopen house. Sa mga semana sa hapit na ang pagpahinungod sa bag-ong templo, atong ablihan ang pultahan ug modapit sa lokal nga mga lider sa gobyerno ug sa relihiyon, lokal nga miyembro sa Simbahan, ug mga tawo sa laing tinuohan ug mosuroy sa bag-ong natukod nga templo.

Maanindot kini nga hitabo nga makatabang sa mga tawo nga dili pamilyar sa atong Simbahan nga makahibalo og gamay kabahin niini. Hapit tanan nga mibisita sa bag-ong templo matingala sa katahum sa gawas ug sa

sulod niini. Nakadayeg sila sa maayong pagkahimo ug detalyadong pagtagad sa tanang bahin sa templo. Dugang pa, daghan sa atong mga bisita mobati og lahi ug espesyal samtang giyahan sila ngadto sa wala pa mapahinungod nga templo. Mao kini ang komon nga mga gikasulti sa mga bisita sa atong mga open house, apan dili kini ang pinakakomon sa tanan nga komentaryo. Ang nakatandog kaayo sa mga bisita labaw sa tanan mao nga ang mga miyembro sa Simbahan nga ilang nahimamat atol sa atong mga open house. Mobyaya sila nga naganahan gayud sa ilang mga tig-abi-abi, nga mga Santos sa Ulahing mga Adlaw.

Ang Simbahan nakadawat og dugang nga pagtagad sa tibuok kalibutan kay sa kaniadto. Ang mga sakop sa media mosulat o maghisgot kabahin sa Simbahan matag adlaw, magreport sa daghan niining mga kalihokan. Daghan sa ilado kaayo nga tigpaga-was og mga balita sa Estados Unidos



kanunay nga maghisgot sa Simbahan o sa mga miyembro niini. Kini nga mga paghisgot moabut usab sa tibuok kalibutan.

Ang Simbahan nakakuha usab og atensyon diha sa Internet, diin, sa inyong nahibaloan, nakausab kaayo sa paagi sa pagpakigbahin og impormasyon sa mga tawo. Sa tanang oras sa tibuok kalibutan, ang Simbahan ug ang mga pagtulun-an niini gihisgutan sa Internet, sa mga blog ug mga social network, sa mga tawo nga wala pa gayud makasulat og newspaper o magasin. Nanaghimo sila og mga video ug nakigbahin niini gamit ang Internet. Ordinaryo ra kining mga tawhana—sila mga miyembro sa atong tinuohan ug sa laing tinuohan—kinsa naghisgot kabahin sa Ang Simbahan ni Jesukristo sa mga Santos sa Ulahing mga Adlaw.

Ang mga kausaban sa atong pagpakigsulti nagpasabut og gamay nganong kitang mga “Mormons” mas nailhan na kay sa kaniadto. Apan ang Simbahan nagtubo usab ug nag-uswag. Mas daghang tawo nga ang ilang mga silingan ug mga higala miyembro sa Simbahan, ug adunay inila nga mga miyembro sa Simbahan nga naa sa gobyerno, mga negosyo, sa entertainment, sa edukasyon, ug bisan asa, morag ingon niini. Bisan ang dili mga miyembro sa Simbahan nakabantay niini, ug nahibulong sila kon unsay nanghitabo. Maanindot nga daghan kaayo ang nahibalo na sa Simbahan ug sa mga Santos sa Ulahing mga Adlaw.

Samtang ang Simbahan nagkainila, sa gihapon dunay daghang tawo nga wala makasabut niini. Ang uban natudloan sa dili pagsalig sa Simbahan, ug naglihok ubos sa nagkadaiya nga negatibong butang bahin sa Simbahan

sa walay pagkwestyon sa tinubdan ug kabalido niini. Daghan usab og sayop nga impormasyon ug kalibug kabahin sa Simbahan ug unsay baruganan niini. Nahitabo kini sukad pa sa panahon ni Propeta Joseph Smith.

Misulat si Joseph Smith og bahin sa iyang kasaysayan “aron sa paghupay sa hunahuna sa katilingban, ug pagbutang sa tanan nga nagpakisayud mahitungod sa kamatuoran nga makahibalo sa tinuod nga mga hitabo” (Joseph Smith—History 1:1). Tinuod nga adunay mga tawo nga motuis sa kamatuoran ug tuyuon gayud ang pagsayop sa mga pagtulun-an sa Simbahan. Apan ang kadaghanan sa adunay mga pangutana kabahin sa Simbahan gusto lang nga makasabut. Kini mao ang maayo og panghunahuna nga mga tawo kinsa sa tinud-anay masusihon mahitungod kanato.

Ang nagtubo nga kainila ug reputasyon sa Simbahan nagpakita og makahuluganong oportunidad kanato isip mga miyembro niini. Makatabang kita “nga dili maabusohan ang mga hunahuna sa publiko,” ug mahusto ang sayop nga impormasyon kon kita gihulagway nga usa ka butang nga dili mao. Mas importante, hinoon, nga atong ipaambit kon si kinsa kita.

Adunay pipila ka butang nga atong mahimo—nga inyong mahimo—aron mouswag ang panabut kabahin sa Simbahan. Kon buhaton nato kini uban sa sama nga espiritu ug sa samang paagi sa atong pag-abi-abi og usa ka open house sa templo, mas masabtan kita sa atong mga higala ug mga silingan. Ang ilang kawalay pagsalig mawala, nagkadaiya nga negatibong mga butang mawala, ug magsugod sila sa pagkasabut sa

Simbahan kon unsa gyud kini.

Pasugyuta ako og pipila ka mga ideya kabahin sa unsay atong mabuhat.

Una, kinahanglan nga isug kita sa atong mga pagpamahayag kabahin ni Jesukristo. Gusto nato nga ang uban mahibalo unsay atong gituohan nga Siya mao ang sentro nga hulagway sa tanang tawhanong kasaysayan. Ang Iyang kinabuhi ug mga pagtulun-an mao ang pinaka-mensahe sa Biblia ug sa ubang basahon nga atong gikon-siderar nga balaang kasulatan. Ang Daang Tugon mipahiluna sa ang-ang sa mortal nga pangalagad ni Kristo. Ang Bag-ong Tugon naghulagway sa mortal Niya nga pangalagad. Ang Basahon ni Mormon mihatag kanato og ikaduha nga saksi sa mortal Niya nga pangalagad. Mianhi Siya sa yuta sa pagpahayag sa Iyang ebanghelyo isip pundasyon alang sa tanang tawo aron ang tanang anak sa Dios makakat-on ug makasunod sa Iyang mga pagtulun-an. Dayon Iyang gihatag ang Iyang kinabuhi aron mahimo natong Manluluwas ug Manunubos. Pinaagi lamang kang Jesukristo mahimong posible ang atong kaluwasan. Mao kini nganong mituo kita nga Siya ang sentro nga hulagway sa tanang tawhanong kasaysayan. Ang atong mahangturong padulngan anaa kanunay sa iyang mga kamot. Usa ka mahimayaong butang ang pagtuo Kaniya ug pagdawat Kaniya isip atong Manluluwas, atong Ginoo, ug atong Agalon.

Mituo usab kita nga posible lamang kini pinaagi kang ni Kristo ang pagkakita sa tuman nga katagbawan, paglaum, ug kalipay—niining kinabuhia ug sa mga kahangturan. Ang atong doktrina, sumala sa gitudlo sa Basahon ni Mormon, tataw nga nag-ingon: “Busa, kamo kinahanglan gayud mopadayon sa unahan uban ang pagkamakanunayon kang Kristo, magbaton sa usa ka hingpit nga kahayag sa paglaum, ug usa ka gugma sa Dios ug sa tanan nga mga tawo. Busa, kon kamo mopadayon sa unahan, magbusog sa pulong ni Kristo, ug molahutay hangtud sa katapusan, tan-awa, sa ingon miingon ang Amahan: Kamo makabaton og kinabuhi nga dayon.” (2 Nephi 31:20).

Kita namahayag sa atong pagtuo kang Jesukristo ug midawat Kaniya isip atong Manluluwas. Manalangin siya kanato ug mogiya sa tanan natong paningkamot. Samtang maghago kita niining mortalidad, Siya molig-on kanato ug magahatag kanato ug kalinaw sa panahon sa mga pagsulay. Ang mga miyembro sa Ang Simbahan ni Jesukristo sa mga Santos sa Ulahing mga Adlaw naglakaw pinaagi sa hugot nga pagtuo kansang Simbahan Iyaha.

Ikaduha, magpakamatarung nga mga ehemplo ngadto sa uban. Human mapahayag ang atong gituohan, kinahanglan nga atong sundon ang tambag nga gihatag kanato sa 1 Timoteo 4:12: “Hinonoa alang sa mga magtutuo, pagkinabuhi ingon nga panig-ingnan sa sinultihan ug sa paggawi, sa gugma sa pagtuo, sa kaputli.”

Ang Manluluwas mitudlo kabahin sa kaimportante nga mahimong ehemplo sa atong gituohan pinaagi sa pag-ingon, “Pasigaa ninyo ang inyong kahayag sa atubangan sa mga tawo aron makita nila ang inyong mga maayong buhat ug dayegon nila ang inyong Amahan nga anaa sa langit” (Matthew 5:16).

Kinahanglan nga ang atong kinabuhi ehemplo sa kamaayo ug hiyas samtang naningkamot kita sa pagsunod sa Iyang ehemplo sa kalibutan. Ang maayong mga buhat sa matag usa nato makadugang sa reputasyon sa Manluluwas ug sa Iyang Simbahan. Samtang apil kamo sa paghimo og maayo, sa pagkadungganon ug matarung nga mga lalaki ug babaye, ang Kahayag ni Kristo mosanag sa inyong kinabuhi.

Sunod, isulti ang kabahin sa Simbahan. Sa inadlaw natong pagpakabuhi, napanalinginan kita og daghang oportunidad nga makapaambit sa unsay atong gituohan ngadto sa uban. Kon ang atong personal ug propesyonal nga mga kauban mangutana kabahin sa atong mga gituohan, nagdapit sila kanato sa pagpaambit kon si kinsa kita ug unsay atong gituohan. Sila tingali interesado o dili sa Simbahan, apan interesado sila nga makaila kanato pag-ayo.



Ang akong rekomendasyon kaninyo mao ang pagdawat sa ilang pagdapit. Ang inyong mga pagpanag-uban wala magdapit ninyo sa pagtudlo, pagsangyaw, pagpasabut, ug pag-awhag. Iapil sila sa pag-istoryahanay— ipaambit ang kabahin sa inyong mga gituohan apan pangutan-a usab sila sa ilang mga gituohan. Sukda ang lebel sa ilang interes pinaagi sa pagpangutana. Kon daghan kaayo silag pangutana, i-focus ang pagsultihanay sa pagtubag sa ilang mga pangutana. Hinumdumi kanunay nga mas maayo nga sila mangutana kay sa kamo ang mag-istorya.

Ang ubang mga miyembro ingon og gustong isekreto ang ilang pagkamiyembro sa Simbahan. Duna silay mga katarungan. Sama pananglit, tingali nagtuo sila nga dili sila angay nga mopaambit sa ilang mga gituohan. Tingali nahadlok sila basin sila og masayop o mapangutan-an og dili nila matubag. Kon ang ingon nga mga hunahuna mosulod man sa inyong ulo, duna koy pipila ka tambag alang nimo. Hinumdumi lamang ang mga pulong ni Juan: “Ang kahadlok wala diha sa gugma, hinonoa ang hingpit nga gugma nagahingilin sa kahadlok” (1 Juan 4:18). Kon gihigugma man nato ang Dios ug gihigugma ang atong mga silingan, gisaaran kita nga atong mabuntog ang atong mga kahadlok.

Kon nakabisita na kamo sa Mormon.org bag-ohay lang, nga mao ang website sa Simbahan alang sa mga interesado sa pagkat-on kabahin sa Simbahan, makakita kamo og mga

miyembro kinsa mipasulod sa ilang mga impormasyon kabahin sa ilang kaugalingon. Naghimo sila og mga profile diha sa internet nga nagpasabut kon si kinsa sila ug kon nga-nong ang ilang relihiyoso nga pagtuo importante kanila. Naghisgot sila kabahin sa ilang hugot nga pagtuo.

Kinahanglan atong dayegon ug himoon ang ingon nga mga panagsinultihay uban sa Kristohanong gugma. Ang atong tuno, sa pagsulti man o pagsulat, kinahanglan nga matinahuron ug ligdong, bisan unsa pay tubag sa uban. Kinahanglan nga matinuhuron kita ug dayag ug maningkamot nga klaro sa unsay atong isulti. Gusto natong likayan ang panaglalis o mahimong mapanalipdanon sa bisan unsa nga paagi.

Si Apostol Pedro mipasabut, “Apan maingon nga balaan man siya nga nagtawag kaninyo, kinahanglan kamo usab magmabalaanon sa tanan ninyong paggawi” (1 Pedro 1:15).

Ang “paagi sa pag-istoryahanay” karon ingon og nagkadugang ang paglakip sa Internet. Nag-awhag kami sa mga tawo, batan-on ug tigulang, sa paggamit sa Internet ug sa social media sa pagpahibalo ug pagpaambit sa ilang relihiyoso nga mga pagtuo.

Kon mogamit kamo sa Internet, tingali makasugat kamo og padayong istoryahanay kabahin sa Simbahan. Kon giaghat sa Espiritu, ayaw og duha-duha sa pagdugang sa inyong mga tingog niini nga pag-istoryahanay.

Ang mensahe sa ebanghelyo ni Jesukristo dili sama sa bisan unsang

butang nga sukad imong ikapaambit sa uban. Sa panahon hapit nga anaa ang tanang impormasyon [information age], kana mao ang pinakabilihon sa tanang impormasyon sa kalibutan. Walay kwestyon ang kabilihon niini. Mao kini ang perlas nga labing bilihon (tan-awa sa Mateo 13:46).

Sa pagpamulong kabahin sa Simbahan, dili nato sulayan nga mas nindot pa kini nga paminawon. Dili kinahanglan nga ituyok-tuyok pa ang atong mensahe. Wala nato kinahanglana ang pagtuyok-tuyok sa atong mensahe. Kinahanglan nga atong isulti ang mensahe sa matinuoron ug yano nga paagi. Kon moabli kita og mga paagi sa pakigsulti, ang mensahe sa gipahiuli nga ebanghelyo ni Jesukristo mopamatuod sa kaugalingon niini niadtong kinsa andam nga modawat niini.

Usahay adunay dakong kalainan—kal-ang sa pagsabut—tali sa paagi nga atong nasinati sa Simbahan gikan sa sulod ug sa nakita sa uban gikan sa gawas. Kini mao ang labing dako nga katarungan nga kita adunay mga open house sa dili pa ang matag pagpahinungod ipahimutang. Ang bolunter nga mga miyembro sa open house sa templo naningkamot sa pagtabang sa uban nga makakita sa Simbahan ingon sa ilang pagkakita niini sa sulod. Ilang nakita ang Simbahan nga usa ka kahibulongan nga buhat, gani katingalahan, ug gusto sila nga ang uban mahibalo usab niini. Naghangyo ako kaninyo sa pagbuhat sa sama.

Akong isaad kaninyo nga kon kamo mosanong sa pagdapit sa pagpakigbahin sa inyong mga gituohan ug mga pagbati kabahin sa gipahiuli nga ebanghelyo ni Jesukristo, ang diwa sa gugma ug kaisug mao ang kanunay ninyong kauban, kay ang “hingpit nga gugma nagahingilin sa kahadlok” (1 Juan 4:18).

Mao kini ang panahon sa pagpala-pad sa mga oportunidad sa pagpaambit sa ebanghelyo ni Jesukristo ngadto sa uban. Unta mangandam kita sa kaugalingon sa pagpahimulos sa mga oportunidad nga gihatag sa matag usa kanato sa pagpaambit sa atong mga gituohan, mapaubsanon akong mag-ampo sa pangalan ni Jesukristo, amen. ■



Ni Elder Jeffrey R. Holland

Sa Korum sa Napulog Duha ka mga Apostoles

Apil Kitang Tanan

Gikan sa matag tawo, batan-on ug tigulang, nga naghupot sa priesthood, mohangyo ako og mas lig-on ug mas mapahinunguron nga tingog, . . . usa ka tingog sa kamaayo, tingog alang sa ebanghelyo, tingog alang sa Dios.

Diha sa diwa nianang talagsaon nga makapatandog nga himno ug inubanan sa kang Elder Richard G. Hinckley nga larinong pag-ampo diha sa akong kasingkasing, ganahan kong mamulong nga prangka karong gabhiona, mga kaigsoonan, ug akong i-apil nianang kaprangka ang batan-ong mga lalaki sa Aaronic Priesthood.

Kon atong hisgutan ang katalagsaon sa Unang Panan-awon ni Joseph Smith, gamay ra usahay ang atong masulti sa mahulgaon nga komprontasyon nga miabut sa wala pa kini, ang komprontasyon nga gitumong sa paglaglag sa batan-on kutob sa mahimo aron sa pagpugong sa pagpadayag nga moabut. Dili kita maghisgut kabahin sa kaaway nga sobra pa sa kinahanglan, ug dili ko gustong maghisgut kabahin niya, apan ang kasinatian sa batan-ong si Joseph nagpahinumdom kanato kon unsay angay hinumduman sa matag tawo, lakip na ang tanang batan-ong lalaki, dinhi nga nanambong.

Numero uno, si Satanas, o Lucifer, o ang amahan sa mga bakak—bisan unsay itawag ninyo kaniya—tinuod gayud, siya gayud ang representasyon sa dautan. Ang iyang mga motibo sa

tanang paagi dautan, ug siya mangurog sa presensya sa makatubos nga kaha-yag, sa paghunahuna bahin mismo sa kamatuoran. Numero dos, hangtud sa hangtud supak siya sa gugma sa Dios, sa Pag-ula ni Jesukristo, ug sa buhat sa kalinaw ug kaluwasan. Makigbatok siya niini bisan kanus-a ug bisan asa kutob sa iyang mahimo. Nahibalo siya nga siya mapildi ug palayason sa katapusan, apan determinado siya nga modala og daghan uban kaniya kutob sa iyang mahimo.

Busa unsa man ang ubang mga taktika sa yawa niini nga bangga kon nameligro ang kinabuhing dayon? Dinhi na usab ang kasinatian sa Sa-gradong Kakahoyan may pagtulun-an. Girekord ni Joseph nga sa pagpaningkamot sa pagbatok sa umaabut nga hitabo, si Lucifer naningkamot “sa ingon ka kahibulongan nga gahum ibabaw kanako nga mao ang mipugong sa akong dila aron ako dili makasulti.”¹

Sama sa gitudlo ni Presidente Boyd K. Packer ganinang buntag, si Satanas dili direktang makakutlo og kinabuhi. Usa kana sa daghang mga butang nga dili niya mahimo. Apan maingon og ang iyang paningkamot sa

pagpugong sa buhat ingon og malam-
puson kon mapugngan lamang niya
ang dila sa matinud-anon. Mga kaig-
soonan, kon mao man kana, nangita
ko karong gabhiona sa mga lalaki nga
batan-on ug tigulang kinsa naghuna-
huna gayud kabahin niini nga gubat tali
sa maayo ug sa dautan sa pag-apil ug sa
pagtingog. Ania kita sa gubat, ug sa mo-
sunod nga pipila ka minutos, gusto ko
nga mahimong estasyon nga tig-recruit.

Kinahanglan pa ba kong mo-*hum*
og pipila ka linya sa “Apil Kitang
Tanan”? Nahibalo na mo, sa linya ka-
labut sa “Naghulat kita karon sa mga
sundalo; nga moboluntaryo?”² Siyem-
pre, ang mahinungdanong butang
kalabut niining tawag nga makigbatok
mao nga kita naghangyo *dili* sa mga
boluntaryo nga mopabuto og pusil o
molabay og granada. Dili, gusto kita
og mga batalyon nga modala isip
mga armas nila sa “matag pulong nga
mogula gikan sa ba-ba sa Dios.”³ Busa
nangita ko karong gabhiona sa mga
misyonaryo nga dili boluntaryong mo-
pugong sa ilang mga dila apan, uban
sa Espiritu sa Ginoo ug sa gahum sa
ilang priesthood, moabli sa ilang mga
ba-ba ug mamulong og mga milagro.
Ang ingon niana nga pagkasulti, ang
mga kaigsoonan sa una miingon, mao
ang paagi diin pinaagi sa hugot nga
pagtuo “ang pinakamaayo nga mga
buhat nahimo, ug pagahimoon.”⁴

Ako espesyal nga mohangyo sa
batan-ong mga lalaki sa Aaronic Pries-
thood nga motarung og lingkod ug
maminaw. Alang kaninyo, sagulan ko
kini og sambingay sa sports. Usa kini
ka kinabuhi ug kamatayon nga contest
nga atong giapilan, batan-ong mga
lalaki, busa mopaduol ko og gamay
kaninyo, mainiton nga mamulong—sa
paagi nga buhaton sa mga coach kon
sikit na kaayo ang dula ug importante
kaayo ang kadaugan. Ug tungod kay
magdepende man ang dula kaninyo,
ang giingon niini nga coach mao nga
sa pakigdula niini nga kaatbang, ang
pipila kaninyo kinahanglan nga mas
limpyo sa moral kay sa unsa kamo
karon. Niini nga gubat tali sa maayo
ug sa dautan, dili kamo mahimong
modula para sa kaaway sa matag
higayon nga moabut ang tintasyon ug



dayon maglaum sa pagpakig-angay sa
Manluluwas sa panahon nga mosulod
sa templo ug magmisyong ingon og
walay nahitabo. Kana, batan-ong kong
mga higala, dili ninyo mabuhat. Ang
Dios dili mabiay-biay.

Busa kita adunay problema karong
gabhiona, kamo ug ako. Kini mao
nga adunay liboan nga nanag-edad sa
Aaronic Priesthood nga batan-ong mga
lalaki nga anaa na sa mga rekord niini
nga Simbahan nga nalakip sa atong
lista sa mga kandidato alang sa uma-
abut nga misyonaryong pagserbisyo.
Apan ang hagit mao ang paghimo nga
kadtong mga deacon, mga teacher,
ug mga priest magpabilin sa kaaktibo
ug takus nga ma-ordinahan nga mga
elder ug moserbisyo isip mga misyo-
naryo. Mao nga nagkinahanglan kita
og batan-ong mga lalaki nga anaa nang
daan sa team sa *pagpabilin* diha niini
ug hunungon ang patuyang og pauntol
kay kamo among gikinahanglan nga
moapil sa dula ug makigdula sa tanan
ninyong kusog! Hapit sa tanang con-
test sa sports nga akong nahibaloan,
adunay mga linya nga ibutang sa natak
nga dulaan diin ang mga partisipante
dili angay molapas aron makigkompe-
tensya. Nan, ang Ginoo mibutang og
mga linya sa katakus alang niadtong
gitawag sa paghago uban Kaniya niini
nga buhat. Walay misyonaryo nga wala
maghinulsol sa sekswal nga kalapasan
o malaw-ay nga sinultihan o pagtan-aw
og pornograpiya ug dayon magpaabut
nga mohagit sa ubang tawo sa paghi-
nulsol niadtong nahimo nga samang
mga butang! Dili kamo makahimo
niana. Ang Espiritu dili makig-uban ka-
ninyo, ug ang mga pulong moungot sa
inyong tutunlan samtang litukon ninyo

kini. Dili kamo mahimong mosubay sa
unsay giingon ni Lehi nga “gidili nga
mga dalan”⁵ ug magpaabut nga mogiya
sa uban ngadto sa “higpit ug pig-ot”⁶
nga dalan—dili kana mahimo.

Apan adunay tubag niini nga hagit
alang kaninyo sa matag tipik samtang
adunay butang alang sa investigator nga
inyong adtoon. Bisan kinsa pa kamo
ug bisan unsay inyong nahimo, kamo
mapasaylo. Ang matag usa kaninyo
batan-ong mga lalaki makabiya sa bisan
unsang kalapasan diin kamo nakiglim-
basug. Mao kini ang milagro sa pagpa-
saylo; mao kini ang milagro sa Pag-ula
ni Ginoong Jesukristo. Apan dili ninyo
kana mahimo nga walay aktibong
pasalig sa ebanghelyo, ug dili ninyo
kana mahimo kon walay paghinulsol
diin kini gikinahanglan. Naghangyo ako
kaninyo batan-ong mga lalaki nga mag-
aktibo ug magmalimpyo. Kon gikina-
hanglan, mohangyo ako kaninyo nga
mag aktibo ug *mag* malimpyo.

Karon, mga kaigsoonan, mamulong
kami sa dayag nga paagi nganha ka-
ninyo tungod kay ang dili kaayo klaro
daw dili mosalir. Maisugon kaming
mamulong tungod kay si Satanas usa
ka tinuod nga binuhat ug siya nagta-
gana sa paglaglag kaninyo, ug nag-
atubang kamo sa iyang impluwensya
sa mas batan-ong mga edad. Mao nga
amo kamong gunitan og maayo sa
kwelyo ug kusganong mosinggit sa
among nahibaloan:

*Paminawa! ang ugong kusog ug klaro;
Apil ngari! Apil ngari!*⁷

Akong batan-ong mga higala, nag-
kinahanglan kita og napulo ka liboan
nga dugang nga mga misyonaryo sa

umaabut nga mga bulan ug mga katui-gan. Kinahanglan nga magagikan kini sa nagtubo nga porsento sa Aaronic Priesthood nga ordinahan, aktibo, limpyo, ug takus nga moserbisyo.

Kamo nga nakaserbisyo o nagserbiyo karon, nagpasalamat kami kaninyo sa mga maayo nga inyong nahimo ug sa kinabuhi nga inyong natandog. Bulahan kamo! Nakita usab namo nga anaay uban nga ngangandoy sa tibuok nilang kinabuhi nga makaserbisyo ug misyon apan, tungod sa mga hinungdan sa panglawas o laing mga kakulian nga dili nila kalikayan, dili sila makahimo. Dayag ug mapasigarbuhon kaming mosaludo niining punduka. Nahibalo kami sa inyong mga tinguha, ug among gipahalipayan ang inyong debosyon. Anaa kaninyo ang among gugma ug among pagdayeg. Kamo “anaa sa team” ug kanunay nga maa-naa diha, bisan dungganon ang inyong pagka-excuse gikan sa full-time nga pagserbisyo. Apan among gikinahanglan ang uban pa kaninyo!

Karon, kamong mga kaigsoonan sa Melchizedek Priesthood, ayaw og pahiyum ug magsandig lang nga hayahay diha sa inyong mga lingkuranan. Wala pa ko mahuman dinhi. Nagkinahanglan kita og liboan pa ka dugang nga mga magtiayon nga magserbisyo sa mga misyon sa Simbahan. Ang matag presidente sa misyon nangamuyo alang kanila. Bisan asa sila magserbisyo, ang atong mga magtiayon naghatag og kahingkod sa buhat nga dili mahimong ikahatag sa gidaghanon sa nanag-edad og 19, bisan unsa sila kamaayo.

Aron sa pag-awhag og dugang nga mga magtiayon sa pagserbisyo, ang Unang Kapangulohan ug ang Korum sa Napulog Duha nakahimo sa usa sa pinakadayag ug pinakamabination nga mga lihok nga nakita sa misyonaryo nga buhat sa miaging 50 ka tuig. Niadtong Mayo niining tuiga, ang mga lider sa priesthood nga anaa sa field nakadawat og pahibalo nga ang bayranan sa balay alang sa mga magtiayon (ug ang gastuhan sa balay *lamang* ang atong gihisgutan) ang bayaran sa missionary fund sa Simbahan kon ang kantidad mosobra sa gitino nang daan nga kantidad matag bulan.



Pagkadakong panalangin! Usa kini ka hulog sa langit nga tabang ngadto sa dagkong gasto nga giatubang sa atong mga magtiayon sa ilang mga misyon. Ang Kaigsoonan mitino usab nga ang pagmisyon sa mga magtiayon mahimong 6 o 12 ka bulan ingon man usab sa naandang 18 o 23. Sa laing talagsaong lihok, ang pagtugot gihatag sa mga magtiayon, sa ilang kaugalingong gasto, sa pagpauli sa makadiyot alang sa mahinungdanon kaayong mga panghitabo sa pamilya. Ug dili na mabalaka nga manuktok pa kamo sa mga pultahan ug mohimo og sama nga iskedyul sa mga nanag-edad og 19! Dili kana namo ipabuhat kaninyo, apan daghan pang buluhaton ang inyong mahimo, uban sa dakong kagawasan kon unsaon ninyo kini sa paghimo.

Mga kaigsoonan, alang sa maayo ug himsog nga panglawas, pamilya, o ekonomikanhong mga rason, among nakita nga ang uban *kaninyo*, tingali dili makaadto karon o sa hangtud. Apan pinaagi sa gamay nga pagplano daghan kaninyo ang makaadto.

Mga bishop ug mga presidente sa stake, hisguti kini nga mga panginahanglan diha sa inyong mga council ug mga komperensya. Lingkod kamo sa atubangan atol sa inyong mga miting ug mainampoong motan-aw sa

kongregasyon alang sa mga pagdasig kon si kinsa ang kinahanglang modawat og tawag. Dayon pakigtambag kanila ug tabangi sila nga makatakda og petsa alang sa pagserbisyo. Mga kaigsoonan, kon mahitabo kana, ingna ang inyong mga asawa nga kon mahimo man ninyong biyaan ang inyong komportable nga lingkuranan ug remote control sulod sa pipila ka bulan, mahimo ra nilang biyaan ang ilang mga apo. Kana nga gagmayng mga palangga maayo ra, ug ako mosaad nga makahimo kamo og mga butang alang kanila sa pagserbisyo sa Ginoo nga, sa kalibutan nga walay katapusan, dili ninyo mahimo kon magpabilin lang kamo sa balay sa paggahin og daghang panahon kanila. Unsa pa ka dakong gasa ang ikahatag sa mga apohan ngadto sa ilang kaliwatan kay sa pagsulti pinaagi sa buhat ingon man sa pulong nga, “Niini nga pamilya kami nagserbisyo og misyon!”

Ang misyonaryo nga buhat dili lamang mao ang butang nga angay natong buhaton niining dako, lapad, talagsaon nga Simbahan. Apan hapit tanang butang nga angay natong buhaton magdepende sa unang pagkadungog sa mga tawo sa ebanghelyo ni Jesukristo ug mopasakop sa tinuohan. Sa tinuoray mao kana nganong ang katapusang mando ni Jesus sa Napulog Duha mao lamang kanang sukaranan—nga “busa panglakaw kamo ug himoa ninyong mga tinun-an ang tanang kanasuran, sa pagpamautismo kanila sa ngalan sa Amahan, ug

Montreal, Quebec, Canada



sa Anak, ug sa Espiritu Santo.”⁸ Dayon, ug niana lamang higayuna, nga ang nahabiling mga panalangin sa ebanghelyo hingpit nga moabut—kalig-on sa pamilya, mga programa sa mga kabatan-onan, mga saad sa priesthood, ug mga ordinansa nga anaa gayud sa templo. Apan sama sa gipamatuod ni Nephi, walay usa niana ang moabut hangtud nga ang usa ka tawo “[mi] sulod ngadto sa . . . ganghaan.”⁹ Sa tanan nga angayang buhaton diha sa dalan padulong sa kinabuhing dayon, nagkinahanglan kita og daghan pang mga misyonaryo nga moabli nianang ganghaan ug motabang sa mga tawo nga makasulod niini.

Gikan sa matag tawo, batan-on ug tigulang, nga naghupot sa priesthood, mohangyo ako og mas lig-on ug mas mapahinunguron nga tingog, usa ka tingog nga dili lamang batok sa dautan ug kaniya nga mao ang representasyon sa dautan, apan usa ka tingog sa kamaayo, tingog alang sa ebanghelyo, tingog alang sa Dios. Mga kaigsoonan sa tanang kapanahonan, tangtanga ang hitgot sa inyong mga dila ug bantayi ang inyong mga pulong sa pagbuhat og mga katingalahan sa kinabuhi niadtong “kinsa natago gikan sa kamatuoran kay sila wala masayud asa kini pangitaa.”¹⁰

*Pagdali ngadto sa gubat, pagdali ngadto sa natad;
Ang kamatuoran atong kalo, pangang, ug taming.
Barugan ang bandila; garbo nga iwagayway!
Malipayon kita, malipayon nga mamauli.*¹¹

Sa pangalan ni Jesukristo, ang atong Agalon, amen. ■

MUBO NGA MGA SULAT

1. Joseph Smith—Kasaysayan 1:15.
2. “We Are All Enlisted,” *Hymns*, nu. 250.
3. Doktrina ug mga Pakigsaad 84:44; tan-awa usab sa Deuteronomio 8:3; Mateo 4:4.
4. *Lectures on Faith* (1985), 73.
5. 1 Nephi 8:28.
6. 2 Nephi 31:18.
7. *Hymns*, nu. 250.
8. Mateo 28:19.
9. 2 Nephi 33:9.
10. Doktrina ug mga Pakigsaad 123:12.
11. *Hymns*, nu. 250.



Ni Bishop Keith B. McMullin

Ikaduhang Magtatambag sa Presiding Bishopric

Ang Gahum sa Aaronic Priesthood

Kamo ug ang katungdanan sa Aaronic Priesthood nga inyong gihuptan mahinungdanon sa buhat sa Langitnong Amahan sa Iyang mga anak ug sa pag-andam niini nga yuta sa Ikaduhang Pag-anhi.

Sa bag-ohay lang nga sesyon sa pagbansay alang sa mga General Authority, si Presidente Thomas S. Monson mipasabut og usab sa mga katungdanan ug mga oportunidad alang sa mga naghupot sa Aaronic Priesthood.¹ Diha sa diwa niana nga pagpanudlo nga ako mamulong kaninyo.

Ang katungdanan, nga saktong pagkatuman, motino sa kapaingnan sa katawhan ug kanasuran. Hilabihan ka mahinungdanon ang baruganan sa katungdanan nga ang mga naghupot sa priesthood giawhag, “Busa, karon himoa ang matag tawo nga makakat-on sa iyang katungdanan, ug pagbuhat sa buhatan diin siya natudlo, diha sa tanan nga kakugi.”²

Si Presidente Monson mipasabut, “Ang tawag sa katungdanan hilum nga moabut samtang kita nga naghupot sa priesthood molihok sa mga buluhaton nga atong nadawat.”³ Si Presidente Monson mikutlo kang George Albert Smith: “Inyo kining katungdanan una sa tanan ang pagkat-on kon unsay gusto sa Ginoo ug dayon pinaagi sa

gahum ug kalig-on sa Iyang balaang Priesthood aron mopalambo sa inyong calling diha atubangan sa inyong isigkatawo aron nga ang mga tawo magmaya nga mosunod kaninyo.”⁴

Namulong kalabut sa Iyang katungdanan, ang atong Ginoo miingon: “Wala ko man tinguhaa ang pagbuhat sa akong kaugalingong kabubut-on, kondili sa kabubut-on sa Amahan.”⁵ “Ako nanaug gikan sa langit, dili sa pagbuhat sa akong kaugalingong kabubut-on, kondili sa kabubut-on sa nagpadala kanako.”⁶ Tungod kay si Jesukristo mibuhay sa Iyang katungdanan, “ang tanan nga mga katawhan maluwas, pinaagi sa pagsunod sa mga balaod ug mga ordinansa sa Ebanghelyo.”⁷ Mga kaigsoonan, mao kini ang sumbanan nga atong sundon.

Nakasinati na ko niini nga kamo kinsa nagserbisyo isip mga deacon, mga teacher, ug mga priest ingon kaandam, kasaligan, ug makabuhay sa inyong katungdanan sama sa among gilauman kaninyo. Kami nagdayeg kaninyo. Ang inyong kamadasigon makatakod, ang inyong mga abilidad



kahibulongan, ang inyong pagpakig-uban makapalig-on. Kamo ug ang katungdanan sa Aaronic Priesthood nga inyong gihuptan mahinungdanon sa buhat sa Langitnong Amahan sa Iyang mga anak ug sa pag-andam niini nga yuta sa Ikaduhang Pag-anhi sa Iyang balaang Anak. Ang among panglantaw kaninyo ug sa inyong katungdanan lapas pa sa inyong edad. Si Pablo namulong bahin kaninyo, nga nag-ingon “Ayaw itugot nga adunay magatamay kanimo tungod sa imong kabatan-on; hinonoa alang sa mga magtotoo pagkinabuhi ingon nga panig-ingnan, sa sinultihan, ug sa paggawi, sa gugma, sa pagtuo, sa kaputli.”⁸

*Anaa sa kalalakin-an sa karaan
Ang priesthood nga kang Aaron
gingalan.*

*Pinaagi sa mga Levite, mga priest, ug
usab mga propeta,
Sa mga anak sa Dios kini mopanalan-
ngin kanila.*

*Dayon miabut ang Manluluwas sa
kalibutan*

*Ug gipangita ang ginganlag Juan,
Aron sa sama nga gahum
pagabunyagan*

Ug gisugdan ang buhat sa kaluwasan.

*Sa ulahing mga adlaw kining samang
gahuma*

*Gipahiuli og balik sa yuta,
Aron tanang mga kamatuoran sa
ebanghelyo
Mogamot unta sa kalag nato.*

*Aaronic Priesthood, maanindot nga
kamatuoran,
Dali aron kanamo moandam—
Aron ang katawhan matubos
Pinaagi sa Pinalanggang Anak sa Dios!*

*Ug siya kinsa naggamit niini nga mga
gahum—*

*Sa yanong batang lalaki kini dili haum.
Sa priesthood nga kupo nga gisul-ob
niya*

*Kita moingon, “Ikaw hingkod nga
lalaki na!”*

“Ang gahum ug pagtugot sa . . . Aaronic nga Pagkapari, mao ang paghupot sa mga yawe sa pagpangalagad sa mga anghel, ug sa pagpangalagad diha sa dayag nga mga ordinansa, ang sulat sa ebanghelyo, ang bunyag sa paghinulsol alang sa kapasayloan sa mga sala, nga nahuyon sa mga pakigsaad ug mga sugo.”¹⁰ Si Presidente Boyd K. Packer nakaobserbar: “Nakahimo kita og maayo kaayo sa pagpang-apud-apod sa *awtoridad* sa priesthood. Kita adunay awtoridad sa priesthood nga na-establisar sa hapit bisan asa. . . . Apan ang pagpang-apud-apod sa *awtoridad* sa priesthood miuswag, nga sa akong hunahuna, nag-una pa sa pagpang-apud-apod sa *gahum* sa priesthood.”¹¹ Alang sa walay katapusang kaayohan sa mga anak sa Dios, kinahanglan gayud kining masolusyonan.

Ang atong propeta misulti kanato unsaon nga mahimo kini. Mikutlo kang George Q. Cannon, si Presidente Monson miingon: “Gusto nakong makita ang gahum sa Priesthood nga nalig-on. . . . Gusto nakong makita kining kalig-on ug gahum nga mapakatap sa tanang mga naghupot sa Priesthood, gikan sa kinatas-ang lider ngadto sa kinagamyang ug labing ubos nga deacon diha sa Simbahan. Matag tawo kinahanglang motinguha ug motagamtam sa mga pagpadayag sa Dios, ang kaha-yag sa langit nagdan-ag sa iyang kalag ug naghatag kaniya og kahibalo kalabut sa iyang mga katungdanan, kalabut nianang bahin sa buhat . . . nga iyang responsibilidad sa iyang Priesthood.”¹²

Unsay buhaton sa deacon, teacher, o priest aron madawat ang espiritu sa pagpadayag ug pagpalambo sa iyang

calling? Siya mahimong magpuyo sa paagi nga iyang matagamtam ang makalimpyo, makapabalaan, ug makapadagan-ag nga gahum sa Espiritu Santo.

Ang kaimportante niini makita niining mga pulong gikan ni Alma: “Karon ako moingon nganha kaninyo nga kini mao ang kapunongan diin ako gitawag, . . . sa pagsangyaw ngadto . . . sa umaabut nga mga kaliwatan . . . nga sila kinahanglan gayud maghinulsol ug *magpakatawo pag-usab*.”¹³ Kon ang tawo magpakatawo pag-usab, ang iyang kasingkasing mausab. Wala siyay tinguha sa mga butang nga dautan o mahugaw. Bation niya ang lawom ug makanunayong gugma alang sa Dios. Siya gusto nga mahimong buotan, moserbisyo sa uban, ug motuman sa mga sugo.¹⁴

Si Presidente Joseph F. Smith mihulagway sa iyang kasinatian bahin niini nga kausaban: “Ang pagbati nga miabut kanako mao kanang tinuod nga kalinaw, gugma ug kahayag. Gibati nako sa akong kalag nga kon ako nakasala . . . ako napasaylo na; nga ako sa tinuod nalimpyohan gikan sa sala; ang akong kasingkasing natandog ug gibati nako nga dili nako pasakitan ang kinagamyang mananap ilawom sa akong mga tiil. Gibati nako nga daw gusto ko nga mobuhat og maayo bisan asa ngadto sa tanang tawo ug sa tanang butang. Gibati nako ang kabag-o sa kinabuhi, kabag-o sa tinguha sa pagbuhat nianang unsay matarung. Walay usa ka tipik sa tinguha alang sa dautan nga nahabilin sa akong kalag. Gamay pa ko nga bata, tinuod kini, . . . apan mao kini ang impluwensya nga miabut kanako, ug ako nasayud nga gikan kini sa Dios, ug kaniadto ug sa kanunay nahimong usa ka buhing saksi ngari kanako sa akong pagdawat sa Ginoo.”¹⁵

Busa nagtawag kami kaninyo talagsaong batan-on nga mga kaigsoonan nga makugihong maningkamot nga “matawo pag-usab.”¹⁶ Pag-ampo alang niining dakong kausaban sa inyong kinabuhi. Tun-i ang mga kasulatan. Tinguhaa labaw pa sa bisan unsang butang ang pagkaila sa Dios ug pagkahimong sama sa Iyang balaang Anak. Paglingaw-lingaw sa inyong

kabatan-on apan “ihiklin ang mga paaging binata”:¹⁷

Isalikway ang malaw-ay ug binuang nga panagsultihanay.

Palayo sa tanang dautan.

Likayi ang panagbingkil.

Paghinulsol kon gikinahanglan.¹⁸

Makatabang kini kaninyo nga motubo ngadto sa dungganong kaligdong sa inyong pagkalalaki. Ang mga kinaiya sa kaisug, pagkasinaligan, pagpaubos, pagtuo, ug kaayo mainyo. Ang mga higala ganahan kaninyo, ang mga ginikanan modayeg kaninyo, ang mga kaigsoonan sa priesthood mosalig kaninyo, ug ang batan-ong mga babaye motahud kaninyo ug mas mahimong maayo tungod kaninyo. Ang Dios motahud ninyo ug mopanalangin sa inyong serbisyo sa priesthood og *gahum gikan sa kahitas-an*.

Kami mobuhat sa among bahin. Isip mga ginikanan ug mga apohan, kami moandam kaninyo alang sa mas maisugon nga pagserbisyo sa gingharian sa Dios. Isip inyong mga kaigsoonan, mahimo kaming mga ehemplo nga inyong sundon. Dugangan namo ang kalig-on sa inyong mga korum. Among paluyohan ang inyong mga kapangulohan sa korum samtang naggamit sila sa ilang mga yawe sa pagpangulo. Hatagan namo kamo og oportunidad aron hingpit nga makatuman sa mga katungdanan sa Aaronic Priesthood ug sa pagpalambo sa inyong calling.

Pinaagi sa inyong pangalagad, dagkong mga panalangin ang moabut sa Simbahan. “Ang mga anghel mamulong pinaagi sa gahum sa Espiritu Santo.”¹⁹ Makahimo usab kamo sa ingon. Samtang mamulong kamo pinaagi sa Espiritu Santo ug modumala sa sagradong mga simbolo sa sakrament, ang mga lalaki ug mga babaye, mga batang lalaki ug mga batang babaye maningkamot sa paghinulsol, aron mapalambo ang ilang pagtuo kang Kristo, ug makauban nila kanunay ang Balaang Espiritu.

Samtang magpuasa kamo ug mangolekta sa mga halad sa puasa, ang mga miyembro maaghat sa pagpahiangay sa ilang mga binuhatan nianang sa Manluluwas. Ang Ginoo nagpakabana sa kabus ug sa ginalutos, ug



Siya midapit, “Umanhi ka ug sumunod kanako.”²⁰ Ang inyong serbisyo sa mga makalolooy naglambigit kanato sa Iyang balaang buhat ug nagtabang kanato nga mapabilin ang kapasayloan sa atong kaugalingong mga sala kaniadto.²¹

Sa inyong “pagduaw sa balay sa matag sakop,”²² ayaw kahadlok ni kaulaw. Ang Espiritu Santo mohatag kaninyo sa mga pulong nga angayang isulti, sa pagpamatuod nga ipahayag, sa serbisyo nga ihatag.

Ang inyong makugihong mga paningkamot sa “pagbantay diha sa simbahan sa kanunay”²³ magmabuningahon. Ang inyong dili pakaaroningnon nga kinaiya mopahumok sa kasingkasing bisan sa dili matuohon nga tawo ug makapalugak sa gunit sa kaaway. Ang inyong pagdapit sa uban nga mokuyog kaninyo sa simbahan, sa pag-ambit sa sakrament uban kaninyo, ug sa pagserbisyo uban kaninyo mahimong maabi-abihong kahayag alang niadtong nawala diha sa mga anino diin ang kahayag sa ebanghelyo hapit na maawop o wala na gayud mosiga.

Oh, akong minahal nga batan-ong mga lalaki, “ayaw pasagdi ang hiyas nga anaa kaninyo,”²⁴ nga inyong nadawat dihang ang Aaronic Priesthood gihatag ug kamo na-ordinahan.

“Kay kita wala sa Dios hatagig espiritu sa katalaw; kondili sa espiritu sa gahum, ug sa gugma, ug pagpugong sa kaugalingon.

“Busa ayaw ikaulaw ang pagpanghimatuod alang sa atong Ginoo. . . . Pakig-ambit sa . . . ebanghelyo pinaagi sa gahum sa Dios;

“Nga . . . nagtawag kanato sa pagtawag ngadto sa kabalaan, . . . nga iyang gihatag kanato diha kang Kristo Jesus sa wala pa ang mga kapanahonan nga walay kinutoban.”²⁵

Ang atong minahal nga propeta “mitawag kaninyo sa pagdala sa bandila.”²⁶ Saludo kami kaninyo, nagampo alang kaninyo, nagmaya sa pagserbisyo uban kaninyo, ug naghatag og pasalamat sa Dios alang sa gahum sa inyong makaluwas nga pangalagad.

Mohatag ko sa akong pagsaksi, ang Dios mao ang atong Amahan sa Kahangturan ug nagpuyo sa kalangitan. Si Jesus ang Kristo mao ang balaang Anak sa Dios, ang Manunubos sa kalibutan, ug kamong matinud-anon nga mga naghupot sa Aaronic Priesthood mao ang Iyang mga representante dinhi sa yuta, sa pangalan ni Jesukristo, amen. ■

MUBO NGA MGA SULAT

1. Thomas S. Monson, miting sa pagbansay sa mga General Authority, Abr. 2010.
2. Doktrina ug mga Pakigsaad 107:99.
3. Thomas S. Monson, “Ang Sagradong Tawag sa Pagserbisyo,” *Liahona*, Mayo 2005, 54.
4. George Albert Smith, sa Conference Report, Abr. 1942, 14; tan-awa usab sa Thomas S. Monson, *Liahona*, Mayo 2005, 54.
5. Juan 5:30.
6. Juan 6:38.
7. Mga Artikulo sa Hugot nga Pagtuo 1:3.
8. 1 Timoteo 4:12.
9. Balak ni Keith B. McMullin; tan-awa sa Keith B. McMullin, “Behold the Man,” *Ensign*, Nob. 1997, 42.
10. Doktrina ug mga Pakigsaad 107:20.
11. Boyd K. Packer, “Ang Gahum sa Priesthood,” *Liahona*, Mayo 2010, 7.
12. George Q. Cannon, *Deseret Weekly*, Nob. 2, 1889, 593; gikutlo ni Thomas S. Monson sa miting sa pagbansay sa mga General Authority, Abr. 2010.
13. Alma 5:49; empasis gidugang.
14. Tan-awa sa Marion G. Romney, “According to the Covenants,” *Ensign*, Nob. 1975, 71–73.
15. Joseph F. Smith, sa Conference Report, Abr. 1898, 66.
16. Tan-awa sa Juan 3:3–7; Alma 5:14–21, 49.
17. 1 Mga Taga-Corinto 13:11.
18. Tan-awa sa 2 Timoteo 2:16, 22–26.
19. 2 Nephi 32:3.
20. Lucas 18:22; tan-awa usab sa Juan 14:12–14.
21. Tan-awa sa Mosiah 4:26.
22. Doktrina ug mga Pakigsaad 20:47.
23. Doktrina ug mga Pakigsaad 20:53.
24. 1 Timoteo 4:14.
25. 2 Timoteo 1:7–9.
26. Thomas S. Monson, miting sa pagbansay sa mga General Authority, Abr. 2010.



Ni Elder W. Christopher Waddell
Sa Seventy

Ang Oportunidad sa Kinabuhi

Pinaagi sa inyong mapahinunguron nga serbisyo ug andam nga pagsakripisyo, ang inyong misyon mahimong balaan nga dapit alang kaninyo.

Usa sa dili makalimtan sa kinabuhi sa usa ka misyonaryo mao ang iyang katapusan, o “pagpauli,” nga interbyu sa presidente sa misyon. Mahinungdanong bahin sa interbyu mao ang panaghisgut kon unsa ang dili makalimtan nga mga kasinatian ug halandumon nga mga leksyon sa kinabuhi nga naangkon sulod lamang sa 18 ngadto sa 24 ka bulan.

Bisan kon kini nga mga kasinatian ug mga leksyon tingali komon sa misyonaryo nga pagserbisyo, ang matag misyon talagsaon, nga may mga hagit ug mga oportunidad nga makapalambo ug mosulay kanato sumala sa atong piho nga mga panginahanglan ug mga personalidad.

Kaniadto pa sa wala pa kita mobiya sa atong yutan-ong panimalay aron moserbisyo og full-time nga misyon, mibiya kita sa langitnong mga ginikanan aron sa pagtuman sa atong mortal nga misyon. Kita adunay Amahan sa Langit, kinsa nakaila kanato—sa atong mga kalig-on ug mga kahuyang, atong mga abilidad ug potensyal. Siya nasayud kon si kinsa nga presidente sa misyon ug mga kompanyon ug mga miyembro ug mga investigator

ang atong gikinahanglan aron mahimo nga misyonaryo, bana ug amahan, ug naghupot sa priesthood nga kita mamahimo.

Ang mga propeta, mga manalagna ug mga tigpadayag nag-assign sa mga misyonaryo ubos sa giya ug impluwensya sa Espiritu Santo. Ang dinasig nga mga presidente sa misyon modumala sa mga transfer [pagbalhin] matag unom ka semana ug mahibalo dayon nga ang Ginoo nasayud gayud asa Niya paserbisyon ang matag misyonaryo.

Mga pipila ka tuig na ang milabay, si Elder Javier Misiego, gikan sa Madrid, Spain, nagserbisyo og full-time nga misyon sa Arizona. Niadtong higayuna, ang iyang mission call sa Estados Unidos maingon og dili sagad, kay kadaghanan sa batan-ong mga lalaki sa Spain gitawag sa pagserbisyo sa ilaha ra nga nasud.

Sa panapos sa usa ka stake fireside, diin siya ug ang iyang kompanyon gidapit sa pag-apil, si Elder Misiego giduol sa usa ka dili kaayo aktibo nga miyembro sa Simbahan nga gidala sa usa ka higala. Kini ang unang higayon nga kining tawhana misulod sa chapel

sa dugay nang panahon. Si Elder Misiego gipangutana kon nakaila ba siya og usa ka José Misiego sa Madrid. Sa dihang si Elder Misiego mitubag nga José Misiego ang ngalan sa iyang amahan, ang tawo naghinam-hinam sa pagpangutana pa aron sa pagsiguro nga kini mao ang José Misiego. Sa dihang natino nga mao gayud ang tawo nga ilang gihisgutan, kining dili kaayo aktibo nga miyembro mihilak. “Ang imong amahan ra ang akong nabunyagan sa akong tibuk misyon,” siya mipasabut ug mihulagway sa iyang misyon, nga sa iyang pagtuo, usa ka pakyas. Iyang gipasangil ang iyang dugay na nga pagkadili-aktibo sa mga pagbati og kakulang ug kabalaka, nagtuo nga gipakyas niya ang Ginoo.

Si Elder Misiego dayon mihulagway sa kahulugan niining daw kapakyasan sa usa ka misyonaryo alang sa iyang pamilya. Siya misulti kaniya nga ang iyang amahan, nga nabunyagan isip usa ka young single adult, naminyo sa templo, nga si Elder Misiego mao ang ikaupat sa unom ka mga anak, nga ang tanang tulo ka mga lalaki ug usa ka babaye miserbisyo og full-time nga misyon, nga ang tanan aktibo sa Simbahan, ug nga ang tanan nga naminyo nabugkos diha sa templo.

Ang dili kaayo aktibo nga returned missionary misugod sa pagbakho. Pinaagi sa iyang mga paningkamot, nasayran niya karon, nga daghang kinabuhi ang napanalanginan, ug ang Ginoo mipadala og usa ka elder gikan sa Madrid, Spain, ngadto sa usa ka fireside sa Arizona aron ipahibalo kaniya nga siya wala mapakyas. Ang Ginoo nasayud asa Niya gusto ang matag misyonaryo moserbisyo.

Sa bisan unsang paagi ang Ginoo gustong mopanalangin kanato atol sa atong misyon, ang mga panalangin sa misyonaryo nga pagserbisyo wala gidesinyo nga matapos kon kita i-release sa atong presidente sa stake. Ang inyong misyon mao ang natad sa pagbansay alang sa kinabuhi. Ang mga kasinatian, mga leksyon, ug pagpamatuod nga naangkon pinaagi sa matinud-anong pagserbisyo gituyo aron sa paghatag og pundasyon

nga nakasentro sa ebanghelyo nga molungtad sa mortalidad ug sa kahangturan. Hinoon, aron ang mga panalangin magpadayon human sa misyon, adunay mga kondisyon nga kinahanglang tumanon. Sa Doktrina ug mga Pakigsaad atong mabasa, “Alang sa tanan kinsa may panalangin sa akong mga kamot kinahanglan nga motuman sa balaod nga gitudlo alang niana nga panalangin, ug sa mga kinahanglanon niini” (D&P 132:5). Kini nga baruganan gitudlo diha sa istorya sa Exodo.

Human madawat ang iyang sugo gikan sa Ginoo, si Moises mibalik sa Ehipto aron sa pagluwas sa mga anak sa Israel gikan sa pagkabihag. Sunod-sunod nga hampak napakyas aron maangkon ang ilang kagawasan, nga misangput ngadto sa ika-10 ug katapusang hampak: “Kay molakaw ako niadtong gabhiona latas sa yuta sa Ehipto, ug patyon ko ang tanan nga panganay sa yuta sa Ehipto” (Exodo 12:12).

Alang sa proteksyon batok sa “maglaglag” (bersikulo 23), ang Ginoo misugo sa Iyang katawhan sa pagsakripisyo, usa ka nating karnero nga “walay ikasaway” (bersikulo 5), ug sa pagkolekta sa dugo gikan sa sakripisyo. Ila dayon nga “kuhaon ang dugo” ug ipahid sa ganghaan sa matag balay—“sa duruha ka haligi ug . . . balabag sa pultahan” (bersikulo 7)—uban niini nga saad: “Ug kong makita ko ang dugo, molabay ako ibabaw kaninyo, ug walay kamatay nga moabut kaninyo” (bersikulo 13).

“Ang mga anak sa Israel nanlakaw, ug nanagbuhat sa ingon sumala sa gisugo sa Ginoo” (bersikulo 28). Sila mihalad sa sakripisyo, mikolekta sa dugo, ug mipahid niini sa ilang mga balay. “Ug nahitabo sa tungang gabii, nga ang Ginoo mipatay sa tanan nga panganay sa yuta sa Ehipto” (bersikulo 29). Si Moises ug ang iyang mga katawhan, sumala sa saad sa Ginoo, gipanalipdan.

Ang dugo nga gigamit sa mga Israelite, nga nagsimbolo sa umaabut nga Pag-ula sa Manluluwas, mao ang produkto sa ilang sakripisyo. Apan, ang sakripisyo ug ang dugo lamang dili paigo sa pag-angkon sa gisaad nga



panalangin. *Kon wala ang pagpahid sa dugo sa mga haligi sa pultahan, ang sakripisyo makawang lang unta.*

Si Presidente Thomas S. Monson nagtudlo: “Ang misyonaryo nga buhat lisud. Kini nanginahanglan sa kusog, kapasidad, ug hilabihan nga paningkamot sa usa ka tawo. . . . Walay laing buhat nga nagkinahanglan og mas taas nga oras o mas dakong debosyon o ingon nga sakripisyo ug hugot nga pag-ampo” (“That All May Hear,” *Ensign*, Mayo 1995, 49).

Isip resulta niana nga sakripisyo, kita mopauli gikan sa atong mga misyon uban sa atong kaugalingong mga gasa: Ang gasa sa hugot nga pagtuod. Ang gasa sa pagpamatuod. Ang gasa nga makasabut sa tahas sa Espiritu. Ang gasa sa matag adlaw nga pagtuon sa ebanghelyo. Ang gasa nga nakaserbisyo sa atong Manluluwas. Mga gasa nga giampingan sa nagamit og maayo nga mga kasulatan, nagum-os nga mga kopya sa *Isangyaw ang Akong Ebanghelyo*, mga journal sa misyonaryo, ug mapasalamatong mga kasingkasing. Hinoon, sama sa mga anak sa Israel, ang nagpadayon nga mga panalangin sa misyonaryo nga pagserbisyo kinahanglan nga gamiton human sa sakripisyo.

Pipila ka tuig na ang milabay, samtang si Sister Waddell ug ako nagdumala sa Spain Barcelona Mission, mohatag ko og katapusan nga buluhaton sa kada misyonaryo atol sa

ilang katapusan nga interbyu. Sa ilang pag-abut sa balay, sila gihangyo nga diha-diha dayon mogahin og panahon sa paghunahuna sa mga leksyon ug mga gasa nga gihatag kanila sa usa ka manggihatagong nga Amahan sa Langit. Sila gihangyo nga mainampoong ilista ug ikonsiderar unsaon paggamit kad-tong mga leksyon human sa misyon—mga leksyon nga adunay epekto sa matag aspeto sa ilang kinabuhi: edukasyon ug pagpili og career, kaminyoon ug mga anak, umaabut nga serbisyo sa Simbahan, ug ang labing importante, unsay ilang gusto nga sila mamahimo ug ang ilang pagpadayon sa paglambo isip mga disipulo ni Jesukristo.

Dili pa ulahi alang sa tanang returned missionary sa paghunahuna sa mga leksyon nga nakat-unan pinaagi sa matinud-anong pagserbisyo ug mas makugihong paggamit niini. Kon ato kining buhaton, mas mabati nato sa hingpit ang impluwensya sa Espiritu sa atong kinabuhi, ang atong mga pamilya mapalig-on, ug mas maduol kita sa atong Manluluwas ug Amahan sa Langit. Sa usa ka milabay na nga kinatibuk-ang komperensya, si Elder L. Tom Perry midapit: “Nanawagan ko kaninyo mga returned missionary sa pagpahinungod pag-usab sa inyong kaugalingon, sa pagbaton og balik sa tinguha ug diwa sa misyonaryo nga pagserbisyo. Nanawagan ko kaninyo sa pagpangita, pag-apil, ug pagbuhat

sa buluhaton sa usa ka sulugoon sa Amahan sa Langit. . . . Isaad ko kaninyo nga adunay daghang mga panalangin nga giandam kaninyo kon kamo magpadayon sa unahan uban sa kadasig nga naangkon na ninyo kaniadto pa isip usa ka full-time nga misyonaryo” (“The Returned Missionary,” *Liahona*, Ene. 2002, 88, 89; *Ensign*, Nob. 2001, 77).

Karon, ngadto sa batan-ong mga lalaki nga wala pa makaserbisyo og full-time nga misyon, akong ipakigbahin ang tambag ni Presidente Monson sa miaging Oktubre: “Akong balikon ang dugay nang gitudlo sa mga propeta—nga ang matag takus, makahimo nga batan-ong lalaki kinahanglan nga mangandam sa pagserbisyo og misyon. Ang misyonaryo nga pagserbisyo usa ka katungdanan sa priesthood—usa ka obligasyon nga gipaabut sa Ginoo kanato kinsa gihatagan og hilabihan ka daghan” (“Samtang Kita Nagkatigum Pag-usab,” *Liahona*, Nob. 2010, 5–6).

Sama sa mga misyonaryo kaniadto ug karon, ang Ginoo nakaila kaninyo ug adunay kasinatian sa misyon nga giandam alang kaninyo. Siya nakaila sa inyong presidente sa misyon ug sa iyang mabinationg asawa, kinsa mohigugma kaninyo sama sa ilang kaugalingon nga mga anak ug kinsa magtinguha og inspirasyon ug giya alang kaninyo. Siya nasayud sa matag usa sa inyong mga kompanyon ug sa unsay makat-unan ninyo gikan kanila. Siya nasayud sa matag dapit asa kamo mangalagad, ang mga miyembro nga inyong mahimamat, ang mga tawo nga inyong tudloan, ug ang mga kinabuhi nga inyong matandog sa kahangturan.

Pinaagi sa inyong mapahinunguron nga serbisyo ug andam nga pagsakripisyo, ang inyong misyon mahimong balaan nga dapit alang kaninyo. Inyong masaksihan ang milagro sa pagkakabig samtang ang Espiritu motrabaho diha kaninyo sa pagtandog sa mga kasingkasing sa inyong tudloan.

Samtang mangandam kamo sa pagserbisyo, adunay daghang buhatonon. Aron mahimong epektibo nga sulugoon sa Ginoo nagkinahanglan

kini og labaw pa kay sa ma-set apart, pagsul-ob og name tag, o pagsulod sa missionary training center. Kini usa ka proseso nga nagsugod dugay na sa wala pa kamo gitawag og “Elder.”

Adto sa inyong misyon nga kamo mismo adunay pagpamatuod sa Basahon ni Mormon, nga naangkon pinaagi sa pagtuon ug pag-ampo. “Ang Basahon ni Mormon maoy gamhanang ebidensya sa pagkabalaan ni Kristo. Usa usab kini ka pruweba sa Pagpahiuli pinaagi ni Propeta Joseph Smith. . . . Isip usa ka misyonaryo, kinahanglan nga ikaw mismo makaangkon og personal nga pagpamatuod nga ang Basahon ni Mormon tinuod. . . . Kini nga pagsaksi sa Espiritu Santo [mahimong] mao ang importanting tumong sa inyong pagtudlo” (*Isang-yaw ang Akong Ebanghelyo: Usa ka Giya sa Misionaryo nga Pangalagad* [2004], 123).

Adto sa misyon nga takus sa pakiguban sa Espiritu Santo. Sa mga pulong ni Presidente Ezra Taft Benson: “Ang Espiritu mao ang pinakaimportante nga nag-inusarang elemento niini nga trabaho. Inubanan sa Espiritu nga nagpalambo sa imong tawag, makahimo ka og mga milagro alang sa Ginoo diha sa misyon. Kon wala ang Espiritu, dili gyud ka molampos *bisan pa* sa imong talento ug abilidad.” (sa *Isang-yaw ang Akong Ebanghelyo*, 214).

Adto sa inyong misyon nga andam motrabaho. “Ang imong kalampusan isip usa ka misyonaryo masukod gayud pinaagi sa imong pasalig sa pagpangita, pagtudlo, pagbunyang, ug pagkumpirmar.” Gilautman nga kamo “epektibo nga nagtrabaho kada adlaw, [maghimo] sa imong . . . pinaka maayo sa pagdala og mga kalag ngadto kang Kristo” (*Isang-yaw ang Akong Ebanghelyo*, 12).

Balikon nako ang pagdapit ni Elder M. Russell Ballard, nga gipamulong ngadto sa usa ka grupo sa batan-ong mga lalaki kaniadto nga nangandam sa pagserbisyo: “Kami nagtan-aw kaninyo, akong batan-ong mga kaigsoonan sa Aaronic Priesthood. Kami nagkinahanglan kaninyo. Sama sa 2,000 ka batan-ong mga manggugubat ni Helaman, kamo usab espiritu nga

mga anak nga lalaki sa Dios, ug kamo usab mahimong matugahan sa gahum sa paglig-on ug pagpanalipod sa Iyang gingharian. Kami nagkinahanglan kaninyo sa paghimo og sagrado nga mga pakigsaad, sama sa ilang gihimo. Kami nagkinahanglan kaninyo nga mahimong hingpit nga masulundon ug matinud-anon, sama kanila” (“Ang Labing Maayong Henerasyon sa mga Misionaryo,” *Liahona*, Nob. 2002, 47).

Sa inyong pagdawat niining imbitasyon, kamo makakat-on og talagsaon nga leksyon, sama ni Elder Misiego ug sa tanan nga matinud-anong miserbisyo, mipauli, ug mihimo niini. Kamo masayud nga ang mga pulong sa atong propeta, si Presidente Thomas S. Monson, tinuod: “Ang misyonaryo nga oportunidad sa kinabuhi mainyo. Ang mga panalangin sa kahangturan nagpaabut kaninyo. Anaa kaninyo ang pribilehiyo nga dili lamang mga tigtan-aw apan mga partisipante sa pagserbisyo diha sa priesthood” (*Ensign*, Mayo 1995, 49). Ako mopamatuod nga kini tinuod sa pangalan ni Jesukristo, amen. ■





Ni Presidente Dieter F. Uchtdorf

Ikaduhang Magtatambag sa Unang Kapangulohan

Pagsangkap pinaagi sa Pamaagi sa Ginoo

Ang mga baruganan sa welfare sa Simbahan dili lamang maayo nga mga ideya; kini gipadayag nga mga kamatuoran gikan sa Dios—kini ang Iyang pamaagi sa pagtabang sa mga timawa.

Saysenta y singko ka tuig ang milabay, human sa Ikaduhang Gubat sa Kalibutan, ako mismo nakasinati sa mga panalangin sa programa sa welfare sa Simbahan. Bisan bata pa ko, nakahinumdom pa gihapon ko sa katam-is sa delata nga mga peach kauban sa niluto nga trigo ug sa espesyal nga kahu-mot sa hinatag nga sinina nga pinadala human sa gubat ngadto sa German nga mga Santos sa mapinangaon nga mga miyembro gikan sa Estados Unidos. Dili gayud nako hikalimtan ug kanunay nakong pasalamatana kana nga mga buhat sa gugma ug kamabination ngadto kanamo nga anaa sa dakong panginahanglan.

Kining personal nga kasinatian ug ang ika-75 nga anibersaryo sa dinasig nga plano sa welfare naghatag kanako og rason sa pagpamalandong og balik sa nag-una nga mga baruganan sa pag-amuma sa mga kabus ug timawa, sa kaugalingon nga pagpaningkamot, ug pagserbisyo sa atong isigkatawo.

Sa Gamot sa atong Hugot nga Pagtuo

Usahay atong makita ang welfare isip laing hilisgutan sa ebanghelyo—usa sa daghang mga sanga sa kahoy sa ebanghelyo. Apan nagtuo ko nga diha sa plano sa Ginoo, ang atong pasalig sa baruganan sa welfare kinahanglan nga anaa sa pinakagamot sa atong hugot nga pagtuo ug debosyon Kaniya.

Sukad sa sinugdanan sa panahon, ang atong Langitnong Amahan klaro kaayong namulong niini nga hilisgutan: gikan sa malumong pangamuyo: “Kon kamo nahigugma kanako . . . kamo maghinumdom sa kabus, ug magpahinungod sa inyong mga kabtangan alang sa ilang panginahanglan”;¹ ngadto sa direkta nga pagmando, “Hinumdumi diha sa tanan nga mga butang ang kabus ug ang timawa, ang masakiton ug ang nagantus, kay siya nga wala magbuhat niini nga mga butang, ang mao dili akong tinun-an”;² ngadto sa kusganon nga pasidaan: “Kon adunay tawo nga mokuha sa kabuhong diin Ako mibuhat, ug dili mohatag sa iyang

bahin, sumala sa balaod sa akong ebanghelyo, ngadto sa mga kabus ug sa mga timawa, siya, uban sa mga dautan, mohangad sa iyang mga mata sa impyerno, nga anaa sa kasakit.”³

Ang Temporal ug ang Espiritwal Gihiusa

Ang duha ka dagkong mga sugo—ang paghigugma sa Dios ug sa atong silingan—gihiusa sa temporal ug espiritwal. Importanting hinumduman nga kining duha ka mga sugo gitawag og “dagko” tungod kay ang tanang kasugoan nagasukad niini.⁴ Sa laing pagkasulti, ang atong mga prayoridad sa kaugalingon, pamilya, ug sa Simbahan kinahanglang magsugod dinhi. Ang tanan nga tumong ug mga binuhatan kinahanglang manukad niining duha ka dagkong mga sugo—gikan sa atong gugma alang sa Dios ug sa atong silingan.

Sama sa duha ka bahin sa sinilyo, ang temporal ug espiritwal dili mabulag.

Ang Tighatag sa tanang kinabuhi namahayag, “Ang tanan nga mga butang ngari kanako mga espirituhanon, ug wala mahinabo sa bisan unsa nga panahon nga Ako mihatag nganha kaninyo og balaod nga temporal.”⁵ Alang kanako nagpasabut kini nga “ang espirituhanong kinabuhi una sa tanan usa ka *kinabuhi*. Dili kini butang nga basta lang mahibaloan ug matun-an, kinahanglan kining sundon.”⁶

Alaot gayud, kay adunay mga tawo nga wala mohatag og gibug-aton sa “temporal” tungod kay gikonsiderar nila kini nga dili kaayo importante. Ilang gihatagan og bili ang espiritwal samtang giminusan ang temporal. Samtang importante nga ang atong mga hunahuna motumong ngadto sa langit, mataligam-an nato ang kahulugan sa relihiyon kon ang atong mga kamot wala usab matumong sa atong isigkatawo.

Pananglitan, si Enoch mitukod og katilingban sa Zion pinaagi sa espiritwal nga proseso sa pagmugna og katawhan nga usa sa kasingkasing ug usa sa hunahuna *ug* sa temporal nga buhat sa pagsiguro nga walay kabus taliwala kanila.⁷

Sama sa gihapon, makatan-aw kita

sa atong hingpit nga ehemplo, si Jesu-kristo, alang sa usa ka sundanan. Sama sa gitudlo ni Presidente J. Reuben Clark Jr. nga, “Sa dihang ang Manluluwas mianhi sa yuta siya adunay duha ka mahinungdanong mga misyon; ang usa mao ang pagpahinabo sa pagka-Mesiyas, ang pag-ula alang sa pagkapukan, ug ang katumanan sa balaod; ang lain mao ang buhat nga iyang gihimo taliwala sa iyang mga kaigsoonan diha sa unod pinaagi sa paghupay sa ilang mga pag-antus.”⁸

Sa samang paagi, ang atong espiritwal nga pag-uswag dili mabulag nga pagkahiusa uban sa temporal nga pagserbisyo nga atong gihatag sa uban.

Ang usa nagtakdo sa usa. Ang usa kon wala ang lain usa ra ka imitasyon sa plano sa Dios sa kalipay.

Ang Pamaagi sa Ginoo

Adunay daghang buotan nga mga tawo ug mga organisasyon sa kalibutan nga naningkamot sa pagtubag sa dinaliang mga panginahanglan sa mga kabus ug timawa sa tanang dapit. Mapasalamaton kita niini, apan ang pamaagi sa Ginoo sa pag-amuma sa mga timawa lahi sa pamaagi sa kalibutan. Ang Ginoo miingon, “Kini kinahanglan nga pagahimoon sa akong kaugalingon nga pamaagi.”⁹ Dili lamang kay interesado Siya sa dinalian natong panginahanglan; Nahingawa usab Siya sa atong mahangturon nga kalamboan. Tungod niini, ang pamaagi sa Ginoo naglakip sa pagbarug sa kaugalingon ug pagserbisyo sa atong silingan agi og dugang sa pag-amuma sa mga kabus.

Niadtong 1941 ang Gila River miawas ug mibaha sa Duncan Valley didto sa Arizona. Usa ka batan-ong presidente sa stake nga ginganlan og Spencer W. Kimball nakigmiting sa iyang mga magtatambag, gitan-aw unsa ka dako ang kadaut, ug mipadalag telegrama sa Siyudad sa Salt Lake nga nangayo og dakong kantidad nga kwarta.

Imbis padad-an og kwarta, si Presidente Heber J. Grant mipadala og tulo ka tawo: Sila si Henry D. Moyle, Marion G. Romney, ug Harold B. Lee. Mibisita sila ni Presidente Kimball ug mitudlo kaniya og importante nga leksyon: “Dili kini usa ka programa

sa ‘hatagi ko,’” sila miingon. “Kini usa ka programa sa ‘pagtabang sa kaugalingon.’”

Daghang katuigan ang milabay, si Presidente Kimball miingon: “Sayon ra unta kaayo kadto, sa akong hunahuna, alang sa Kaigsoonan sa pagpadala kanamo [og kwarta] ug dili unta kadto lisud nga maglingkod sa akong opisina ug iapud-apod kini; apan daghang kaayohan ang miabut namo kay kami adunay gatusan sa [among kaugalingong mga miyembro] nga miadto sa Duncan ug mitukod og mga koral ug mihakot sa mga pagkaon ug miabuno sa mga yuta ug mibuhar sa tanang mga butang nga gikinahanglang buhaton. Kana ang pagtabang sa kaugalingon.”¹⁰

Pinaagi sa pagsunod sa pamaagi sa Ginoo, ang mga miyembro sa stake ni Presidente Kimball wala lamang makatubag sa ilang dinaliang mga panginahanglan, apan napalambo usab nila ang pagbarug sa kaugalingon, nahupay ang pag-antus, ug mitubo diha sa gugma ug panaghiusa samtang nagerbisyo sila sa usag usa.

Apil Kitang Tanan

Niini gayung orasa adunay daghang mga miyembro sa Simbahan ang nag-antus. Sila gigutom, walay kwarta, ug nanlimbasug sa tanang matang sa pisikal, emosyonal, ug espirituhanong kasakit. Sila nag-ampo sa tibuok kusog sa ilang kalag alang sa panabang, alang sa kahupayan.

Mga kaigsoonan, palihug ayaw hunahunaa nga kini responsibilidad sa ubang tawo. Kini akoo, ug kini inyoha. Apil kitang tanan. Ang “tanan” buot pasabut nga *tanan*—matag naghupot sa Aaronic ug Melchizedek Priesthood, adunahan ug kabus, diha sa tanang nasud. Diha sa plano sa Ginoo, ang tanan dunay ikatampo.¹¹

Ang leksyon nga atong nakat-unan sa kada henerasyon mao nga ang mga adunahan ug kabus ang *tanan* anaa ubos sa samang sagrado nga obligasyon sa pagtabang sa ilang silingan. Kini nagkinahanglan sa pagtinabangay natong tanan aron malampusong magamit ang mga baruganan sa welfare ug pagbarug sa kaugalingon.

Makamatikod kita sa mga

panginahanglan nga naglibut nato naglaum nga may usa ka tawo gikan sa layong dapit nga mokalit og pakita aron sa pagtubag niana nga mga panginahanglan. Tingali naghulat kita sa mga eksperto nga espesyalista sa pagsulbad og pihong mga problema. Kon kita maghimo niini, atong gihikawan ang atong silingan sa serbisyo nga mahimo natong mahatag, ug ato usab nga gihikawan ang atong kaugalingon sa oportunidad sa pagserbisyo. Bisang og dili sayop ang kalabut sa mga eksperto, atubangon na lang nato kini: dili gayud sila igo sa pagsulbad sa tanang mga problema. Hinoon, ang Ginoo mibutang sa Iyang priesthood ug sa mga organisasyon niini diha sa atong pultahan sa tanang kanasuran diin naestablisar ang Simbahan. Ug, diha gayud sa kiliran niini, Iyang gibutang ang Relief Society. Sama sa atong nasayran isip naghupot sa priesthood, walay paningkamot sa welfare ang magmalampuson kon kini pakyas sa paggamit sa talagsaong mga gasa ug talento sa atong mga sister.

Ang pamaagi sa Ginoo dili mao ang paglingkod lang sa daplin sa sapa ug maghulat sa pag-agos sa tubig nga mahuman una kita molabang. Magkuyog gayud kini, ihulho ang buktunan sa imong sinina, pagtrabaho, ug paghimo og taytayan o sakayan aron makalabang sa katubigan sa atong mga hagit. Kamong kalalakin-an sa Zion, kamong naghupot sa priesthood, ang makadumala ug makadala og kahupayan sa mga Santos pinaagi sa paggamit sa dinasig nga mga baruganan sa programa sa welfare! Inyo kini nga misyon sa pagbuka sa inyong mga mata, gamita ang inyong priesthood, ug pagtrabaho diha sa pamaagi sa Ginoo.

Ang Pinakanindot nga Organisasyon sa Yuta

Atol sa Grabing Kalisud, si Harold B. Lee, nga nagerbisyo kaniadto isip presidente sa stake, gihangyo sa Kaigsoonan sa pagpangita og tubag sa grabe nga kakabus, kasubo, ug kagutom nga mikuyanap sa tibuok kalibutan nianang panahona. Nanlimbasug siya nga makakita og solusyon ug midangup ngadto sa Ginoo ug nangutana,

“Unsa nga matang sa organisasyon ang kinahanglan namong batunan . . . sa paghimo niini?”

Ug “maingon og ang Ginoo ang nagsulti [ngadto kaniya]: “Tan-awa, anak. Wala na ninyo kinahanglana ang laing organisasyon. Nahatag na nako ninyo ang pinakanindot nga organisasyon nga ania na sa yuta. Wala nay laing mas nindot pa kay sa organisasyon sa priesthood. Ang kinahanglan lamang ninyong buhaton mao ang paggamit sa priesthood aron matuman ang buhat. Mao ra kana.””¹²

Mao kana ang sinugdanan ingon man usab sa atong panahon. Gipahimutang na ang organisasyon sa Ginoo ngari kanato. Ang atong hagit mao ang pagtino kon unsaon kini sa paggamit.

Ang dapit sa pagsugod mao ang pagpamilyar sa atong kaugalingon sa unsay gipadayag na sa Ginoo. Dili nato hunahunaon nga nahibalo na kita. Kinahanglan natong atubangon ang hilisgutan uban sa kamapaubsanon sama sa usa ka bata. Ang matag henerasyon kinahanglang magkat-on og usab sa mga doktrina nga maoy pundasyon sa pamaagi sa Ginoo sa pag-amuma sa mga timawa. Sama sa gitudlo kanato sa daghang mga propeta sa daghang katuigan, ang mga baruganan sa welfare sa Simbahan dili lamang maayo nga mga ideya; kini gipadayag nga mga kamatuoran gikan sa Dios—kini ang Iyang pamaagi sa pagtabang sa mga timawa.

Mga kaigsoonan, tun-i og una ang gipadayag nga mga baruganan ug mga doktrina. Basaha ang mga handbook kalabut sa welfare sa Simbahan;¹³ pahimusli ang Internet website nga providentliving.org; basaha og balik ang artikulo sa Hunyo 2011 nga *Liahona* kabahin sa plano sa welfare sa Simbahan. Tan-awa ang kabahin sa pamaagi sa Ginoo sa pagsangkap sa Iyang mga Santos. Kat-uni kon sa unsang paagi nga ang mga baruganan sa pag-amuma sa mga timawa, pagserbisyo sa sili-ngan, ug ang pagbarug sa kaugalingon nagtakdo sa usag usa. Ang pamaagi sa Ginoo sa pagbarug sa kaugalingon naglakip sa balanse nga paagi sa daghang mga aspeto sa kinabuhi, lakip ang edukasyon, panglawas, panarbaho,



Leicester, England

panalapi sa pamilya, ug espirituhanong kalig-on. Ipamilyar ang inyong kaugalingon sa modernong programa sa welfare sa Simbahan.¹⁴

Sa higayon nga inyong matun-an ang mga doktrina ug mga baruganan sa welfare sa tibuok Simbahan, tinguhaa ang paggamit sa inyong nakatunanan ngadto sa mga panginahanglan niadtong anaa ubos sa inyong pangatungdanan. Buot ipasabut nga, sa dakong bahin, inyo kining hunahunaon og maayo sa inyong kaugalingon. Matag pamilya, matag kongregasyon, matag dapit sa kalibutan managlahi. Walay usa ka tubag nga haum sa tanan diha sa welfare sa Simbahan. Usa kini ka pagtabang sa kaugalingon nga programa diin ang mga indibidwal maoy responsable sa ilang pagbarug sa kaugalingon. Ang atong mga kapanguhaan naglakip sa personal nga pag-ampo, sa kaugalingon natong hinatag sa Dios nga mga talento ug mga abilidad, sa mga butang nga anaa atong magamit pinaagi sa kaugalingon natong mga pamilya ug mga kaliwat, sa nagkadaiyang mga kapanguhaan sa komunidad, ug siyempre

sa maamumahon nga pagsuporta sa mga korum sa priesthood ug Relief Society. Mogiya kini kanato ngadto sa dinasig nga sundanan sa pagbarug sa kaugalingon.

Kinahanglang maghimo kamo og plano nga nahisubay sa doktrina sa Ginoo ug motukma sa mga kahimtang sa inyong dapit. Sa pagpatuman sa balaang mga baruganan sa welfare, kinahanglang dili kamo magtan-aw kanunay sa Siyudad sa Salt Lake. Apan kinahanglan ninyong tan-awon ang mga handbook, ang inyong kasingkasing, ug ang langit. Salig sa inspirasyon sa Ginoo ug sunda ang Iyang pamaagi.

Sa katapusan kinahanglan ninyong buhaton sa inyong dapit ang unsay gibuhay sa mga disipulo ni Kristo sa matag dispensasyon: pagtinambagay, gamita ang tanang kapanguhaan nga anaa, tinguhaa ang inspirasyon sa Espiritu Santo, pangayo sa Ginoo alang sa Iyang pagtugot, ug dayon ihulho ang buktunan sa inyong mga sinina ug pagtrabaho.

Ako mohatag kaninyo og saad, kon kamo mosunod niini nga sundanan, makadawat kamo og piho nga giya kon *kinsa, unsa, kanus-a*, ug *asa* ang pagsangkap pinaagi sa pamaagi sa Ginoo.

Ang mga Panalangin sa Pagsangkap pinaagi sa Pamaagi sa Ginoo

Ang mapanagnaon nga mga saad ug mga panalangin sa welfare sa Simbahan, sa pagsangkap pinaagi sa pamaagi sa Ginoo, mao ang pipila sa pinakamaayo ug makadasig sa mga gipamahayag sa Ginoo ngadto sa Iyang mga anak. Miingon Siya, “Kong ibubo mo ang imong kalag ngadto sa gigutom, ug busgon mo ang sinakit nga kalag; unya ang imo nga kahayag mosubang sa kangitngitan ug ang imong kadulom maingon sa kaudtohan: ug ang Ginoo magamando kanimo sa kanunay.”¹⁵

Adunahan man kita o kabus, bisan asa man kita nagpuyo niini nga kalibutan, kitang tanan nagkinahanglan sa usag usa, kay pinaagi sa pagsakripisyo sa atong panahon, mga talento, ug mga kapanguhaan nga ang atong mga espiritu motubo ug mahimong lunsay.

Kini nga buhat sa pagsangkap diha sa pamaagi sa Ginoo dili lamang laing aytem diha sa listahan sa mga programa sa Simbahan. Dili kini mahimong ibaliwala o pasagdaan. Mahinungdanon kini sa atong doktrina; kini ang lintunganay sa atong relihiyon. Mga kaigsoonan, kini atong dako ug espesyal nga kahigayunan isip mga naghupot sa priesthood sa paggamit sa priesthood aron matuman ang buhat. Kinahanglang dili nato ilayo ang atong mga kasingkasing ug mga hunahuna sa pagkahimong mas labaw pa nga makabarug sa kaugalingon, mas maa-yong moamuma sa timawa, ug mohatag og maloloy-on nga serbisyo.

Ang temporal nahigot gayud sa espiritwal. Ang Dios mihatag kanato niining mortal nga kasinatian ug sa temporal nga mga hagit nga nag-uban niini isip usa ka laboratoryo diin kita mahimong motubo ngadto sa pagkabinuhad nga gusto sa Langitnong Amahan nga kita mamahimo. Unta atong masabtan ang mahinungdanong katungdanan ug panalangin nga naggikan sa pagsunod ug pagsangkap diha sa pamaagi sa Ginoo mao ang akong pag-ampo sa pangalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 42:29, 30.
2. Doktrina ug mga Pakigsaad 52:40.
3. Doktrina ug mga Pakigsaad 104:18.
4. Tan-awa sa Mateo 22:36–40.
5. Doktrina ug mga Pakigsaad 29:34.
6. Thomas Merton, *Thoughts in Solitude* (1956), 46.
7. Moises 7:18.
8. J. Reuben Clark Jr., sa Conference Report, Apr. 1937, 22.
9. Doktrina ug mga Pakigsaad 104:16; tan-awa usab sa bersikulo 15.
10. Spencer W. Kimball, sa Conference Report, Abr. 1974, 183, 184.
11. Tan-awa sa Mosiah 4:26; 18:27.
12. Harold B. Lee, transcript of welfare agricultural meeting, Okt. 3, 1970, 20.
13. Tan-awa sa *Handbook 1: Stake Presidents and Bishops* (2010), chapter 5, “Administering Church Welfare”; *Handbook 2: Administering the Church* (2010), chapter 6, “Welfare Principles and Leadership”; *Providing in the Lord’s Way: Summary of a Leader’s Guide to Welfare* (pamphlet, 2009).
14. Libro ni Elder Glen L. Rudd *Pure Religion: The Story of Church Welfare since 1930* (1995), makuha sa Church distribution Services, usa ka nindot nga dapit sa pagtuon sa mga doktrina ug kasaysayan sa programa sa welfare sa Ginoo.
15. Isaias 58:10–11; tan-awa usab sa mga bersikulo 7–9.



Ni Presidente Henry B. Eyring

Unang Magtatambag sa Unang Kapangulohan

Pagpangandam sa Priesthood: “Nagkinahanglan Ko sa Inyong Tabang”

Ayaw og kabalaka kon sa inyong hunahuna dili kamo eksperyensyado, apan hunahunaa, uban sa tabang sa Ginoo, kamo mamahimo.

Akong mga kaigsoonan, dakong kalipay nga makauban mo niining tibuok kalibutan nga miting sa priesthood sa Dios. Karon mamulong ko kabahin sa pagpangandam sa priesthood, sa atong kaugalingon ug sa atong gihatag nga tabang sa uban.

Kadaghanan nato maghunahuna gyud sa atong kaugalingon usahay, “Andam na ba ko alang niini nga buluhaton sa priesthood?” Ang akong tubag, “Oo, kamo andam na.” Ang akong tuyo karon mao ang pagtabang ninyo nga mahibalo niana nga pagpangandam ug makatigom og kaisug gumikan niini.

Sama sa inyong nahibaloan, ang Aaronic Priesthood gipili isip igpapangandam nga priesthood. Ang dakong pundok sa nanaghupot sa Aaronic Priesthood mao ang batan-ong mga deacon, mga teacher, ug priest nga nanag-edad og 12 ngadto sa 19.

Tingali naghunahuna kita bahin sa pagpangandam sa priesthood nga nahitabo sa katuigan sa pagka-Aaronic Priesthood. Apan ang atong Langitnong Amahan miandam na kanato sukad pa niadtong gitudloan pa kita sa Iyang presensya didto sa Iyang gingharian sa wala pa kita matawo. Kita giandam Niya karong gabhiona. Ug Siya mopadayon sa pag-andam nato samtang kita motugot pa Kaniya.

Ang katuyoan sa tanang pagpangandam sa priesthood, sa kinabuhi sa wala pa dinhi sa yuta ug niining kinabuhia, mao ang pag-andam kanato ug niadtong atong giserbisohan alang Kaniya, alang sa kinabuhing dayon. Ang pipila sa unang mga leksyon didto sa kinabuhi sa wala pa dinhi sa yuta naglakip sa plano sa kaluwasan, nga si Jesukristo ug ang Iyang Pag-ula mao ang sentro niini. Wala lang kita tudloi sa plano apan

didto kita sa mga konseho diin kita mipili niini.

Tungod kay ang tabil sa kalimot gibutang man sa atong hunahuna sa atong pagkahimugso, kita kinahanglang mangita og paagi aron mahibaloan og balik niining kinabuhia ang unsay atong nahibaloan ug gidepensa-han kaniadto. Kabahin sa atong pagpangandam niining kinabuhia mao ang pagpangita nianang bililhong kamatuoran aron kita makapasalig og usab niini pinaagi sa pakigsaad. Nagkinahanglan kana og hugot nga pagtuo, pagpaubos, ug kaisug sa atong bahin ingon man usab sa tabang gikan sa mga tawo nga nakakaplag sa kamatuoran ug dayon mipakigbahin niini ngari kanato.

Sila tingali ang mga ginikanan, mga misyonaryo, o mga higala. Apan kana nga tabang usa ka bahin sa atong pagpangandam. Ang atong pagpangandam sa priesthood kanunayng naglakip sa uban kinsa giandam nang daan aron motanyag ngari kanato og oportunidad sa pagdawat sa ebanghelyo ug dayon mopili sa paglihok pinaagi sa pagtuman sa mga pakigsaad aron motuhop kini sa atong kasingkasing. Aron mahimo kitang takus sa kinabuhing dayon, ang atong pagserbisyo niining kinabuhia kinahanglang maglakip sa pagtrabaho sa tibuok natong kasingkasing, hunahuna, ug gahum ug maningkamot sa pag-andam sa uban aron makabalik sa Dios uban kanato.

Mao nga ang ubang bahin sa pagpangandam sa priesthood nga himoon nato niining kinabuhia mao ang mga oportunidad sa pagserbisyo ug pagtudlo sa uban. Kini maglakip sa pagkahimong mga magtutudlo sa Simbahan, pagka-maalamon ug pagka-mahigugmaong mga amahan, pagkasakop sa korum, ug pagkamisyonaryo sa Ginoo. Ang Ginoo mohatag kanato sa mga oportunidad, apan kon andam ba kita kana magdepende kanato. Ang akong tuyo karon mao ang pagpakita sa pipila ka mahinungdanong mga pagpili nga gikinahanglan aron magmalampuson ang pagpangandam sa priesthood.

Ang maayo nga mga pagpili sa tawo nga tigbansay ug sa tawo nga gibansay magdepende sa pagsabut kon



giunsa pag-andam sa Ginoo ang Iyang mga sulugoon sa priesthood.

Una, Siya motawag og mga tawo, batan-on ug tigulang, nga kon tanawon sa kalibutanong mga mata, ug bisan sa ilang kaugalingon, huyang ug yano. Ang Ginoo makausab niadtong klaro nga mga kahuyang ngadto sa kalig-on. Makausab kana sa pamaagi unsaon sa pagpili sa maalamon nga lider kon si kinsa ang bansayon ug unsaon sa pagbansay. Ug kini makausab sa pamaagi kon unsay buhaton sa naghupot sa priesthood ngadto sa mga oportunidad alang sa kalamboan nga gitanyag kaniya.

Atong ikonsiderar ang pipila ka mga ehemplo. Kaniadto usa ko ka walay kasinatian nga priest sa dako nga ward. Ang akong bishop mitawag nako sa telepono usa ka Domingo sa hapon. Dihang akong gitubag, siya miingon, “Duna ka bay panahon sa pagkuyog nako? Nagkinahanglan ko sa imong tabang.” Siya mipasabut nga gusto lang niya nga ikauban ako sa pagbisita sa usa ka babaye nga wala nako mahibalo, nga walay pagkaon ug kinahanglang makat-on unsaon pagdumala sa iyang kwarta sa maayong paagi.

Karon, nahibalo ako nga duna siyay duha ka eksperyenyadong magtatambag sa bishopric. Ang duha mga hingkod na nga may daghang kasinatian. Ang usa ka magtatambag tag-iy

sa dakong negosyo, kinsa sa kaulahian nahimong presidente sa misyon ug General Authority. Ang laing magtatambag usa ka ilado nga huwes sa siyudad.

Ako bag-o lang nga gitawag nga unang assistant sa korum sa mga priest. Nahibalo siya nga gamay ra ko og nasabtan mahitungod sa mga baruganan sa welfare. Gamay ra gani ako og nahibaloan mahitungod sa pinansyal nga pagdumala. Wala pa gani ko makasulay og pirma og tseke, walay bank account, o wala pa gani ko makakita og personal nga badyet. Apan, bisan sa akong pagkawalay kasinatian, akong gibati nga tinud-anay kaayo siya sa dihang miingon siya nga, “Nagkinahanglan ko sa imong tabang.”

Akong nasabtan unsay gipasabut niadtong dinasig nga bishop. Iyang nakita nako ang bulawanong oportunidad sa pag-andam sa usa ka naghupot sa priesthood. Sigurado ko nga wala niya makita daan nianang walay kasinatian nga batang lalaki ang umaabut nga mahimong sakop sa Presiding Bishopric. Apan siya mitratar kanako nianang adlaw, ug sa tanang adlaw sa akong pagkaila kaniya sa mga katugan, isip usa ka proyekto sa pagpangandam sa talagsaon nga saad.

Daw nalingaw siya niini, apan kadto trabaho alang kaniya. Sa among pagpauli sa akong balay human sa among pagbisita sa biyuda nga nanginahanglan, iyang giparking ang sakyanan. Iyang giablihan ang ginamit na kaayo ug puno sa marka nga mga kasulatan. Mihatag siya kanako og mabinationong pagkorihir. Miingon siya nga kinahanglan pa kong magtuon ug magkat-on sa mga kasulatan. Apan tingali iyang nakita nga ako huyang ug yano kaayo nga matudloan. Hangtud karong adlaw akong mahinumduman ang iyang gitudlo nianang hapon. Apan labaw sa tanan, akong nahinumduman unsa siya ka masaligon nga ako makakat-on ug mahimong mas maayo—ug ako mahimo gayud.

Nakita niya lapas pa sa kamatuoran kon kinsa ko sa umaabut ngadto sa mga posibilidad nga naa sa usa ka tawo kinsa mibati nga huyang ug yano ra kaayo sa pagpangayo og tabang sa Ginoo ug sa pagtuo nga kini moabut.

Ang mga bishop, mga presidente sa misyon, ug mga amahan makapili sa paglihok niadtong mga posibilidad. Akong nakita kana nga nahitabo sa miting sa pagpuasa karong bag-o samtang ang usa ka presidente sa korum sa mga deacon mihatag sa iyang pagpamatuod. Mahimo na siya nga teacher ug mobiya na sa iyang mga sakop sa korum.

Mipamatuod siya uban sa talagsaong pagbati diha sa iyang tingog kabahin sa kalamboan sa pagkamaayo ug gahum nga anaa sa mga sakop sa iyang korum. Wala pa ako makadungog og tawo nga midayeg sa iyang organisasyon nga labihan ka nindot kay sa iyang gihimo. Siya midayeg sa ilang pagserbisyo. Ug dayon miingon siya nga nasayud siya nga nakahimo siya sa pagtabang sa bag-ong mga deacon sa dihang mibati sila nga nabugatan tungod kay gibati na niya kana sa dihang miabut siya sa priesthood.

Ang iyang mga pagbati sa kahuyang naghimo kaniyang mas mapailubon, mas maloloy-on, ug sa ingon mas nakapalig-on ug nakaserbisyo sa uban. Niadto nga katuigan diha sa Aaronic Priesthood, alang kanako, nahimo siyang lig-on ug maalamon. Iyang nakat-unan nga gitabangan siya isip presidente sa korum sa klaro ug tataw nga panumduman kabahin sa kaugalingon niyang panginahanglan sa miaging duha ka tuig. Ang hagit sa iya nga pagpangulo ug sa ato moabut kon kana nga mga panumduman molubad ug magkahanaw tungod sa dagan sa panahon ug sa atong kalampanan.

Si Pablo nakakita tingali nianang kakuyaw sa pagtambag sa iyang mas manghud nga kompanyon sa priesthood, nga si Timoteo. Siya miawhag ug mitudlo kaniya sa kaugalingon niyang pagpangandam sa priesthood ug sa pagtabang sa Ginoo sa pag-andam sa uban.

Paminawa usay gisulti ni Pablo kang Timoteo, nga mas manghod niya nga kompanyon:

“Ayaw itugot nga adunay magatamay kanimo tungod sa imong kabatan-on; hinonoa alang sa mga magtotoo pagkinabuhi ingon nga panig-ingnan, sa sinultihan, ug sa paggawi, sa gugma, sa pagtuo, sa kaputli.

“Kugih ang pagbasa sa kasulatan ngadto sa kapunongan, ug ang pagmaymay, ug ang pagpanudlo, hangtud sa akong pag-anha diha.

“Ayaw pasagdi ang hiyas nga anaa kanimo, nga gikahatag kanimo pinaagi sa gipamulong nga propesiya, inubanan sa pagpandong kanimo. . .

“Tagda ang imong kaugalingon, ug ang imong pagpanudlo;¹ magpadayon ikaw niini: kay sa pagbuhat mo sa ingon pagaluwason mo ang imong kaugalingon, ug ang mga magapatalinghug kanimo.”²

Si Pablo mihatag og maayong tambag alang natong tanan. Ayaw og kabalaka kon sa inyong hunahuna dili kamo eksperyensyado apan hunahuna, uban sa tabang sa Ginoo, kamo mamahimo.

Ang doktrina nga giawhag ngari kanato ni Pablo sa atong pagbusog sa pagpangandam sa priesthood mao ang mga pulong ni Kristo ug mahimong takus sa pagdawat sa Espiritu Santo. Dayon kita makahibalo kon unsay gusto sa Ginoo nga ipabuhat kanato sa atong pagserbisyo ug makadawat og kaisug sa paghimo niini, bisan unsa pa ang kahintang nga atong atubangon sa umaabut.

Giandam na kita alang sa pagserbisyo sa priesthood nga mahimong mas mahagiton inig-abut sa panahon. Sama pananglit, ang atong mga braso ug mga utok matigulang sama nato. Ang atong kapasidad sa pagkat-on ug paghinumdom sa atong mga nabasa mokunhod. Sa paghatag og serbisyo sa priesthood ang Ginoo naglaum nga kita mohimo og dugang pa gayud nga pagdisiplina matag adlaw sa atong kinabuhi. Kita makaandam niana nga pagsulay pinaagi sa pag-ugmad og hugot nga pagtuo pinaagi sa pagserbisyo samtang nagpadayon kita.

Ang Ginoo mihatag kanato og oportunidad sa pag-andam pinaagi sa butang nga Iyang gitawag og “ang panumpa ug pakigsaad [sa] priesthood.”³

Usa kini ka pakigsaad nga atong himoon uban sa Dios sa pagsunod sa tanan Niya nga mga sugo ug paghatag og serbisyo sama sa Iyang ihatag kon ania pa Siya dinhi. Ang pagsunod niana nga mga sumbanan kutob sa atong mahimo nag-ugmad og espirituhanong

kalig-on nga atong kinahanglanon sa paglahutay sa katapusan.

Ang maayo kaayong mga tigbansay mipakita kon unsaon nako sa pagtukod niana nga kalig-on: kini mao ang paghulma og usa ka kinaiya nga batukan ang pagkaluya ug kahadlok nga mag-agni kaninyo sa paghunong. Ang epektibo nga mga magtutudlo sa Ginoo mipakita nako nga ang pagpabilin sa espirituhanong gahum naggikan sa paglatas sa dapit diin ang uban mipahulay.

Kamo bantugang mga lider sa priesthood nga nag-ugmad nianang espirituhanong kalig-on sa inyong kabatan-on aduna pa gihapon niini samtang ang pisikal nga kalig-on magkaluya.

Ang akong manghud nga lalaki didto sa gamayng siyudad sa Utah nagnegosyo. Nakadawat siya og tawag sa telepono sa hotel nga gikan ni Presidente Spencer W. Kimball. Gabii na kaayo kadto human sa kapoy kaayo nga trabaho sa akong igsoon ug labaw pa kang Presidente Spencer W.

Kimball, nga misugod sa pakigsulti sa telepono niini nga paagi. Miingon siya, “Akong nadunggan nga anaa ka karon sa lungsod. Kahibalo ko nga gabii na kaayo ug nga unta matulog ka na, apan makatabang ka ba nako? Nagkinahanglan ko nimo isip akong kompanyon sa pagsusi sa kahintang sa tanang chapel niini nga siyudad.” Ang akong igsoon mikuyog kaniya nianang gabhiona, kulang sa kahibalo kabahin sa pagmentinar og mga chapel o bisan unsa mahitungod sa mga chapel ug wala masayud nganong si Presidente Kimball mobuhat pa niining butanga human sa iyang kapoy nga adlaw o nganong nagkinahanglan man siya og tabang.

Mga katuigan ang milabay nakadawat ko og susama nga tawag didto sa usa ka hotel sa Japan. Ako ang bag-ong komisyoner sa edukasyon alang sa Simbahan nianang higayuna. Nahibalo ko nga si Presidente Gordon B. Hinckley didto sa maong hotel sa iyang assignment sa Japan. Akong gitubag ang bagting sa telepono nga mao pa lang gyud ang akong paghigda aron matulog, gikapoy sa pagbuhat sa tanan nga sa akong hunahuna kaya nakong buhaton.

Si Presidente Hinckley malipayong nangutana, “Nganong natulog na man ka nga nagbasa pa man ko sa dokumento nga atong ribyuhunon?” Busa mibangon ko ug mitrabaho bisan kon nahibalo ko nga si Presidente Hinckley makahimo ra og mas nindot nga pagribyu sa dokumento kay sa akong mahimo. Apan daw iyang gipabati nako nga nagkinahanglan siya sa akong tabang.

Si Presidente Thomas S. Monson, dapit sa katapusan sa hapit tanang miting, mangutana sa secretary sa Unang Kapangulohan, “Up to date ba ko sa akong trabaho?” Ug kanunay siyang mopahiyom inig tubag: “Oo, President, updated ka.” Ang makapahimuot nga pahiyom ni Presidente Monson naghatag kanako og mensahe. Makapahunahuna dayon ni nako, “Aduna pa ba koy angayng buhaton sa akong mga assignment?” Ug dayon mobalik ko sa akong opisina aron motrabaho.

Ang bantugang mga magtutudlo mipakita kanako unsaon pag-andam sa pagtuman sa panumpa ug pakigsaad kon ang panahon ug edad maghimo niining mas lisud. Sila mipakita ug mitudlo kon unsaon nako sa pagdisiplina ang akong kaugalingon sa pagtrabaho og mas maayo kutob sa akong mahimo samtang himsog ug lig-on pa.

Dili ko mahimong hingpit nga sulu-oon matag oras, apan makapaningkamot ako nga makahatag og dugang nga paningkamot kutob sa akong mahimo. Tungod niana nga kinaiya nga naugmad og sayo, andam na ko sa mga pagsulay sa umaabut. Kamo ug ako mahimong andam uban sa kalig-on sa pagtuman sa atong panumpa ug pakigsaad nga makabuntog sa mga pagsulay nga siguradong moabut kon magkaduol na ang katapusan sa kinabuhì.

Akong nakita ang ebidensya niana diha sa miting sa Church Board of Education. Si Presidente Spencer W. Kimball nianang higayuna nakahatag og mga tuig sa pagserbisyo samtang nag-antus og sunod-sunod nga mga hagit sa panglawas nga si Job ra ang makasabut. Siya ang nangulo sa miting nianang buntaga.

Sa kalit lang, mihunong siya og sulti. Nalup-og siya sa iyang lingkuranan. Nagpiyong ang iyang mga mata.



Davao, Philippines

Ang iyang ulo midungoy. Naglingkod ko duol niya. Si Elder Holland naglingkod tupad namo. Kaming duha mibarug aron tabangan siya. Kay dili kami eksperyensyado sa mga emerhensya, nakahukom kami sa pag-alsa kaniya, sa gihapon naglingkod sa iyang lingkuranan, ngadto sa iyang opisina nga duol ra.

Nahimo siya namong magtutudlo nianang higayuna sa iyang kalisdanan. Ang matag usa namo nag-alsa sa matag kilid sa iyang lingkuranan, migawas kami sa kwarto nga mitinganan ngadto sa agianan padulong sa Church Administration Building. Mibuka og gamay ang iyang mga mata, makita nga nalipong gihapon, ug miingon, “O, palihug pag-amping. Ayaw pasakiti ang inyong mga buko-buko.” Samtang nagkaduol kami sa pultahan sa opisina, miingon siya, “O, lain ang akong gibati nga nakabalda ko sa miting.” Mga minutos human napasulod namo siya sa iyang opisina, sa gihapon wala mahibalo unsay iyang problema, mitan-aw siya kanamo og miingon, “Wala ba kamo makahunahuna nga kinahanglan mong mobalik ngadto sa miting?”

Milakaw kami ug nagdali-dali og balik, nagtuo nga ang among pagadto didto gikinahanglan sa Ginoo. Si Presidente Kimball sukad sa iyang pagkabata mipugos sa iyang kaugalingon lapas pa sa iyang mga limitasyon sa paglahutay aron pagserbisyo ug paghigugma sa Ginoo. Kadto usa ka

kinaiya nga lig-ong naestablisar nga anaa sa dihang siya nagkinahanglan niini. Andam siya. Ug busa nakatudlo ug nakapakita siya nato unsaon nga mahimong andam sa pagtuman sa panumpa ug pakigsaad, pinaagi sa makanunayong pagpangandam sulod sa mga katuigan pinaagi sa atong tanang kusog nga kon tan-awon daw gamayng mga buluhaton nga may gamayng mga sangputanan.

Ang akong pag-ampo mao nga unta kita motuman sa atong mga pakigsaad sa priesthood aron mahimong takus ang atong kaugalingon sa kinabuhing dayon ug ang mga tawo nga atong bansayunon. Ako mosaad ninyo nga kon kamo mohimo kutob sa inyong mahimo, ang Dios mopalambo sa inyong kalig-on ug sa inyong kaalam. Siya moandam kaninyo. Ako mosaad kaninyo nga kadtong inyong gipangbansay ug gipakitaan og ehemplo modayeg sa inyong ngalan sama sa ania kanako karon nga talagsaong mga tigbansay nga akong nailhan.

Ako mopamatuod nga ang Dios nga Amahan buhi ug nahigugma kaninyo. Siya nakaila kaninyo. Siya ug ang Iyang nabanhaw ug nahimaya nga Anak, nga si Jesukristo, mipakita sa walay kasinatian nga batang lalaki, nga si Joseph Smith. Ilang gisalig kaniya ang Pagpahiuli sa kahingpitan sa ebanghelyo ug ang tinuod nga Simbahan. Sila midasig kaniya dihang siya nagkinahanglan niini. Sila mipabati kaniya sa mahigugmaong pagpanton dihang kini modala na unta niya paubos aron siya mapataas. Sila miandam kaniya, ug Sila nag-andam nato alang sa kalig-on aron mopadayon paingon sa celestial nga himaya nga mao ang tumong ug tuyo sa tanang pagserbisyo sa priesthood.

Akong ibilin ninyo ang akong panalangin nga inyong mahibaloan ang mahimayaong oportunidad nga gihatag sa Dios kaninyo sa pagtawag ug pagandam kaninyo sa pagserbisyo Kaniya ug sa pagserbisyo sa uban. Sa pangalan sa atong mahigugmaong lider ug magtutudlo, nga si Jesukristo, amen. ■

MUBO NGA MGA SULAT

1. Tan-awa sa 2 Nephi 32:3–6.
2. 1 Timoteo 4:12–14, 16.
3. Doktrina ug mga Pakigsaad 84:39.



Ni Presidente Thomas S. Monson

Magmaisugon sa Pagbarug nga Mag-inusara

Hinaut gayud nga magmaisugon kita ug andam sa pagbarug sa unsay atong gituohan.

Minahal kong kaisoonan, pagkadako nga pribilehiyo nga ikauban kamo niining gabhiona. Kitang nanaghupot sa priesthood sa Dios nag-ugmad og kasuod ug panag-igsoonay.

Atong mabasa sa Doktrina ug mga Pakigsaad, sa seksyon 121, bersikulo 36, “nga ang katungod sa pagkapari dili mabulag gikan sa mga gahum sa langit.” Pagkaanindot sa gasa nga gihatag kanato—nga makahupot sa priesthood, nga “dili mabulag gikan sa mga gahum sa langit.” Hinoon, kining bililhong gasa, naglakip dili lamang sa mga espesyal nga mga panalangin apan sa balaanong mga responsibilidad usab. Kinahanglan nga atong ipahimutang ang atong kinabuhi aron takus kita sa priesthood nga atong gihuptan. Nagpuyo kita sa panahon nga gilibutan og daghang butang nga gituyo sa pag-agni kanato sa mga dalan nga mohatud kanato sa kalaglagan. Ang paglikay sa maong dalan nagkinahanglan og determinasyon ug kaisug.

Nakahinumdom ko og usa ka higayon—ug mahinumdoman usab sa pipila kaninyo karon—kon ang sumbanan sa kadaghanan sa mga tawo sama ra kaayo sa atong mga sumbanan. Dili na kini tinuod karon. Bag-ohay lang nakong nabasa ang usa ka artikulo sa *New York Times* kabahin sa usa ka pagtuon nga nahitabo atol sa ting-init niadtong 2008. Usa ka tinahod nga sociologist sa Notre Dame nangulo og usa ka research team sa pagpasiugda og detalyadong interbyu ngadto sa 230 ka mga young adult sa tibuok Amerika. Nagtuo ko nga makapaniguro kita nga ang mga resulta sama ra sa kadaghanang mga bahin sa kalibutan.

Akong ipakigbahin kaninyo ang tipik lang niining puno sa impormasyon nga artikulo:

“Ang mga tig-interbyu mihatag og pangutana nga nag-aghat og detalyadong mga tubag bahin sa husto ug sayop, lisud nga mga pagpili kabahin sa moral ug kahulugan sa kinabuhi. Sa tag-as kaayong mga tubag, . . . inyong

makita nga ang mga batan-on nag-imbistigar sa pagsulti og bisan unsa nga may kalabutan niining butanga. Apan wala lang gayud silay mga kategoriya o bokabularyo sa paghimo sa ingon.

“Sa dihang gihangyo sa paghulagway sa lisud nga pagpili kabahin sa moral nga ilang giatubang, ikatulo nga bahin sa mga batan-on wala gayud makatubag sa pangutana o makahulagway sa mga problema nga dili moral, sama sa makaabang ba sila og apartment o kon sila aduna bay kwarta nga ikabayad sa parkinganan.”

Ang artikulo nagpadayon:

“Ang kasagaran nga gituohan, nga balikan pirme sa kadaghanan nila, mao nga ang moral nga mga pagpili usa lamang ka butang sa indibiwal nga kagustuhan. ‘Personal kini,’ ang mga hingtungdan kasagaran moingon. ‘Anaa ra kini sa tagsa-tagsa. Kinsa man ko nga mosulti?’

“Sa pagsalikway sa dili makwestyon nga awtoridad, daghan sa mga batan-on ang nagpatuyang ra kaayo, [nag-ingon]: ‘Akong buhaton kon unsay akong mahunahunaan nga makalipay nako o unsay akong gibati. Wala koy laing paagi aron mahibalo unsay buhaton kondili unsay akong gibati.’”

Kadtong mipahigayon sa mga interbyu mipasabut nga ang kadaghanan sa mga batan-on nga ilang gika-istorya “wala mahatagi og mga kapanguhaan—sa mga eskwelahan, mga institusyon [o] mga pamilya—sa pag-ugmad sa ilang moral nga mga pangagpas.”¹

Mga kaisoonan, walay usa nga nakadungog nako karon ang magduhaduha kon unsay moral ug unsay dili, ni adunay usa nga magduhaduha kabahin sa unsay atong gilauman isip mga naghupot sa priesthood sa Dios. Gitudloan na kita ug padayong tudloan sa mga balaod sa Dios. Bisan unsa pay inyong makita o madungog sa laing dapit, kini nga mga balaod dili mausab.

Sa atong pagpakabuhi matag adlaw, dili kapugngan nga ang atong pagtuo hagiton. Tingali usahay makita nato ang atong kaugalingon nga gilibutan sa uban ug sa gihapon nagbarug nga gamay ra o gani nagbarug nga nag-inusara kabahin sa unsay mahimong



dawaton ug unsay dili. Aduna ba kitay moral nga kaisug sa pagbarug nga lig-on alang sa atong mga gituohan, bisan kon ang pagbuhat sa ingon nagkinahanglan nga magbarug kita nga mag-inusara? Isip mga naghupot sa priesthood sa Dios, importante nga makahimo kita sa pag-atubang—uban sa kaisug—bisan unsa pang mga hagit ang moabut kanato. Hinumdumi ang mga pulong ni Tennyson: “Ang akong kalig-on sama sa kalig-on sa napulo, kay ang akong kasingkasing putli.”²

Nagkadaghan, ang inilang mga tawo ug uban pa kinsa—sa usa o lain pang rason—anaa makita sa publiko, adunay kalagmitan nga mobiyabi sa relihiyon sa kinatibuk-an ug, usahay, sa Simbahan mismo. Kon ang atong mga pagpamatuod dili igo nga nakagamot, ang maong mga pagtamay modala nato sa pagduha-duha bahin sa atong kaugalingong gituohan o mapahuyang sa atong determinasyon.

Sa panan-awon ni Lehi sa kahoy sa kinabuhi, nga makita sa 1 Nephi 8, nakita ni Lehi, lakip sa uban, kadtong nagkupot sa gunitanan nga puthaw hangtud nga miabut sila ug mikaon sa bunga sa kahoy sa kinabuhi, nga atong nahibaloan nga nagrepresentar sa gugma sa Dios. Ug dayon, subo kaayo, nga paghuman nga sila maka-kaon sa bunga, ang uban naulaw tungod niadtong anaa sa “dako ug lapad nga gambalay,” nga nagrepresentar sa garbo sa katawhan, nga nagpunting sa ilang mga tudlo ngadto nila ug nagbiay-biay nila; ug sila nahulog ngadto sa sayop nga mga agianan ug nawala.³

Pagkagamhanang himan sa kaaway ang pagbiay-biay ug pagbugal-bugal! Usab, mga kaigsoonan, kita aduna bay kaisug sa pagbarug nga lig-on atubangan sa maong lisud nga oposisyon?

Nagtuong ko nga ang akong unang kasinatian sa pagbaton og kaisug sa pagpakabuhi sumala sa akong gituohan nahitabo dihang nagserbisyo ko sa Navy sa Estados Unidos sa hapit na mahuman ang Ikaduhang Gubat sa Kalibutan.

Ang Navy boot camp dili sayon nga kasinatian alang kanako, ni alang ni bisan kinsa nga nakalahutay niini. Sulod sa unang tulo ka semana nakumbinsir ko nga ang akong kinabuhi nameligro. Ang navy wala mosulay sa pagbansay nako; misulay kini sa pagpatay kanako.

Kanunay gayud nakong mahinum-duman dihang miabut ang Dominggo human sa unang semana. Nakadawat mi og malipayong balita gikan sa chief petty officer. Nagbarug sa bansayanan sa bugnaw nga hangin sa California, nadungog namo kini nga mando: “Karon ang tanan manimba—ang tanan, gawas nako. Magrelaks ra ko!” Dayon misiyagit siya, “Tanan kamong mga Katoliko, magpundok mo sa Camp Decatur—ug ayaw og balik hangtud alas tres. Forward, march!” Dakong pundok sa mga tawo ang milakaw. Dayon misiyagit sa iyang ikaduhang mando, “Kadtong mga Judeo, magpundok mo sa Camp Henry—ug ayaw og balik hangtud alas tres. Forward, march!” Gamay ra nga mga tawo ang mimartsa. Dayon miingon siya,

“Kamong nahabilin nga mga Protestante, magpundok mo sa mga teyatro sa Camp Farragut—ug ayaw og balik hangtud alas tres. Forward, march!”

Diha-diha dunay misantup sa akong hunahuna, “Monson, dili ka Katoliko; dili ka Judeo; dili ka Protestante. Ikaw usa ka Mormon, busa barug lang dinhi!” Makapaniguro ko ninyo nga mibati ko nga hingpit nga nag-inusara. Maisugon ug determinado, oo—apan nag-inusara.

Ug dayon nadungog nako ang labing matam-is nga mga pulong nga akong nadungog sukad nga gisulti nianang chief petty officer. Mitan-aw siya sa akong direksyon ug nangutana, “Ug kamo mga ondo unsay itawag sa inyong mga kaugalingon?” Hangtud nianang panahona wala ko kamatikod nga duna bay nagbarug sa akong tapad o sa luyo sa bansayanan. Hapit magdungan, matag usa namo mitubag, “mga Mormon!” Lisud ihulagway ang kalipay nga mipuno sa akong kasingkasing sa akong paglingi ug nakita ang pipila ka mga marino.

Nangutkot sa ulo ang chief petty officer sa katingala apan sa katapusan miingon, “Nan, pangita mo og lugar nga kapundukan. Ug ayaw og balik hangtud alas tres. Forward, march!”

Sa among paglakaw, naghunahuna ko sa mga pulong sa usa ka rhyme nga nakat-unan nako sa Primary mga katuigan kaniadto:

*Magmaisugon nga Mormon ka;
Magmaisugon sa Pagbarug nga
Mag-inusara.
Magmaisugon nga magbaton og
lig-ong katuyoan;
Magmaisugon nga kini sa uban
mahibaloan.*

Bisan tuod nga ang kasinatian lahi sa unsay akong gipaabut, andam ko nga mobarug nga mag-inusara, kon kadto gikinahanglan.

Sukad nianang adlaw, adunay mga higayon nga walay usa nga nagbarug sa akong likod ug busa ako *mibarug* nga nag-inusara. Mapasalamaton kaayo ko nga nakahimo sa desisyon kaniadto pa nga magpabiling lig-on ug matinuoron, kanunayng



andam ug andam nga mopanalipod sa akong relihiyon, kon ang panginahanglan moabut.

Kon moabut ang bisan unsang oras nga mobati kita og pagkadili angayan sa buluhaton alang nato sa umaabut, mga kaigsoonan, mopakigbahin ko ninyo sa pamahayag nga gihimo pagka-1987 sa Presidente sa Simbahan nianang higayuna nga si Ezra Taft Benson samtang namulong siya sa dakong pundok sa mga miyembro sa California. Miingon si Presidente Benson:

Sa tanang kapanahonan, ang mga propeta naglantaw sulod sa mga katuigan sa atong panahon. Binilyon sa mga nangamatay ug kadtong matawo pa naglantaw ngari kanato. Ayaw og kasayop niini—kamo pinili nga henerasyon. . . .

Dul-an sa unom ka libo ka tuig ang Dios miandam kaninyo aron matawo kamo sa katapusang mga adlaw sa dili pa ang ikaduhang pag-anhi sa Ginoo. Ang ubang tawo mopalayo, apan ang gingharian sa Dios magpabiling magbarug aron moabi-abi sa pagbalik sa Pangulo niini—gani si Jesukristo.

“Samtang kini nga henerasyon ika-tandi sa kadautan sa kapanahunan ni Noe, kon limpyohan na sa Ginoo ang yuta pinaagi sa baha, adunay dakong kalainan kini nga panahon: [Mao nga ang] Dios miluwas alang sa katapusang panahon sa pipila sa Iyang pinakalig-on . . . nga mga anak, kinsa

motabang sa paghimo sa gingharian nga madaugon.”⁴

Oo, mga kaigsoonan, nagrepresentar kita sa Iyang kinalig-unan nga mga anak. Responsibilidad nato nga mahimong takus sa tanang mahimayaong panalangin nga giandam sa atong Langitnong Amahan alang kanato. Bisan asa kita moadto, ang atong priesthood magauban kanato. Nagbarug ba kita sa balaang mga dapit? Palihug, sa dili pa ninyo ibutang sa peligro ang inyong kaugalingon ug ang inyong priesthood pinaagi sa pag-adto sa mga dapit o sa pag-apil sa mga kalihokan nga dili makaayo kaninyo o nianang priesthood, hunong aron hunahunaon ang mga sangputanan. Matag usa kanato gitugyanan og Aaronic Priesthood. Diha sa proseso, ang matag usa nakadawat sa gahum nga naghupot sa mga yawe sa pagpangalagad sa mga anghel. Miingon si Presidente Gordon B. Hinckley:

“Dili kamo makahimo sa pagbuhat og bisan unsa nga maghimong babag tali kaninyo ug sa pagpangalagad sa mga anghel alang kaninyo.

“Dili kamo mahimong imoral sa bisan unsa nga matang. Dili kamo mahimong dili magmatinuoron. Dili kamo makapanikas o makapamakak. Dili kamo mahimong mogamit sa ngalan sa Dios sa walay kapuslanan o mogamit og hugaw nga pulong ug sa gihapon adunay katungod sa pagpangalagad sa mga anghel.”⁵

Kon aduna kaninyo ang nadagma sa inyong panaw, gusto nakong masabtan ninyo sa walay pagpangutana nga adunay paagi sa pagbalik. Ang proseso gitawag og paghinulsol. Ang atong Manluluwas mihatag sa Iyang kinabuhi aron hatagan kamo ug ako nianang bulahan nga gasa. Bisan sa kamatuoran nga ang dalan sa paghinulsol dili sayon, ang mga saad tinuod. Gisultihan na kita ug pada-yong gitudloan sa mga balaod sa Dios. “Bisan pa ang inyong mga sala mapula, sila pagapution ingon sa nieve.”⁶ “Ug dili na gayud hinumduman [ang] inyong mga sala.”⁷ Kaanindot nga pahayag. Pagkadako nga panalangin. Pagkaanindot nga saad.

Mahimong dunay naghunahuna ninyo sa inyong kaugalingon, “Wala man ko magsunod sa tanang mga sugo ug wala ko magbuhat sa unsay kinahanglan nakong buhaton, ug ang akong kinabuhi maayo ra man. Mahimo ra kong maglingaw-lingaw sa kinabuhi bisag dili magsunod sa kasugoan.” Mga kaigsoonan, mosaad ko ninyo nga dili kini magsilbi sa kadugayan.

Pila pa lang gayud ka bulan nga milabay nakadawat ko og sulat gikan sa usa ka tawo nga naghunahuna makausa nga pwede ra niyang maangkon ang duha. Naghinulsol na siya karon ug mipahiayang sa iyang kinabuhi sa mga baruganan sa ebanghelyo ug sa mga sugo. Gusto kong mopakigbahin ninyo og usa ka paragraph gikan sa iyang sulat, kay nagrepresentar kini sa kamatuoran sa sayop nga panghunahuna: “Kinahanglan nakong makatunanan sa akong kaugalingon (sa lisud nga paagi) nga ang Manluluwas husto gayud dihang miingon Siya, ‘Walay bisan kinsa nga arang makaalagad og duha ka agalon: kay mahitabo man nga dumtan niya ang usa, ug higugmaon niya ang ikaduha; o dapigan niya ang usa, ug tamayon niya ang ikaduha. Dili kamo makaalagad sa Dios ug sa mga bahandi.’⁸ Akong gisulayan, kutob sa akong mahimo sama sa gibuhay sa uban, nga buhaton ang duha. Sa katapusan,” miingon siya, “Akong naangkon ang tanang kahaw-ang, kangit-ngit, ug kasubo



General Authorities sa Ang Simbahan ni Jesukristo sa mga Santos sa Ulahing mga Adlaw

Oktubre 2011

ANG UNANG KAPANGULOHAN



Henry B. Eyring
Unang Magtatambag



Thomas S. Monson
Presidente



Dieter F. Uchtdorf
Ikaduhang Magtatambag

ANG KORUM SA NAPULOG DUHA KA MGA APOSTOLES



Boyd K. Packard



L. Tom Perry



Russell M. Nelson



Dallin H. Oaks



M. Russell Ballard



Richard G. Scott



Robert D. Hales



Jeffrey R. Holland



David A. Bednar



Quentin L. Cook



D. Todd Christofferson



Neil L. Andersen

ANG KAPANGULOHAN SA SEVENTY



Ronald A. Rasband



Steven E. Snow



Walter F. González



L. Whitney Clayton



Joy E. Jensen



Donald L. Hallstrom



Tad R. Callister

ANG UNANG KORUM SA SEVENTY

(sa alpabetikal nga pagkahan-ay)



Marcos A. Adikanis



Jose L. Alonso



Carlos H. Amado



Ian S. Adern



Mervyn B. Arnold



David S. Baxter



Shayne M. Bowen



Gerald Causse



Yoon Hwan Choi



Craig C. Christensen



Don R. Clarke



Carl B. Cook



Lawrence E. Conhige



Claudio R. M. Costa



LeGrand R. Curtis Jr.



Benjamin De Hoyos



John B. Dickson



Kevin R. Duncan



David F. Evans



Enrique R. Faldaballo



Eduardo Gavaret



Carlos A. Goady



Christoffer Golden Jr.



Gerrit W. Gong



C. Scott Gow



James J. Hamula



Keith K. Hilbig



Martin K. Jensen



Daniel L. Johnson



Paul V. Johnson



Patrick Kearon



Paul E. Koelliker



Erich W. Kopschke



Richard J. Moynnes



Marcus B. Nash



Brent H. Nielson



Allan F. Pucker



Kevin W. Pearson



Anthony D. Perkins



Paul B. Pieper



Raimel E. Pino



Bruce D. Porter



Dale G. Renlund



Michael T. Ringwood



Lynn G. Robbins



Joseph W. Sitari



Ulisses Soares



Gary E. Stevenson



Michael John U. Teh



Jose A. Texeira



Octaviano Tenorio



Juan A. Uceda



Francisco J. Vinos



W. Christopher Waddell



William R. Walker



F. Michael Watson



Kazuhiko Yamashita



Jorge F. Zeballos



Claudio D. Zivic



W. Craig Zwick



Wilford W. Andersen



Koichi Aoyagi



Randall K. Bennett



Craig A. Cardon



Bruce A. Carlson



J. Deen Connish



Keith R. Edwards



Stanley G. Ellis



Bradley D. Foster



Larry W. Gibbons



O. Vincent Haleck



Larry R. Lawrence



Per G. Molin



James B. Martino



Jairo Marzagrandi



Kent F. Richards



Gregory A. Schwitzer



Kent D. Watson



Larry M. Wilson

ANG PRESIDING BISHOPIC



Richard C. Egley
Unang Magtarambong



H. David Burton
Tiglamalang Bishop



Keith B. McMillin
Ikaatubang Magtarambong



Ang mga Santos sa Ulahing mga Adlaw sa tibuok kalibutan nagpundok aron maminaw sa kinatibuk-ang komperensya "sa [ilang] kaugalingong (D&P 90:11). Litrato tuyok gikan sa ibabaw sa tuo mao ang mga miyembro sa Simbahan sa Johannesburg, South Africa; Salvador, Brazil; San Salvador, El Salvador; Montreal, Quebec, Canada; Montalban, Philippines; Gómez Palacio, Mexico; and Tokyo, Japan.



nga gihatag ni Satanang ngadto sa mga motuo sa iyang panglingla, ilusyon, ug mga bakak.”

Aron mahimo kitang lig-on ug makabuntog sa tanang mga pwersa nga mobira nato sa sayop nga direksyon o sa tanang mga tingog nga nag-awhag nato sa pagpili sa sayop nga dalan, kinahanglan aduna kitay kaugalingon natong pagpamatuod. Nag-edad man kamo og 12 o 112—o bisan asa sa tunga—masayud kamo mismo nga ang ebanghelyo ni Jesukristo tinuod. Basaha ang Basahon ni Mormon. Pamalandongi ang mga pagtulun-an niini. Pangutan-a ang Langitnong Amahan kon tinuod ba kini. Aduna kitay saad nga “kon kamo mangutana sa kinasingkasing, uban sa tinuod nga katuyoan, nga may hugot nga pagtuo kang Kristo, siya mopakita sa kamatuoran niini nganha kaninyo, pinaagi sa gahum sa Espiritu Santo.”⁹

Kon kita masayud nga ang Basahon ni Mormon tinuod, nan masayud usab kita nga si Joseph Smith tinuod nga propeta ug nakakita sa Dios nga Amahan sa Kahangturan ug sa Iyang Anak, nga si Jesukristo. Masayud usab kita nga ang ebanghelyo gipahiuli niining ulahing mga adlaw pinaagi ni Joseph Smith—lakip na ang pagpahiuli sa Aaronic ug Melchizedek Priesthood.

Sa higayon nga kita duna nay pagpamatuod, atong responsibilidad nga mopakigbahin nianang pagpamatuod ngadto sa uban. Daghan kaninyo mga kaigsoonan ang nakaserbisyo isip mga misyonaryo sa tibuok kalibutan. Daghan kaninyo batan-ong mga lalaki ang moserbisyo pa. Andama ang inyong kaugalingon karon alang niana nga oportunidad. Siguradoa nga takus kamo nga moserbisyo.

Kon andam kita nga mopakigbahin sa ebanghelyo, andam kita nga motubag sa tambag ni Apostol Pedro, kinsa miawhag, “Kinahanglan andam kamo kanunay sa pagtubag kang bisan kinsa nga mangutana sa hinungdan sa paglaum nga anaa kaninyo.”¹⁰

Makabaton kita og mga oportunidad sa tibuok natong kinabuhi sa pagpakigbahin sa atong mga gituohan, bisan tuod nga wala kita masayud sa

kanunay kon kanus-a kita tawagon sa pagbuhat sa ingon. Ang maong oportunidad miabut kanako niadtong 1957 dihang nagtrabaho ko sa negosyo sa pagmantala ug gihangyo nga moadto sa Dallas, Texas, kaniadto gitawag og “ang siyudad sa mga simbahan,” aron mamulong sa kombensyon bahin sa negosyo. Human sa kombensyon, mi-suroy-suroy ko sakay sa bus libut sa sudlunon nga mga dapit sa siyudad. Sa pag-agi namo sa nagkalainlaing mga simbahan, ang among drayber mikomentaryo, “Dapit sa wala inyong makita ang simbahan sa Methodist,” o “Diha sa tuo mao ang katedral sa Katoliko.”

Sa pag-agi namo sa nindot nga pulang building nga hinimo sa brick nga nahimutang sa bungtod, miingon ang drayber, “Diha nga building magpundok ang mga Mormon.” Usa ka babaye sa likod sa bus ang miingon, “Drayber, pwede mi nimong sultihan og dugang bahin sa mga Mormon?”

Ang drayber mipahunong sa bus sa daplin sa karsada, milingi ug mitubag, “Day, ang ako ra gyung nahibaloan bahin sa mga Mormon mao nga magpundok sila nianang pulang building nga hinimo sa brick. Aduna bay usa dinhi sa bus nga nahibalo bahin sa mga Mormon?”

Naghulat ko nga dunay motubag. Akong gitan-aw ang ekspresyon sa nawong sa matag tawo alang sa timailhan kon duna bay nahibalo, duna bay mokomentaryo. Wala. Akong naamguhan nga anaa ra kanako ang paghimo sama sa gisugyot ni Apostol Pedro, nga, “andam kamo kanunay sa pagtubag kang bisan kinsa nga mangutana sa hinungdan sa paglaum nga anaa kaninyo.” Naamguhan usab nako ang kamatuoran sa panultihon “Kon moabut ang panahon sa pagdesisyon, ang oras sa pagpangandam milabay na.”

Sulod sa misunod nga 15 minutos o sobra pa, ako adunay pribilehiyo sa pagpakigbahin sa akong pagpamatuod niadtong anaa sa bus kabahin sa Simbahan ug sa atong mga gituohan. Mapasalamaton ko sa akong pagpamatuod ug mapasalamaton nga andam ko sa pagpakigbahin niini.

Sa tibuok nakong kasingkasing ug kalag nag-ampo ko nga matag tawo nga naghupot sa priesthood motahud niana nga priesthood ug magmatinuron sa pagsalig nga gipahayag dihang gihatag kini. Hinaut nga ang matag usa kanato nga naghupot sa priesthood sa Dios nasayud sa unsay iyang gituohan. Hinaut nga magmaisugon kita ug andam sa pagbarug sa unsay atong gituohan, ug kon kinahanglan kitang magbarug nga mag-inusara diha sa proseso, hinaut nga maisugon nato kanang buhaton, gilig-on sa kahibalo nga sa pagkatinuod wala kita mag-inusara kon magbarug uban sa atong Amahan sa Langit.

Sa atong pagpamalandong sa mahinungdanong gasa nga gihatag kanato—“ang katungod sa pagkapari dili mabulag gikan sa mga gahum sa langit”—hinaut nga ang atong determinasyon mao ang pagbantay ug pagpanalipod niini ug mahimong takus sa dagkong mga saad niini. Hinaut nga mosunod kita sa panudlo sa Manluluwas ngari kanato, nga makita sa basahon sa 3 Nephi: “Ipakita ninyo ang inyong kahayag aron kini moiwig sa kalibutan. Tan-awa Ako mao ang kahayag diin kamo mopakita—nga diin kamo nakakita kanako nga mihimo.”¹¹

Kita unta sa kanunay magsunod niana nga kahayag ug ipataas kini nga makita sa tibuok kalibutan mao ang akong pag-ampo ug akong panalangin ngadto sa tanang nakabati sa akong tingog, sa pangalan ni Jesukristo, amen. ■

MUBO NGA MGA SULAT

1. David Brooks, “If It Feels Right . . .,” *New York Times*, Sept. 12, 2011, nytimes.com.
2. Alfred, Lord Tennyson, “Sir Galahad,” sa *Poems of the English Race*, sel. Raymond Macdonald Alden (1921), 296.
3. Tan-awa sa 1 Nephi 8:26–28.
4. Ezra Taft Benson, “In His Steps” (Church Educational System fireside, Feb. 8, 1987); tan-awa usab sa “In His Steps,” sa *1979 Devotional Speeches of the Year: BYU Devotional and Fireside Addresses* (1980), 59.
5. Gordon B. Hinckley, “Personal Worthiness to Exercise the Priesthood,” *Liahona*, Hulyo 2002, 60.
6. Isaias 1:18.
7. Jeremias 31:34.
8. Mateo 6:24.
9. Moroni 10:4.
10. 1 Pedro 3:15.
11. 3 Nephi 18:24.



Ni Presidente Henry B. Eyring
Unang Magtatambag sa Unang Kapangulohan

Usa ka Saksi

Ang Basahon ni Mormon mao ang pinakamaayo nga giya sa pagkat-on kon unsa kita ka maayo sa atong pagbuhat ug unsaon sa pagbuhat og mas maayo.

Mapasalamaton ako niining oportunidad sa pagpamulong kaninyo niining Igpapahulay sa kinatibuk-ang komperensya sa Simbahan ni Jesukristo sa mga Santos sa Ulahing mga Adlaw. Kada miyembro sa Simbahan dunay managsamang sagrado nga responsibilidad. Midawat kita niini ug misaad nga barugan kini dihang kita gibunyagan. Atong nakatunan gikan sa mga pulong ni Alma, ang bantugang propeta sa Basahon ni Mormon, kon unsay atong gisaad sa Dios nga kita mamahimo: “Andam sa pagbangutan uban niadto nga nagbangutan; oo, sa paghupay niadto nga nagkinahanglan sa kahupayan, ug mobarug ingon nga mga saksi sa Dios sa tanan nga mga panahon ug diha sa tanan nga mga butang, ug diha sa tanan nga mga dapit nga kamo mahimo nga maanaa, bisan hangtud sa kamatayon, nga kamo mahimo nga matubos sa Dios, ug malakip uban niadto nga diha sa unang pagkabanhaw, nga kamo makabaton og kinabuhi nga dayon.”¹

Kana sagrado nga sugo ug mahima-yaong saad gikan sa Dios. Ang akong mensahe karon may kalabutan sa pag-awhag. Ingon nga ang Basahon ni Mormon naghimo sa responsibilidad

nga dayag ngari kanato, kini nagtudlo usab kanato sa dalan sa kinabuhing dayon.

Una, misaad kita nga magmang-gihatagon. Ikaduha, misaad kita nga mahimong mga saksi sa Dios. Ug ikatulo, misaad kita sa paglahutay. Ang Basahon ni Mormon mao ang pinakamaayo nga giya sa pagkat-on kon unsa kita ka maayo sa atong pagbuhat ug unsaon sa pagbuhat og mas maayo.

Sugdan nato kini sa pagkamanggi-hatagon. Pahinumduman ko kamo sa bag-ohay nga mga kasinatian. Daghan kaninyo ang miapil sa usa ka adlaw nga pagserbisyo. Dihay liboan niini nga gihimo sa tibuok kalibutan.

Usa ka konseho sa inyong isig ka Santos nag-ampo aron mahibalo kon unsa nga serbisyo ang planohon. Nangutana sila sa Dios aron masayud kon kinsa ang atong serbisyo-han, unsa nga serbisyo ang ihatag, ug kinsa ang dapiton sa pag-apil. Tingali ila ganing giampo nga dili makalimtan ang mga pala o tubig nga mainom. Labaw sa tanan, nag-ampo sila nga ang tanan nga mihatag og serbisyo ug ang tanan nga midawat niini mobati sa gugma sa Dios.

Nasayud ako nga kadto nga mga pag-ampo natubag sa dili mominos usa ka ward. Kapin sa 120 ka mga miyembro miboluntaryo sa pagtabang. Sulod sa tulo ka oras ilang nalimpyo ang mga nataran sa usa ka simbahan sa among komunidad. Kapoy ug malipayon kini nga buhat. Ang mga ministro sa simbahan mipasalamat. Ang tanan kinsa nagtinabangay nianang adlaw mibati og panaghiusa ug mas dako nga gugma. Ang uban gani miingon nga gibati nila ang kalipay samtang sila nangibut og sagbut ug namung-ol sa gagmay nga kahoy.

Ang mga pulong gikan sa Basahon ni Mormon nakatabang kanila nga mahibalo nganong gibati nila kana nga kalipay. Si Haring Benjamin ang miingon niini ngadto sa iyang katawhan, “Kat-uni nga kon kamo . . . anaa sa pag-alagad sa inyong mga isigkat-awo kamo anaa lamang sa pag-alagad sa inyong Dios.”² Ug si Mormon ang mitudlo sa iyang mga pulong diha sa Basahon ni Mormon, “Ang gugma nga putli mao ang tiunay nga gugma ni Kristo, ug kini molahutay sa kahang-turan; ug bisan kinsa nga makaplagan nga aduna niini sa katapusan nga adlaw, kini makaayo uban kaniya.”³

Ang Ginoo motuman sa Iyang mga saad kaninyo kon kamo motuman sa inyo. Samtang kamo nagserbisyo sa uban alang Kaniya, ipabati Niya kaninyo ang Iyang gugma. Ug sa kadugayan, ang mga pagbati sa gugmang putli mahimong kabahin sa inyong pagka-kamo. Ug inyong madawat ang kasiguroan sa pasalig ni Mormon diha sa inyong kasingkasing samtang kamo magpadayon sa pagserbisyo sa uban niining kinabuhia nga ang tanan maayo ra kaninyo.

Sama sa inyong pagsaad sa Dios nga magmahigugmaon, kamo misaad nga mosaksi Kaniya bisan asa kamo sa tibuok ninyong kinabuhi. Usab, ang Basahon ni Mormon mao ang pinakamaayo nga giya nga akong nahibaloan nga makatabang kanato nga matuman kana nga saad.

Gidapit ako makausa sa pagpamulong sa gradwasyon sa usa ka unibersidad. Ang presidente gusto nga si Presidente Gordon B. Hinckley ang

dapiton, apan nahibaloan nga dili siya makatambong. Busa agig resulta ako ang nakadawat sa imbitasyon. Ako usa ka junior nga sakop sa Korum sa Napulog Duha ka mga Apostoles.

Ang tawo nga midapit nako sa pagpamulong nabalaka sa dihang mas daghan siyag nahibaloan mahitungod sa akong mga obligasyon isip Apostol. Gitawag ko niya sa telepono ug miingon nga siya karon nakasabut nga ang akong katungdanan mao ang pagsaksi kang Jesukristo.

Sa usa ka bug-at nga tono gisultihan ko niya nga ako dili makahimo niana kon ako mamulong pa didto. Gipasabut niya nga ang unibersidad mitahud sa mga tawo sa tanang relihiyosong mga tinuohan, lakip niadtong milimud sa pagkaanaay Dios. Gisubli niya, “Dili ka makatuman sa imong katungdanan diri.”

Akong gibutang ang telepono uban sa seryuso nga mga pangutana sa akong hunahuna. Sultihan ba nako ang unibersidad nga dili nako tumanon ang kasabutan sa pagpamulong? Mga semana na lamang kini sa dili pa ang okasyon. Ang akong pag-adto didto napahibalo na. Unsa kaha ang epekto niini sa maayong ngalan sa Simbahan kon dili ko motuman sa gikasabutan?

Nag-ampo ako aron mahibalo unsay gusto sa Dios nga akong buhaton. Ang tubag miabut sa makapatingalang paagi ngari kanako. Akong naamguhan nga ang mga ehemplo ni Nephi, Abinadi, Alma, Amulek, ug sa mga lalaking anak ni Mosiah nakaimpluwensya kanako. Sila isug nga mga saksi ni Jesukristo atubangan sa grabe kadelikado .

Busa ang bugtong kapilian nga himoon mao ang pagpangandam. Akong gisiksiak ang tanan nga akong mahibaloan mahitungod sa unibersidad. Samtang nagkaduol ang adlaw sa pagpamulong, ang akong kabalaka nagkadako ug nagkahugot ang akong mga pag-ampo.

Sa milagro sama sa pag-iway sa Pula nga Dagat, nakakita ako og artikulo sa mantalaan. Ang unibersidad napasidunggan sa pagbuhat kon unsay nakat-unan sa Simbahan nga



buhaton sa atong tawhanong mga paningkamot sa tibuok kalibutan. Ug busa sa akong pakigpulong akong gihulagway unsa ang ato ug ang ilang nabuhat sa pagtabang sa mga tawo nga anaa sa dakong panginahanglan. Miingon ko nga ako nasayud nga si Jesukristo mao ang tinubdan sa mga panalangin nga miabut ngadto sa mga kinabuhi niadtong ato ug sa ilang giserbisyoohan.

Human sa miting ang mga tigpaminaw namarug sa pagpamakpak, nga ingon og lahi ra alang kanako. Natingala ako apan sa gihapon nabalaka. Nahinumdom ko kon unsay nahitabo ni Abinadi. Si Alma lamang ang midawat sa iyang pagsaksi. Apan nianang pagkagabii, sa usa ka dakong pormal nga panihapon, akong nadungog ang presidente sa unibersidad nga nag-ingon nga sa akong pakigpulong nadungog niya ang mga pulong sa Dios.

Ang maong milagroso nga pagkalingkawas panagsa ra sa akong kasi-natian isip usa ka saksi ni Kristo. Apan ang epekto sa Basahon ni Mormon diha sa inyong kinaiya, gahum, ug kaisug sa pagsaksi sa Dios tinuod. Ang doktrina ug ang walay kahadlok nga mga ehemplo niana nga basahon mobayaw, mogiya ug modasig kaninyo.

Ang kada misyonaryo kinsa nagsangyaw sa pangalan ug ebanghelyo ni Jesukristo mapanalanginan pinaagi sa kada adlaw nga pagbusog sa Basahon ni Mormon. Ang mga ginikanan nga nanlimbasug sa pagpamatuod sa

Manluluwas ngadto sa kasingkasing sa usa ka bata matabangan samtang sila mangita og paagi sa pagdala sa mga pulong ug sa espiritu sa Basahon ni Mormon ngadto sa panimalay ug sa tanang kinabuhi sa ilang pamilya. Kana napamatud-an na nga tinuod kanamo.

Kana nga milagro akong nakita nga nanghitabo sa matag miting sa sakrament ug sa matag klase nga akong gitambongan sa Simbahan. Ang mga mamumulong ug ang mga magtutudlo nagpakita og gugma ug hingkod nga panabut sa kasulatan, ilabi na sa Basahon ni Mormon. Ug ang personal nga mga pagpamatuod klaro nga naggikan sa kinahiladman sa ilang kasingkasing. Nagtudlo sila uban sa nagtubo nga kombiksyon ug nagpamatuod uban sa gahum.

Akong nakita ang ebidensya ingon nga kita nagkamaayo diha sa ikatulo nga bahin sa saad nga atong gihimo sa bunyag. Kita nakigsaad sa paglahutay; sa pagsunod sa mga sugo sa Dios samtang kita buhi pa.

Akong gibisitahan ang karaan nakong higala didto sa ospital kinsa nahiling nga adunay kanser nga wala nay kaayohan. Gikuyog nako ang akong duha ka gagmayng anak nga mga babaye. Wala ko magdahum nga makaila pa diay siya sa mga bata. Ang iyang kaugalingong pamilya nagbarug alirong sa iyang katre sa among pagsulod.

Mihangad siya ug mipahiyum. Kanunay nakong mahinumduman ang iyang hitsura samtang iyang nakita

nga among gikuyog ang among anak nga mga babaye. Misinyas siya nga paduolon sila sa iyang katre. Milingkod siya, migakos kanila, ug gipaila-ila ngadto sa iyang pamilya. Misulti siya sa kabuotan sa duha ka gagmayng mga bata. Ingon og nagpaila siya og mga prinsesa ngadto sa halangdong gingharian.

Nagdahum ako nga dali ra ang among pagbisita. Sa tinuod, nagtuo ko nga, siya gikapoy. Apan samtang ako nagtan-aw ingon og natunaw ang katuigan. Sanag siyang tan-awon ug klaro nga napuno sa gugma alang kanamong tanan.

Ingon og iyang gitagamtam ang higayon nga ingon og mihunong sa pag-irog ang oras. Gigahin niya ang kadaghanan sa iyang kinabuhi sa pag-amuma og mga bata alang sa Ginoo. Nasayud siya gikan sa asoy sa Basahon ni Mormon nga ang nabanhaw nga Manluluwas mikuha sa gagmayng mga bata, sa tinagsa, mipanalangin kanila, ug mihilak sa kalipay.⁴ Ug siya nakasinati sa iyang kaugalingon og igong gidugayon niana nga kalipay aron makalahutay sa Iyang mahigugmaong pagserbisyo hangtud sa katapusan.

Akong nakita kanang sama nga milagro sa lawak katulganan sa lalaki nga nakahatag og igong matitud-anon nga serbisyo nga sa akong pagtuo igo na ang iyang nahimo aron mopahulay.

Nahibalo ko nga siya miagi na sa taas ug sakit nga pagtambal sa usa ka sakit nga giingon sa doktor nga wala nay kaayohan. Wala silay gitanyag nga dugang nga tambal ni paglaum.

Ang iyang asawa midala kanako ngadto sa lawak katulganan sa iyang bana. Didto siya, naghigda ibabaw sa maayong pagkahapngig nga higdaanan. Nagsul-ob siya og bag-ong inutaw nga puting polo, kurbata, ug bag-ong sapatos.

Nakita niya ang katingala sa akong mga mata, mikatawa sa hilum, ug mipasabut, "Human sa imong pagpanalangin kanako, gusto kong motubag sa tawag sa pagbangon ug motrabaho." Akong nakita nga siya andam na sa interbyu nga mahitabo sa dili madugay uban sa Agalon, kinsa iyang

gialagaran uban sa kamatinud-anon.

Siya usa ka ehemplo sa hingpit nga nakabig nga Santos sa Ulahing mga Adlaw nga akong gikahimamat human nila nahatag ang mahalarong serbisyo. Sila nagpadayon

Gihulagway kini ni Presidente Marion G. Romney sa ingon niini nga paagi: "Sa usa ka tawo nga hingpit nga nakabig, ang pagtinguha sa mga butang nga [supak] sa ebanghelyo ni Jesukristo nahanaw na, ug ang napuli mao ang gugma sa Dios uban ang hugot ug magiyahon nga determinasyon sa pagsunod sa iyang mga sugo."⁵

Kana mao ang hugot nga determinasyon nga akong nakita kasagaran kaayo diha sa sinati na nga mga disipulo ni Jesukristo. Sama sa sister nga miabiabi sa akong anak nga mga babaye ug sa lalaki nga nagsul-ob og bag-ong sapatos andam sa pagbangon ug pagtrabaho alang sa Ginoo, ilang gisunod ang Iyang mando hangtud sa katapusan. Ang tanan kaninyo nakakita niini.

Makatan-aw kamo niini pag-usab kon kamo mobasa sa Basahon ni Mormon. Sa gihapon akong gibati ang pagdayeg sa akong kasingkasing kon basahon ko kini nga mga pulong sa usa ka nagkatigulang ug determinadong sulugoon sa Dios: "Kay bisan niini nga panahon, ang akong tibuok nga lawas mikurog sa hilabihan samtang misulay sa pagpamulong nganha kaninyo; apan ang Ginoo . . . nagbulig kanako, ug nagtugot kanako nga ako mamulong nganha kaninyo."⁶

Makabaton kamo og kaisug sama kanako gikan sa ehemplo sa paglahutay nga gihatag kanato ni Moroni.

Siya nag-inusara sa iyang pagpangalagad. Siya nasayud nga ang katapusan sa kinabuhi duol na alang kaniya. Ug bisan pa niana pamatia kon unsay iyang gisulat alang sa kaayohan sa katawhan nga wala pa matawo ug sa mga kaliwatan sa iyang mortal nga mga kaaway: "Oo, duol ngadto kang Kristo, ug paghingpit diha kaniya, ug ilimud ang inyong mga kaugalingon sa tanan nga dili diosnon; ug kon kamo molimud sa inyong mga kaugalingon sa tanan nga dili diosnon, ug mohigugma sa Dios uban sa tibuok ninyo nga gahum, hunahuna ug kusog, niana ang iyang grasya igo alang kaninyo, nga pinaagi sa iyang grasya kamo mahimo nga hingpit diha kang Kristo."⁷

Mihatag si Moroni niana nga pagsaksi isip usa ka panamilit sa iyang kinabuhi ug pagpangalagad. Iyang giawhag ang gugmang putli sama sa mga propeta sa tibuok Basahon ni Mormon. Gidugang niya ang iyang pagsaksi sa Manluluwas sa dihang ang kamatayon nagsingabut kaniya. Siya usa ka tinuod nga kinabig nga anak sa Dios, sama sa atong mahimo: mapuno sa gugmang putli, makanunayon ug walay kahadlok isip usa ka saksi sa Manluluwas ug sa Iyang ebanghelyo, ug determinado sa paglahutay hangtud sa katapusan.

Mitudlo si Moroni nato kon unsay gikinahanglan niana gikan kanato. Miingon siya nga ang unang lakang sa hingpit nga pagkakabig mao ang hugot nga pagtuo. Ang mainampung pagtuon sa Basahon ni Mormon molig-on sa pagtuo diha sa Dios nga Amahan, sa Iyang Pinalanggang Anak,



ug sa Iyang ebanghelyo. Kini molig-on sa inyong pagtuo sa mga propeta sa Dios, karaan ug sa karon.

Kini mas makapaduol ninyo sa Dios kay sa bisan unsa nga basahon. Kini makapausab og kinabuhi ngadto sa mas maayo. Nag-awhag ako kaninyo sa pagbuhat unsay gibuhit sa akong misyonaryo nga kompanyon. Milayas siya sa iyang panimalay sa dihang tin-edyer pa, adunay tawo nga mibutang og Basahon ni Mormon sa kahon nga gidala niya sa iyang pagpangita og labaw nga kalipay.

Ang katuigan milabay. Mibalhin balhin siya og dapit sa tibuok kalibutan. Siya nag-inusara ug walay kalipay usa ka adlaw niana sa dihang nakita niya ang kahon. Ang kahon nga iyang gidala puno sa mga butang. Ilawom sa kahon, nakita niya ang Basahon ni Mormon. Gibasa niya ang saad niini ug gisulayan kini. Nasayud siya nga kini tinuod. Kana nga saksi miusab sa iyang kinabuhi. Nakaplagaan niya ang kalipay lapas sa iyang gipangandoy.

Ang inyong kopya sa Basahon ni Mormon mahimong natago sa inyong panan-aw pinaagi sa kalinga ug atensyon tungod sa tanan ninyo nga panaw. Nangamuyo ako kaninyo sa pagtuo og maayo ug sa kanunay gikan sa mga pahina niini. Anaa niini ang kahingpitan sa ebanghelyo ni Jesukristo, nga mao lamang ang paagi nga makabalik ngadto sa Dios.

Ibilin ko kaninyo ang akong tinuod nga pagsaksi nga ang Dios buhi ug motubag sa inyong mga pag-ampo. Si Jesukristo mao ang Manunubos sa kalibutan. Ang Basahon ni Mormon tinuod ug sigurado nga saksi nga Siya buhi, ug nga Siya mao ang atong nabanhaw ug buhing Manluluwas.

Ang Basahon ni Mormon usa ka bililhon nga saksi. Karon akong ibilin kaninyo ang akong pagsaksi sa sagradong pangalan ni Jesukristo, amen. ■

MUBO NGA MGA SULAT

1. Mosiah 18:9.
2. Mosiah 2:17.
3. Moroni 7:47.
4. Tan-awa sa 3 Nephi 17:21–22.
5. Marion G. Romney, sa Conference Report, Okt. 1963, 23.
6. Mosiah 2:30.
7. Moroni 10:32.



Ni Elder Robert D. Hales

Sa Korum sa Napulog Duha ka mga Apostoles

Nagahulat sa Ginoo: Matuman ang Imong Kabubut-on

Ang katuyoan sa atong kinabuhi dinhi sa yuta mao ang pagtubo, paglambo, ug malig-on pinaagi sa kaugalingon natong mga kasinatian.

Niining buntag sa Igpapahulay, nagpasalamat kita ug nagpamatuod sa buhing kamatuoran sa atong Manluluwas. Ang Iyang ebanghelyo gipahiuli pinaagi ni Propeta Joseph Smith. Ang Basahon ni Mormon tinuod. Gidumala kita og buhing propeta karon, si Presidente Thomas S. Monson. Labaw sa tanan, naghatag kita og balaang pagsaksi sa Pag-ula ni Jesukristo ug sa mahangturong mga panalangin nga naggikan niini.

Sa milabayng pipila ka bulan, aduna koy oportunidad sa pagtuo ug pagkat-on og dugang mahitungod sa maulaong sakripisyo sa atong Manluluwas ug giunsa Niya sa pag-andam ang Iyang Kaugalingon sa paghimo ni-anang mahangturong paghalad alang sa matag usa kanato.

Ang Iyang pagpangandam nag-sugod didto sa kinabuhi sa wala pa dinhi sa yuta sa dihang naghulat Siya sa Iyang Amahan, nga nag-ingon, “Ang imong pagbuot mao ang matuman, ug ang himaya imo sa

kahangturan.”¹Sugod nianang higayuna ug nagpadayon karon, Iyang gigamit ang Iyang kabubut-on sa pagdawat ug pagtuman sa plano sa atong Langitnong Amahan. Ang mga kasulatan nagtudlo kanato nga sa batan-on pa Siya, Siya “anaa sa balay sa [Iyang] Amahan”² ug “naghulat sa Ginoo nga moabut ang panahon sa Iyang pangalagad.”³ Sa edad nga 30, nag-antus Siya og grabe nga tintasyon apan mipili sa pagpakigbatok, nga nag-ingon, “Pahawa diha, Satanas.”⁴ Sa Getsemani, misalig Siya sa Iyang Amahan, nga namahayag, “Hinoon dili ang akong pagbuot maoy matuman, kondili ang imo,”⁵ ug dayon migamit sa Iyang kabubut-on nga mag-antus alang sa atong mga sala. Pinaagi sa makapaubos nga husay atubangan sa kadaghanan ug sa kasakit sa paglansang sa krus, naghulat Siya sa Iyang Amahan, andam nga “samaran alang sa atong mga kalapasan . . . [ug] gibun-og tungod sa atong mga kada-utan.”⁶ Bisan kon Siya mituaw, “Dios

ko, Dios ko, nganong gitalikdan mo ako?”⁷ naghulat Siya sa Iyang Amahan—migamit sa Iyang kabubut-on nga pasayloon ang Iyang mga kaway,⁸ nagtan-aw nga mabantayan ang Iyang inahan,⁹ ug molahutay sa kata-pusan hangtud nga ang Iyang kinabuhi ug mortal nga misyon natapos.¹⁰

Kanunay kong namalandong, Ngano nga ang Anak sa Dios ug ang Iyang balaang mga propeta ug ang tanang matinud-anong mga Santos adunay mga pagsulay ug mga kasakit, bisan kon naningkamot sila sa pagbuhay sa kabubut-on sa Langitnong Amahan? Nganong grabe man kini kalisud, ilabi na kanila?

Naghunahuna ko ni Joseph Smith, nga nag-antus sa sakit sa bata pa ug sa pagpanglutos sa tibuok niyang kinabuhi. Sama sa Manluluwas, siya mituaw, “O Dios, hain ba ikaw?”¹¹ Apan bisan kon siya daw nag-inusara, migamit siya sa iyang kabubut-on paghulat sa Ginoo ug sa pagtuman sa kabubut-on sa iyang Langitnong Amahan.

Naghunahuna ko sa atong pioneer nga mga kaliwatan, nga gipapahawa sa Nauvoo ug mitabok sa kapatagan, migamit sa ilang kabubut-on sa pagsunod sa propeta bisan og nag-antus sila sa mga sakit, grabe nga kakabus, ug ang uban gani sa kamatayan. Nganong ingon man ka grabe ang kasakit? Para sa unsa? Alang sa unsa nga katuyoan?

Samtang mangutana kita niini, atong maamgohan nga ang katuyoan sa atong kinabuhi dinhi sa yuta mao ang pagtubo, paglambo, ug malig-on pinaagi sa kaugalingon natong kasi-natian. Unsaon nato kini paghimo? Ang mga kasulatan naghatag kanato og tubag sa usa ka yano nga hugpong sa mga pulong: kita “maghulat sa Ginoo.”¹² Ang mga pagsulay ihatag kanatong tanan. Kining mortal nga mga hagit nagtugot kanato ug sa atong Langitnong Amahan sa pagtino kon kita mogamit ba sa atong kabubut-on sa pagsunod sa Iyang Anak. Nasayud na Siya, ug kita adunay oportunidad sa pagkat-on, nga bisan kon unsa ka lisud ang atong mga kahimtang, “kining tanan nga mga butang [alang sa atong] kasinatian, ug . . . [atong] kaayohan.”¹³



Nagpasabut ba kini nga kanunay ra natong sabton ang atong mga hagit? Dili ba kitang tanan, usahay, adunay rason nga mangutana, “O Dios, hain man ikaw?”¹⁴ Oo! Kon ang kapikas mamatay, ang kapares maghunahuna. Kon ang pinansyal nga kalisud moabut sa pamilya, ang amahan mangutana. Kon ang mga anak mahisalaag, ang inahan ug amahan motuaw sa kasubo. Oo, “ang paghilak mopabilin sa kagabhion, apan ang kalipay moabut sa kabuntagon.”¹⁵ Dayon, sa banag-banag sa atong nagtubo nga pagtuo ug pagsabut, kita mobangon ug mopili sa paghulat sa Ginoo, nga mag-ingon, “ang Imong pagbuot matuman.”¹⁶

Nan, unsa man ang ipasabut sa paghulat sa Ginoo? Sa mga kasulatan, ang pulong *paghulat* nagpasabut nga molaum, magpaabut, ug mosalig. Ang paglaum ug pagsalig sa Ginoo nagkinahanglan og pagtuo, pailub, pagpaubos, kaaghup, kamainantuson, pagsunod sa mga sugo, ug paglahutay sa katapusan.

Ang paghulat sa Ginoo nagpasabut nga pagtanom sa liso sa pagtuo ug pag-amuma niini “uban sa dako nga kakugi, ug . . . pailub.”¹⁷

Nagpasabut kini nga mag-ampo sama sa gibuhay sa Manluluwas—ngadto sa Dios, ang atong Langitnong Amahan—nga nag-ingon, “Paanhia

ang imong gingharian. Pagabuhaton unta ang imong kabubut-on.”¹⁸ Mao kana ang pag-ampo nga atong ihalad sa tibuok natong kalag sa pangalan sa atong Manluluwas, si Jesukristo.

Ang paghulat sa Ginoo nagpasabut nga mamalandong sa atong mga kasingkasing ug “modawat sa Espiritu Santo” aron masayud kita sa “tanang nga mga butang nga kinahanglan [natong] buhaton.”¹⁹

Sa atong pagsunod sa mga pag-aghat sa Espiritu, atong madiskobrihan nga ang “kasakit mohimog pagkamainantuson”²⁰ ug kita makat-on sa “pagpadayon diha sa pagpailub hangtud [kita] mahingpit.”²¹

Ang paghulat sa Ginoo nagpasabut nga “mobarug nga lig-on”²² ug “mopadayon sa unahan” diha sa pagtuo, “magbaton sa usa ka hingpit nga kahayag sa paglaum.”²³

Kini nagpasabut nga “mosalig lamang diha sa mga maayo nga buhat ni Kristo”²⁴ ug “uban sa [Iyang] grasya nga motabang [kanato, nga mag-ingon]: Ang Imong pagbuot mao ang matuman, O Ginoo ug dili ang amo.”²⁵

Samtang maghulat kita sa Ginoo, kita “dili matarug sa paghupot sa mga sugo,”²⁶ nasayud nga kita “sa usa ka adlaw makapahulay gikan sa tanan [nato] nga mga kasakitan.”²⁷

Ug “dili [nato] wad-on . . . ang [atong] pagsalig”²⁸ nga “ang tanan nga mga butang diin [kita] gipaantus molihok alang sa [atong] kaayohan.”²⁹

Kadto nga mga kasakitan moabut sa nagkalainlaing matang. Ang kasi-natian ni Job nagpahinumdom kanato unsay posible natong antuson. Si Job nawad-an sa tanan niyang kabtangan, lakip na ang iyang kayutaan, balay, ug mga hayop; mga sakop sa iyang pamilya; iyang dungog; kahimsog sa iyang panglawas, ug gani kalantip sa iyang panghunahuna. Apan naghulat siya sa Ginoo ug mihatag og gamhanan nga personal nga pagpamatuod: Siya miingon:

“Nasayud ako nga ang akong Manluluwas buhi man, ug sa kaulahian nga adlaw siya motindog sa ibabaw sa yuta:

“Ug sa tapus . . . kining lawas ko gayud malaglag, unya sa wala ang

akong unod makita ko ang Dios.”³⁰

“Ania karon, iyang pagalaglagon ako: ako walay paglaum.”³¹

Bisan pa sa talagsaong mga ehemplo ni Job, sa mga propeta, ug sa Manluluwas, mabantayan nato nga mahagiton gihapon ang paghulat sa Ginoo, labi na kon dili nato masabtan sa hingpit ang Iyang plano ug mga katuyoan alang nato. Kana nga pagsabut kasagarang ihatag nga “pagtulun-an human sa usa ka pagtulun-an, [ug] lagda human sa usa ka lagda.”³²

Sa akong kinabuhi akong nakatunan nga usahay dili ko makadawat og tubag sa usa ka pag-ampo kay ang Ginoo nasayud nga dili ko andam. Kon Siya motubag, sa kasagaran “diyutay dinhi ug diyutay didto”³³ kay mao lamang kana ang akong mahimo o tanan nga andam nakong buhaton.

Kasagaran mag-ampo kita nga makabaton og pailub, apan gusto nato nga karon dayon! Sa batan-on pa, si Presidente David O. McKay nag-ampo alang sa pagsaksi sa kamatuoran sa ebanghelyo. Daghang katuigan ang milabay, samtang nagserbisyo siya sa iyang misyon sa Scotland, kana nga pagsaksi sa katapusan miabut. Sa kaulahian siya misulat, “Usa kadto ka pagpasalig kanako nga ang sinsero nga pag-ampo matubag ‘sa usa ka panahon, sa usa ka lugar.’”³⁴

Dili kita masayud kon kanus-a o sa unsang paagi ihatag ang mga tubag sa Ginoo, apan sa Iyang panahon ug sa Iyang paagi, ang mga tubag moabut. Ang ubang tubag tingali kinahanglan natong hulaton hangtud sa sunod nga kinabuhi. Mahimong tinuod kini sa pipila sa mga saad sa atong patriyarkal nga mga panalangin ug sa pipila ka mga panalangin alang sa mga sakop sa pamilya. Dili kita mohunong sa pagsalig sa Ginoo. Ang Iyang mga panalangin mahangturon, dili temporaryo.

Ang paghulat sa Ginoo makahatag kanato og bililhong oportunidad sa pagdiskobre nga adunay daghan nga naghulat kanato. Ang atong mga anak naghulat nga kita makapakita og pailub, gugma, ug pagsabut ngadto kanila. Ang atong mga ginikanan naghulat nga kita makahatag og



pasalamat ug kalooy. Ang atong mga igsoon naghulat nga kita mahimong matugtanon, maloloy-on, ug mapasayloon. Ang atong mga kapikas naghulat nga kita mahigugma kanila sama sa paghigugma sa Manluluwas sa matag usa kanato.

Sa atong paglahutay sa pisikal nga pag-antus, nagkadako ang atong kasayuran kon pila ang naghulat sa matag usa kanato. Sa tanang mga Maria ug mga Marta, sa tanang maayong mga Samaritanhon nga nangalagad sa masakiton, nagtabang sa maluyahon, ug nag-amuma sa adunay kakulangan sa mental ug pisikal, akong gibati ang pasalamat sa mahigugmaong Langitnong Amahan ug sa Iyang Pinalangga nga Anak. Sa inyong inadlaw nga pangalagad sama kang Kristo, naghulat kamo sa Ginoo ug nagbuhat sa kabubut-on sa inyong Langitnong Amahan. Ang iyang pasalig kaninyo klaro: “Maingon nga gibuhay ninyo kini ngadto sa usa sa mga labing gagmay niining akong mga igsoon, gibuhay usab ninyo kini kanako.”³⁵ Nasayud Siya sa inyong mga sakripisyo ug mga kasubo. Dunggon Niya ang inyong mga pag-ampo. Ang

Iyang kalinaw ug kapahulayan mainyo samtang padayon kamong maghulat Kaniya uban sa hugot nga pagtuo.

Matag usa kanato mas gimahal sa Ginoo labaw pa kay sa posible natong masabtan o mahunahunaan. Mas magmabination kita sa usag usa ug mas magmabination kita sa atong kaugalingon. Atong hinumduman nga samtang maghulat kita sa Ginoo, mahimo kitang “[mga] santos pinaagi sa [Iyang] pag-ula, . . . manunoton, maaghup, mapainubsanon, mapailubon, puno sa gugma, mauyunon sa pagdawat sa tanan nga mga butang diin ang Ginoo makakita nga angay ipahamtang nganha [kanato], bisan ingon sa usa ka bata nga motugyan sa iyang kaugalingon ngadto sa iyang amahan.”³⁶

Mao kana ang pagtugyan sa atong Manluluwas ngadto sa Iyang Amahan didto sa Tanaman sa Getsemani. Nangamuyo Siya sa Iyang mga disipulo, “Pagtukaw kamo uban kanako,” apan sa tulo ka higayon Siya mibalik ngadto nila ug nakita nga sila nangatulog.³⁷ Wala ang pagpakig-uban niining mga disipulo ug sa katapusan wala ang presensya sa Iyang Amahan, ang Manluluwas mipili sa pag-antus sa atong “mga sakit ug mga kasakit ug mga pagtintal sa matag matang.”³⁸ Pinaagi sa anghel nga gipadala aron sa paglig-on Kaniya,³⁹ wala Siya “mabalibad sa pag-inom sa pait nga kopa.”⁴⁰ Naghulat Siya sa Iyang Amahan nga nag-ingon, “Matuman ang Imong kabubut-on,”⁴¹ ug mapaubsaon Niyang gituman ang Iyang misyon nga nag-inusara.⁴² Karon, isip usa sa Iyang Napulog Duha ka mga Apostoles niining ulahing mga adlaw, ako nag-ampo nga kita lig-unon sa pagtukaw uban Kaniya ug maghulat Kaniya sa tibuok natong kinabuhi.

Niining buntag sa Igpapahulay, mopadayag ko og pasalamat nga sa ako ug sa inyong Getsemani,⁴³ wala kita mag-inusara. Siya nga nagbantay *kanato* “dili mahatagpilaw ni mahikatulog.”⁴⁴ Ang Iyang mga anghel dinhi ug sa pikas kinabuhi “anaa libut [kanato], aron sa pagtabang [kanato].”⁴⁵ Mohatag ko sa akong linain nga pagsaksi nga ang saad sa Manluluwas tinuod, kay Siya miingon, “Kadtong naghulat

sa Ginoo magabag-o sa ilang kusog; sila manlupad pinaagi sa mga pako ingon sa mga agila; sila manalagan, ug dili makapuyan; sila manlakaw, ug dili mangaluya.”⁴⁶ Unta maghulat kita Kaniya pinaagi sa pagpadayon uban sa pagtuo, nga kita unta makaingon sa atong mga pag-ampo, “Matuman ang Imong kabubut-on,”⁴⁷ ug mobalik ngadto Kaniya nga adunay dungog. Sa balaan nga pangalan sa atong Manluluwas ug Manunubos, nga si Jesu-kristo, amen. ■

MUBO NGA MGA SULAT

1. Moises 4:2.
2. Lucas 2:49.
3. Hubad ni Joseph Smith, Mateo 3:24, sa Ang Giya ngadto sa mga Kasulatan.
4. Lucas 4:8.
5. Lucas 22:42.
6. Isaias 53:5; Mosiah 14:5.
7. Mateo 27:46; Marcos 15:34.
8. Tan-awa sa Lucas 23:34.
9. Tan-awa sa Juan 19:27.
10. Tan-awa sa Juan 19:30.
11. Doktrina ug mga Pakigsaad 121:1.
12. Salmo 37:9; 123:2; Isaias 8:17; 40:31; 2 Nephi 18:17.
13. Doktrina ug mga Pakigsaad 122:7.
14. Doktrina ug mga Pakigsaad 121:1.
15. Salmo 30:5.
16. Mateo 6:10; 3 Nephi 13:10; tan-awa usab sa Mateo 26:39.
17. Alma 32:41.
18. Mateo 6:10; Lucas 11:2.
19. 2 Nephi 32:5.
20. Mga Taga-Roma 5:3.
21. Doktrina ug mga Pakigsaad 67:13.
22. Alma 45:17.
23. 2 Nephi 31:20.
24. Moroni 6:4.
25. Doktrina ug mga Pakigsaad 109:24.
26. Alma 1:25.
27. Alma 34:41.
28. Mga Hebreohanon 10:35.
29. Doktrina ug mga Pakigsaad 98:3.
30. Job 19:25–26.
31. Job 13:15.
32. 2 Nephi 28:30.
33. 2 Nephi 28:30.
34. *Mga Pagtulun-an sa mga Presidente sa Simbahan: David O. McKay* (2003), xviii.
35. Mateo 25: 40.
36. Mosiah 3:19.
37. Mateo 26:38; tan-awa usab sa mga bersikulo 39–45.
38. Alma 7:11.
39. Tan-awa sa Lucas 22:43.
40. “In Memory of the Crucified,” *Hymns*, nu. 190; tan-awa usab sa 3 Nephi 11:11; Doktrina ug mga Pakigsaad 19:18–19.
41. Mateo 26:42.
42. Tan-awa sa Doktrina ug mga Pakigsaad 76:107; 88:106; 133:50.
43. “Where Can I Turn for Peace?” *Hymns*, nu. 129.
44. Salmo 121:4.
45. Doktrina ug mga Pakigsaad 84:88.
46. Isaias 40:31.
47. Mateo 26:42.



Ni Elder Tad R. Callister
Sa Kapangulohan sa Seventy

Ang Basahon ni Mormon—Basahon gikan sa Dios

Kauban sa Biblia, ang Basahon ni Mormon usa ka importante nga saksi sa doktrina ni Kristo ug sa Iyang kabalaan.

Katuigan na ang milabay ang apohan sa akong lolo migunit og kopya sa Basahon ni Mormon sa unang higayon. Miabli siya sa tunga-tunga ug mibasa og pila ka pahina. Dayon mipahayag siya, “Kana nga basahon gisulat sa Dios o sa yawa, ug akong susihon kinsa ang nagsulat niini.” Gihurot niya kini pagbasa kaduha sa misunod nga 10 ka adlaw ug dayon mipahayag, “ang yawa dili makasulat niini—gikan kini sa Dios.”¹

Kana mao ang katalagsaon sa Basahon ni Mormon—walay tunga-tunga. Pulong kini sa Dios sumala sa gipanagna, o kini hingpit nga panglimbong. Kini nga libro wala gayud mangangkon nga usa kini ka moral nga kasabutan o teyolohikanhong komentaryo o koleksyon sa makadasisig nga mga sinulat. Nangangkon kini nga pulong sa Dios—matag sentence, matag bersikulo, matag pahina. Si Joseph Smith mipahayag nga ang anghel sa Dios ang midala kaniya ngadto sa bulawan nga mga palid, nga nanglangkob sa mga sinulat sa mga propeta

sa karaan nga Amerika, ug siya mihubad niadto nga mga palid pinaagi sa balaan nga mga gahum. Kon kana nga istorya tinuod, nan ang Basahon ni Mormon balaan nga kasulatan, sama sa gipahayag niini; kon dili, usa kini ka komplikado, yawan-ong panglingla.

Si C. S. Lewis naghisgot sa sama nga problema nga giatubang sa usa ka tawo kinsa kinahanglang mopili kon dawaton ba o isalikway ang kabalaan sa Manluluwas—diin walay naa sa tunga-tunga. “Maningkamot ako sa pagpugong ni bisan kinsa nga mosulti og binuang nga butang nga kanunay isulti sa mga tawo mahitungod Kaniya nga: ‘Andam kong modawat ni Jesus nga usa ka moral nga magtutudlo, pero dili ko modawat sa Iyang gipangangkon nga siya Dios.’ Mao kanang butanga nga dili nato angay isulti. Ang tawo nga usa gyud ka tawo ug mosulti og ingon niana nga butang kabahin ni Jesus dili mamahimo nga usa ka moral nga magtutudlo. . . . Kinahanglan nga mopili kamo. Posible nga kining tawhana

mao kaniadto, ug karon, ang Anak sa Dios: o kon di gani usa ka buangon nga tawo o mas grabe pa... Pero dili kita mohatag og walay bili nga pagdayeg mahitungod sa Iyang pagkatalagsaon nga magtutudlo sa tawo. Wala kita Niya hatagi og katungod sa pag-iningon niana. "Dili kana maoy Iyang tuyo."²

Ingon man, kinahanglan kitang mohimo og yano nga pagpili sa Basahon ni Mormon—kon sa Dios ba kini o sa yawa. Wala gayuy laing kapilian. Sa makadiyot dapiton ko kamo sa usa ka pagtesting nga makatabang ninyo sa pagsuta sa tinuod nga matang niini nga basahon. Pangutan-a ang inyong kaugalingon kon ang mosunod nga mga kasulatan nga gikan sa Basahon ni Mormon makapaduol ba ninyo ngadto sa Dios o sa yawa:

"Pagbusog sa mga pulong ni Kristo; kay tan-awa, ang mga pulong ni Kristo magtug-an kaninyo sa tanan nga mga butang nga inyong buhaton" (2 Nephi 32:3).

O niini nga mga pulong sa usa ka mahigugmaon nga amahan ngadto sa iyang mga anak: "Ug karon, akong mga anak, hinumdumi, hinumdumi nga kini diha sa lig-on nga sukaranan sa atong Manunubos kinsa mao si Kristo, ang anak sa Dios, nga kamo kinahanglan gayud motukod sa inyong tukuranan" (Helaman 5:12).

O niini nga mga pulong sa usa ka propeta: "Duol ngadto kang Kristo, ug paghingpit diha kaniya" (Moroni 10:32).

Kini ba nga pamahayag gikan sa Basahon ni Mormon posibling gipasi-ugdahan sa yawa? Human ang Manluluwas mipapahawa sa mga yawa, ang mga Pariseo miingon nga nabuhat Niya kini "pinaagi ni Beelzebu ang prinsipeng sa mga yawa." Ang Manluluwas mitubag nga ang maong sulti binuang: "Ang matag gingharian," Siya miingon, "nga mabahin batok sa iyang kaugalingon, malaglag; ug ang matag siyudad... balay dili mobarug kon kini mabahin batok sa iyang kaugalingon." Ug dayon sa Iyang makakombinang nga katapusang pamahayag: "*Kon si Satanas man nagpagula kang Satanas, nabahin diay siya batok sa iyang kaugalingon; nan unsaon pa man pagbarug sa*



iyang gingharian?" Mateo 12:24–26; empasis gidugang.

Kon ang unang mga kasulatan gikan sa Basahon ni Mormon nagtudlo nato sa pagsimba ug paghigugma ug pagserbisyo sa Manluluwas (nga ilang gibuhahat), sa unsang paagi nga kini gikan sa yawa? Kon mao, siya mabahin batok sa iyang kaugalingon ug sa ingon naglaglag sa iyang kaugalingong gingharian, ang mao gayud nga kahintang miingon ang Manluluwas dili mahitabo. Ang matinuoron, patas nga pagbasa sa Basahon ni Mormon makahatag sa tawo sa sama nga konklusyon sa apohan sa akong lolo, nga: "Ang yawa dili makasulat niini—gikan gyud kini sa Dios."

Apan ngano nga ang Basahon ni Mormon importante man kaayo kon duna na kitay Biblia nga makatudlo kanato mahitungod ni Jesukristo? Wala ba kamo mahibulong nganong dunay daghang simbahan nga Kristiyano sa kalibutan karon nga ila mang nakuha ang ilang mga doktrina gikan sa samang Biblia? Tungod kay lahi-lahi ang ilang pagsabut sa Biblia. Kon pareha pa unta ang ilang pagsabut, pareha ra unta silag simbahan. Dili kini mao ang kahintang nga gusto sa Ginoo, kay si Apostol Pablo mipahayag nga adunay "usa ka Ginoo, usa ka pagtuo, usa ka bautismo" (Mga Taga-Efeso 4:5). Aron mahitabo kini nga panaghiusa, ang Ginoo miestablisar og balaan nga balaod sa mga saksi. Si Pablo mitudlo, "Sa bisan unsa nga sumbong pamatud-an sa duha o tulo ka mga saksi" (2 Mga Taga-Corinto 13:1).

Ang Biblia usa ka saksi ni Jesukristo; ang Basahon ni Mormon lain nga saksi. Ngano nga ang ikaduhang saksi importante kaayo? Ang mosunod nga paghulagway makatabang:

Pila ka tul-id nga linya ang inyong ma-drawing sa usa ka tuldok diha sa papel? Ang tubag walay katapusan. Sa makadiyot, ibutang ta nga ang usa ka tuldok nagrepresentar sa Biblia ug ang gatasan ka tul-id nga linya nga madrowing agi niana nga tuldok nagrepresentar sa lain-laing paghubad sa Biblia ug ang kada hubad nagrepresentar og laing simbahan.

Unsay mahitabo, kon nianang piraso sa papel adunay ikaduha nga tuldok nga nagrepresentar sa Basahon ni Mormon? Pila man ka tul-id nga linya ang inyong madrowing tali niining duha ka mga tuldok: ang Biblia ug ang Basahon ni Mormon? Usa lang. Usa lang ka hubad sa mga doktrina ni Kristo ang makuha sa pagpamatuod niining duha ka mga saksi.

Sa kanunay ang Basahon ni Mormon maoy magpamatuod, moklaro, mohiusa nga saksi sa doktrina nga gitudlo sa Biblia busa adunay "usa ka Ginoo, usa ka pagtuo, usa ka bautismo." Pananglit, pipila ka tawo ang naglibug kon importante ba ang bunyag alang sa kaluwasan bisan og ang Manluluwas mipahayag ngadto ni Nicodemo, "Gawas kon ang tawo iganak pag-usab, dili siya makakita sa gingharian sa Dios" (Juan 3:5). Ang Basahon ni Mormon, hinoon, mitangtang sa tanang pagduhaduha niana nga hilisguttan: "Ug siya misugo sa tanan nga mga tawo nga sila kinahanglan gayud nga maghinulsol, ug magpabunyag sa iyang ngalan, . . . o sila dili maluwas sa gingharian sa Dios" (2 Nephi 9:23).

Dihay nagkadaiyang matang sa mga bunyag sa kalibutan karon bisan og ang Biblia nagsulti nato sa paagi sa pagbunyag sa Manluluwas, atong



Jundiai, Brazil

labing maayo nga Ehemplo: “[Siya] mi-haw-as dayon gikan sa tubig” (Mateo 3:16). Makahaw-as kaha Siya gikan sa tubig gawas kon Siya miunlod una ngadto sa tubig? Basin og duna pay panaglalis niini nga hilisgutan, ang Basahon ni Mormon makapawala niini sa direkta nga pamahayag sa doktrina kabahin sa saktong paagi sa bunyag: “Ug unya kamo mopaunlod kanila diha sa tubig” (3 Nephi 11:26).

Daghang nagtuo nga ang pinadayag nahuman sa Biblia bisan og ang Biblia mismo mao ang pagpamatuod sa pagpadayag nga sumbanan sa Dios kapin sa 4,000 ka tuig sa pagkabuhi sa tawo. Pero ang usa ka dili saktong doktrina sama niini maingon sa domino nga ang lihok mopatumpag sa laing mga domino, o niining kahintang, ang pagkatumpag sa saktong mga doktrina. Ang pagtuo nga nahunong na ang pagpadayag maoy hinungdan nga matumpag ang doktrina nga ang Dios pareha ra kaniadto, karon, ug sa kahangturan” (Mormon 9:9); ug maoy hinungdan nga matumpag ang doktrina nga gitudlo ni Amos nga “sa pagkatinuod ang Ginoong Dios dili magbuhat sa bisan unsa, gawas kon ang iyang tinago, ipadayag niya sa iyang mga alagad, ang mga manalagna [propeta]” (Amos 3:7); ug maoy hinungdan nga matumpag ang doktrina nga ang “Dios wala diay pinalabi sa mga tawo” (Mga Buhat 10:34) ug sa ingon namulong ngadto sa tanang mga tawo sa tanang kapanahunan. Apan maayo na lang ang Basahon ni Mormon mipahibalik

sa biblikal nga kamatuoran sa padayon nga pagpadayag:

“Ug usab ako mamulong nganha kaninyo kinsa naglimud sa mga pagpadayag sa Dios, ug nag-ingon nga sila gihunong, nga wala na ang mga pagpadayag

“Kay kita wala ba makabasa nga ang Dios sama kagahapon, karon ,ug sa kahangturan . . . ?” (Mormon 9:7, 9).

Sa laing pagkasulti, kon ang Dios, nga walay kausaban, namulong sa karaang panahon, sama sa gihapon mamulong siya sa modernong mga panahon.

Ang lista sa doktrinal nga mga pagpanghimatuod ug katin-awan magpadayon, pero, walay usa nga mas gamhanan, makapatandog, kay sa pagtulun-an diha sa Basahon ni Mormon sa Pag-ula ni Jesukristo. Gusto ba ninyong mabatonan ang pagdayandayan sa inyong kalag sa usa ka dili malalis nga saksi nga ang Manluluwas mikunsad ilawom sa inyong mga sala ug nga walay sala, walay mortal nga kalisud gawas sa maloloy-on nga tabang sa Iyang Pag-ula—nga diha sa matag usa sa inyong pakigbisog Siya adunay kasulbaran gamit ang bilil-hong gahum sa pagkaayo? Nan basaha ang Basahon ni Mormon. Motudlo ug mopamatuod kini kaninyo nga ang Pag-ula ni Kristo walay katapusan tungod kay kini milibut ug milukop ug mipatigbabaw sa tanang may utlanan nga kahuyang nga nahibaloan sa tawo. Mao kana nganong si propeta Mormon mipahayag nga, “Kamo

magbaton og paglaum pinaagi sa pag-ula ni Kristo” (Moroni 7:41).

Dili ikatingala nga ang Basahon ni Mormon namahayag uban sa kaisug, “Ug kon kamo motuo diha ni Kristo, kamo motuo niini nga mga pulong, kay sila ang mga pulong ni Kristo” (2 Nephi 33:10). Kauban sa Biblia, ang Basahon ni Mormon usa ka importante nga saksi sa mga doktrina ni Kristo ug sa Iyang kabalaan. Uban sa Biblia, kini “nagtudlo sa tanan nga mga tawo nga sila kinahanglang magbuhat og matarung” (2 Nephi 33:10). Ug kauban sa Biblia, modala kini nato ngadto sa “usa ka Ginoo, usa ka pagtuo, usa ka bautismo.” Mao kana kon ngano nga ang Basahon ni Mormon importante kaayo sa atong kinabuhi.

Pila ka tuig na ang milabay misimba ko sa didto sa Toronto, Canada. Usa ka 14 anyos nga batang babaye ang namulong. Miingon siya nga naghisgot siya og relihiyon sa usa sa iyang amiga sa eskwelahan. Miingon kaniya ang iyang amiga, “Unsay imong relihiyon?”

Mitubag siya, “Ang Simbahan ni Jesukristo sa mga Santos sa Ulahing mga Adlaw, o Mormons.”

Ang iyang amiga mitubag, “Naka-hibalo ko niana nga Simbahan, ug nasayud ko nga dili kana tinuod.”

“Giunsa nimo pagkahibalo?” mao ang tubag.

“Tungod kay,” nagsiksik ko niini” miingon ang iyang amiga.

“Nabasa na ba nimo ang Basahon ni Mormon?”

“Wala,” mao ang tubag. “Wala ko kabasa.”

Dayon kining matahum nga batanong babaye mitubag, “Kon mao wala ka pa makasiksik sa akong Simbahan tungod kay akong nabasa ang matag pahina sa Basahon ni Mormon ug ako nasayud nga kini tinuod.”

Ako usab nakabasa sa matag pahina sa Basahon ni Mormon, gibalik-balik, ug ako mopamatuod sa akong ligdong nga pagsaksi, sama sa apohan sa akong lolo, kini gikan sa Dios. Sa pangalan ni Jesukristo, amen. ■

MUBO NGA MGA SULAT

1. Willard Richards, sa LeGrand Richards, *A Marvelous Work and a Wonder*, rev. ed. (1972), 81, 82.
2. C. S. Lewis, *Mere Christianity* (1952), 40–41.



Ni Elaine S. Dalton

Kinatibuk-ang Presidente sa Young Women

Higugmaa ang Iyang Inahan

Unsaon sa amahan pag-amuma og malipayon, tarung nga anak nga babaye sa nagkapeligro nga kalibutan karon? Ang tubag gitudlo na pinaagi sa mga propeta sa Ginoo.

Walay pulong nga ikahulagway sa sagradong okasyon samtang ang usa ka bag-ong amahan nagkugos sa iyang masuso nga batang babaye sa unang higayon. Niining tuiga tulo sa among anak nga mga lalaki nahimong bag-ong mga amahan sa masuso nga batang mga babaye. Samtang akong gitan-aw ang among isug, kusing anak nga lalaki nga tigdula og rugby, si Jon, nga nagkugos sa iyang unang masusong batang babaye, siya mitan-aw niya sa kalumo ug unya mitan-aw siya nako nga daw nag-ingon, “Unsaon ko sa pag-amuma ang usa ka batang babaye?”

Niining buntaga gusto kong mamulong sa among anak nga mga lalaki ug sa tanang mga amahan. Unsaon sa amahan pag-amuma og malipayon, tarung nga anak nga babaye sa nagkapeligro nga kalibutan karon? Ang tubag gitudlo na pinaagi sa mga propeta sa Ginoo. Usa kini ka yano nga tubag, ug tinuod kini—“Ang pinaka-importanting butang nga mahimo sa amahan alang sa iyang [anak nga babaye] mao ang paghigugma sa inahan [inahan sa bata].”¹ Sa pamaagi sa inyong paghigugma sa iyang inahan, matudloan

ninyo ang inyong anak nga babaye mahitungod sa kalumo, kamaun-ongon, pagtahud, kamanggiloy-on, ug debosyon. Makakat-on siya gikan sa inyong ehemplo kon unsa ang malau-man gikan sa batan-ong mga lalaki ug unsa nga mga kalidad ang pangitaon sa umaabut nga kapikas. Makapakita kamo sa inyong anak nga babaye pinaagi sa inyong paghigugma ug pagtahud sa inyong asawa nga siya kinahanglan makigminyo og tawo kinsa mohigugma ug motahud kaniya. Ang inyong ehemplo motudlo sa inyong anak nga babaye sa paghatag og bili sa pagkababaye. Nagpakita kamo kaniya nga siya anak sa atong Langitnong Amahan, kinsa nahigugma kaniya.

Higugmaa pag-ayo ang iyang inahan aron ang inyong kaminyoon celestial. Ang kaminyoon sa templo alang sa karon ug sa kahangturan takus sa imong labing dako nga paningkamot ug labing taas nga prayoridad. Diha pa lamang nga nakompleto na ni Nephi ang templo sa kamingawan nga siya miingon, “Ug . . . kami mipuyo subay sa matang sa pagkamalipayon.”² Ang “matang sa pagkamalipayon” makita sa templo. Kini mao ang pagtuman sa

pakigsaad. Ayaw itugot nga mosulod sa inyong kinabuhi o panimalay ang bisan unsa nga impluwensya nga makakompromiso sa inyong mga pakigsaad o sa inyong pasalig ngadto sa inyong asawa ug pamilya.

Diha sa Young Women kami nagtabang sa inyong anak nga babaye nga makasabut sa iyang pagkatawo isip anak nga babaye sa Dios ug sa importansya nga magpabiling mahiyason ug takus sa pagdawat sa mga panalangin sa templo ug sa kaminyoon sa templo. Kami nagtudlo sa inyong anak nga babaye sa importansya sa paghimo ug pagtuman sa sagradong mga pakigsaad. Kami nagtudlo kaniya nga mopasalig karon sa pagpakabuhi aron siya kanunay nga mahimong takus sa pagsulod sa templo ug sa dili pagtugot sa bisan unsa nga paglangan, pagbalda, o dili angayan niana nga tumong. Ang inyong ehemplo, isip iyang amahan, labaw nga maka-impluwensya kay sa importante namong gipamulong. Ang batan-ong mga babaye nabalaka sa ilang mga amahan. Daghan ang nagpahayag nga ang ilang labing dakong tinguha mao ang pagkahiusa sa kahangturan isip pamilya. Gusto nila nga kamo atua didto kon sila moadto sa templo o magminyo sa templo. Pakigsuod sa inyong anak nga babaye ug tabangi siya nga maandam ug magpabiling takus alang sa templo. Kon siya mag-edad na og 12, iuban ninyo siya kanunay ngadto sa templo sa pagpahigayon og mga bunyag alang sa inyong mga katigulangan ug sa uban. Handumon niya kini nga mga panumduman sa hangtud.

Ang nabantug nga kultura karon nagsulay sa pagguba ug pagpakubos sa inyong mahangturon nga tahas isip patriarch ug amahan ug nagpaminus sa inyong pinaka-importanting mga responsibilidad. Kini gihatag nganha kaninyo “pinaagi sa balaan nga plano,” ug isip mga amahan kamo “mao ang mangulo sa [inyong] mga pamilya diha sa gugma ug sa pagkamatarung ug may kapangakohan sa pagsangkap sa mga kinahanglanon sa kinabuhi ug sa pagpanalipod sa [inyong] mga pamilya.”³

Mga amahan, kamo ang tigbalantay sa inyong panimalay, sa inyong mga

asawa, ug inyong mga anak. Sa karon, “dili sayon nga butang ang pagpanalipod sa pamilya batok sa mga pagpanghulhog sa dautan ngadto sa [ilang] mga hunahuna ug mga espi-ritu. . . . Kini nga mga impluwensya makahimo ug dali ra nga makasulod sa panimalay. Si Satanas [alisto kaayo]. Dili niya kinahanglang gub-on ang pultahan.”⁴

Kinahanglan nga kamo ang mga tigbalantay sa hiyas. “Ang naghupot og priesthood *mahiyason*. Ang mahiyason nga pamatasan nagpasabut nga [kamo adunay] putli nga mga hunahuna ug limpyo nga mga lihok. . . . Ang hiyas maoy . . . usa ka kinaiya sa pagkadios-non.” Kini “susama sa pagkabalaan.”⁵ Ang mga mithi sa Young Women mga sama kang Kristo nga mga hiyas nga naglakip sa bili sa hiyas. Kami nag-tawag kaninyo karon sa pakig-uban kanamo sa paggiya sa kalibutan sa usa ka pagbalik ngadto sa hiyas. Aron sa pagbuhat niini, kamo “kinahanglan nga mopalambo og hiyas ug pagkabalaan”⁶ pinaagi sa pagwagtang diha sa inyong kinabuhi sa bisan unsa nga dautan ug wala mahiuyon ngadto sa usa kinsa naghupot sa balaang priesthood sa Dios. “Himoa ang hiyas nga modayan-dayan sa inyong mga hunahuna nga walay paghunong; unya ang imong pagsalig mosamot pagkalig-on diha sa atubangan sa Dios; ug . . . ang Espiritu Santo mao ang inyong kauban sa kanunay.”⁷ Busa pagmatngon kamo sa unsa man ang inyong tan-awon sa kalingawan sa media o mga basahon. Ang inyong personal nga hiyas maoy makita sa inyong anak nga mga babaye, ug usab sa inyong anak nga mga lalaki, kon unsa ang tinuod nga kalig-on ug moral nga kaisug. Pinaagi sa pagka-tigbalantay sa hiyas sa kaugalingon ninyong kinabuhi, sa inyong panimalay, ug sa mga kinabuhi sa inyong mga anak, kamo nagpakita sa inyong asawa ug anak nga mga babaye kon unsa gayud ang tinuod nga gugma. Ang inyong personal nga kaputli mohatag kaninyo og gahum.

Kamo ang tigbalantay sa inyong anak nga babaye labaw pa kay sa legal nga panghunahuna. Pagpakanaa sa kinabuhi sa inyong anak nga

babaye. Pahibaloa siya sa inyong mga sumbanan, sa inyong mga gipaabut, inyong mga paglaum ug mga damgo alang sa iyang kalampusan ug kalipay. Interbyuha siya, ilha ang iyang mga higala ug, kon ang panahon moabut, ang iyang mga hinigugma. Tabangi siya nga makasabut sa importansya sa edukasyon. Tabangi siya nga makasabut nga ang prinsipyo sa kaligdong usa ka proteksyon. Tabangi siya nga mopili og musika ug media nga nagdapit sa Espiritu ug nahiangay sa iyang balaang pagkatawo. Himoa nga aktibo ka nga bahin sa iyang kinabuhi. Ug kon sa katugan sa iyang pagkatin-edyer dili man siya mauli gikan sa usa ka date sa tuk-mang oras, lakaw kuhaa siya. Mosupak siya ug moingon nga gidaot ninyo ang iyang sosyal nga kinabuhi, apan siya sa hilum nahibalo nga gihigugma ninyo siya ug nga kamo nag-amuma kaniya igo nga mahimo niyang tigbalantay.

Dili kamo ordinaryong mga lalaki. Tungod sa inyong pagkawalay kahadlok didto sa kinabuhi sa wala pa dinhi sa yuta, naapil kamo nga mahimong mga lider ug makabaton og gahum sa priesthood. Didto nagpakita kamo og “naghingapin nga hugot nga pagtuo ug maayo nga mga buhat,” ug kamo ania karon dinhi sa pagbuhat sa samang butang.⁸ Ang inyong priesthood nagpalahi kaninyo.

Sa pipila ka mga semana ang among tulo ka anak nga mga lalaki makahatag na og pangalan ug panalangin sa ilang masuso nga batang mga babaye. Ako nanghinaut nga kini ang una sa daghang priesthood nga mga panalangin nga ilang madawat gikan sa ilang mga amahan, tungod kay sa kalibutan diin sila magtubo, ilang gikinahanglan kini nga mga panalangin. Ang inyong anak nga babaye magmanggad sa priesthood ug mohukom diha sa iyang kasingkasing nga kini mao ang iyang gusto sa iyang umaabut nga panimalay ug pamilya. Timan-i sa kanunay “nga ang katungod sa pagkapari dili mabulag gikan sa mga gahum sa langit” ug “madumala . . . lamang diha sa mga baruganan sa pagkamatarung.”⁹

Mga amahan, kamo ang bayani sa inyong anak nga babaye. Ang akong amahan mao ang akong bayani. Sagad

akong maghulat sa tikanganan sa among balay alang sa iyang pag-abut matag gabii. Iya akong alsahon ug ituyok ug dayon ipabutang ang akong mga tiil ibabaw sa iyang dakong sapatos ug iya akong isayaw padulong sa balay. Nagustuhan ko ang hagit sa pagsulay nga mosunod sa iyang kada lakang. Sa gihapon gusto ko kini.

Nasayud ba kamo nga ang inyong pagpamatuod adunay gamhanang impluwensya sa inyong mga anak. Ako nahibalo nga ang akong amahan adunay pagpamatuod. Ako nahibalo nga iyang gihigugma ang Ginoo. Ug tungod kay ang akong amahan nahigugma sa Ginoo, gibuhat ko sab kini. Ako nahibalo nga mibati siya sa mga biyuda tungod kay gigamit niya ang iyang bakasyon sa pagpintal sa panimalay sa usa ka biyuda kinsa nagpuyo sa sunod nga balay. Nakaingon ako nga kadto mao ang labing nindot nga bakasyon sa among pamilya sukad tungod kay gitudloan ko niya unsaon sa pagpintal. Mapanalanginan ninyo ang kinabuhi sa inyong anak nga babaye sa mga katugang moabut kon mangita mo og mga paagi sa paghatag og panahon kaniya ug sa pagpakigbahin sa inyong pagpamatuod ngadto niya.

Sa Basahon ni Mormon, si Abish nakabig pinaagi sa pagpakigbahin sa iyang amahan ngadto kaniya sa talagsaong niyang panan-awon. Sa daghang katugan human niana, iyang gihuptan ang iyang pagpamatuod diha sa iyang kasingkasing ug mipuyo nga matarung sa dautan nga katilingban. Unya miabut ang panahon nga dili na gayud siya mahimutang, ug midagan siya gikan sa usa ka balay ngadto sa laing balay sa pagpakigbahin sa iyang pagpamatuod ug sa mga milagro nga iyang nasaksihan diha sa balay sa hari. Ang gahum sa pagkakabig ug pagpamatuod ni Abish nahimong himan sa pagkausab sa tibuk katilingban. Ang mga tawo kinsa nakadungog kaniya nga nagpamatuod nahimong mga tawo kinsa “nakabig ngadto sa Ginoo, [ug] wala gayud mobiya,” ug ang ilang anak nga mga lalaki nahimong mga batan-ong manggugubat!¹⁰

Sama sa giingon sa himno, “Barug, O katawhan sa Dios [Rise up, O men of

God!]¹¹ Usa kini ka pagtawag kaninyo, mga tawo nga nagdala sa balaang priesthood sa Dios. Hinaut nga masulti kini nganha kaninyo ingon sa nasulti kabahin ni Kapitan Moroni:

“[Siya] usa ka kusgan ug gamhanan nga tawo; . . . usa ka tawo nga hingpit ang salabutan; . . . usa ka tawo nga malig-on diha sa hugot nga pagtuo kang Kristo. . . .

“ . . . Kon ang tanan nga mga tawo maingon, ug naingon, ug maingon bisan kanus-a, sama ngadto kang Moroni, tan-awa, ang mga gahum gayud sa impyerno nauyog na unta sa kahangturan; . . . ang yawa wala untay gahum ibabaw sa mga kasingkasing sa mga katawhan.”¹²

Mga kaigsoonan, mga amahan, batan-ong mga lalaki, “Unong ngadto sa pagkaharianon nga anaa kaninyo.”¹³

Busa unsaon ninyo sa pag-amuma ang usa ka batang babaye? Higugmaa ang iyang inahan. Giyahi ang inyong pamilya ngadto sa templo, magpakatigbalantay sa hiyas, ug ipalambo ang inyong priesthood. Mga amahan, gisalig kaninyo ang harianong anak nga mga babaye sa atong Langitnong Amahan. Sila mahiyason ug pinili. Kini akong pag-ampo nga kamo magbantay kanila, maglig-on kanila, magpasunod og mahiyasong pamatasan, ug magtudlo kanila sa pagsunod sa matag tunob sa Manluluwas—tungod kay Siya buhi! Sa pangalan ni Jesukristo, amen. ■

MUBO NGA MGA SULAT

1. Si Presidente David O. McKay sagad nga mokutlo niini nga pahayag ni Theodore Hesburgh, sa “Quotable Quotes,” *Reader’s Digest*, Ene. 1963, 25; tan-awa usab sa *Richard Evans’ Quote Book* (1971), 11.
2. 2 Nephi 5:27.
3. “Ang Pamilya: Usa ka Pamahayag ngadto sa Kalibutan,” *Liahona* Nob. 2010, 129.
4. A. Theodore Tuttle, “The Role of Fathers,” *Ensign*, Ene. 1974, 67.
5. Ezra Taft Benson, “Godly Characteristics of the Master,” *Ensign*, Nob. 1986, 46.
6. Doktrina ug mga Pakigsaad 46:33.
7. Doktrina ug mga Pakigsaad 121:45, 46.
8. Alma 13:3; tan-awa usab sa bersikulo 2.
9. Doktrina ug mga Pakigsaad 121:36.
10. Alma 23:6; tan-awa usab sa Alma 19:16–17; 53:10–22.
11. “Rise Up, O Men of God,” *Hymns*, nu. 323.
12. Alma 48:11, 13, 17.
13. Sa Harold B. Lee, “Be Loyal to the Royal within You,” sa *Speeches of the Year: BYU Devotional ug sa mga Pakigpulong sa Ten-Stake Fireside 1973* (1974), 100.



Ni Elder M. Russell Ballard

Sa Korum sa Napulog Duha ka mga Apostoles

Ang Importansya sa Pangalan

Magpalambo kita og kinaiya . . . sa pagklaro nga ang Ang Simbahan ni Jesukristo sa mga Santos sa Ulahing mga Adlaw mao ang ngalan nga gitudlo sa Ginoong Mismo nga kita mailhan.

Elder Hales, sa ngalan kanamong tanan, among gipaabut ang pinakadakong gugma ug mapasalamaton kaayo nga ania ikaw karong buntaga.

Sa miaging kinatibuk-ang komprensya sa Abril, ang akong hunahuna kanunay nga nag-focus sa hilisgutan kabahin sa importansya sa pangalan. Sa miaging pila ka bulan, daghang mga apo sa tuhod ang miabut sa among pamilya. Bisan ingon og mas paspas ang ilang pag-abut kay sa akong mahunahuna, ang dugang nga bata gikalipay sa among pamilya. Ang matag usa nakadawat og espesyal nga ngalan nga gipili sa iyang mga ginikanan, ngalan nga maoy mailhan sa tibuok niyang kinabuhi, magpalahi kaniya gikan sa uban. Tinuod kini sa matag pamilya, ug tinuod usab kini tali sa mga relihiyon sa kalibutan.

Ang Ginoong Jesukristo nahibalog unsa ka importante ang klaro nga paghatag og ngalan sa Iyang Simbahan niining ulahing mga adlaw. Sa ika-115 nga seksyon sa Doktrina ug mga Pakigsaad, Siya Mismo, mingalan sa Simbahan: “Kay sa ingon ang akong simbahan pagatawagong sa katapusan

nga mga adlaw, gani Ang Simbahan ni Jesukristo sa mga Santos sa Ulahing mga Adlaw” (bersikulo 4).

Ug si Haring Benjamin mitudlo sa iyang katawhan sa kapanahunan sa Basahon ni Mormon:

“Ako manghinaut nga kamo kinahanglan modala diha kaninyo sa ngalan ni Kristo, tanan kamo nga nakasulod ngadto sa pakigsaad uban sa Dios nga kamo kinahanglan magmasulundon ngadto sa katapusan sa inyong mga kinabuhi. . . .

“Ug ako manghinaut nga kamo kinahanglan mahinumdom usab, nga kini mao ang ngalan nga ako miingon nga ako kinahanglan mohatag nganha kaninyo nga dili na pagapapason, gawas kon kini pinaagi sa kalapasan; busa, pagmatngon nga kamo dili makalapas, nga ang ngalan dili mapapas gikan sa inyong mga kasingkasing” (Mosiah 5:8, 11).

Atong gidala ang ngalan ni Kristo nganhi kanato diha sa mga tubig sa pagbunyang. Atong gibag-o ang epekto niana nga pagbunyang matag semana samtang mag-ambit kita sa sakrament, nagtimaan sa atong kaandam nga modala sa Iyang ngalan nganhi kanato



nagsaad kanunay sa paghinumdom Kaniya (tan-awa sa D&P 20:77, 79).

Kita ba nakakita kon unsa kita ka bulahan nga makadala ngari nato sa ngalan sa Pinalangga ug Bugtong nga Anak sa Dios? Ato bang nasabtan kon unsa kaimportante kana? Ang pangalan sa Manluluwas mao lamang ang ngalan ubos sa langit diin ang tawo maluwas (tan-awa sa 2 Nephi 31:21).

Kon mahinumduman ninyo, si Presidente Boyd K. Packer naghisgot sa importansya sa pangalan sa Simbahan sa miaging kinatibuk-ang komperensya sa Abril. Mipasabut siya nga “sa pagtuman sa gipadayag, atong gitawag ang atong kaugalingon nga Ang Simbahan ni Jesukristo sa mga Santos sa Ulahing mga Adlaw kay sa Simbahan nga Mormon” (“Gigiyahan sa Espiritu Santo,” *Liahona*, Mayo 2011, 30).

Tungod kay ang ngalan sa Simbahan importante kaayo, akong ipalanog ang mga pagpadayag gikan sa mga kasulatan, ang mga instruksyon gikan sa Unang Kapangulohan diha sa mga sulat niadtong 1982 ug 2001, ug ang mga pulong sa ubang mga Apostoles kinsa miawhag sa mga miyembro sa Simbahan sa pagsuporta ug pagtudlo sa kalibutan nga ang Simbahan mailhan sa pangalan sa Ginoo nga si Jesukristo. Mao kini ang ngalan diin ang Ginoo motawag kanato sa katapusang adlaw.

Kini ang ngalan diin ang Iyang Simbahan mailhan nga lahi kay sa uban.

Naghunahuna ko sa makadaghan nganong ang Manluluwas mihatag sa siyam ka pulong nga pangalan sa Iyang gipahiuli nga Simbahan. Ingon og taas kini, apan kon hunahunaon nato kini isip usa ka paghulagway sa kinatibuk-ang pagsabut kon unsa ang Simbahan, kalit lang ang pagmubo niini, klaro, ug diretso. Sa unsang paagi ang bisan unsang paghulagway mas direkta ug klaro ug gani mapahayag sa ingon ka diyutay nga mga pulong?

Ang matag pulong naghatag og katin-awan. Ang pulong nga *Ang* nagpasabut sa pagkalahi nga posisyon sa gipahiuli nga Simbahan tali sa mga relihiyon sa kalibutan.

Ang mga pulong nga *Simbahan ni Jesukristo* nagpahayag nga kini Iyang Simbahan. Sa Basahon ni Mormom, mitudlo si Jesus, “Ug unsaon kining akong simbahan kon kini dili pagatawgon sa akong ngalan? Kay kon ang usa ka simbahan pagatawgon sa ngalan ni Moises niana kini simbahan ni Moises; o kon kini pagatawgon sa ngalan sa usa ka tawo niana kini simbahan sa tawo; apan kon kini pagatawgon sa akong ngalan niana kini mao ang akong simbahan, kon kini mao nga sila natukod diha sa akong ebanghelyo” (3 Nephi 27:8).

Sa Ulahing mga Adlaw nagpasabut nga pareho ra kini nga Simbahan sa Simbahan nga gitukod ni Jesukristo atol sa Iyang mortal nga pangalagad apan gipahiuli niining ulahing mga adlaw. Nahibalo kita nga adunay usa ka pagsupil, o apostasiya, nga gikinahanglan sa pagpahiuli sa Iyang tinuod ug hingpit nga Simbahan sa atong panahon.

Sa mga Santos nagpasabut ang mga miyembro niini nagsunod Kaniya ug naningkamot sa paghimo sa Iyang kabubut-on, nagtuman sa Iyang mga sugo, ug sa makausa nangamdang nga makapuyo uban Kaniya ug sa atong Langitnong Amahan ugma damlag. Ang *Santos* dayag nga mao kadtong naningkamot sa paghimo sa ilang kinabuhi nga balaan pinaagi sa pagpagsaad sa pagsunod kang Kristo.

Ang ngalan nga gihatag sa Manluluwas sa Iyang Simbahan tukma nga nagpahibalo kanato kon kinsa kita ug unsay atong gituohan. Nagatuo kita nga si Jesukristo mao ang Manluluwas ug Manunubos sa tanang katawhan. Iyang gitubos ang tanan nga magahinulsol sa ilang mga sala, ug Iyang gibugto ang mga higot sa kamatayon ug gihimo ang pagkabanhaw gikan sa kamatayon. Atong gisunod si Jesukristo. Ug sama sa giingon ni Haring Benjamin ngadto sa iyang katawhan, mao usab ang akong ipamatuod karon kanatong tanan, “Kamo kinahanglang mahinumdom sa pagbaton sa [Iyang] ngalan nga nahisulat kanunay sa inyong mga kasingkasing” (Mosiah 5:12).

Gihangyo kita sa pagbarug nga mga saksi Kaniya “sa tanan nga mga panahon ug diha sa tanan nga mga butang, ug diha sa tanan nga mga dapit” (Mosiah 18:9). Nagpasabut kini nga andam kita sa pagpahibalo sa uban kon kinsa ang atong gisunod ug kansang Simbahan kita nahisakop: ang Simbahan ni Jesukristo. Sigurado nga gusto natong buhaton kini diha sa diwa sa paghigugma ug pagpamatuod. Gusto natong sundon ang Manluluwas pinaagi sa yano ug klaro, hinoon mapainubsanon, nga pagpahayag nga kita mga miyembro sa Iyang Simbahan. Siya atong gisunod

pinaagi sa pagkahimong Santos sa Ulahing mga Adlaw—mga disipulo sa ulahing mga adlaw.

Ang katawhan ug mga organisasyon sagad nga hatagan sa uban ug mga angga. Ang angga usa ka pinamubo nga porma sa ngalan, o gikuha gikan sa panghitabo o pipila sa pisikal og ubang mga hiyas. Samtang ang mga angga walay sama nga estado o kahulugan sa tinuod nga mga ngalan, magamit kini sa tukmang paagi.

Ang Simbahan sa Ginoo sa karaan ug sa modernong panahon dunay mga angga. Ang mga Santos sa Bag-ong Tugon gitawag og mga *Kristiyanos* tungod kay mipakita sila og pagtuo kang Jesukristo. Kana nga ngalan, unang gigamit sa mga kaaway sa pagpanaway kanila, nahimo karon nga ilhanan nga ngalan, ug atong dungog nga tawagon nga Kristiyanong simbahan.

Ang atong mga miyembro gitawag og mga *Mormons* tungod kay mituo kita sa Basahon ni Mormon: Laing Tugon ni Jesukristo. Ang uban mosulay sa paggamit sa pulong nga *Mormon* nga sagad kaayong nagpasabut sa mga tawo nga mibiya sa Simbahan ug mihimo og lain-laing ginagmayng pundok. Ang ingon nga paggamit nagpalibug lamang. Mapasalamaton kita sa mga paningkamot sa media aron mahunong na ang paggamit sa pulong nga *Mormon* nga usa sa makapalibug sa publiko tali sa Simbahan ug sa mga polygamist o ubang fundamentalist nga mga pundok. Akong klarohon sa pagsulti nga Ang Simbahan ni Jesukristo sa mga Santos sa Ulahing mga Adlaw walay bisan unsa nga koneksyon sa mga polygamist nga pundok, lakip niadtong mitawag sa ilang kaugalingon nga Fundamentalist Mormons o laing kaparehas sa atong ngalan.

Gani ang *Mormon* dili maoy tibuok ug husto nga ngalan sa Simbahan, ug bisan tuod gigamit kini sa mga tigpanaway sa unang kapanahonan sa pagpangukod, gidawat kini nga angga kon hisgutan ang miyembro apan dili ang institusyon. Wala kinahanglana nga atong hunungon ang paggamit sa angga nga *Mormon* kon angay, apan



kinahanglan nga ipadayon ang atong paghatag og empasis sa tibuok og eksakto nga ngalan sa Simbahan mismo. Sa laing pagkasulti, kinahanglan nga atong likayan ug dili iawhag ang termino nga “Mormon nga Simbahan.”

Sulod sa mga katuigan samtang duna koy mga assignment sa tibuok kalibutan, napangutan-an ko sa daghang higayon kon sakop ba ko sa Mormon nga Simbahan. Ang akong tubag mao “miyembro ako sa Ang Simbahan ni Jesukristo. Tungod kay kami mituo sa Basahon ni Mormon, nga ang ngalan gisunod sa usa ka karaan nga Amerikanong lider nga propeta ug mao usab ang laing Tugon ni Jesukristo, kami usahay matawag nga mga Mormon.” Sa matag hitabo kini nga tubag gidawat kaayo ug sa pagkatinuod miabli sa mga oportunidad alang kanako nga makapasabut sa Pagpahiuli sa kahingpitan sa ebanghelyo niining ulahing mga adlaw.

Mga kaigsoonan, hunahunaa kon unsa ang dakong epekto sa yano nga pagtubag sa paggamit sa tibuok nga pangalan sa Simbahan sumala sa gipamahayag sa Ginoo nga angay natong buhaton. Ug kon dili dayon ninyo magamit ang tibuok nga ngalan, basta masulti nimo nga, “sakop ko sa Simbahan ni Jesukristo” ug unya ipasabut ang “sa mga Santos sa Ulahing mga Adlaw.”

Ang uban mangutana, unya unsa man diay nang mga Internet sites sama sa Mormon.org ingon man kanang lain-laing mga gipasiugdahan sa Simbahan nga mga campaign sa media? Sama sa akong giingon, kon ang gipasabut nga *Mormons* mao ang mga miyembro usahay tukma sad. Isip usa ka praktikal nga butang, kadtong dili sakop sa atong tinuohan mangita kanato pinaagi sa pagsiksik niana nga pulong. Apan kon maabli na gani ninyo ang Mormon.org, ang tukma nga ngalan sa Simbahan gipasabut diha sa home page, ug makita kini sa matag dugang nga pahina sa site. Dili praktikal nga maglaum sa mga tawo nga mo-type sa tibuok nga ngalan sa Simbahan kon mangita kanato o kon mag-log-on sa atong website.

Samtang kini nga pagkapraktikal magpadayon, kinahanglan dili pugngan ang mga miyembro sa paggamit sa tibuok nga ngalan sa Simbahan kutob sa mahimo. Magpalambo kita og kinaiya sa atong mga pamilya ug sa atong mga kalihokan sa Simbahan ug sa atong inadlaw nga pakig-uban sa pagklaro nga ang Ang Simbahan ni Jesukristo sa mga Santos sa Ulahing mga Adlaw mao ang ngalan nga gitudlo sa Ginoo Mismo nga kita mailhan.

Usa ka bag-o nga survey sa opinyon nagpakita nga daghan kaayong tawo ang wala pa makasabut sa husto

nga ang buot ipasabut sa *Mormon* mao diay na ang mga miyembro sa atong Simbahan. Ug ang kadaghanan sa mga tawo dili pa sigurado kon ang mga Mormon Kristiyano ba. Bisan sa dihang ilang nabasa ang atong Helping Hands nga buhat sa tibuok kalibutan pagkahuman sa kusog nga bagyo, mga linog, baha, ug kagutom, wala sila molakip sa atong tawhanon nga mga paningkamot isip usa ka Kristiyanong organisasyon. Labing siguro mas sayon kanila ang pag-sabut nga kita nagtuo ug nagsunod sa Manluluwas kon atong ipaila ang atong kaugalingon isip mga miyembro sa Ang Simbahan ni Jesukristo sa mga Santos sa Ulahing mga Adlaw. Niining paagiha kadtong makadungog sa ngalan nga *Mormon* sabton niya kana nga pulong ngadto sa gipadayag nga ngalan ug sa mga tawo kinsa magasunod kang Jesukristo.

Sigon sa gihangyo sa Unang Kapangulohan sa ilang sulat niadtong Pebrero 23, 2001: “Ang paggamit sa gipadayag nga ngalan nga, Ang Simbahan ni Jesukristo sa mga Santos sa Ulahing mga Adlaw. . . , nagkaanam ka importante sa atong responsibilidad sa pagsangyaw sa ngalan sa Manluluwas sa tibuok kalibutan. Busa, mohangyo kami nga kon magpasabut man kita sa Simbahan atong gamiton ang tibuok nga ngalan niini kutob sa mahimo.”

Balik sa tuig 1948 sa kinatibuk-ang komperensya sa Oktubre, si Presidente George Albert Smith miingon, “Mga kaigsoonan, kon mopalayo man kamo dinhi, tingali ikauban ninyo ang lain-laing denominasyon sa kalibutan, apan hinumdumi nga dunay usa lamang ka Simbahan sa tibuok kalibutan nga sa balaan nga sugo nagdala sa pangalan ni Jesukristo, atong Ginoo” (sa Conference Report, Okt. 1948, 167).

Mga kaigsoonan, unta kita usab mahinumdom niini kon mobiya na kita sa komperensya karon. Tuguti nga ang atong mga pagpamatuod Kaniya madungog ug ang atong gugma alang Kaniya kanunay nga maanaa sa atong kasingkasing, mapaubsanon akong nag-ampo sa Iyang ngalan, ni Ginoong Jesukristo, amen. ■



Ni Presidente Thomas S. Monson

Barug sa Balaan nga mga Dapit

Ang pagpakigsulti sa atong Amahan sa Langit—lakip ang atong mga pag-ampo ngadto Kaniya ug sa Iyang inspirasyon ngari kanato—gikinahanglan aron kita makahupay sa mga bagyo ug mga pagsulay sa kinabuhi.

Minahal kong mga kaigsoonan, nadungog nato ang nindot nga mga mensahe karong buntaga, ug akong gidayeg ang matag usa nga miapil. Nalipay kaayo kita nga ania usab si Elder Robert D. Hales uban nato ug maarang-arang na ang gibati. Gihigugma ka namo, Bob.

Samtang namalandong kon unsay akong ipamulong kaninyo niining buntaga, akong gibati ang kadasig sa pagpakigbahin og mga hunahuna ug pagbati nga gituohan nakong angay ug tukma sa panahon. Ako nag-ampo nga unta ako giyahan sa akong mga ipamulong.

Nagpuyo na ko niining kalibutanana sulod na sa 84 ka tuig karon. Sa paghatag ninyo og gamay nga panglantaw, natawo ko sa samang tuig nga si Charles Lindbergh mipalupad sa unang solo nga paglupad gikan sa New York ngadto sa Paris sa usa ray makina, usa ray lingkuranan nga eroplano. Daghan ang nausab sukad niana sulod sa 84 ka tuig. Ang tawo dugay nang nakaadto ug nakabalik gikan sa buwan. Sa tinuod, ang hinimo-himong

istorya sa siyensya kaniadto nahimo nang tinuod karon. Ug kana nga reyalidad, salamat sa teknolohiya sa atong panahon, paspas kaayo nga nausab nga dili kita makasunod niini—kon duna man kitay nasundan. Alang nato kinsa makahinumdom og mga telepono nga tuyukon pa ang numero sa pag-dial ug mga kinamot nga typewriter, ang teknolohiya karon labaw pa ka kahibulongan.

Usab ang kusog kaayong kausaban mao ang sumbanan sa moralidad sa katilingban. Ang mga kinaiya nga kaniadto gikonsiderar nga dili angayan ug imoral sa pagkakaran wala lamang itugot apan gitan-aw na sa kadaghanan gayud nga madawat ra.

Bag-o lang akong nabasa diha sa *Wall Street Journal* ang artikulo ni Jonathan Sacks, ang pangulong rabbi [magtutudlo sa relihiyon nga Judeo] sa Britanya. Sa daghang mga butang, iyang gisulat: “Hapit ang matag katilingban sa Kasadpan kaniadtong 1960 adunay kausaban sa moral, usa ka kinatibuk-an nga pagbiya sa tradisyonal nga pamatasan kabahin sa

pagkontrolar sa kaugalingon. Ang inyo rang gikinahanglan, gikanta sa Beatles, mao ang gugma. Ang lagda nga moral sa Judeo-Kristiyano gibiyaaan. Sa dapit niini namugna [ang nabantog nga panultihon]: *[Buhata] bisan unsa nga maayo kaninyo.* Ang Napulo ka mga Sugo giusab pagsulat isip ang Napulo ka Mamugnaong mga Sugyot.”

Si Rabbi Sacks miingon sa kasubo: “Atong gitalikdan ang moral natong mga baruganan sama sa walay pagmatngon natong pagwaldas sa atong puhunan. . . .

“Adunay dagkong bahin sa [kalibutan] diin ang relihiyon usa lamang ka butang sa nangagi ug walay tingog nga nagsagang sa kinaiya nga palita kini, gamita kini, isul-ob kini, ipakita kini, tungod kay angayan kamo niini. Ang mensahe mao nga ang moralidad dili na uso, ang konsyensa alang ra sa mga huyang, ug ang labing importanting mando mao nga: ‘Ayaw pagpadakop.’”¹

Akong mga kaigsoonan, kini—sa kasubo—naghulagway pag-ayo sa kalibutan nga naglibut kanato. Kita ba nasubo sa hilabihan ug naghunahuna kon unsaon gayud sa pagpakabuhi sa ingon nga kalibutan? Wala. Sa tinuod, kita sa atong kinabuhi adunay ebanghelyo ni Jesukristo, ug nasayud kita nga ang moralidad wala mawala sa uso, nga ang atong konsensya anaa sa paggiya kanato, ug kita ang responsable sa atong mga lihok.

Bisan tuod ang kalibutan nausab, ang mga balaod sa Dios nagpabiling mao lang gihapon. Wala kini mausab, kini dili mausab. Ang Napulo ka mga Sugo mao gayud kana—mga sugo. Kini *dili* mga sugyot. Kini sa matag tipik mga gikinahanglan gihapon karon sama sa paghatag niini sa Dios kaniadto sa mga anak sa Israel. Kon kita lamang maminaw, atong madungog ang lanog sa tingog sa Dios, nagsulti kanato dinhi ug karon:

“Dili ka magbaton og lain nga mga dios sa atubangan ko.

“Alang kanimo dili ka magbuhat og usa ka larawan nga linilok. . . .

“Dili mo pagagamiton ang ngalan sa Ginoo nga imong Dios sa pasipala. . . .



“Hinumduman mo ang Adlaw nga Igpapahulay, aron sa pagbalaan niini. . . .

“Tahuron mo ang imong amahan ug ang imong inahan. . . .

“Dili ka magpatay.

“Dili ka magpanapaw.

“Dili ka magpangawat.

“Dili ka magsaksi og bakak. . . .

“Dili ka maibug.”²

Ang atong lagda sa pamatasan dili mausab; ug dili masabut-sabot. Kini dili lamang makaplagaan sa Napulo ka mga Sugo apan usab sa Wali sa Bungtod, nga gihatag ngari kanato sa Manluluwas sa dihang Siya dinhi pa sa yuta. Makaplagaan kini diha sa tanan Niyang mga pagtulun-an. Makaplagaan kini diha sa mga pulong sa bag-ong mga pagpadayag.

Ang atong Amahan sa Langit mao kagahapon, karon ug sa kahangturan. Si propeta Mormon miingon kanato nga ang Dios “dili mabalhinon gikan sa tanan nga kahangturan ngadto sa tanan nga kahangturan.”³ Niini nga kalibutan diin ang tanan maingon ug mausabon, ang Iyang pagkamakanunayon mao ang usa ka butang nga atong masaligan, usa ka angkla diin kita makapanggunit og tarung ug layo sa peligro, kondili ibanlas kita ngadto sa peligruso nga katubigan.

Makit-an kini ninyo sa mga panahon nga kadtong mga kalibutanon mas malipayon kay kaninyo. Ang

pipila kaninyo mobati nga pinugnan tungod sa lagda sa pamatasan nga atong gisunod sa Simbahan. Akong mga kaigsoonan, ako mopahayag kaninyo, nga *walay* makahatag og mas labaw nga kalipay sa atong kinabuhi o labaw nga kalinaw sa atong kalag kay sa Espiritu nga makaduol nato samtang kita magsunod sa Manluluwas ug magsunod sa mga sugo. Kana nga Espiritu dili moanha sa ingon niana nga matang sa kalihokan nga giapilan sa kadaghanan dinhi sa kalibutan. Si Apostol Pablo mipahayag sa kamatuoran: “Ang tawo nga kalibutanon dili magadawat sa igatudlo sa Espiritu sa Dios: kay alang kaniya kini mga binuang: Ug siya dili arang makasabut niini, tungod kay kini ugod kinahanglan mang pagatugkaron sa espirituhanong paagi.”⁴ Ang termino nga *tawo nga kalibutanon* mahimong magpasabut ni bisan kinsa kanato kon atong tugutan ang atong kaugalingon nga mag-iningon niini.

Kinahanglan kitang magmabinantayon sa kalibutan nga misalikway pagayo sa espirituhanong mga butang. Importante nga atong isalikway ang bisan unsa nga dili uyon sa atong mga sumbanan, sa dili gayud pag-undang sa unsay atong labing gitinguha: kinabuhing walay katapusan sa gingharian sa Dios. Usahay ang mga pagsulay magpalisud kanato, tungod kay kini dili kalikayan nga bahin sa atong

kasinatian sa mortalidad. Kita, hinoon, mas maandam sa pakig-atubang niini, sa pagkat-on niini, ug sa pagbuntog niini kon anaa kanato ang ebanghelyo isip pundasyon sa atong kinabuhi, ug gugma sa Manluluwas sa atong mga kasingkasing. Si propeta Isaias mipahayag, “Ang buhat sa pagkamatarung mahimo nga pakigdait; ug ang sangputanan sa pagkamatarung kalinaw ug pagsalig sa walay katapusan.”⁵

Isip paagi nga *maania* sa kalibutan apan dili *iya* sa kalibutan, kinahanglan nga kita makigsulti sa atong Langit-nong Amahan pinaagi sa pag-ampo. Siya buot nga kini atong buhaton; Siya motubag sa atong mga pag-ampo. Ang Manluluwas mipahimangno nato, nga girekord sa 3 Nephi, kapitulo 18, nga “magbantay ug mag-ampo kanunay tingali pa unya og masulod kamo sa pagtintal; kay si Satanas nagtinguha sa pag-angkon kaninyo. . . .

“Busa kamo kinahanglan gayud nga mag-ampo sa kanunay ngadto sa Amahan sa akong ngalan;

“Ug bisan unsa nga kamo mangayo sa Amahan diha sa akong ngalan, nga matarung, magtuo nga kamo makadawat, tan-awa kini ihatag nganha kaninyo.”⁶

Nakaangkon ko sa akong pagpamatuod sa gahum sa pag-ampo sa dihang ako nag-edad og 12. Mitrabaho akog maayo nga makakwarta ug nakatigum og singko dolyares. Panahon kini sa Dakong Kalisud, dihang ang singko dolyares dako na kaayo nga kantidad—ilabi sa bata nga nag-edad og 12. Akong gihatag ang tanan nakong sinsilyo, singko dolyares ang tanan, ngadto sa akong papa, ug gibalikan niya ko og papel nga singko dolyares. Nahibalo kong duna koy giplanong paliton sa akong singko dolyares, bisan niining mga tuiga di na ko kahinumdom unsa kadto. Nahinumdoman lang nako kon unsa kaimportante kadto nga kwarta para nako.

Niana nga panahon kami walay washing machine, mao nga ang akong mama mopadala sa among mga labhanan ngadto sa laundry kada semana. Human sa pila ka adlaw, usa ka tipun-og nga matawag nato og “basa

nga linabhan” ibalik ngari namo, ug ihayhay ni Mama sa hayhayan luyo sa balay aron mauga.

Akong nasuksok ang akong papel nga singko dolyares sa bulsa sa akong maong nga karsones. Sigon sa inyong matag-anan, ang akong karsones gipadala na ngadto sa laundry nga ang kwarta didto sa bulsa. Sa dihang akong naamguhan kon unsay nahitabo, naguol ako pag-ayo. Nasayud ako nga ang mga bulsa naandan nga hilngon sa laundry sa dili pa labhan. Kon ang akong kwarta wala madiskubrihe ug makuha nianang higayuna, ako sigurado nga ang kwarta matagak sa paglaba ug kuhaon sa tiglaba kinsa walay ideya kon kinsa ang ulian sa kwarta, bisan kon siya gusto nga mobuhat sa ingon. Ang kahigayunan nga mabalik ang akong singko dolyares hanap kaayo—nga mao gyud ang mahitabo sumala sa akong inahan sa dihang misulti ko niya nga nahibilin ang kwarta sa akong bulsa.

Gusto ko kadtong kwartaha; nangingahanglan ako niadtong kwartaha; ako mitrabaho og maayo aron mokita niadtong kwartaha. Akong naamgo han nga adunay usa lang ka butang nga akong mahimo. Sa akong kaguol miduol ko sa akong Amahan sa Langit ug nangamuyo Kaniya sa pagpanalipod sa akong kwarta niana nga bulsa hangtud ang among basa nga linabhan mabalik.

Paglabay sa duha ka dugay nga adlaw, sa dihang nahibalo ko nga hapit na moabut ang delivery truck nga maghatud sa among linabhan, milingkod ko sa may bintana, nagpaabut. Sa dihang ang trak mihunong na, naglagubo ang akong kasingkasing. Sa dihang ang basa nga mga sinina diha na sa balay, akong gibira ang akong maong ug midagan sa akong lawak. Akong gikuot ang bulsa nga nagkurrog ang mga kamot. Sa dihang wala akoy nakit-an bisag unsa, nagtuo ko nga wala na ang tanan. Ug dayon ang akong mga tudlo nakahikap ug basa nga singko dolyares nga papel. Samtang kini akong gikuha gikan sa bulsa, ang kalipay milukop nako. Mihatag ako og kinasingkasing nga pag-ampo sa akong Amahan sa Langit, kay ako

nasayud nga Iyang gitubag ang akong pag-ampo.

Sukad nianang dugay nga panahon, duna koy dili maihap nga mga pag-ampo nga gitubag. Walay adlaw nga molabay nga dili ako makigsulti sa akong Amahan sa Langit pinaagi sa pag-ampo. Kini usa ka relasyon nga akong gihambin—nga sa tinuod ako mahisalaag kon wala kini. Kon kamo karon wala niana nga relasyon sa inyong Amahan sa Langit, awhagon ko kamo sa pagtinguha niana nga tumong. Samtang kamo nagbuhat sa ingon, kamo may katungod sa Iyang inspirasyon ug giya sa inyong kinabuhi—mga panginahanglan alang sa matag usa kanato kon kinahanglan kita nga makasugakod espirituhanong paagi sa atong pagpakabuhi dinhi sa yuta. Ang ingon nga inspirasyon ug giya mga gasa nga Iyang gihatag sa walay pagpugong kon kita magtinguha lamang niini. Pagkanindot niini nga bahandi!

Ako kanunay nga namapainubsanon ug mapasalamaton kon ang akong Langitnong Amahan makigsulti kanako pinaagi sa Iyang inspirasyon. Nakakat-on ako sa pag-ila niini, sa pagsalig niini, ug sa pagsunod niini. Sa makadaghan ako nahimong tigdawat sa mao nga inspirasyon. Usa ka mahinuklugong kasinatian nahitabo niadtong Agosto 1987 sa panahon sa pagpahinungod sa Templo sa Frankfurt Germany. Si Presidente Ezra Taft Benson kauban namo sa una o ikaduhang adlaw sa pagpahinungod apan mipauli, ug busa akong oportunidad ang pag-conduct sa nahibiling mga sesyon.

Sa pagka-Sabado kami dunay sesyon alang sa among mga miyembro nga Dutch kinsa didto sa distrito sa Templo sa Frankfurt. Kaila kaayo ko sa usa sa labing maayo nga mga lider sa Netherlands, si Brother Peter Mourik. Sa hapit na ang sesyon, diha akoy klaro nga pagbati nga si Brother Mourik kinahanglang tawgon aron mamulong sa iyang kaubang mga miyembrong Dutch panahon sa sesyon ug nga, sa pagkatinuod, siya kinahanglan maoy unang mamulong. Kay wala makakita niya diha sa

templo nianang buntaga, mipadala ako og mubo nga sulat ngadto ni Elder Carlos E. Asay, ang among Area President, nangutana kon si Peter Mourik mitambong ba sa sesyon. Sa hapit na motindog aron pagsugod sa sesyon, nakadawat ako og mubo nga sulat gikan ni Elder Asay nag-ingon nga si Brother Mourik *wala* motambong, nga siya tua sa laing dapit, ug siya nagplano sa pagtambong sa pagpahinungod nga sesyon sa templo sa sunod adlaw kauban sa mga militar sa stake.

Samtang nagbarug ko sa pulpito sa pag-abi-abi sa mga tawo ug sa pagpahibalo sa programa, akong nadawat og balik ang klaro nga inspirasyon nga kinahanglan nakong ipahibalo nga si Peter Mourik ang unang mamumulong. Kini sukwahi sa akong mga gibati, kay bag-o lang nakong nadungog ni Elder Asay nga si Brother Mourik *wala* gayud sa templo. Nagsalig sa inspirasyon, bisan niana, akong gipahibalo ang pagpanganta sa choir, ang pag-ampo, ug dayon gipaila nga ang unang mamumulong mao si Brother Peter Mourik.

Sa akong pagbalik sa akong lingkuranan, mipasiplat ko ni Elder Asay ug nakita sa iyang nawong ang hitsura sa kabalaka. Sa kaulahian misulti siya nako nga sa dihang akong gipahibalo nga si Brother Mourik mao ang unang mamumulong, dili siya makatuo sa iyang nadungog. Siya miingon nga siya nahibalo nga akong nadawat ang iyang mubo nga sulat ug akong nabasa kini, ug dili siya makatugkad kon nganong akong gipahibalo si Brother Mourik isip mamumulong, nahibalo nga siya wala bisan asa sa templo.

Sa panahon nga kining tanan nahitabo, si Peter Mourik didto sa miting sa opisina sa area sa Porthstrasse. Samtang ang iyang miting nagpadayon, sa kalit milingi siya ni Elder Hawkes, kinsa mao ang Regional Representative, ug nangutana, “Unsa kadali makahatud ka nako ngadto sa templo?”

Si Elder Hawkes, kinsa nabantug nga kusog momaneho sa iyang gamay nga sports car, mitubag, “Mahatud ka nako didto sa 10 minutos! Apan



nganong kinahanglan kang moadto sa templo?”

Si Brother Mourik miangkon nga siya wala mahibalo kon nganong kinahanglan siyang moadto sa templo apan siya nahibalo nga siya kinahanglang moadto. Silang duha mibiya dayon padulong sa templo.

Atol sa nindot kaayong pagpanganta sa choir, gilipot nakog pasiplat, naghunahuna nga sa dili madugay makita nako si Peter Mourik. Wala nako makit-i. Kahibudnganan, bisan niana, wala ako mobati og kabalaka. Ako adunay nindot, klaro nga kasigurohan nga ang tanan mamaayo ra.

Misulod si Brother Mourik sa atubangang pultahan sa templo sa naghinapos na ang pangbukas nga pag-ampo,

sa gihapon wala mahibalo nganong anaa siya didto. Samtang siya nagdali paglakaw sa pasilyo, nakita niya ang akong hitsura diha sa monitor ug nakadungog kanakong nagpahibalo, “Maminaw kita karon gikan ni Brother Peter Mourik.”

Sa katingala ni Elder Asay, si Peter Mourik diha-diha dayon misulod sa lawak ug mibarug sa may podium.

Human sa sesyon, si Brother Mourik ug ako naghigot niana nga hitabo sa wala pa ang iyang oportunidad sa pagpamulong. Akong gipamalandong ang inspirasyon nga miabut nianang adlaw dili lang kanako apan usab ngadto ni Brother Peter Mourik. Kana nga talagsaong kasinatian naghatag og klaro nga saksi kanako sa importansya

sa katakus sa pagdawat sa inspirasyon ug dayon sa pagsalig niini—ug sa pagsunod niini— kon kini moabut. Ako nasayud sa walay pagpangutana nga gituyo sa Ginoo alang niadtong kinsa anaa niana nga sesyon sa pagpahinungod sa Templo sa Frankfurt sa pagpamati sa gamhanan, makatandog nga pagpamatuod sa Iyang sulugoon nga si Brother Peter Mourik.

Hinigugma kong mga kaigsoonan, ang pagpakigsulti sa atong Amahan sa Langit—lakip ang atong mga pagampo ngadto Kaniya ug sa Iyang inspirasyon ngari kanato—gikinahanglan aron kita makahupay sa mga bagyo ug mga pagsulay sa kinabuhi. Ang Ginoo nagdapit kanato, “Paduol ngari kanako ug Ako mopaduol nanganha kaninyo; pangita kanako nga makugihon ug kamo makakita kanako.”⁷ Samtang kini atong buhaton, atong mabatyagan ang Iyang Espiritu sa dinhi sa atong kinabuhi, nga naghatag kanato og tinguha ug kaisug sa pagbarug nga lig-on ug dili matarug sa pagkamatarung—sa “[pag]l baru . . . sa balaan nga mga dapit, ug ayaw pagbalhin.”⁸

Samtang nagkausab ang kalibutan libut nato ug ang mga baruganan sa moral sa katilingban nagkahuyang, hinaut atong hinumduman ang bilil-hong mga saad sa Ginoo niadtong kinsa nagsalig Kaniya: “Ayaw kahadlok; kay ania ako uban kanimo: Ayaw pagtalaw; kay ako mao ang imong Dios: Palig-unon ko ikaw; oo, buligan ko ikaw; oo, ituboy ko ikaw sa tuong kamot sa akong pagkamatarung.”⁹

Pagkaanindot nga saad! Hinaut ingon niana ang atong panalangin, ako nag-ampo diha sa sagradong pangalan sa atong Ginoo ug Manluluwas, si Jesukristo, amen. ■

MUBO NGA MGA SULAT

- Jonathan Sacks, “Reversing the Decay of London Undone,” *Wall Street Journal*, Ago. 20, 2011, online.wsj.com; empasis gidugang. *Mubo nga sulat*: Lord Sacks mao ang pangulong rabbi sa United Hebrew Congregations sa Commonwealth.
- Exodo 20:3–4, 7–8, 12–17.
- Moroni 8:18.
- 1 Mga Taga-Corinto 2:14.
- Isaias 32:17.
- 3 Nephi 18:18–20.
- Doktrina ug mga Pakigsaad 88:63.
- Doktrina ug mga Pakigsaad 87:8.
- Isaias 41:10.



Ni Elder Russell M. Nelson

Sa Korum sa Napulog Duha ka mga Apostoles

Mga Pakigsaad

Kon kita makaamgo nga kita mga anak sa pakigsaad, makaila kita kon kinsa kita ug unsa ang gipaabut sa Dios nato.

Usa ka semana human sa bag-ong buluhaton sa pagtukod sa unang stake sa Moscow, Russia,¹ mitambong ko og komperensya sa district sa St. Petersburg. Samtang nagsulti sa akong pagpasalamat sa unang mga misyonaryo ug lokal nga mga lider kinsa nagdala og kalig-on sa Simbahan sa Russia, akong gisulti ang pangalan ni Vyacheslav Efimov. Siya mao ang unang kinabig nga Russian nga nahimong presidente sa misyon. Siya ug ang iyang asawa maayo kaayong mibuhay niana nga buluhaton. Wala madugay human nila nakompleto ang ilang misyon, ug sa atong kasubo, si Presidente Efimov kalit nga namatay.² Siya 52 anyos pa lang.

Samtang naghigot niining magtiayong pioneer, mibati ko sa pagpangutana sa kongregasyon kon naa ba kaha si Sister Efimov. Tumoy didto sa luyo sa lawak, usa ka babaye ang mibarug. Gidapit ko siya sa pagduol sa mikropono. Oo, si Sister Galina Efimov kadto. Namulong siya uban ang kalig-on sa pagtuo ug gamhanang mipamatuod sa Ginoo, sa Iyang ebanghelyo, ug sa Iyang gipahiuli nga Simbahan. Siya ug ang iyang bana nabugkos diha sa balaang templo.

Miingon siya nga sila ghiusa sa kahangturan. Sila gihapon ang magkauuban nga misyonaryo, si Sister Efimov dinhi nga bahin sa tabil ug si Pres. Efimov sa pikas nga bahin.³ Uban sa mga luha sa kalipay, gipasalamatan niya ang Dios sa sagradong mga pakigsaad sa templo. Mihilak usab ako, uban sa hingpit nga pagsabut nga ang mahangturonang panaghiusa niining matinud-anong magtiayon mao ang matarung nga resulta sa paghimo, pagtuman, ug pagtahud sa sagradong mga pakigsaad.

Usa sa labing importanting konsepto sa tinuod nga relihiyon mao kang sagrado nga pakigsaad. Sa legal nga pinulongan, ang pakigsaad mao ang kasabutan tali sa duha o daghang mga tawo. Apan sa relihiyosong pagsabut, ang pakigsaad mas lawom pa og kahulugan. Kini usa ka sagradong saad uban ang Dios. Siya ang naghahan-ay sa mga kondisyon. Ang kada tawo mahimong mopili sa pagdawat sa mga kondisyon. Kon ang usa ka tawo modawat sa mga kondisyon sa pakigsaad ug mosunod sa balaod sa Dios, iyang madawat ang mga panalangin sa pakigsaad. Kita nasayud nga “kon kita makadawat og bisan unsa nga panalangin gikan sa Dios, kini



“Ang Amahan ingon nga mipasanay kanako nganha kaninyo pag-una, . . . mipadala kanako sa pagpanalangin kaninyo diha sa pagbiya sa matag usa gikan sa iyang mga kadautan; ug kini tungod kay kamo ang mga anak sa pakigsaad.”¹²

Ang pakigsaad nga gihimo sa Dios uban kang Abraham¹³ ug sa wala madugay gipanghimatuod og usab uban ni Isaac¹⁴ ug ni Jacob¹⁵ usa ka talagsaong kahulugan. Kini naglangkob og daghang mga saad, lakip ang:

- Si Jesus ang Kristo matawo pinaagi sa kaliwatan ni Abraham.
- Ang mga kaliwat ni Abraham dili maihap, may katungod sa walay katapusang pagdaghan ug usab may katungod sa pagdala sa priesthood.
- Si Abraham mahimong amahan sa daghang nasud.
- May mga yuta nga mapanunod sa iyang kaliwat.
- Ang tanang kanasuran sa yuta mapanalanginan sa iyang binhi.¹⁶
- Ug kana nga pakigsaad walay katapusan—gani ngadto sa “usa ka libo ka kaliwatan.”¹⁷

Pipila niining mga saad natuman na; ang uban wala pa. Nagkutlo ko gikan sa unang panagna sa Basahon ni Mormon: “Ang atong amahan [si Lehi] wala mamulong sa atong binhi lamang, apan ngadto usab sa tanan nga balay ni Israel, nagtudlo sa pakigsaad diin kinahanglan matuman sa *ulahing mga adlaw*; diin nga pakigsaad gihimo sa Ginoo ngadto sa atong amahan nga si Abraham.”¹⁸ Dili ba kana makapatingala? Mga 600 ka tuig sa *wala pa* matawo si Jesus didto sa Bethlehem, ang mga propeta nahibalo nga ang pakigsaad ni Abraham sa katapusan matuman lamang sa *ulahing mga adlaw*.

Sa pagpahinabo niana nga saad, ang Ginoo mipakita niining ulahing mga adlaw sa pagbag-o sa pakigsaad sama kang Abraham. Ngadto ni Propeta Joseph Smith, ang Agalon mipahayag:

“Si Abraham nakadawat og mga saad mahitungod sa iyang binhi, ug sa bunga sa iyang mga bat-ang—kang

tungod sa pagsunod niana nga balaod diha diin kini gipasikad.”⁴

Sa tibuok kasaysayan sa kalibutan, ang Dios mihimo og mga pakigsaad ngadto sa Iyang mga anak.⁵ Ang Iyang mga pakigsaad anaa sa tanang bahin sa tibuok plano sa kaluwasan ug busa kabahin sa kahingpitan sa Iyang ebanghelyo.⁶ Pananglit, ang Dios misaad sa pagpadala og Manluluwas alang sa Iyang mga anak,⁷ nagsugo nga magmasulundon sa Iyang balaod.⁸

Sa Biblia atong mabasa ang mga lalaki ug mga babaye sa Karaang Kalibutan kinsa nailhan isip mga anak sa pakigsaad. Unsa nga pakigsaad? “Ang pakigsaad nga gihimo sa Dios uban sa [ilang] mga ginikanan, sa iyang

pag-ingon kang Abraham, Pinaagi sa imong kaliwat pagapanalanginan ang tanang kabanayan sa yuta.”⁹

Sa Basahon ni Mormon atong mabasa ang katawhan sa Bag-ong Kalibutan kinsa naila usab isip mga anak sa pakigsaad.¹⁰ Ang nabanhaw nga Ginoo ang nagpahibalo kanila: “Tan-awa, kamo mao ang kaliwatan sa mga propeta, ug kamo mga sakop sa balay ni Israel; ug kamo anaa sa pakigsaad diin ang Amahan mihimo uban sa inyong mga amahan, nag-ingon ngadto kang Abraham: Ug diha sa imong binhi ang tanan nga mga kaliwatan sa yuta mapanalanginan.”¹¹

Ang Manluluwas mipasabut sa importansya sa ilang pagkatawo isip mga anak sa pakigsaad. Siya miingon,



Stockholm, Sweden

kinsa nga mga bat-ang kamo gikan, . . . akong sulugoon nga si Joseph. . . .

“Kini nga saad inyo usab, tungod kay kamo gikan kang Abraham.”¹⁹

Uban niini nga pagbag-o, atong nadawat, sama kanila sa karaan, ang balaang priesthood ug ang mahangtulong ebanghelyo. Kita adunay katungod sa pagdawat sa kahingpitan sa ebanghelyo, pagpahimulos sa mga panalangin sa priesthood, ug pagpaka-sarang sa labing dako nga panalangin sa Dios—kana mao ang kinabuhing walay katapusan.²⁰

Ang uban nato mga tinuod nga binhi ni Abraham; ang uban gipundok sa iyang pamilya pinaagi sa pagsagop. Ang Ginoo wala maghimo og kalinain.²¹ Madawat natong tanan ang gisaad nga mga panalangin—kon atong pangitaon ang Ginoo ug sundon ang Iyang mga sugo.²² Apan kon kita dili, mawala nato ang mga panalangin sa pakigsaad.²³ Sa pagtabang nato, ang Iyang Simbahan naghatag og patriyarkal nga mga panalangin sa paghatag sa tigdawat og panan-awon sa iyang kaugmaon, ingon man usab usa ka sumpay sa nangagi, gani usa ka pagpadayag sa kaliwatan balik ngadto ni Abraham, Isaac, ug Jacob.²⁴

Ang mga kaigsoonan sa pakigsaad adunay katungod sa pagpaka-sarang alang sa panumpa ug pakigsaad sa priesthood.²⁵ Kon kamo

“matinud-anon ngadto sa pagbaton niining duha ka mga pagkapari . . . ug sa pagpalambo [sa inyong] balaan nga tawag, [kamo] pagabalaanon pinaagi sa Espiritu Santo ngadto sa pagbag-o sa [inyong] mga lawas.”²⁶ Dili ra kana lang. Ang mga lalaki kinsa takus nga modawat sa priesthood modawat ni Ginoong Jesukristo, ug kadto kinsa modawat sa Ginoo modawat sa Dios Amahan.²⁷ Ug siya nga modawat sa Amahan makadawat sa tanan nga Siya aduna.²⁸ Dili katoohan nga mga panalangin modagayday gikan niini nga panumpa ug pakigsaad ngadto sa takus nga mga lalaki, mga babaye, ug mga bata sa tibuok kalibutan.

Ato ang responsibilidad sa pagtabang og tuman sa pakigsaad ni Abraham. Ang atong kaliwat giorden nang daan ug giandam sa pagpanalangin sa tanang katawhan sa kalibutan.²⁹ Kana mao nganong ang katungdanan sa priesthood naglakip sa misyonaryo nga buhat. Human sa mga 4,000 ka tuig sa pagpinaabut ug pagpangandam, kini mao ang gitakda nga panahon kanus-a pagadad-on ang ebanghelyo ngadto sa mga kaliwatan dinhi sa yuta. Kini mao ang panahon sa gisaad nga pagpundok sa Israel. Ug kinahanglan kitang moapil! Dili ba kana kulbahinam? Ang Ginoo nagsalig nato ug sa atong anak nga mga lalaki—ug mapasalamaton kaayo

Siya ngadto sa atong anak nga mga babaye—kinsa takus nga nagserbisyo isip mga misyonaryo niining importanting panahon sa pagpundok sa Israel.

Ang Basahon ni Mormon usa ka makita nga ebidensya nga ang Ginoo nagsugod na sa pagpundok sa Iyang mga anak sa pakigsaad ni Israel.³⁰ Kini nga basahon, gisulat sa *atong* panahon, nagpahayag isip usa sa katuyoan niini nga “kamo masayud nga ang pakigsaad nga gihimo sa Amahan ngadto sa mga anak ni Israel . . . nagsugod na sa pagkatuman. . . . Kay tan-awa, ang Ginoo mohinumdom gayud sa iyang pakigsaad diin siya mihimo ngadto sa iyang mga katawhan sa balay ni Israel.”³¹

Sa tinuod, ang Ginoo wala makalimot! Siya mipanalangin nato ug sa uban sa tibuok kalibutan sa Basahon ni Mormon. Usa sa mga katuyoan niini mao ang “pagpamatuod ngadto sa Judeo ug sa Hentil nga si Jesus mao ang Kristo.”³² Kini nakatabang kanato sa paghimo og mga pakigsaad ngadto sa Dios. Kini nagdapit nato sa paghinumdom Kaniya ug sa pag-ila sa Iyang Pinalanggang Anak. Kini ang lain nga tugon ni Jesukristo.

Ang mga anak sa pakigsaad adunay katungod sa pagdawat sa Iyang doktrina ug sa pagkasayud sa plano sa kaluwasan. Sila *makaangkon* niini pinaagi sa paghimo og mga pakigsaad nga may sagradong kahulugan. Mii-ngon si Brigham Young: “Ang tanang mga Santos sa Ulahing mga Adlaw mosulod sa bag-o ug walay katapusan nga pakigsaad kon sila magpasakop niini nga Simbahan. . . . Sila mosulod sa bag-o ug walay katapusan nga pakigsaad aron sa pagpaluyo sa Ginharian sa Dios.”³³ Sila *nagtuman* sa pakigsaad pinaagi sa pagkamasulundon ngadto sa Iyang mga sugo.

Sa bunyag nakigsaad kita sa pagserbisyo sa Ginoo ug sa pagsunod sa Iyang mga sugo.³⁴ Kon kita moambit sa sakrament, kita nagbag-o niana nga pakigsaad ug nagpahayag sa atong kandam sa pagdala diha sa atong mga kaugalingon sa pangalan ni Jesukristo. Niana nga paagi kita gisagop isip Iyang anak nga mga lalaki ug mga babaye ug nailhan isip mga igsoon. Siya mao ang amahan sa atong bag-ong

kinabuhi.³⁵ Sa katapusan, diha sa balaang templo, kita mahimong mga manununod sa mga panalangin sa mangtuturong pamilya, nga sa makausa gisaad ngadto ni Abraham, Isaac, Jacob, ug sa ilang kaliwatan.³⁶ Sa ingon, ang celestial nga kaminyoon mao ang pakigsaad sa kahimayaan.

Kon kita makaamgo nga kita mga anak sa pakigsaad, makaila kita kon kinsa kita ug unsa ang gipaabut sa Dios nato.³⁷ Ang Iyang balaod nahisulat diha sa atong mga kasingkasing.³⁸ Siya mao ang atong Dios ug kita Iyang katawhan.³⁹ Mapasaligong mga anak sa pakigsaad nagpabilin nga makanunayon, bisan sa panahon sa kalisdanan. Kon kana nga doktrina nahimong kabahin sa atong kinabuhi, bisan ang hapdos sa kamatayon mahupay ug ang atong espirituhanong kusog malig-on.

Ang labing dako nga pagdayeg nga madawat niining kinabuhia mao nga mailhan nga usa ka tighupot sa pakigsaad. Ang mga ganti alang sa tighupot og pakigsaad madawat niini nga kinabuhi ug human sa kinabuhi dinhi. Ang kasulatan nagpahayag nga “kamo kinahanglan maghunahuna sa bulahan ug sa malipayon nga kahimtang niadto nga naghupot sa mga sugo sa Dios. Kay tan-awa, sila bulahan sa tanan nga mga butang, . . . ug kon sila magpabilin nga matinud-anon hangtud sa katapusan sila pagadawat ngadto sa langit . . . [ug] mopuyo uban sa Dios diha sa usa ka kahimtang nga walay katapusan ang kalipay.”⁴⁰

Ang Dios buhi. Si Jesus mao ang Kristo. Ang Iyang Simbahan gipahiuli sa pagpanalangin sa tanang katawhan. Si Presidente Thomas S. Monson mao ang iyang propeta karon. Ug kita, isip *matinud-anong* mga anak sa pakigsaad, mapanalanginan karon ug sa kahangturan. Ako nagpamatuod sa pangalan ni Jesukristo, amen. ■

MUBO NGA MGA SULAT

1. Ang Moscow Russia Stake natukod niadtong Domingo, Hunyo 5, 2011.
2. Si Vyacheslav Efimov mao ang presidente sa Russia Yekaterinburg Mission gikan 1995 hangtud 1998. Siya namatay niadtong Pebrero 25, 2000.
3. Tan-awa sa Doktrina ug mga Pakigsaad 138:57.
4. Doktrina ug mga Pakigsaad 130:21.



5. Pananglitan, human sa dako nga Lunop, miingon Siya nga “ang balangaw makita sa panganod: ug pagahinumduman ko ang akong saad, nga ania sa taliwala kanako ug kaninyo . . . ; ug ang mga tubig dili na mahimo nga lunop aron pagalaglagon ang tanan nga unod” (Genesis 9:14–15, footnote 15b; gikan sa Hubad ni Joseph Smith, Genesis 9:20).
6. Tan-awa sa Doktrina ug mga Pakigsaad 66:2; 133:57.
7. Tan-awa sa Juan 3:16.
8. Tan-awa sa Abraham 3:25.
9. Mga Buhat 3:25.
10. Tan-awa sa 3 Nephi 20:26.
11. 3 Nephi 20:25.
12. 3 Nephi 20:26.
13. Tan-awa sa Genesis 17:1–10, 19; Levitico 26:42; Mga Buhat 3:25; Bible Dictionary, “Abraham, Covenant of.”
14. Tan-awa sa Genesis 26:1–5, 24.
15. Tan-awa sa Genesis 28:1–4, 10–14; 35:9–13; 48:3–4.
16. Tan-awa ang mga pakisayran nga gilista sa mga endnote 13–15 sa ibabaw.
17. Deuteronomio 7:9; 1 Mga Cronicas 16:15; Salmo 105:8.
18. 1 Nephi 15:18; emphasis gidugang.
19. Doktrina ug mga Pakigsaad 132:30–31. Ang Ginoo misulti usab kang Joseph Smith: “Ug ingon nga Ako misulti ngadto ni Abraham mahitungod sa mga kaliwatan sa yuta, gani Ako moingon ngadto sa akong sulugoon nga si Joseph: Diha kanimo ug diha sa imong binhi pagapanalanginan ang kaliwatan sa yuta.” (Doktrina ug Mga Pakigsaad 124:58).
20. Tan-awa sa Doktrina ug mga Pakigsaad 14:7.
21. Tan-awa sa Mga Buhat 10:34–35.
22. Tan-awa sa Exodo 19:5.
23. Ang mga kasulatan nagpahayag nga “Ako, ang Ginoo, mapugos sa pagtuman kon kamo mobuhat sa unsa nga Ako misulti; apan kon kamo dili mobuhat sa unsa nga Ako misulti, kamo dili makaangkon og saad” (Doktrina ug Mga Pakigsaad 82:10).
24. Niadtong Septyembre 21, 1823, kini nagpakigsaad nga konsepto unang gipadayag ngadto ni Propeta Joseph Smith. Dayon si anghel Moroni mipahayag nga si Elijah ang propeta moabut isip mensahero gikan sa langit sa pagtanum diha sa mga kasingkasing sa mga anak og kahibalo sa mga saad nga sa makausa gihimo ngadto sa mga amahan sa balay ni Israel (tan-awa sa Doktrina ug Mga Pakigsaad 2:1–3).
25. Tan-awa sa Doktrina ug Mga Pakigsaad 84:33–34, 39–40.
26. Doktrina ug mga Pakigsaad 84:33.
27. Tan-awa sa Doktrina ug mga Pakigsaad 84:35, 37.
28. Tan-awa sa Doktrina ug Mga Pakigsaad 84:38.
29. Tan-awa sa Alma 13:1–9.
30. Tan-awa sa 3 Nephi 29.
31. 3 Nephi 29:1, 3.
32. Ang ulohang pahina sa Basahon ni Mormon: Lain nga Tugon ni Jesukristo.
33. *Mga Pagtulun-an sa mga Presidente sa Simbahan: Brigham Young* (1997), 74.
34. Tan-awa sa Doktrina ug mga Pakigsaad 20:37.
35. “Kami naghigot kang Kristo, kami nalipay diha kang Kristo, kami nagsangyaw kang Kristo, kami nanagna kang Kristo, . . . nga ang among mga anak mahimo nga masayud sa unsa nga tinubdan sila mahimo nga mangita alang sa kapasayloan sa ilang mga sala” (2 Nephi 25:26).
36. Tan-awa sa Mga Taga-Galacia 3:29; Doktrina ug mga Pakigsaad 86:8–11.
37. Kini nga konsepto nagpasabut kanato: “Daghan nga mga kaliwatan human ang Mesiyas ipakita diha sa lawas ngadto sa mga katawhan, unya ang kahingpitan sa ebanghelyo sa Mesiyas moabut ngadto sa mga Hentil, gikan sa mga Hentil ngadto sa salin sa atong mga binhi—ug niana nga adlaw ang mga salin sa atong binhi masayud nga sila mga sakop sa balay ni Israel, ug nga sila mao ang mga katawhan sa pakigsaad sa Ginoo; ug unya sila masayud ug moabut sa kasayuran sa ilang mga katigulangan, ug usab sa kasayuran sa ebanghelyo sa ilang Manunubos, diin gipangalagad ngadto sa ilang mga amahan pinaagi kaniya; busa, sila moabut sa kasayuran sa ilang Manunubos ug ang mga katuyoan sa iyang doktrina, nga sila masayud unsaon pagdangop ngadto kaniya ug maluwas” (1 Nephi 15:13–14).
38. Tan-awa sa Isaias 55:3; Jeremias 31:33; Mga Taga-Roma 2:15; 2 Mga Taga-Corinto 3:2–3; Mga Hebreohanon 10:16.
39. Tan-awa sa Salmo 95:7; 100:3; Jeremias 24:7; 31:33; 32:38; Ezequiel 11:20; 37:23, 27; Zacarias 8:8; 2 Mga Taga-Corinto 6:16; Mga Hebreohanon 8:10.
40. Mosiah 2:41.



Ni Elder Dallin H. Oaks

Sa Korum sa Napulog Duha ka mga Apostoles

Mga Pagtulun-an ni Jesus

Si Jesukristo mao ang Bugtong ug Pinalangga nga Anak sa Dios. . . Siya mao ang atong Manhuluwas gikan sa sala ug kamatayon. Kini ang labing importante nga kahibalo dinhi sa yuta.

Unsa may inyong paghunahuna mahitungod kang Kristo?” Mateo 22:42. Pinaagi niadtong mga pulong gilibug ni Jesus ang mga Pariseo sa Iyang panahon. Pinaagi niadtong sama nga mga pulong akong gipangutana ang akong isigka Santos sa Ulahing mga Adlaw ug ubang Kristiyano unsa gayud ang inyong gituohan mahitungod kang Jesukristo ug unsay inyong gibuhat tungod niana nga tinuohan.

Kasagaran sa akong mga kinutlo sa kasulatan magagikan sa Biblia kay pamilyar kini sa kadaghanan sa mga Kristiyano. Ang akong mga interpretasyon magagikan siyempre kon unsay gitudlo kanato sa bag-ong kasulatan, labi na ang Basahon ni Mormon, kalabut sa kahulugan sa mga kasulatan sa Biblia nga dili kaayo klaro nga ang lainlaing mga Kristiyano wala magkasabut sa kahulugan niini. Mamulong ko sa mga tumutuo ug sa uban usab. Sama sa gipamulong kanato ni Elder Tad R. Callister karong buntaga, uban nga nagtawag sa ilang kaugalingon nga mga Kristiyano nagdayeg kang

Jesus isip bantugang magtutudlo apan naglikay sa pagpanghimatuod sa Iyang kabalaan. Sa pagpamulong kanila, akong gigamit ang mga pulong Mismo ni Jesus. Kinahanglan natong ikonsiderar unsay Iyang gitudlo Mismo kon si kinsa Siya ug unsay ipabuhat Niya nganong gipadala Siya sa yuta.

Bugtong nga Anak

Si Jesus nagtudlo nga Siya ang Bugtong nga Anak. Miingon Siya:

“Kay gihigugma gayud sa Dios ang kalibutan, nga tungod niana gihatag niya ang iyang bugtong Anak, aron ang tanan nga mosalig kaniya dili malaglag, kondili may kinabuhing dayon.

“Kay gipadala sa Dios ang iyang Anak nganhi sa kalibutan, dili aron ang kalibutan iyang pagahukman sa silot, kondili aron ang kalibutan maluwag pinaagi kaniya” (Juan 3:16–17).

Ang Dios Amahan mipanghimatuod niini. Sa panapos sa sagradong kasinatian didto sa Bukid sa Transpigurasyon, Siya mipahayag gikan sa langit: “Mao kini ang akong Anak nga pinalangga, nga kaniya may

kalipay ako; patalinghugi ninyo siya” (Mateo 17:5).

Si Jesus nagtudlo usab nga ang Iyang panagway pareho sa Iyang Amahan. Sa Iyang mga Apostoles, Siya miingon:

“Kon nakaila pa kamo kanako, makaila usab unta kamo sa akong Amahan: ug sukad karon nakaila na kamo kaniya, ug nakakita na kaniya.

“Si Felipe miingon kaniya, Ginoo, ipakita kanamo ang Amahan, ug igo na kana kanamo.

“Si Jesus mitubag kaniya, Kadugay ko nang pakig-uban kaninyo, ug wala ka pa diay makaila kanako, Felipe? ang nakakita kanako nakakita sa Amahan” (Juan 14:7–9).

Sa wala madugay, si Apostol Pablo mihulagway sa Anak isip “tukma nga hulad sa kinaiya sa [Dios Amahan]” (Mga Hebreohanon 1:3; tan-awa usab sa 2 Mga Taga-Corinto 4:4).

Tiglalang

Si Apostol Juan misulat nga si Jesus, kinsa iyang gitawag og “ang Pulong,” “sa sinugdanan uban sa Dios. Ang tanang mga butang nangahimo pinaagi kaniya; ug niadtong mga nangahimo na, walay bisan usa nga nahimo nga dili pinaagi kaniya” (Juan 1:2–3). Sa ingon, ubos sa plano sa Amahan, si Jesukristo mao ang Tiglalang sa tanang mga butang.

Ginoong Dios sa Israel

Atol sa Iyang pangalagad sa Iyang katawhan sa Palestina, si Jesus nama-hayag nga Siya si Jehova, ang Ginoong Dios sa Israel (tan-awa sa Juan 8:58). Wala madugay, isip ang nabanhaw nga Ginoo, nangalagad Siya sa Iyang katawhan sa kontinente sa Amerika. Didto namahayag Siya:

“Tan-awa, Ako mao si Jesukristo, kinsa gipamatud-an sa mga propeta nga moanhi sa kalibutan. . . .

“. . . Ako mao ang Dios sa Israel, ug ang Dios sa tibuok yuta” (3 Nephi 11:10, 14).

Unsa ang Iyang Nabuhat alang Kanato

Sa usa ka komperensya sa stake daghang tuig nang milabay, akong nahimamat ang babaye nga miingon nga



Iyang mga pagtulun-an nagdan-ag sa atong agianan sa mortal nga kinabuhi ug nagpakita kanato sa dalan balik ngadto sa Amahan.

Nagbuhat sa Kabubut-on sa Amahan

Sa kanunay, si Jesus mitahud sa Amahan ug misunod Kaniya. Bisan gani batan-on pa Siya namahayag ngadto sa Iyang yutan-ong mga gini-kanan, “Wala ba diay kamo mahibalo nga kinahanglan anhi gayud ako sa balay sa akong Amahan?” (Lucas 2:49). “Kay ako nanaug gikan sa langit,” wala madugay Siya nagtudlo, “dili sa pagbuhat sa akong kaugalingong kabubut-on, kondili sa kabubut-on sa nagpadala kanako” (Juan 6:38; tan-awa usab sa Juan 5:19). Ug ang Manluluwas nagtudlo, “Walay bisan kinsa nga makaadto sa Amahan, gawas kon pinaagi kanako” (Juan 14:6; tan-awa usab sa Mateo 11:27).

Makabalik kita sa Amahan pinaagi sa pagbuhat sa Iyang kabubut-on. Si Jesus nagtudlo, “Dili ang tanang magaingon kanako, Ginoo, Ginoo, makasulod sa gingharian sa langit; kondili ang nagatuman sa kabubut-on sa akong Amahan nga anaa sa langit” (Mateo 7:21). Siya mipasabut:

“Daghan unya ang magaingon kanako niadtong adlaw, Ginoo, Ginoo, dili ba nanaghimo man kamig mga propesiya tungod sa imong ngalan? ug nanagpagula sa mga yawa tungod sa imong ngalan? ug nakahimo sa daghang mga milagro tungod sa imong ngalan?”

“Ug unya magaingon ako kanila, wala ko gayud kamo igkaila: pahawa kanako, kamong mamumuhat og dautan” (Mateo 7:22–23).

Kinsa man diay ang makasulod sa gingharian sa langit? Dili kadtong naghimo lamang og milagro gamit ang ngalan sa Ginoo, si Jesus nagtudlo, apan kadto lamang “nagatuman sa kabubut-on sa akong Amahan nga anaa sa langit.”

Ang Halangdong Ehempro

Si Jesus mipakita kanato unsaon kini paghimo. Balik-balik Siya nga midapit kanato sa pagsunod Kaniya: “Ang akong mga karnero

gihangyo siya sa pagbalik sa simbahan human sa daghang tuig nga nahilayo apan dili makahunahuna og bisan unsang rason nganong kinahanglan siyang mobalik. Aron pagdasig niya miingon ko, “Kon imong hunahunaon ang tanang mga butang nga nabuhat sa Manluluwas kanato, wala ka bay daghang mga rason nga mobalik sa simbahan aron mosimba ug moserbisyo Kaniya?” Nakurat ko sa iyang tubag: “Unsay nabuhat Niya alang nako?” Alang niadtong wala makasabut kon unsay nabuhat sa atong Manluluwas alang nato, akong tubagon na nga pangutana sa Iyang kaugalingong mga pulong ug sa akong kaugalingong pagpamatuod.

Kinabuhi sa Kalibutan

Ang Biblia nagrekord sa pagtulun-an ni Jesus: “Ako mianhi aron sila makabaton og kinabuhi, ug sa pagpakabaton niini sa madagayaon gayud” (Juan 10:10). Unya, sa

Bag-ong Kalibutan, Siya mipahayag, “Ako ang kahayag ug ang kinabuhi sa kalibutan” (3 Nephi 11:11). Siya ang kinabuhi sa Kalibutan tungod kay Siya ang atong Tiglalang ug tungod kay, pinaagi sa Iyang Pagkabanhaw, kitang tanan makasiguro nga mabuhi kita pag-usab. Ug ang kinabuhi nga Iyang gihatag kanato dili lang basta mortal nga kinabuhi. Siya nagtudlo, “Ginahatagan ko silag kinabuhing dayon; ug sila dili gayud malaglag, ug walay bisan kinsa nga magaagaw kanila gikan sa akong kamot” (Juan 10:28; tan-awa usab sa Juan 17:2).

Kahayag sa Kalibutan

Si Jesus nagtudlo usab, “Ako mao ang kahayag alang sa kalibutan: siya nga magasunod kanako dili gayud magalakaw sa kangitngit” (Juan 8:12). Namahayag usab Siya, “Ako mao ang dalan, ang kamatuoran, ug ang kinabuhi” (Juan 14:6). Siya ang dalan ug Siya ang kahayag tungod kay ang



nagapatalinghug sa akong tingog, ug ako nakaila kanila, ug sila nagasunod kanako” (Juan 10:27).

Gahum sa Priesthood

Siya mihatag og gahum sa priesthood ngadto sa Iyang mga Apostoles (tan-awa sa Mateo 10:1) ug ngadto sa uban. Ngadto kang Pedro, ang nagdumalang Apostol, Siya miingon, “Ug hatagan ko ikaw sa mga yawe sa gingharian sa langit: ug bisan unsay imong pagabugkason dinhi sa yuta, didto sa langit pagailhon kini nga binugkos: ug bisan unsay imong pagaluagan dinhi sa yuta, didto sa langit pagailhon kini nga linuagan” (Mateo 16:19; tan-awa usab sa Mateo 18:18).

Si Lucas misulat nga “gitudlo sa Ginoo . . . ang laing kapitoan, ug sila iyang gisugo sa pag-una kaniya nga magtinagurha ngadto sa tanang lungsod ug dapit, nga iyang pagaadtoon” (Lucas 10:1). Wala madugay kining Kapitoan malipayong misulti ni Jesus, “Bisan pa gani ang mga yawa nagapailalum nga masinugtanon kanamo tungod sa imong ngalan” (Lucas 10:17). Usa ko ka saksi nianang gahum sa priesthood.

Giya pinaagi sa Espiritu Santo

Sa hapit na matapos ang Iyang yutan-ong pangalagad, si Jesus nagtudlo sa Iyang mga Apostoles, “Ang

Manlalaban, ang Espiritu Santo, nga sa akong ngalan igapadala sa Amahan, siya mao ang magatudlo kaninyo sa tanang butang, ug magapahinumdom kaninyo sa tanan nga akong gikasulti kaninyo” (Juan 14:26), ug “siya ang magatultol kaninyo ngadto sa tibuok nga kamatuoran” (Juan 16:13).

Giya pinaagi sa Iyang mga Sugo

Siya usab naggiya kanato pinaagi sa Iyang mga sugo. Sa ingon Siya mimando sa mga Nephite nga sila kinahanglang dili maglalis mahitungod sa mga punto sa doktrina, kay, Siya miingon:

“Siya nga may espiritu sa panagbingkil dili gikan kanako, apan gikan sa yawa, kinsa mao ang amahan sa panagbingkil, ug siya nagkutaw sa mga kasingkasing sa mga tawo sa panagbangi uban ang kasuko, sa usag usa.

“Tan-awa, kini dili mao ang akong doktrina, ang pagkutaw sa mga kasingkasing sa mga tawo sa kasuko, usa batok sa usa; apan mao kini ang akong doktrina, nga ang ingon niini nga mga butang pagahunungon” (3 Nephi 11:29–30).

Pag-focus sa Kinabuhing Dayon

Siya mihagit usab kanato sa pag-focus diha Kaniya, dili sa mga butang sa kalibutan. Sa Iyang bantugang wali kalabut sa tinapay sa kinabuhi,

si Jesus mipasabut sa kalainan tali sa mortal ug mahangturong pagkaon. “Ayaw ninyo pagahagoi ang kalan-on nga mawagtang ra,” Siya miingon, “kondili mao hinooy hagoi ninyo kanang kalan-on nga molungtad ngadto sa kinabuhing dayon, nga igahatag kaninyo sa Anak sa tawo” (Juan 6:27). Ang Manluluwas nagtudlo nga Siya mao ang Tinapay sa Kinabuhi, ang tinubdan sa kabaskog. Naghisgut kabahin sa mortal nga pagkaon nga gitanyag sa kalibutan, lakip ang mana nga gipadala ni Jehova aron sa pagpakaon sa mga anak sa Israel didto sa kamingawan, si Jesus nagtudlo nga kadtong nagsalig niini nga tinapay nangamatay na karon (tan-awa sa Juan 6:49). Sa laing bahin, ang pagkaon nga Iyang gitanyag mao “ang buhing tinapay nga nanaug gikan sa langit,” ug, si Jesus nagtudlo, “bisan kinsa nga mokaon niining maong tinapay, siya mabuhi sa dayon” (Juan 6:51).

Pipila sa Iyang mga disipulo miingon nga “lisud kining sultiha,” ug sukad niadtong higayuna daghan sa Iyang mga sumusunod “mitalikod, ug wala na managpanglakaw uban kaniya” (Juan 6:60, 66). Tataw gayud nga sila wala modawat sa Iyang unang gitudlo nga kinahanglang nilang “unahon . . . pagpangita ang gingharian sa Dios” (Mateo 6:33). Bisan karon ang uban nga nangangkon nga Kristiyano mas daling madani sa mga butang sa kalibutan—mga butang



nga mopatunhay sa kinabuhi dinhi sa yuta apan dili makapalambo paingon sa kinabuhing dayon. Alang sa uban, ang Iyang “lisud kining sultiha” rason gihapon nga dili mosunod ni Kristo.

Ang Pag-ula

Ang labing mahinungdanon sa mortal nga pangalagad sa atong Manluluwas mao ang Iyang Pagkabanhaw ug ang Iyang Pag-ula alang sa mga sala sa kalibutan. Si Juan Bautista nanagna niini sa dihang siya miingon, “Tan-awa mao kana ang Kordero sa Dios, nga magakuha sa sala sa kalibutan” (Juan 1:29). Sa wala madugay, si Jesus nagtudlo nga “ang Anak sa tawo mianhi . . . sa pag-alagad, ug sa paghalad sa iyang kinabuhi sa pagpakamatay ingon nga lukat alang sa daghan” (Mateo 20:28). Sa Katapusang Panihapon, si Jesus mipasabut, sumala sa asoy diha sa Mateo, nga ang bino nga Iyang gipanalanginan mao “ang akong dugo sa pakigsaad, nga igaula alang sa daghan sa kapasayloan sa mga sala” (Mateo 26:28).

Sa pagpakita ngadto sa mga Nephite, ang nabanhaw nga Ginoo midapit kanila sa pagduol aron paghikap sa samad sa Iyang kilid ug sa agi sa lansang diha sa Iyang mga kamot ug tiil. Sa iyang paghimo niini, Siya mipasabut, “nga kamo masayud nga Ako mao ang Dios sa Israel, ug ang Dios sa tibuok yuta, nga gipatay tungod sa mga sala sa kalibutan” (3 Nephi 11:14). Ug, ang asoy nagpadayon, ang pundok sa mga katawhan “nangluhod sa tiilan ni Jesus, ug nagsimba kaniya” (bersikulo 17). Tungod niini, sa katapusan ang tibuok kalibutan mosimba Kaniya.

Si Jesus dugang nga nagtudlo og bililhong mga kamatuoran mahitungod sa Iyang Pag-ula. Ang Basahon ni Mormon, nga naghatag og dugang nga mga detalye sa mga pagtulun-an ug naghatag og labing nindot nga pagpasabut kabahin sa Iyang misyon, nagsaysay niini nga pagtulun-an:

“Ang akong Amahan mipadala kanako nga Ako unta ituboy nganha sa krus . . . , nga Ako unta makadala sa tanan nga mga tawo ngari kanako, . . .

“ . . . nga sila mahukman sumala sa ilang mga buhat.



“Ug . . . bisan kinsa ang maghinulsol ug magpabunyag pinaagi sa akong ngalan siya mapuno; ug kon siya molahutay hangtud sa katapusan, tan-awa, Ako mohukom kaniya nga walay sala sa atubangan sa akong Amahan niana nga adlaw sa diha nga Ako mobarug aron paghukom sa kalibutan. . . .

“Ug walay mahugaw nga butang nga makasulod didto sa gingharian [sa Amahan]; busa walay makasulod sa iyang kapahulayan gawas niadto kinsa nakahugas sa ilang mga saput sa akong dugo, tungod sa ilang hugot nga pagtuo, ug paghinulsol sa tanan nila nga mga sala, ug sa ilang pagkamatitud-anon hangtud sa katapusan” (3 Nephi 27:14–16, 19).

Ug mao nga atong nasabtan nga ang Pag-ula ni Jesukristo naghatag kanato og oportunidad sa pagbuntog sa espirituhanong kamatayon nga maoy resulta sa sala ug, pinaagi sa paghimo ug pagtuman sa sagrado nga mga pakigsaad, maangkon ang mga panalangin sa kinabuhing dayon.

Hagit ug Pagpamatuod

Si Jesus mihatag sa hagit “Unsa may inyong paghunahuna mahitungod kang Kristo?” (Mateo 22:42). Si Apostol Pablo mihagit sa mga taga-Corinto nga “susiha ang inyong kaugalingon sa pagsuta, kon kamo nagapadayon ba sa inyong pagtuo” (2 Mga Taga-Corinto 13:5). Kitang tanan kinahanglang motubag niini nga mga hagit sa atong kaugalingon. Asa man ang atong

hingpit nga pagkamaunungon? Sama ba kita sa mga Kristiyano nga halandumong gihulagway ni Elder Neal A. Maxwell nga mibalhin sa ilang pinuy-anan ngadto sa Zion apan sa gihapon may laing pinuy-anan sa Babelonia?¹

Walay tunga-tunga nga baruganan. Kita mga sumusunod ni Jesukristo. Kita mga miyembro sa Iyang Simbahan ug sumusunod sa Iyang ebanghelyo, ug kinahanglang dili mogamit og visa sa pagbisita sa Babelonia o mobuhat sama nga usa sa lumulupyo niini. Kita kinahanglang motahud sa Iyang ngalan, mosunod sa Iyang mga sugo, ug “ayaw pangita sa mga butang niini nga kalibutan apan paninguha . . . sa pagtukod og una sa gingharian sa Dios, ug sa pagpatunhay sa iyang pagkamatarung” (Mateo 6:33, footnote a; gikan sa Hubad ni Joseph Smith, Mateo 6:38).

Si Jesukristo *mao* ang Bugtong ug Pinalangga nga Anak sa Dios. Siya *mao* ang atong Tiglalang. Siya *mao* ang Kahayag sa Kalibutan. Siya *mao* ang atong Manluluwas gikan sa sala ug kamatayon. Kini ang labing importante nga kahibalo dinhi sa yuta, ug kamo mahimong masayud niini sa inyong kaugalingon, ingon nga ako nasayud niini sa akong kaugalingon. Ang Espiritu Santo, nga nagpamatuod sa Amahan ug sa Anak ug naggiya kanato ngadto sa kamatuoran, mipadayag niini nga mga kamatuoran ngari kanako, ug Siya mopadayag niini nganha kaninyo. Ang paagi mao ang tinguha ug pagkamasulundon. Si Jesus nagtudlo, “Pangayo, ug kamo pagahatagan; pangita, ug kamo makakaplag; pagtuktok, ug kamo pagaablihan” (Mateo 7:7). Kalabut sa pagkamasulundon, Siya mitudlo, “Kon tuyoon ni bisan kinsa ang pagbuhat sa kabubut-on sa Dios, nan, iyang mahibaloan kon ang akong gitudlo gikan ba sa Dios, o nagsulti ba lamang ako sa kinaugalingon kong pagbulot-an” (Juan 7:17). Ako mopamatuod sa kamatuoran niini nga mga butang sa pangalan ni Jesukristo, amen. ■

MUBO NGA SULAT

1. Tan-awa sa Neal A. Maxwell, *A Wonderful Flood of Light* (1990), 47.



Ni Matthew O. Richardson

Ikaduhang Magtatambag sa Kinatibuk-ang
Kapangulohan sa Sunday School

Pagtudlo subay sa Paagi sa Espiritu

Bisan og kitang tanan mga magtutudlo, kinahanglan hingpit natong masabtan nga ang Espiritu Santo mao ang tinuod nga magtutudlo ug saksi sa tanang kamatuoran.

Daghang tuig na ang milabay kuyog ko sa akong kompanyon sa missionary training center dihang akong nadungog ang tingog sa usa ka bata nga nag-ingon, “Lola, kana sila *tinuod* ba nga mga misyonaryo?” Milingi ko ug nakita ang batang babaye nga naggunit sa kamot sa iyang lola ug nagtudlo nako ug sa akong kompanyon. Mipahiyom ko, milamano, mitan-aw og direktso sa iyang mata, ug miingon, “Hello, ako si Elder Richardson, ug kami *tinuod* nga mga misyonaryo.” Mipahiyom siya samtang nagtan-aw nako, nalipay nga siya naa uban sa tinuod nga mga misyonaryo.

Milakaw ko gikan nianang kasinatian uban sa nabag-o nga dedikasyon. Gusto nako nga mahimong matang sa misyonaryo nga gilauman sa Manlu-luwas, sa akong pamilya, ug niining batang babaye. Sulod sa duha ka tuig, naningkamot ko og maayo nga mahimong sama tan-awon, sama og hunahuna, sama og lihok, ug labaw sa tanan sama motudlo sa usa ka *tinuod* nga misyonaryo.

Sa dihang nauli na ko, makita gayud kini nga bisan kon nahuman

na ko sa misyon, ang impluwensya sa akong misyon wala mobiya nako. Gani, bisan hangtud niining mga tuiga, gibati pa gihapon nako nga ang akong misyon mao ang labing nindot nga duha ka tuig *alang* sa akong kinabuhi. Usa sa wala damha nga leksyon gikan sa akong misyon mao kadtong tingog sa batang babaye. Karon lang madungog pa nako sa akong hunahuna “Lola, kana ba siya *tinuod* nga naghupot sa priesthood?” “Lola, kana ba siya *tinuod* nga bana o *tinuod* nga amahan?” o “Lola, kana ba siya *tinuod* nga miyembro sa Simbahan?”

Akong nakat-unan nga ang yawe aron mahimong *tinuod* sa matag aspeto sa atong kinabuhi mao ang atong abilidad sa pagtudlo sa paagi nga dili mopugong sa pagkat-on. Makita ninyo, ang *tinuod nga kinabuhi* nagkinahanglan og *tinuod nga pagkat-on*, nga magdepende sa *tinuod nga pagtudlo*. “Ang responsibilidad sa [pektibong] pagtudlo dili lang alang niadtong dunay pormal nga tawag isip mga magtutudlo.”¹ Gani, matag sakop sa pamilya, lider sa Simbahan, ug miyembro sa Simbahan (lakip ang

mga kabatan-onan ug mga kabataan) adunay responsibilidad sa pagtudlo.

Bisan og kitang tanan mga magtutudlo, kinahanglan hingpit natong masabtan nga ang Espiritu Santo mao ang *tinuod* nga magtutudlo ug saksi sa tanang kamatuoran. Kadtong wala pa gayud makasabut niini mahimong mosulay sa pagpuli sa Espiritu Santo ug mobuhat sa tanan nga sila ra, modapit sa Espiritu sa pag-uban nila aron tigsuporta lang, o nagtuo nga gitugyan na nila ang ilang pagtudlo sa Espiritu, apan, ang tinuod, nagtudlo sila nga walay “pagpangandam.” Tanang mga ginikanan, mga lider, ug mga magtutudlo adunay responsibilidad sa pagtudlo “pinaagi sa Espiritu.”² Kinahanglang di sila motudlo “kon wala pa ang Espiritu” o “wala na ang Espiritu” apan “pinaagi sa Espiritu” aron ang Espiritu makatudlo sa kamatuoran nga di malimitahan.

Si Moroni mitabang nato nga masabtan kon unsaon nato “pagtudlo pinaagi sa Espiritu” nga dili pulihan, dili sagulan, o dili papahawaon ang Espiritu Santo isip ang *tinuod* nga magtutudlo. Si Moroni nag-ingon nga ang mga Santos nagdumala sa ilang mga kasinatian “subay sa paagi sa kalihokan sa Espiritu.”³ Nagkinahanglan kini og labaw pa kay sa pagbaton sa Espiritu uban kanato. Ang pagdumala sa atong kaugalingon “subay sa paagi” sa Espiritu Santo nagpasabut nga kinahanglan tingali natong usbon ang atong paagi sa pagtudlo aron sundon ang paagi sa pagtudlo sa Espiritu Santo. Sa atong pagpahiangay sa atong paagi diha sa paagi sa Espiritu Santo, niana ang Espiritu Santo makatudlo ug makapamatuod nga dili malimitahan. Kining importante nga pagpahiangay mahimong makita sa mosunod nga ehemplo.

Daghang katuigan na ang milabay ang akong mga anak ug ako naglakaw sa tumoy sa South Sister, ang 10,358 ka pye (3,157 m) nga bukid sa Oregon. Human sa pila ka oras miabut kami sa taas nga 45 degrees nga bakilid nga may gagmayng mga bato sa bulkan. Makita na ang kinatumyan, mipadayon kami nga namatngonan na lang namo nga kada lakang, ang among tiil

malubong sa gagmayng mga bato, nga maoy hinungdan sa among pagsibog og pila ka sentimetro. Ang akong 12 anyos nga anak nga lalaki mipadayon samtang ako nagpabilin uban sa akong 8 anyos nga anak nga babaye. Ang kakapoy ug kasagmuyo wala madugay mao na ang gibati, ug naguol siya, naghunahuna nga dili na niya maka-uban ang iyang igsoong lalaki sa kinatumyan. Ang akong unang gustong buhaton mao ang pagkugos kaniya. Ang akong espiritu matinguhaon, apan ang nakasubo lang kay luya na ang akong lawas. Nanglingkod kami sa mga bato, gitan-aw ang among sitwasyon, ug naghimo og bag-ong plano. Giingnan nako siya nga mogunit sa luyo nga bulsa sa akong karsones, mogunit og maayo, ug—labaw sa tanan—inglakang gayud nako, kinahanglang molakang dayon siya puli sa akong agi. Iyang gisunod ang matag lihok nako ug nagsalig sa pag-alsa tungod sa paggunit sa akong mga bulsa. Human sa unsay daw walay katapusan, miabut gayud kami sa kinatumyan sa bukid. Ang iyang kalipay sa kadaugan ug katagbawan dili gayud kabayran. Ug oo, siya ug ang iyang igsoong lalaki, sa akong opinyon, *tinuod* nga mga hiker.

Ang kalampusan sa akong anak nga babaye mao ang resulta sa iyang makugihong paningkamot ug unsa siya ka maayo mo-hike *subay sa paagi* sa akong pag-hike. Samtang iyang gipahiangay ang iyang lihok sa akong lihok, nakaangkon kami og panaguyon, nagtugot kanako sa paggamit sa akong tanang kusog. Ingon niana usab kon kita magtudlo “subay sa paagi sa mga kalihokan sa Espiritu.” Samtang atong ipahiangay ang paagi sa atong pagtudlo aron motukma nianang sa Espiritu Santo, ang Espiritu molig-on kanato ug, sa samang higayon, dili malimitahan. Sa paghunahuna niini, palihug ikonsiderar usab ang duha ka mahinungdanong “mga kalihokan sa Espiritu” nga angay natong sundon.

Una, ang Espiritu Santo nagtudlo sa mga indibidwal sa personal gayud nga paagi. Kini ang nakapahimong posible nga kita masayud mismo sa kamatuoran. Tungod sa atong lainlaing mga panginahanglan, mga



kahimtang, ug pag-uswag, ang Espiritu Santo nagtudlo kanato unsay angay natong masayran ug buhaton aron kita mahimong unsay angayan nga kita mahimo. Palihug hinumdumi nga bisan kon ang Espiritu Santo nagtudlo “sa kamatuoran sa tanan nga mga butang,”⁴ dili Siya motudlo sa tanang kamatuoran sa usa lang ka higayon. Ang Espiritu nagtudlo sa kamatuoran “pagtulun-an human sa usa ka pagtulun-an, lagda human sa usa ka lagda, diyutay dinhi ug diyutay didto.”⁵

Kadtong nagtudlo subay sa paagi sa Espiritu nakasabut nga sila nagtudlo og mga tawo, dili mga leksyon. Sa ingon, ilang mabuntog ang tinguha sa paghurot sa tanang anaa sa manwal o pagtudlo sa tanan nilang nakat-unan bahin sa hilisgutan ug mo-focus hinoon niadtong mga butang nga kinahanglang masayran ug buhaton sa ilang pamilya o mga sakop sa klase. Ang mga ginikanan, mga lider, ug mga magtutudlo nga nagsunod sa paagi sa pagtudlo sa Espiritu, daling makakat-on nga ang *tinuod* nga pagtudlo naglakip labaw pa kay sa pag-istorya ug pagsulti lang. Isip resulta, motuyo sila og hunong aron maminaw, mag-oberbar og maayo, ug dayon mahibalo unsay sunod nga buhaton.⁶ Kon buhaton nila kini, ang Espiritu Santo anaa sa posisyon sa pagtudlo sa mga nagkat-on ug sa mga magtutudlo kon unsay kinahanglan nilang buhaton ug isulti.⁷

Ikaduha, ang Espiritu Santo nagtudlo pinaagi sa pagdapit, pag-aghat, pag-awhag, ug pagdasig kanato sa pagbuhat. Si Kristo mipaniguro kanato nga atong masayran ang kamatuoran kon kita mosunod sa doktrina ug mobuhat sa ingon.⁸ Ang Espiritu mogiya, ug mopakita kanato sa unsay kinahanglang buhaton.⁹ Hinoon, dili Siya mobuhat alang kanato sa unsay mahimo nato sa atong kaugalingon. Makita ninyo, ang Espiritu Santo dili mahimo nga magkat-on *alang* kanato, mobati *alang* kanato, o mobuhat *alang* kanato tungod kay sukwahi kini sa doktrina sa kabubut-on. Siya mopahimutang sa mga oportunidad ug modapit kanato nga magkat-on, mobati, ug mobuhat.

Kadtong nagtudlo subay niini nga paagi sa Espiritu nagtabang sa uban pinaagi sa pagdapit, pag-awhag, ug paghatag kanila og mga oportunidad sa paggamit sa ilang kabubut-on. Ang mga ginikanan, lider, ug magtutudlo mahibalo nga sila dili mobati, magkat-on, o gani maghinulsol *alang* sa ilang pamilya, kongregasyon, o mga sakop sa klase. Imbis mangutana, “Unsay akong mabuhat alang sa akong mga anak, mga sakop sa klase, o sa uban?” sila mangutana, “Unsaon nako pagdapit ug pagtabang niadtong naglibut kanako aron makat-on sa ilang kaugalingon?” Ang mga ginikanan nga nagsunod sa mga kalihokan sa Espiritu Santo nagmugna og panimalay diin ang pamilya makat-on sa paghatag og bili kay sa makat-on lang mahitungod sa bili. Sa samang paagi, imbis nga maghisgut lang bahin sa mga doktrina, ang mga magtutudlo nagtabang sa mga nagkat-on nga makasabut ug mosunod sa mga doktrina sa ebanghelyo. Ang Espiritu Santo dili malimitahan kon ang mga indibidwal mogamit sa *ilang* kabubut-on sa saktong paagi.

Sa mga kahimtang karon sa kalibutan, nagkinahanglan gayud kita sa *tinuod* nga pagkat-on ug pagtudlo diha sa atong mga panimalay, mga miting, ug sa mga klase sa ebanghelyo. Nasayud ko nga ang inyong paningkamot aron molambo mahimong daw sobra ra kaayo usahay.

Palihug ayaw pagpakawala sa pag-laum sa inyong pag-uswag. Naghuna-huna ko og balik sa akong kasinatian nga nag-hike uban sa akong mga anak. Nagkauyon kami nga matag hunong namo aron mopahulay, imbis mo-focus lang kon unsa pa ka layo ang among adtoon, molingi dayon kami ug motan-aw sa ubos sa bukid. Motan-aw kami sa talan-awon ug mosulti sa usag usa, “Tan-awa unsa na ka layo ang atong naabtan.” Dayon moginhawa kami og lawom, motalikod dayon, moatubang sa bungtod, ug mosugod na usab sa pagkatkat usa ka lakang sa matag higayon. Mga kaisoonan, kamo *makahimo* sa pagmatuto, paggiya, ug pagtudlo subay sa paagi sa mga kalihokan sa Espiritu. Nasayud ako nga kamo makahimo niini. Nasayud ako nga makahimo kamo niini, ug ang mga kinabuhi mausab.

Ang akong kinabuhi napanalanginan og *tinuod nga mga magtutudlo*, kinsa nagtudlo uban sa Espiritu ug labaw sa tanan pinaagi sa Espiritu. Ako modapit kaninyo sa pagpahiangay sa paagi sa inyong pagtudlo subay sa paagi sa Espiritu Santo sa tanan ninyong buhaton. Ako mopamatuod nga si Jesukristo mao ang atong Manluluwas ug ang Iyang ebanghelyo gipahiuli. Tungod niini kita kinahanglan nga mahimong *tinuod* nga mga ginikanaan, *tinuod* nga mga lider, *tinuod* nga mga magtutudlo, ug *tinuod* nga mga nagkat-on. Ako mopamatuod nga ang Dios motabang kaninyo sa inyong mga paningkamot, sa sagradong pangalan sa atong Manluluwas, nga si Jesukristo, amen. ■

MUBO NGA MGA SULAT

1. *Pagtudlo, Walay Labaw ka Mahinungdanon nga Tawag: Usa ka Giya nga Kapanguhaan alang sa Pagtudlo sa Ebanghelyo* (1999), 61.
2. Doktrina ug mga Pakigsaad 50:14.
3. Moroni 6:9.
4. Moroni 10:5; tan-awa usab sa Doktrina ug mga Pakigsaad 50:14; *Matinud-anon sa Timuhoan: Usa ka Pakisayran sa Ebanghelyo* (2004), 31–32.
5. 2 Nephi 28:30.
6. Tan-awa sa David A. Bednar, “Paningkamot sa Pagkat-on pinaagi sa Hugot nga Pagtuo,” *Liahona*, Sept. 2007, 16–24.
7. Tan-awa sa Lucas 12:12.
8. Tan-awa sa Juan 7:17.
9. Tan-awa sa 2 Nephi 32:1–5.



Ni Elder Kazuhiko Yamashita
Sa Seventy

Bahandi sa Simbahan ang mga Misyonaryo

Mapasalamaton ko nga ang mga misyonaryo gitawag sa Ginoo, nga sila mitubag nianang tawag, ug nga sila nagserbisyo sa tibuok kalibutan.

Daghang tuig na ang milabay usaniana ka gabii, ang bag-ong gitawag nga misyonaryo nga ginganlan og Elder Swan ug ang iyang senior nga kompanyon nga Japanese mibisita sa among balay. Maayo gani diha ko sa balay niadtong higayuna, mao nga ako silang gipasulod. Sa dihang giabi-abi nako sila sa may pultahan, nakamatikod ko dayon sa coat nga gisul-ob ni Elder Swan. Sa walay paghuna-huna, miingon ko kaniya, “Kanindot sa imong gisul-ob nga coat!” Hinoon, kadto dili bag-ong coat, ug lubad na gani. Naghunahuna ko nga ang coat nga gisul-ob gibilin diha sa apartment sa miuli na nga misyonaryo.

Si Elder Swan diha-diha dayon mitubag sa akong gisulti, ug kini sukwahi gayud sa unsay akong gihunahuna. Naglisud sa pagsulti og Hinapon siya mitubag: “Oo, nindot gayud kini nga coat. Gisul-ob ni nga coat sa akong papa niadtong nagserbisyo siya isip usa ka misyonaryo sa Japan sobra na sa 20 ka tuig ang milabay.”

Ang iyang papa nagserbisyo sa Japan Okayama Mission. Ug sa diha nga ang iyang anak nga lalaki mobiya na aron moserbisyo og misyon sa Japan,

gihatag niya ang iyang coat ngadto sa iyang anak. Kini nga litrato nagpakita sa coat sa duha ka henerasyon nga gisul-ob sa mga Elder Swan sa Japan.

Natandog ko sa dihang nakadungog ko sa mga pulong ni Elder Swan. Ug akong nasabtan karon nganong gisul-ob ni Elder Swan ang coat sa iyang papa samtang nag-proselyte siya. Si Elder Swan mialagad sa iyang misyon nga nakapanunod sa gugma sa iyang amahan alang sa Japan ug sa mga tawo niini.

Sigurado ko nga pipila kaninyo nakasinati og susama niini. Daghang mga misyonaryo nga nagserbisyo sa Japan misulti nako nga ang ilang mga amahan, ilang mga inahan, ilang mga lolo, o ilang mga tiyo nakaserbisyo usab og misyon sa Japan.

Ganahan ko nga mopadayag sa akong sinserong gugma, pagtahud, ug pagbati sa pasalamat sa tanang returned missionary nga nagserbisyo sa tibuok kalibutan. Sigurado ko nga kadtong inyong natabangan nga makabig wala makalimot ninyo. “Pagkatum ibabaw sa kabukiran sa mga tiil niadtong nanagdala sa mga maayong balita . . . !”¹

Usa ako niadtong mga kinabig. Nakabig ko sa edad nga 17, sa dihang estudyante pa ko sa high school. Ang misyonaryo nga mibunyang nako mao si Elder Rupp nga taga-Idaho. Bag-o lang siyang na-release isip presidente sa stake sa Idaho. Wala na ko makakita kaniya sukad nga bag-o kong nabunyagan, apan nag-e-mail ko niya ug nakig-istorya niya sa telepono. Wala gayud ako makalimot kaniya. Ang iyang mabination, mapahiyumon nga nawong nakulit sa akong panumduman. Nalipay kaayo siya sa dihang nahibalo siya nga maayo ra ko.

Sa dihang 17 anyos pa ko, wala pa ko kaayo makasabut sa mga mensahe nga gipangtudlo sa mga misyonaryo ngari nako. Apan, ako adunay espesyal nga pagbati kalabut sa mga misyonaryo, ug ganahan kong mahisama nila. Ug akong gibati ang ilang tinud-anay ug malungtaron nga gugma.

Istoryahan ko kamo sa adlaw nga gibunyagan ko. Hulyo 15 kadto, ug init kaayo kadto nga adlaw. Usa ka babaye ang gibunyagan usab nianang adlaw. Ang bunyaganan hinimo mismo sa mga misyonaryo, ug dili kaayo kini nindot tan-awon.

Gikumpirmahan kami human sa among bunyag. Una, ang sister gikumpirmahan ni Elder Lloyd. Milingkod ko tapad sa ubang mga miyembro, mipiyong sa akong mga mata, ug hilum nga naminaw. Si Elder Lloyd mikumpirma kaniya ug dayon misugod sa pagpanalangin kaniya. Apan, si Elder Lloyd mihunong sa pagsulti, busa gibuka nako ang akong mga mata ug mitutok gayud kaniya.

Bisan karon klaro nakong mahinumduman kadto nga panghitabo. Ang mga mata ni Elder Lloyd napuno sa mga luha. Ug sa unang higayon sa akong kinabuhi, nakasinati ko nga nasanapan sa Espiritu Santo. Ug pinaagi sa Balaang Espiritu nakaangkon ko og sigurado nga kahibalo nga si Elder Lloyd nahigugma kanamo ug ang Dios nahigugma kanamo.

Dayon turno na nako nga kumpirmahan. Si Elder Lloyd ra gihapon. Iyang gipandong ang iyang mga kamot sa akong ulo ug mikumpirma kanako



isip miyembro sa Simbahan, mitugyan sa gasa sa Espiritu Santo, ug dayon misugod sa paghatag og panalangin. Ug usab mihunong siya sa pagsulti. Apan, nasabtan na nako karon kon unsa ang nahitabo. Nasayud gayud ako pinaagi sa Espiritu Santo nga ang mga misyonaryo nahigugma kanako ug ang Dios nahigugma kanako.

Karon ganahan kong mosulti og pipila ka mga pulong ngadto sa mga misyonaryo nga kasamtangang nagmision sa tibuok kalibutan. Ang inyong mga kinaiya ug ang gugma nga inyong gipakita ngadto sa uban mahinungdanon kaayo nga mga mensahe. Bisan og wala dayon nako masabti ang mga doktrina nga gitudlo sa mga misyonaryo kanako, akong gibati ang ilang dakong gugma, ug ang ilang daghang mga buhat sa pagkamabination nagtudlo kanako og importante nga mga leksyon. Ang inyong mensahe usa ka mensahe

sa gugma, mensahe sa paglaum, ug mensahe sa hugot nga pagtuo. Ang inyong kinaiya ug ang inyong mga lihok nagdapit sa Espiritu, ug ang Espiritu makapasabut kanato sa mga butang nga mahinungdanon. Ang gusto nakong ipaabut ninyo mao nga pinaagi sa inyong gugma, kamo sa tinuoray nagpakigbahin sa gugma sa Dios. Bahandi kamo niini nga Simbahan. Mapasalamaton kaayo ako ninyong tanan sa inyong sakripisyo ug sa inyong dedikasyon.

Ganahan usab akong mamulong kaninyong umaabut nga mga misyonaryo. Sa akong kaugalingong pamilya, upat sa among mga anak ang nagserbisyo og mision, ug ang ikalima namo nga misyonaryo mosulod sa Provo Missionary Training Center sa katapusan niining bulana. Sunod tuig ang among kinamanghuran nagplano nga magmision human sa paggradwar sa high school.

Mao nga ako mosulti sa akong anak nga mga lalaki ug kaninyong tanan sa pagpangandam sa pagserbisyo og misyon. Importante ang pagdala og tulo ka mga butang sa inyong misyon:

1. Usa ka tinguha nga mosangyaw sa ebanghelyo. Ang Ginoo gusto nga inyong pangitaon ang Iyang karnero ug magasusi kanila.² Ang mga tawo sa tibuok kalibutan naghulat kaninyo. Palihug adtoa dayon kon asa sila. Walay laing naningkamot og maayo kay sa mga misyonaryo nga moadto aron pagluwas sa uban. Usa ako niadtong naluwas.
2. Palambo ang inyong pagpamatuod. Ang Ginoo nagkinahanglan sa inyong “kasingkasing ug andam nga hunahuna.”³
3. Higugmaa ang uban, sama ni Elder Swan, kinsa midala sa coat ug gugma sa iyang amahan ngadto sa misyon alang sa Japan ug sa katawhan niini.

Ug kaninyo nga wala makahibalo kon unsaon pagpangandam sa pagserbisyo og misyon, palihug adtoa ug pakigkita sa inyong bishop. Nasayud ko nga motabang siya kaninyo.

Mapasalamaton ko nga ang mga misyonaryo gitawag sa Ginoo, nga sila mitubag nianang tawag, ug nga sila nagserbisyo sa tibuok kalibutan. Mosulti ko kaninyong tanan nga mga returned missionary: Mapasalamaton kaayo ko sa tanan ninyong mga paningkamot. Bahandi kamo niini nga Simbahan. Ug hinaut nga magpadayon kamo kanunay nga mahimong mga misyonaryo ug molihok sama sa mga disipulo ni Kristo.

Mopamatuod ko nga kita mga anak sa atong Amahan sa Langit, nga Siya nahigugma kanato, ug Iyang gipadala ang Iyang Hinigugmang Anak, nga si Jesukristo, aron kita makabalik pag-usab sa Iyang presensya. Gisulti ko kining tanan sa sagrado nga pangalan ni Jesukristo, amen. ■

MUBO NGA MGA SULAT

1. Isaias 52:7.
2. Ezequiel 34:11.
3. Doktrina ug mga Pakigsaad 64:34.



Ni Elder Randall K. Bennett
Sa Seventy

Pilia ang Kinabuhing Dayon

Ang mahangturon ninyong padulngan dili resulta sa sulagma lamang apan tungod sa pagpili. Dili pa gayud ulahi ang pagsugod sa pagpili sa kinabuhing dayon!

Mga tuig nang milabay, samtang didto sa dagat uban sa akong pamilya, nakabantay ko og mga timailhan ug bandila nga nagpasidaan kanamo sa usa ka kusog nga sulog, baluron nga dagat. Dili makita sa wala mabansay nakong mga mata apan daling mamatngunan sa mga tigbantay nga naa sa duol nga tore, ang kusog nga sulog peligro sa tanan nga mobiya sa baybayon ug moadto sa tubig. Nakahinumdom kong nangatarungan, “Maayo kong molangoy. Ang paglangoy usa ka maayo nga ehersisyo. Luwas ra ko sa mabaw nga tubig.”

Sa pagbaliwala sa mga pasidaan ug sa masaligon nga pagbati sa kaugalingon nakong paghukom, miadto ko sa tubig aron motagamtam sa “pangpabugnaw” nga paglangoy. Human sa pila ka minutos mihangad ko sa pagpangita sa akong pamilya sa duol nga beach, apan ang beach wala na sa duol! Ang makalingla nga sulog diin ako gipasidan-an midakop kanako ug daling mianod kanako palayo sa akong pamilya.

Masaligon sa sinugdanan ug dayon nawad-an sa paglaum, misulay ko og langoy padulong sa baybayon, apan

ang sulog mianod kanako sa lawom, mas baluron nga tubig. Naluya ko ug natuk-an og sugod sa nahingos nga tubig. Ang pagkalumos posibling nang mahitabo. Sa katapusan dihang nahutdan ko og kusog, misinggit gyud ko og tabang.

Milagro, ang tigbantay diha dayon sa akong kilid. Wala ko kabantay nga nagbantay na diay siya sa pag-ubog nako sa tubig. Nahibalo siya nga ang sulog moanod nako, ug nahibalo siya kon asa ako dad-a niini. Paglikay sa sulog, milibut siya sa paglangoy ug sa dapit gayud diin ako naglisud, dayon mapailubon nga naghulat sa akong pagsinggit og tabang. Luya na nga molangoy nga ako ra padulong sa baybayon, nagpasalamat ko sa iyang pagluwas. Kon wala ang iyang tabang dili na gyud ko makabalik sa akong pamilya.

Nianang adlawo nakapili ko og dili maayo nga nakahatag og grabeng sangputanan kanako ug sa akong pamilya. Sa atong pagkonsiderar karon sa gasa sa pagpili, manghinaut ko nga ang Espiritu Santo motabang sa matag usa nato nga matimbang-timbang ang mga pagpili nga atong himoon.

Ang atong pinalanggang propeta, si Presidente Thomas S. Monson, mitudlo: “Dili gyud ko makaingon nga ang mga pagdesisyon modeterminar sa padulngan. Dili kamo makahimo og mahangturong mga desisyon nga wala mahangturong mga sangputanan.”¹

Matag usa kaninyo; sama sa gitudlo na kanato niini nga komperensya; usa ka pinalanggang espiritu nga anak nga lalaki o babaye sa langitnong mga ginikanan. Kamo may diosnong kinaiyahan ug padulngan.² Sa kinabuhi sa wala pa dinhi sa yuta nakakat-on kamo sa paghigugma sa kamatuoran. Mihimo kamo og saktong mahangturong mga pagpili. Nahibalo kamo nga dinhi sa mortalidad, dunay kasakit ug kalisdanan, kasubo ug pag-antus, mga pagsulay nga makatabang ninyo nga motubo ug molambo. Nahibalo sab kamo nga makapadayon kamo sa paghimo og saktong pagpili, maghinulsol sa sayop nga pagpili, ug pinaagi sa Pag-ula ni Jesukristo, makaangkon og kinabuhing dayon.

Unsay gitudlo ni propeta Lehi kabahin sa pagpili? Kay aduna niini kita “gawasnon sa *pagpili* og kalingkawasan ug *kinabuhi nga dayon*, pinaagi sa halangdon nga Tigpataliwala sa tanan nga mga tawo, o sa pagpili sa pagkabihag ug sa kamatayon, sumala sa pagkabihag ug sa gahum sa yawa.” Mimando dayon siya, “Kamo mosalig sa halangdon nga Tigpataliwala, ug mopatalinghug ngadto sa iyang mahinungdanon nga mga sugo; ug magmatinud-anon sa iyang mga pulong, ug *mopili sa kinabuhi nga dayon*.”³

Sa unsay gipili natong hunahunaon, bation, ug buhaton, kamo ba ug ako *nagpili sa kinabuhing dayon?*

Ang among mga apo ngakat-on nga kon sila mopili, gipili usab nila ang mga sangputanan niini. Bag-ohay lang usa sa among tres anyos nga apong babaye midumili sa pagkaon sa iyang panihapon. Ang iyang mama mipasabut, “Hapit na ang tingkatulog. Kon pilion nimo ang pagpanihapon, gipili sab nimo ang ice cream nga pang-desert. Kon pilion nimo nga dili mokaon sa panihapon, imong gipili nga matulog na karon, nga wala ice



Montreal, Quebec, Canada

cream.” Ang among apong babaye mikonsiderar sa iyang duha ka mga kapilian ug dayon mapugsanong namahayag, “Ganahan ko *niini* nga pagpili—magdula ug mokaon lang og ice cream ug dili matulog.”

Nangandoy ba kita nga makadula, mokaon lang og ice cream, dili matulog, ug unya makalikay sa sangputanan sama sa malnutrisyon ug pagkaluya?

Sa pagkatinuod kita dunay duha lamang ka mahangturong kapilian, ang matag usa may mahangturong sangputanan: pagpili sa pagsunod sa Manluluwas sa kalibutan ug sa ingon pagpili sa kinabuhing dayon uban sa Dios o pagpili sa pagsunod sa kalibutan ug sa ingon pagpili sa pagpalayo sa atong kaugalingon gikan sa Dios sa hangtud.

Dili kita magmalampuson nga mopili sa duha sa kasiguroan tungod sa pagkamatarung ug sa peligro sa pagkakalibutanon. Ang pagkakalibutanon ingon og wala dalang problema, apan mao usab sa akong “pangpabugnaw” nga paglangoy!

Sama sa sulog nga unta mousab sa dagan sa kinabuhi sa akong pamilya, ang mga sulog karon sa pagkakalibutanon, ang malinglahon nga mga pilosopiya, sayop nga mga pagtulun-an, ug naghitak nga imoralidad nagtinguha sa pagbira nato palayo ug sa hangtud mobulag nato gikan sa atong

pamilya ug gikan sa atong Langitnong Amahan.

Ang buhi natong mga propeta, manalagna, ug tigpadayag nakakita ug nagtinguha sa pagpasidaan nato sa sagad nga dili kaayo apan peligro nga kalibutanong mga sulog nga naghulga nato. Mahigugmaon silang nagdapit, nag-awhag, nagtudlo, nagpahinumdom, ug nagpasidaan kanato. Nahibalo sila nga ang atong kasiguroan nag-agad sa pagpili nga sundon (1) ang mga pagtulun-an nga atong naangkon sa inadlaw nga pagtuon sa kasulatan ug pag-ampo; (2) ang giya sa Espiritu Santo; ug (3) ang ilang mapanagnaong tambag. Nahibalo sila nga adunay kasiguroan ug sa katapusan kalipay diha lamang ug pinaagi sa atong Manluluwas, si Jesukristo, ug pagpuyo sa Iyang ebanghelyo. Sama sa gitudlo ni Elder Dallin H. Oaks, ang atong Manluluwas namahayag, “Ako mao ang dalan, ang kamatuoran, ug ang kinabuhi: wala bisan kinsa nga makaadto sa Amahan, gawas kon pinaagi kanako.”⁴

Atol sa kalisud ug pag-antus didto sa post-Soviet Russia, si Anatoly ug Svetlana Reshetnikov mipili sa pagkamatarung batok sa pagkakalibutanon. Human magpasakop sa Simbahan, sila gipanglutos. Gipaubsan ang iyang ranggo sa trabaho. Maisugon silang naghunahuna, “Karon may dako na kitang panahon sa pagserbisyo sa Dios!” Kanunay silang nakadawat og

mga hulga, bisan pa niana gipili nilang magpuyo og kinabuhi nga nagsentro sa ebanghelyo. Si Elder Anatoly Reshetnikov gitawag isip unang Area Seventy nga taga-Russia. Pinaagi sa ilang mga pagpili, ang mga Reshetnikovs pada-yon nga *mipili sa kinabuhing dayon*.

Kitang tanan moatubang og mga kalisdanan. Kitang tanan may mga tintasyon. Kitang tanan nakahimo og sayop. Dili gayud lisud o ulahi ang paghimo og saktong mga pagpili. Ang paghinulsol mao ang usa sa sakto nga mga pagpili.

Si Presidente Dieter F. Uchtdorf mitudlo:

“Ang gagmayng mga sayop ug ginagmay pagpalayo sa doktrina sa ebanghelyo ni Jesukristo makahatag og masulub-ong sangputanan sa atong kinabuhi. Busa importante kaayo nga kita magbaton og disiplina nga makahimo og sayo ug mahinungdanon nga kausaban nga mahibalik sa husto nga dalan ug dili maghulat o maglaum nga ang mga sayop sa laing paagi mousab sa iyang kaugalingon.

“Ang dugay natong paglangay-la-ngay sa kausaban sa atong lihok, mas magkadako ang panginahanglan sa paghimo og kausaban ug mas dugay ang pagbalik sa husto nga tumong—gani hangtud moabut sa punto diin ang dautang hitabo mopatim-aw.”⁵

Ang mga bukton sa kalooy sa Manluluwas kanunay nga gitulon ngadto sa matag usa kanato.⁶ Kon kita sinsero ug hingpit nga maghinulsol, mapasaylo kita sa hingpit sa atong mga sayop ug ang Manluluwas dili na mahinumdom niini.⁷

Sa pagtimbang-timbang sa inyong mga pagpili ug mga sangputanan, tingali mangutana mo sa inyong kaugalingon:

- Nagtinguha ba ako sa balaan nga direksyon pinaagi sa inadlaw nga pagtuon sa kasulatan ug pag-ampo, o ako ba mipili nga mahimong busy o walay interes sa paggahin og panahon sa pagtuon sa mga pulong ni Kristo ug pagpakigsulti sa akong Langitnong Amahan?
- Ako ba nagpili nga mosunod sa tambag sa buhing mga propeta sa



Dios, o ako ba nagsunod sa kalibutanong mga paagi ug nagsupak sa mga opinyon sa uban?

- Ako ba nagtinguha sa giya sa Espiritu Santo matag adlaw sa unsay akong gipili nga hunahunaon, bation ug, buhaton?
- Padayon ba ang akong pagtabang, pagserbisyo o pagluwas sa uban?

Minahal kong mga kaigsoonan, ang mahangturon ninyong padulngan dili resulta sa sulagma lang apan sa pagpili. Dili pa gayud ulahi ang pagsugod sa *pagpili sa kinabuhing dayon!*

Mohatag ako sa akong pagsaksi nga tungod sa talagsaong plano sa kalipay sa Langitnong Amahan, ang matag usa kanato mahimong hingpit

pinaagi sa Pag-ula ni Jesukristo. Uban sa atong mga pamilya, makapuyo kita uban sa Langitnong Amahan sa kahangturan ug makadawat og hingpit nga kalipay. Niining mga butanga ako mopamatuod sa sagradong pangalan ni Jesukristo, amen. ■

MUBO NGA MGA SULAT

1. Thomas S. Monson, “Decisions Determine Destiny” (Church Educational System fireside for young adults, Nob. 6, 2005), institute.lds.org.
2. “Ang Pamilya: Usa ka Pamahayag ngadto sa Kalibutan,” *Liahona* Nob. 2010, 129.
3. 2 Nephi 2:27, 28; emphasis gidugang.
4. Juan 14:6.
5. Dieter F. Uchtdorf, “Ang Kalainan sa Gamay nga mga Sayop,” *Liahona* ug *Ensign*, Mayo 2008, 59.
6. Tan-awa sa Alma 5:33.
7. Tan-awa sa Doktrina ug mga Pakigsaad 107:87.



Ni Elder J. Devn Cornish
Sa Seventy

Ang Pribilehiyo sa Pag-ampo

Ang pag-ampo usa sa labing bililhong mga gasa sa Dios sa tawo.

Akong minahal nga mga kaigsonan, ang Dios nga atong Amahan dili usa ka pagbati o ideya o pwera. Usa Siya ka balaan nga tawo kinsa, sama sa gitudlo sa mga kasulatan, adunay nawong ug mga kamot ug usa ka mahimayaon nga imortal nga lawas. Tinuod Siya, nakaila Siya sa matag usa kanato, ug Siya nahigugma sa matag usa kanato. Gusto Siya nga mopanalangin kanato.

Si Jesus miingon:

“Kinsa bang tawhana diha kaninyo, nga kon ang iyang anak mangayog tinapay, hatagan hinoon niyag bato?”

“Ug kon kini mangayog isda, hatagan hinoon niyag bitin?”

“Busa kon kamo, bisan sa inyong pagkadautan, mahibalo man ganing mohatag og mga maayong gasa ngadto sa inyong mga anak, unsa pa gayud ka labaw pa sa inyong Amahan nga anaa sa langit nga mohatag og mga maayong butang ngadto sa mga nagapangayo kaniya?” (Mateo 7:9–11).

Tingali ang usa ka personal nga kasinatian makatabang aron sa pagpakita sa punto. Sa batan-on pa kong residente nga doktor sa Boston Children’s Hospital, nagtrabaho ko og taas nga oras ug kasagaran mobiyahe

gikan sa ospital ug sa among balay sa Watertown, Massachusetts, nga magbisikleta kay ang akong asawa ug bag-o pa nga pamilya nagkinahanglan sa among sakyanan. Usa ka gabii nagsakay ko pauli sa balay human sa taas nga oras sa ospital, mibati og grabe nga kakapoy ug kagutom ug medyo nasagmuyo. Nahibalo ko nga kinahanglan kong mohatag sa akong asawa ug upat ka gagmayng mga anak dili lamang sa akong panahon ug kusog kon moabut ko sa balay apan usa usab ka malipayon nga kinaiya. Sa tinuod lang, naglisud ko sa pagpadayon og sikad.

Maagian sa akong rota ang tindahan sa piniritong manok, ug gibati nako nga dili kaayo ko gutomon ug kapuyon kon mohunong ko og kadali aron mokaon og usa ka hiwa nga manok sa akong pagpauli. Nahibalo ko nga nag-sale sila og paa sa manok sa kantidad nga 29 sentimos matag usa, apan sa pagtan-aw nako sa akong pitaka, singko sentimos na lang gayud ang nahabilin. Samtang nagbiyahe ko, akong giingnan ang Ginoo sa akong sitwasyon ug mihangyo, sa Iyang kalooy, kon tugutan ba ko Niya nga makakita og baynte singko sentimos

sa karsada. Giingnan nako Siya nga wala ko magkinahanglan niini isip timailhan apan magmapasalamaton kaayo ko kon Iyang ihatag nako kining kinalooy nga panalangin.

Misugod ko sa pagtan-aw og maayo sa yuta apan walay nakit-an. Nangingkamot sa pagpabilin sa kinaiya nga puno sa pagtuo apan mapaubsanon samtang nagsakay ko, mipaingon ko sa tindahan. Dayon, diha gayud atbang sa karsada gikan sa dapit nga gitindahan og manok, nakakita ko og baynte singko sentimos diha sa yuta. Uban sa pasalamat ug kahupayan, ako kining gipunit, mipalit og manok, gitagamtam ang matag kaon niini, ug malipayong misakay pauli sa balay.

Sa Iyang kalooy, ang Dios sa langit, ang Tiglalang ug Magmamando sa tanang mga butang bisan asa, mitubag sa pag-ampo kalabut sa gamay ra kaayo nga butang. Ang usa ka tawo tingali mangutana nganong magpakabana pa man Siya sa butang nga gamay ra. Nakatuo ako nga ang atong Langitnong Amahan nahigugma og maayo kanato nga ang butang nga importante ngari kanato nahimong importante ngadto Kaniya, tungod kay Siya nahigugma kanato. Unsa pa kaha nga Siya gustong motabang kanato sa dagkong butang nga atong gipangayo, nga matarung (tan-awa sa 3 Nephi 18:20)?

Mga gagmayng bata, mga batan-on, ug mga hamtong usab, palihug tuhi kon unsa kadako ang kagustuhan sa inyong Langitnong Amahan nga mopanalangin *kaninyo*. Apan tungod kay dili Siya manghilabut sa atong kabubut-on, kinahanglan natong mangayo sa Iyang tabang. Kasagaran mahitabo kini pinaagi sa pag-ampo. Ang pag-ampo usa sa labing bililhong mga gasa sa Dios sa tawo.

Sa usa ka higayon ang mga disipulo ni Jesus nangutana, “Ginoo, tudloi kami sa pag-ampo” (Lucas 11:1). Agig tubag, si Jesus mihatag kanato og ehemplo nga unta mahimong usa ka giya sa mahinungdanong mga baruganan sa pag-ampo (tan-awa sa Russell M. Nelson, “Mga Leksyon gikan sa mga Pag-ampo sa Ginoo,” *Liahona*, Mayo 2009, 46–49; tan-awa



usab sa Mateo 6:9–13; Lucas 11:1–4). Sumala sa ehemplo ni Jesus:

Magsugod kita pinaagi sa pagpagsulti sa atong Langitnong Amahan: “Amahan namo nga anaa sa langit” (Mateo 6:9; Lucas 11:2). Kini atong pribilehiyo nga moduol og direktso sa atong Amahan. Dili kita mag-ampo ngadto ni bisan kinsa nga nilalang. Hinumdumi nga gitambagan kita nga maglikay sa pagbalik-balik, lakip na sa kanunay nga paggamit sa pangalan sa Amahan samtang mag-ampo kita.¹

“Pagabalaanon unta ang imong ngalan” (Mateo 6:9; Lucas 11:2). Si Jesus misangpit sa Iyang Amahan diha sa usa ka kinaiya sa pagsimba, miila sa Iyang kagamhanan ug midayeg ug mipasalamat Kaniya. Sa pagkatinuod kini nga butang sa pagtahud sa Dios sa balaang paagi ug ang paghatag og kinasingkasing ug piho nga mga pasalamat mao ang usa sa mga yawe sa epektibo nga pag-ampo.

“Paanhia ang imong gingharian. Pagabuhaton unta ang imong kabubut-on” (Mateo 6:10; Lucas 11:2). Kita hingpit nga moangkon sa atong pag-salig sa Ginoo ug mopahayag sa atong tinguha sa pagsunod sa Iyang kabubut-on, bisan kon dili kini sama sa atong kabubut-on. Ang atong Bible Dictionary nagpasabut: “Ang pag-ampo mao ang lihok diin ang kabubut-on sa Amahan ug ang kabubut-on sa anak nagkasinabtanay sa usag usa. Ang tumong sa pag-ampo dili ang

pag-usab sa kabubut-on sa Dios, apan ang pagsiguro sa atong kaugalingon ug sa uban sa mga panalangin nga andam nang ihatag sa Dios, apan sa kondisyon nga kita mangayo niini” (Bible Dictionary, “Prayer”).

“Hatagi kami karon sa pagkaon namo sa matag adlaw” (Mateo 6:11; tan-awa usab sa Lucas 11:3). Mangayo kita niadtong mga butanga nga gusto nato gikan sa Ginoo. Ang pagkamatinuoron importante sa pagpangayo og mga butang gikan sa Dios. Dili kini hingpit nga pagkamatinuoron, pananglitan, nga mangayo og tabang sa Ginoo sa usa ka eksamin sa eskwelahan kon wala ko maminaw sa klase, mohimo sa gihatag nga homework, o magtuon alang sa eksamin. Kasagaran samtang mag-ampo ko, ang Espiritu malumong moaghat kanako sa pag-angkon nga duna pay daghan nga kinahanglan nakong buhaton aron makadawat sa tabang nga akong gipangayo sa Ginoo. Dayon kinahanglan nakong mopasalig ug mobuhat sa akong bahin. Sukwahi kini sa plano sa Dios nga ang Ginoo mao ang mohimo alang kanato nianang atong mahimo sa atong kaugalingon.

“Ug pasayloa kami sa among mga utang” (Mateo 6:12) o, sa laing bersyon, “Pasayloa kami sa among mga sala” (Lucas 11:4). Usa ka mahinungdanon ug usahay ang makalimtan nga bahin sa personal nga pag-ampo mao ang paghinulsol. Aron mosalir

ang paghinulsol, kinahanglan nga kini piho, sinsero, ug malungtaron.

“Maingon nga kami usab nakapasaylo man sa mga nakautang kanamo” (Mateo 6:12; tan-awa usab sa Lucas 11:4). Giklaro sa Manluluwas ang kalambigitan tali sa napasaylo ang atong mga sala ug pagpasaylo sa uban kinsa nakasala kanato. Usahay ang mga sayop nga nabuhat sa uban ngari kanato sakit kaayo ug lisud nga mapasaylo o kalimtan. Mapasalamaton kaayo ako sa kahupayan ug pag-ayo nga akong nakaplagan sa pagdapat sa Ginoo nga pasagdan na lang ang atong mga kasakit ug ipasa kini ngadto Kaniya. Diha sa Doktrina ug mga Pakigsaad, seksyon 64, Siya miingon:

“Ako, ang Ginoo, mopasaylo kinsa Ako mopasaylo, apan kamo gikinahanglan nga mopasaylo sa tanan nga mga tawo.

Ug kamo kinahanglan moingon diha sa inyong mga kasingkasing—himoa nga ang Dios mohukom tali kanako ug kaninyo, ug moganti kaninyo sumala sa inyong mga binuhatan” (nga bersikulo 10–11).

Dayon biyaan na nato sa hingpit kanang butanga, tugutan ang Ginoo nga mokuha niini, kon kita nagtinguha nga mamaayo.

“Ug ayaw kami itugyan sa panulay kondili luwasa kami gikan sa dautan” (Mateo 6:13, Hubad ni Joseph Smith, Mateo 6:14 tan-awa usab sa Lucas 11:4, footnote c; gikan sa Hubad ni Joseph Smith). Busa, sa atong mga pag-ampo mahimo kitang magsugod sa mapanalipuron nga proseso sa pagsul-ob sa tibuok hinagiban sa Dios (tan-awa sa Mga Taga-Efeso 6:11; D&P 27:15) pinaagi sa paglantaw sa umaabut nga adlaw ug pagpangayo og tabang sa makalilisang usahay nga mga butang nga atong atubangon. Palihug, akong mga higala, ayaw kalimot sa pagpangayo sa Ginoo sa pagpanalipod ug pag-uban kaninyo.

“Kay imo ang gingharian, ug ang gahum, ug ang himaya, sa kahangturan” (Mateo 6:13). Makapakat-on kini nga si Jesus mitapos niini nga pag-ampo pinaagi sa pagdayeg og balik sa Dios ug pagpahayag sa Iyang balaang pagtahud ug pagtugyan

ngadto sa Amahan. Kon kita tinud-anay nga nagtuo nga ang Dios mao ang nagmando sa Iyang gingharian ug Siya aduna sa tanang gahum ug tanang himaya, atong giila nga Siya gayud ang nagdumala, nga Siya nahigugma kanato sa hingpit nga gugma, ug Siya gusto nga kita magmalipayon. Akong nabantayan nga usa sa mga sekreto sa malipayong kinabuhi mao ang pag-ila nga ang pagbuhat sa mga butang sa paagi sa Ginoo makalipay kanako kay sa pagbuhat sa mga butang sa akong paagi.

Adunay risgo nga ang usa ka tawo mobati nga dili ganahang mag-ampo. Kini nga ideya nagagikan nianang dautan nga espiritu, kinsa mao ang usa nga nagtudlo kanato nga dili mag-ampo (tan-awa sa 2 Nephi 32:8). Makuyaw kini nga maghunahuna nga kita makasasala ra kaayo aron mag-ampo sama nga ang usa ka masakiton kaayo nga tawo magtuo nga masakiton ra kaayo siya aron moadto sa doktor!

Dili gayud kita maghunahuna nga bisan unsa nga matang sa pag-ampo, bisan unsa pa ka sinsero, mahimong epektibo kaayo kon ang atong buhaton mao lamang ang paglitok sa pag-ampo. Kinahanglang dili lamang kita molitok sa atong mga pag-ampo, kinahanglang ato kining buhaton. Ang Ginoo mas mahimuot sa tawo nga mag-ampo ug dayon molihok kay sa tawo nga mag-ampo lang. Sama sa tambal, ang pag-ampo mosalir lamang kon ato kining gamiton sigun sa gimando.

Kon ako moingon nga ang pag-ampo usa ka tim-os nga pribilehiyo, dili kini tungod lamang kay ako mapasalamaton nga nakigsulti ngadto sa Langitnong Amahan ug bation ang Iyang Espiritu kon mag-ampo ko. Tungod usab kini kay Siya sa pagkatinuod motubag ug makig-istorya kanato. Siyempre, ang paagi sa Iyang pagpakigsulti kanato sa kasagaran dili ang usa ka tingog nga atong madungog. Si Presidente Boyd K. Packer mipasabut: “Kanang malumo, hilum nga tingog sa inspirasyon moabut ingon nga usa ka pagbati kay sa usa ka tingog. Ang tiunay nga salabutan mahimong



ipamulong ngadto sa hunahuna. . . . Kini nga giya moabut isip mga hunahuna, isip mga pagbati pinaagi sa mga pag-aghat ug mga impresyon” (“Pag-ampo ug mga Pag-aghat,” *Liahona*, Nob. 2009, 44).

Usahay morag wala kita makadawat ug tubag sa atong sinsero ug determinado nga mga pag-ampo. Nagkinahanglan kini og hugot nga pagtuo sa paghinumdom nga ang Ginoo motubag sa Iyang panahon ug sa Iyang paagi aron nga kita mapanahangin og maayo. O, sa dugang nga pagpamalandong, kanunay natong maamgohan nga nasayud na diay kita sa hingpit kon unsay angayan natong buhaton.

Palihug ayaw kasagmuyo kon kini dili mosalir kaninyo diha-diha dayon. Sama sa pagkat-on og usa ka langyaw nga pinulongan, nagkinahanglan kini og praktis ug paningkamot. Palihug hibalo, hinoon, nga kamo makakat-on sa pinulongan sa Espiritu, ug kon mahitabo kana, makahatag kini kaninyo og dakong pagtuo ug gahum diha sa pagkamatarung.

Akong gihatagan og bili ang tambag sa atong minahal nga propeta, si Presidente Thomas S. Monson, kinsa miingon: “Niadtong nakadungog kanako karon kinsa nanlimbasug sa mga hagit ug mga kalisud dako man o gamay, ang pag-ampo mao ang tighatag og espirituhanong kalig-on; kini mao ang pasaporte padulong sa kalinaw. Ang pag-ampo mao ang paagi diin

kita moduol sa atong Amahan sa Langit, kinsa nahigugma kanato. Pakig-istorya ngadto Kaniya diha sa pag-ampo ug dayon paminawa ang tubag. Ang mga milagro nahitabo pinaagi sa pag-ampo” (“Himoa ang Imong Kaugalingon nga Labing Maayo,” *Liahona*, Mayo 2009, 68).

Mapasalamaton gayud ako sa pribilehiyo nga makadangup sa akong balaang Langitnong Amahan diha sa pag-ampo. Mapasalamaton ako alang sa dili maihap nga mga higayon nga Iya akong gidungog ug gitubag. Tungod kay Iya akong gitubag, lakip na usahay sa mapanagnaon ug milagrosong mga paagi, ako nasayud nga Siya buhi. Mapaubsanon usab akong mopamatuod nga si Jesus, ang Iyang balaan nga Anak, mao ang atong buhi nga Manluluwas. Kini ang Iyang Simbahan ug gingharian dinhi sa yuta; kini nga buhat tinuod. Si Thomas S. Monson, kinsa atong matinud-anong gi-ampo, mao ang Iyang propeta. Niining mga butanga ako mopamatuod nga may hingpit nga kasiguroan sa pangalan ni Jesukristo, amen. ■

MUBO NGA SULAT

1. Tan-awa sa Francis M. Lyman, “Proprieties in Prayer,” sa Brian H. Stuy, comp., *Collected Discourses Delivered by President Wilford Woodruff, His Two Counselors, the Twelve Apostles, and Others*, 5 vols. (1987–92), 3:76–79; B. H. Roberts, comp., *The Seventy’s Course in Theology*, 5 vols. (1907–12), 4:120; *Encyclopedia of Mormonism* (1992), “Prayer,” 1118–19; Bruce R. McConkie, *Mormon Doctrine*, 2nd ed. (1966), 583.



Ni Elder Quentin L. Cook

Sa Korum sa Napulog Duha ka mga Apostoles

Ang mga Awit nga Dili Nila Makanta

Bisan og wala kita masayud sa tanang mga tubag, nasayud kita sa importante nga mga baruganan nga nakapahimo kanato sa pag-atubang sa mga trahedy uban sa pagtuo ug pagsalig.

Daghang mga tawo ang nag-atubang og daghang mga problema o gani trahedy niining mortal nga panaw. Sa tibuok kalibutan makita nato ang mga ehemplo sa mga pag-sulay ug mga kalisdanan.¹ Matandog kita sa atong makita sa telebisyon sa mga hulagway sa kamatayon, grabe nga pag-antus, ug kasagmuyo. Makita nato ang mga Hapon nga bayanihong nanlimbasug batok sa pagkagun-ob tungod sa linog ug tsunami. Ang makalilisang nga talan-awon sa pagkagun-ob sa mga tore sa World Trade Center, nga bag-o lang natong gihinumduman sakit handumon. May matandog kanato kon atong makita ang ingon nga trahedy, ilabi na kon ang nag-antus mao ang inosenteng mga tawo.

Usahay ang mga trahedy personal ra kaayo. Usa ka anak nga lalaki o babaye namatay og sayo o nabiktima sa makamatay nga sakit. Usa ka mahigugmaong ginikanan namatay tungod sa wala damha nga hitabo o aksidente. Sa higayon nga ang trahedy mahitabo, magbangutan kita ug maningkamot sa pagtambayayong sa alantuson

sa usag usa.² Magbangutan kita sa butang nga dili matuman ug sa mga awit nga dili makanta.

Apil sa labing sagad nga ipangu-tana ngadto sa mga lider sa Simbahan mao, “Nganong ang makiangayong Dios motugot man sa bati nga mga butang nga mahitabo, labi na sa buotan nga mga tawo? Ngano nga kad-tong matarung ug anaa sa serbisyo sa Ginoo dili man makalingkawas gikan nianang mga trahedy?”

Bisan og wala kita masayud sa tanang mga tubag, nasayud kita sa importante nga mga baruganan nga nakapahimo kanato sa pag-atubang sa mga trahedy uban sa pagtuo ug pagsalig nga adunay mahayag nga kaugmaon nga giplano alang sa matag usa kanato. Pipila sa labing importante nga mga baruganan mao:

Una, kita adunay Amahan sa Langit, nga nakaila ug nahigugma kanato sa tagsa-tagsa ug hingpit nga nakasabut sa atong pag-antus.

Ikaduha, ang Iyang Anak, si Jesukristo, ang atong Manluluwas ug Manunubos, kansang Pag-ula wala

lang nakahatag og kaluwasan ug kahi-mayaan apan mobayad usab sa tanang dili makiangayon sa kinabuhi.

Ikatulo, ang plano sa kalipay sa Amahan alang sa Iyang mga anak nag-lakip dili lang sa kinabuhi nga wala pa dinhi sa yuta ug mortal nga kinabuhi apan sa kinabuhing dayon usab, lakip na ang dako ug mahimayaong pag-hiusa og balik uban niadtong nawala kanato. Tanang mga sayop tarungon, ug atong makita uban sa hingpit nga kaklaro ug walay sayop nga panglantaw ug panabut.

Gikan sa limitadong panglantaw niadtong wala makabaton og kahi-balo, panabut, o pagtuo sa plano sa Amahan—kinsa nagtan-aw lang sa kalibutan pinaagi sa mortal nga panglantaw sa mga gubat, kabayolente, sakit, ug kadautan niini—kini nga kinabuhi daw makapasagmuyo, samok, dili makiangayon, ug walay kahulugan. Ang mga lider sa Simbahan mikomparar niining panglantaw sa tawo nga nag-lakaw sa tunga-tunga sa tulo ka akto nga drama.³ Kadtong walay kahibalo sa plano sa Amahan dili makasabut unsay nahitabo sa unang akto, o sa kinabuhi nga wala pa dinhi sa yuta, ug sa mga katuyoan nga gi-establisar didto; ni sila makasabut sa pagpasabut ug resolusyon nga moabut sa ikatulong akto, nga mao ang mahimayaong katumanan sa plano sa Amahan.

Daghan ang wala makadayeg nga ubos sa Iyang mahigugmaon ug hingpit nga plano, kad-tong dinaugdaug bisan walay nahimong sayop mao ang madaugon sa katapusan.⁴

Pipila ka bulan na lang 100 ka tuig na sukad sa makalilisang nga pagkalunod sa barko nga *Titanic*. Ang makalilisang nga mga kahimtang nga naglibut niining grabeng panghitabo adunay dakong epekto sa mga tawo sa tibuok siglo sukad sa pagkahitabo niini. Ang mga tigpasiugda sa bag-ong luxury liner, nga may 11 ka andana ang kahabugon ug hapit 270 metros ang gitas-on,⁵ nangusog gayud ug nangatarungan nga ang *Titanic* luwas gikan sa katubigan nga puno sa dagkong mga ice. Kini nga barko gituhan nga dili gayud malunod; apan sa dihang misangad kini sa ibabaw sa

puno sa ice nga Atlantic Ocean, sobra sa 1,500 ka tawo ang nangamatay.⁶

Sa daghang mga paagi ang pagkalunod sa *Titanic* usa ka panig-ingnan sa kinabuhi ug sa daghang mga baruganan sa ebanghelyo. Usa kini ka hingpit nga ehemplo sa kalisud sa pagtan-aw lang pinaagi sa panglantaw niining mortal nga kinabuhi. Ang kamatayon makalilisang nga mga sangputanan apan usa ka wala damha nga hitabo. Sa daghang nangamatay sa duha ka gubat sa kalibutan ug sa bag-o lang nga miaging ika-10 nga anibersaryo sa pagkagun-ob sa mga tore sa World Trade Center, atong nakita sa atong panahon ang talan-awon nga makapakurat, mga pag-antus, ug mga isyu sa moral sa naglibut nga mga panghitabo nga resulta sa dautang paggamit sa kabubut-on. Adunay grabeng mga epekto sa pamilya, mga higala, ug mga nasud isip resulta niining mga trahedyo, bisan unsa pa ang hinungdan.

Kabahin sa *Titanic*, mga leksyon ang nakat-unan kalabut sa kakuyaw sa garbo ug pagbiyahe sa delikadong katubigan ug “nga ang Dios walay pinalabi sa tawo.”⁷ Kadtong naapil nagagikan sa tanang kahimtang sa kinabuhi. Ang uban adunahan ug inila, sama ni John Jacob Astor; apan adunay mga trabahante usab, imigrante, mga babaye, mga bata, ug mga tripolante.⁸

Dunay duha ka koneksyon ang mga Santos sa Ulahing mga Adlaw ngadto sa *Titanic*. Ang duha naghulagway sa atong hagit sa pagsabut sa mga pagsulay, mga kalisdanan, ug mga trahedyo ug naghatag og panglantaw kon unsaon nato kini pagdala. Ang una mao ang ehemplo sa pagkamasalamaton sa mga panalangin nga atong nadawat ug sa mga hagit nga atong gilikayan. Apil niini si Alma Sonne, kinsa sa kaulahian nagserbisyo isip General Authority.⁹ Siya ang akong presidente sa stake sa dihang natawo ko sa Logan, Utah. Si Elder Sonne ang nag-interbyu kanako sa akong misyon. Niadtong panahona ang tanang gamsiyon interbyuhon og usa ka General Authority. Dako kaayo siya og impluwensya sa akong kinabuhi.

Sa dihang si Alma batan-on pa, duna siyay higala nga dili kaayo aktibo



sa Simbahan, ginganlan og Fred. Daghan kaayo silag gihisgutan kabahin sa pagmisyon, ug sa katapusan nakumbinsir ni Alma Sonne si Fred sa pagandam ug pagserbisyo. Silang duha gitawag ngadto sa British Mission. Sa katapusan sa ilang misyon, si Elder Sonne, ang mission secretary, miiskedyul og biyahe sa ilang pagpauli sa Estados Unidos. Nagpareserba siya og tiket sa *Titanic* para niya, ni Fred, ug sa upat ka laing mga misyonaryo nga nahuman na usab sa ilang misyon.¹⁰

Sa dihang miabut na ang panahon sa pagbiyahe, sa pipila ka rason si Fred nadugay. Gikanselar ni Elder Sonne ang tanang unom ka gipareserba nga tiket nga mosakay sa bagong luxury liner sa unang pagbiyahe niini ug mipareserba og tiket sa barko nga molawig sa sunod adlaw.¹¹ Ang upat ka mga misyonaryo nga naghinam-hinam sa pagsakay sa *Titanic*, mipahayag sa ilang kasagmuyo. Ang tubag ni Elder Sonne susama sa asoy ni Jose ug sa iyang igsoong mga lalaki didto sa Ehipto nga girekord diha sa Genesis: “Unsaon man nato pagpauli sa atong mga pamilya kon wala ang bata uban kanato?”¹² Siya mipasabut sa iyang mga kauban nga silang tanan nagdungan og adto sa England ug kinahanglang magdungan sila og pauli. Si Elder Sonne wala madugay nahibalo sa pagkalunod sa *Titanic* ug mapasalamatong miingon ngadto sa iyang higala nga si Fred, “Imong giluwang ang akong kinabuhi.” Mitubag si Fred, “Dili, sa imong pag-awhag nako sa pagmisyon, imong giluwang ang akong kinabuhi.”¹³ Ang tanang mga

misyonaryo nagpasalamat sa Ginoo sa pagpanalipod kanila.¹⁴

Usahay, sama sa nahitabo ni Elder Sonne ug sa iyang kauban nga mga misyonaryo, daghang mga panalangin ang moabut niadtong matinud-anon. Kita kinahanglang mapasalamaton sa tanang malumo nga mga kalooy nga moabut sa atong kinabuhi.¹⁵ Baliwala ra nato ang daghang mga panalangin nga atong nadawat matag adlaw. Importante kaayo nga kita adunay diwa sa pagpasalamat sa sulod sa atong kasingkasing.¹⁶

Ang mga kasulatan klaro; kadkang mga matarung, nagsunod sa Manluluwas, ug nagtuman sa Iyang mga sugo mouswag sa yuta.¹⁷ Ang importanting butang sa pag-uswag mao ang pagbaton sa Espiritu sa atong kinabuhi.

Hinoon, ang pagkamatarung, pagampo, ug pagkamatinud-anon dili sa kanunay moresulta og malipayong katapusan sa pagkamortal. Daghan ang makasinati og grabeng mga pagsulay. Kon kini mahitabo, ang buhat sa pagbaton og hugot nga pagtuo ug pagpangayo og mga panalangin sa priesthood gitugutan sa Dios. Ang Ginoo miingon, “Ang mga anciano . . . pagatawgon, ug magampo ug magpandong sa ilang mga kamot kanila diha sa akong ngalan; ug kon sila mamatay sila mamatay ngari nako, ug kon sila mabuhi sila mabuhi ngari nako.”¹⁸

Angayng masayran nga ang ikaduhang koneksyon sa mga Santos sa Ulahing mga Adlaw sa *Titanic* wala matapos sa malipayong kinabuhi. Si Irene Corbett 30 anyos. Usa siya ka batan-ong asawa ug inahan gikan

sa Provo, Utah. Siya adunay daghang mga talento isip artist ug musician; magtutudlo ug nurse usab siya. Sa pag-awhag sa medikal nga mga propesyonal sa Provo, mieskwela siya og unom ka bulan nga kurso sa pagtuon sa pagka-midwife didto sa London. Dako niyang tinguha nga makahimo og kalainan sa kalibutan. Siya mainampingon, manggihunahunaon, mainampoon, ug lig-on. Usa sa mga rason nga iyang gipili ang *Titanic* sa pagpauli ngadto sa U.S. tungod kay naghunahuna siya nga ang mga misyonaryo mobiyahe kuyog kaniya ug maghatag kini og dugang nga seguridad. Si Irene usa sa pipila ka mga babaye nga wala maluwas niining makalilisang nga trahedyo. Kadaghanan sa mga babaye ug mga bata gipasakay sa mga lifeboat ug sa katapusan naluwas. Walay igong mga lifeboat para sa tanan. Apan gituhan nga wala siya mosakay sa mga lifeboat tungod kay, sa iyang espesyal nga pagbansay, mitabang siya sa daghang mga pasahero nga nangaangol sa pagbanga sa dagko nga ice.¹⁹

Daghang mga matang sa mga hagit. Ang uban nakahatag kanato og gikinahanglang mga kasinatian. Ang bati nga mga resulta niining mortal nga kinabuhi dili ebidensya sa kakulang sa pagtuo o pagkadili hingpit sa tibuok nga plano sa atong Amahan sa Langit. Ang kalayo sa magtutunaw tinuod, ug ang mga kalidad sa pamatasan ug pagkamatarung nga napalambo pinaagi sa kalisdanan mohingpit ug molimpyo kanato ug moandam kanato sa pag-atubang sa Dios.

Sa dihang si Propeta Joseph Smith usa ka binilanggo sa Liberty Jail, ang Ginoo miingon kaniya nga daghang mga kalamidad ang moabut sa katawhan. Ang Manluluwas namahayag og gamayng bahin “Kon ikaw itambug ngadto sa ilawom; kon ang dagko nga mga balod nagkunsabo batok kanimo; kon ang mapintas nga mga hangin mahimo nga imong kaaway; . . . ug ang tanan nga mga elemento magkahiusa nga mobabag sa agianan; . . . kining tanan nga mga butang makahatag kanimo og kasinatian, ug alang sa imong kaayohan.”²⁰ Ang Manluluwas mitapos sa Iyang panudlo: “Ang imong



mga adlaw nahibaloan, ug ang imong mga tuig dili makulangan; busa, ayaw kahadlok . . . , kay ang Dios mouban kanimo hangtud sa kahangturan.”²¹

Ang ubang mga hagit resulta gikan sa kabubut-on sa uban. Ang kabubut-on importante sa tinagsa nga espiritwal nga pagtubo ug paglambo. Ang dautang kinaiya usa ka elemento sa kabubut-on. Si Kapitan Moroni mipasabut niining importante kaayo nga doktrina: “Kay ang Ginoo mitugot sa mga matarung nga mapatay nga ang iyang kaangayan ug paghukom modangat sa mga dautan.” Iyang giklaro nga ang matarung dili mawala, apan “mosulod ngadto sa kapahulayan sa Ginoo nga ilang Dios.”²² Ang dautan manubag sa mga dautang butang nga ilang gibuhat.²³

Ang ubang mga hagit moabut tungod sa pagsupak sa mga balaod sa Dios. Ang mga problema sa panglawas nga resulta sa pagpanigarilyo, alkohol, ug pag-abuso sa droga makapakurat. Ang nangapriso isip resulta sa krimen nga may kalabutan sa alkohol ug droga taas usab kaayo.²⁴

Ang kadaghan sa nagdiborsyo tungod sa pagpanapaw dayag usab. Daghan niining mga pagsulay ug mga kasakit mahimong malikayan pinaagi sa pagsunod sa mga balaod sa Dios.²⁵

Ang akong minahal nga presidente sa misyon, si Elder Marion D. Hanks (nga namatay niadtong Agosto), mihangyo namong mga misyonaryo sa pagmemorya og pamahayag aron makabuntog sa mga hagit sa mortal nga kinabuhi: “Walay kahigayunan, walay kapalaran, walay kapadulngan nga makausab o makapugong sa lig-ong pagpahinungod sa determinadong kalag.”²⁶

Iyang giila nga dili kini magamit sa tanang mga hagit nga atong masagubang apan magamit sa espirituhanon nga mga butang. Nakadayeg ako sa iyang tambag sa akong kinabuhi.

Usa sa mga rason sa grabe nga nangamatay sa *Titanic* tungod kay walay igong mga lifeboat. Bisan unsa pa ang mga pagsulay nga atong giatubang niini nga kinabuhi, ang Pag-ula sa Manluluwas makahatag og mga lifeboat alang sa tanan. Alang sa naghunahuna nga ang mga pagsulay nga ilang giatubang dili makiangayon, ang Pag-ula nagbayad sa tanang dili makiangayon sa kinabuhi.²⁷

Ang talagsaong hagit niadtong nawad-an og mga minahal sa kinabuhi mao ang paglikay sa paghunahuna sa nawala nga mga oportunidad niining kinabuhi. Kasagaran kadtong namatay og sayo nakapakita og dako nga kapabilidad, mga interes, ug mga talento. Sa atong limitado nga panabut, nagbangutan kita sa mga butang nga dili matuman ug sa mga awit nga dili makanta. Gihulagway kini isip pagkamatay uban sa imong musika nga anaa pa kanimo. Ang musika niini nga sitwasyon usa ka panig-ingnan sa wala matuman nga bisan unsang potensyal. Usahay ang mga tawo naghimo og mahinungdanong pagpangandam apan walay oportunidad sa pagbuhat dinhi sa pagkamortal.²⁸ Usa sa pirmeng kutloon nga inila nga balak, “Elegy Written in a Country Church Yard,” ni Thomas Gray, nagpakita sa ingon nga nawalang mga oportunidad:

*Daghang mga bulak nga namukhad nga wala makita,
Ug ang katahum niini sa hangin sa disyerto nabaliwala.*²⁹

Ang nawalang oportunidad mahimong may kalabutan sa pamilya, trabaho, mga talento, mga kasinatian, o uban pa. Tanan niini nahunong sa kahimtang ni Sister Corbett. Adunay mga awit nga wala niya makanta ug potensyal nga wala niya matuman niining mortal nga kinabuhi. Apan kon kita motan-aw agi sa lapad ug klaro nga panglantaw sa ebanghelyo imbis sa limitado nga mortal nga panglantaw, atong masayran ang dakong mahangturon nga ganti nga gisaad sa usa ka mahigugmaong Amahan diha sa Iyang plano. Sama sa gitudlo ni Apostol Pablo, “Ang wala makita sa mata, ni madungog sa dalunggan, ni mosantop sa kasingkasing sa tawo, ang gikatagana sa Dios alang kanila nga nahigugma kaniya.”³⁰ Ang linya sa paborito nga himno makahatag og kahupayan, kalipay, ug klaro nga panglantaw: “Ug si Jesus naminaw sa mga awit nga dili nako makanta.”³¹

Ang Manluluwas miingon: “Busa, himoa nga ang inyong mga kasingkasing mahupay. . . . Pagmalinawon ug hibalo nga Ako mao ang Dios.”³² Kita Iyang gisaaran nga kita uban sa atong mga anak mokanta sa “mga awit sa walay katapusan nga kalipay.”³³ Sa pangalan ni Jesukristo, ang atong Manluluwas, amen. ■

MUBO NGA MGA SULAT

1. Tan-awa sa Juan 16:33.
2. Tan-awa sa Mosiah 18:8–9; tan-awa usab sa 2 Nephi 32:7.
3. Tan-awa sa Boyd K. Packer, “The Play and the Plan” (fireside sa Church Educational System alang sa mga young adult, Mayo 7, 1995), 3: “Sa pagkamortal, sama kita sa usa ka tawo nga misulod sa teyatro nga mao pa gayud ang pagsaka sa kurtina sa ikaduhang akto. Wala kita makaabut sa Unang Akto. . . . ‘Ug silang tanan nagpuyo nga malipayon human niana’ wala gayud masulat sa ikaduhang akto. Kana nga linya anaa sa ikatulong hugna dihang ang mga misteryo nasulbad ug ang tanan natarung.” Tan-awa usab sa Neal A. Maxwell, *All These Things Shall Give Thee Experience* (1979), 37: “Ang Dios . . . nakakita sa sinugdanan ug sa katapusan. Ang kwentada . . . usa ka butang nga kitang mga mortal dili makasabut. Dili kita makahimo sa pagsumada kay wala nato ang tanang numero. Nasirad-an kita sa usa ka panahon ug nalimitahan sa panglantaw niining mortal nga kinabuhi.”
4. Kadtong namatay nga wala pa moabut sa edad sa pagkamay-tulubagon naluwas sa celestial nga gingharian (tan-awa sa Doktrina ug mga Pakigsaad 137:10). Kadtong namatay nga wala mahibalo



- sa ebanghelyo ug modawat unta niini kon nahatagan pa sila og oportunidad mahimo usab nga manununod sa Celestial nga Gingharian (tan-awa sa Doktrina ug mga Pakigsaad 137:7). Agig dugang, bisan kadtong wala kaayo magpakabuhi nga matarung moabut ang panahon nga panalangin og kinabuhi nga labaw pa niining kinabuhia (tan-awa sa Doktrina ug mga Pakigsaad 76:89).
5. Tan-awa sa Conway B. Sonne, *A Man Named Alma: The World of Alma Sonne* (1988), 83.
 6. Tan-awa sa Sonne, *A Man Named Alma*, 84.
 7. Mga Buhat 10:34; tan-awa usab sa “The Sinking of the World’s Greatest Liner,” *Millennial Star*, Abr. 18, 1912, 250.
 8. Tan-awa sa *Millennial Star*, Abr. 18, 1912, 250.
 9. Si Elder Sonne uyoan ni Elder L. Tom Perry.
 10. Tan-awa sa Sonne, *A Man Named Alma*, 83.
 11. Tan-awa sa Sonne, *A Man Named Alma*, 83–84; tan-awa usab sa “From the Mission Field,” *Millennial Star*, Abr. 18, 1912, 254: “Releases and Departures.— Ang mosunod nga gihinganlan nga mga misyonaryo madungganong gi-release ug milawig pauli sa ilang pinuy-anan Abril 13, 1912, sakay sa barko nga *Mauretania*. Gikan sa Great Britain—Alma Sonne, George B. Chambers, Willard Richards, John R. Sayer, F. A. Dahle. Gikan sa Netherlands—L. J. Shurtliff.”
 12. Tan-awa sa Genesis 44:30–31, 34.
 13. Sa Frank Millward, “Eight Elders Missed Voyage on Titanic,” *Deseret News*, Hulyo 24, 2008, M6.
 14. Tan-awa sa “Friend to Friend,” *Friend*, Mar. 1977, 39.
 15. Tan-awa sa David A. Bednar, “Ang Malumo nga mga Kalooy sa Ginoo,” *Liahona*, Mayo 2005, 99–102.
 16. Tan-awa sa Doktrina ug mga Pakigsaad 59:21.
 17. Tan-awa sa Alma 36:30.
 18. Doktrina ug mga Pakigsaad 42:44.
 19. Interbyu sa apong lalaki ni Irene Corbett nga si Donald M. Corbett, Okt. 30, 2010, pinaagi ni Gary H. Cook.
 20. Doktrina ug mga Pakigsaad 122:7.
 21. Doktrina ug mga Pakigsaad 122:9.
 22. Alma 60:13.
 23. Ang Manluluwas miklaro nga “sa paghimog sala magaabut gayud hinoon: apan alaut ang tawo nga pinaagi kaniya magaabut kini!” (Lucas 17:1).
 24. Seksyon 89 sa Doktrina ug mga Pakigsaad— “sa han-ay ug kabubut-on sa Dios diha sa temporal nga kaluwasan sa tanan nga mga santos sa katapusan nga mga adlaw” (bersikulo 2)—nakapanalangin og maayo sa mga Santos sa Ulahing mga Adlaw.
 25. Tan-awa sa Doktrina ug mga Pakigsaad 42:22–24.
 26. Tan-awa sa “Will,” *Poetical Works of Ella Wheeler Wilcox* (1917), 129.
 27. Tan-awa sa “Ang Pag-ula,” *Isangyaw ang Akong Ebanghelyo: Usa ka Giya sa Misyonaryo nga Pangalagad* (2004), 51–52.
 28. Tan-awa sa “The Song That I Came to Sing,” sa *The Complete Poems of Rabindranath Tagore’s Gitanjali*, ed. S. K. Paul (2006), 64: “Ang awit nga akong kantahon nagpabiling wala makanta hangtud niining adlaw. Migahin ko sa akong mga adlaw sa pagtaud ug pagtangtang sa kwerdas sa akong instrumento.”
 29. Thomas Gray, “Elegy Written in a Country Church Yard,” sa *The Oxford Book of English Verse*, ed. Christopher Ricks (1999), 279.
 30. 1 Mga Taga-Corinto 2:9.
 31. “There Is Sunshine in My Soul Today,” *Hymns*, nu. 227.
 32. Doktrina ug mga Pakigsaad 101:16; tan-awa usab sa Salmo 46:10.
 33. Doktrina ug mga Pakigsaad 101:18; tan-awa usab sa Doktrina ug mga Pakigsaad 45:71.



Ni Presidente Thomas S. Monson

Hangtud sa Sunod Natong Panagkita

Hinaut nga ang espiritu nga atong gibati dinhi magpabilin uban kanato samtang kita magbuhat sa mga butang nga atong gihimo kada adlaw.

Akong mga kaigsoonan, nahibalo kong mouyon kamo kanako nga usa kini ka makapadasiyag kaayo nga komperensya. Atong gibati ang Espiritu sa Ginoo sa hilabihan niining milabayng duha ka adlaw samtang natandog ang atong mga kasingkasing ug nalig-on ang atong mga pagpamatuod mahitungod niining balaan nga buhat. Among ipahayag ang pasalamat sa matag usa nga miapil, lakip ang mga Kaigsoonan nga naghalad sa mga pag-ampo.

Ania kitang tanan dinhi tungod kay nahigugma kita sa Ginoo ug gustong moserbisyo Kaniya. Akong ipamatuod kaninyo nga ang atong Langitnong Amahan mahunahunaon kanato. Akong giila ang Iyang kamot sa tanang mga butang.

Sa makausa pa ang musika maa-nindot kaayo, ug akong ipahayag ang akong personal ug sa tibuok Simbahan nga pasalamat niadtong andam nga mopaambit ngari kanato sa ilang mga talento niining bahina.

Among gipahayag ang among halawom nga pasalamat ngadto sa mga Kaigsoonan nga na-release atol niini nga komperensya. Matinud-anon

ug maayo ang ilang pagserbisyo ug nakahimo og mahinungdnong mga kontribusyon sa buhat sa Ginoo.

Akong ipahayag ang dakong pasalamat sa akong matinud-anon ug mapahinunguron nga mga magtatambag ug pasalamat sila atubangan sa tanan sa suporta ug abag nga ilang gihatag kanako. Sila sa tinuod mga tawo sa kaalam ug panabut, ug ang ilang pagserbisyo mapuslanon kaayo.

Akong gipasalamatan ang akong mga kaigsoonan sa Korum sa Napulog Duha sa ilang labing maayo ug walay kaluya nga pagserbisyo diha sa buhat sa Ginoo. Ingon man akong ipahayag ang akong pasalamat sa mga sakop sa mga Korum sa Seventy ug sa Presiding Bishopric sa ilang dili hinakog ug

epektibo nga serbisyo. Ipahayag usab nako ang samang pasalamat alang sa mga kababayan-an ug kalalakin-an nga nagserbisyo isip mga opisyal sa kinatibuk-ang auxiliary.

Mga kaigsoonan, akong ipaniguro kaninyo nga ang atong Langitnong Amahan mahunahunaon sa mga hagit nga atong giatubang sa kalibutan karon. Siya nahigugma sa matag usa kanato ug mopanalangin kanato samtang maningkamot kita sa pagsunod sa Iyang mga sugo ug mangita Kaniya pinaagi sa pag-ampo.

Bulahan gayud kita nga aduna niining gipahiuli nga ebanghelyo ni Jesukristo. Naghatag kini og tubag sa mga pangutana kon diin kita gikan, nganong ania kita dinhi, ug asa kita padulong kon mobiya na kita niining kinabuhia. Naghatag kini og kahulugan ug katuyoan ug paglaum sa atong kinabuhi.

Gipasalamatan nako kamo alang sa serbisyo nga andam kaayo ninyong gihatag sa usag usa. Kita ang mga kamot sa Dios dinhi sa yuta, ubos sa sugo sa paghigugma ug pagserbisyo sa Iyang mga anak.

Pasalamat ko kamo sa tanan nga nahimo ninyo sa inyong mga ward ug mga branch. Akong gipahayag ang akong pasalamat sa inyong kaandam nga moserbisyo sa mga posisyon diin kamo gitawag, bisan unsa pa man kini. Ang matag usa importante sa pagpadayon sa buhat sa Ginoo.

Ang komperensya nahuman na. Samtang mamauli kita, hinaut nga kita luwas. Hinaut atong maabtan ang tanan nga maayo ra samtang wala kita. Hinaut nga ang espiritu nga atong gibati dinhi magpabilin uban kanato samtang kita magbuhat sa mga butang nga atong gihimo kada adlaw. Hinaut



nga atong ikapakita ang dugang nga kamabination sa usag usa. Hinaut nga kanunay kitang makita nga naghimo sa buhat sa Ginoo.

Hinaut nga ang mga panalangin sa langit maanaa kaninyo. Hinaut nga ang inyong mga panimalay mapuno sa panaghiusa ug gugma. Hinaut nga kanunay ninyong maalimahan ang inyong mga pagpamatuod, nga kini mamahimong proteksyon kaninyo batok sa kaaway.

Isip ubos ninyong sulugoon, nagtinguha ko sa tibuok nakong kasing-kasing sa paghimo sa kabubut-on sa Dios ug sa pagserbisyo Kaniya ug sa pagserbiyo kaninyo.

Mahal ko kamo, ako nag-ampo alang kaninyo. Mohangyo ko kaninyo sa makausa pa nga ako ug ang tanang mga General Authority inyong hinumduman sa inyong mga pag-ampo. Kami inyong kauban sa pag-uswag niining kahibulongan nga buhat. Akong ipamatuod kaninyo nga kitang tanan apil niini ug ang tanang lalaki, babaye, ug bata adunay bahin nga pagabuhaton. Hinaut nga ang Dios mohatag kanato og kalig-on ug katakus ug determinasyon sa mas maayo nga pagbuhat sa atong bahin.

Akong ipamatuod kaninyo nga tinuod kini nga buhat, nga buhi ang atong Manluluwas, ug Siya naggiya ug nagdumala sa Iyang Simbahan dinhi sa yuta. Akong ibilin kaninyo ang akong pagsaksi ug akong pagpamatuod nga ang Dios nga atong Mahang-turong Amahan buhi ug nahigugma kanato. Siya gayud ang atong Amahan, ug Siya personal ug tinuod. Hinaut nga kita mahibalo ug makasabut nga andam Siya sa pagpaduol kanato, nga andam gayud Siya sa pagtabang kanato, nga Siya nahigugma gayud kanato, ug Siya daghan gayud og gihimo ug andam nga mobuhat alang kanato.

Hinaut nga Siya manalangin kaninyo. Hinaut nga ang Iyang gisaad nga kalinaw maanaa kaninyo karon ug sa hangtud.

Manamilit ako hangtud sa sunod natong panagkita sulod sa unom ka bulan, ug buhaton ko kini sa pangalan ni Jesukristo, ang atong Manluluwas ug Manunubos, amen. ■



Ni Julie B. Beck

Kinatibuk-ang Presidente sa Relief Society

Unsay Akong Gipanghinaut nga Masabtan sa Akong Apo nga mga Babaye (ug Apo nga mga Lalaki) mahitungod sa Relief Society

Sukad sa adlaw nga ang ebanghelyo gisugdan sa pagpahiuli niini nga dispensasyon, ang Ginoo nagkinahanglan sa matinud-anong mga babaye sa pag-apil isip Iyang mga disipulo.

Kini pribilehiyo nga mamulong kaninyo niining makasaysayanong miting. Panalangin alang kanato nga magkauban. Sa panahon sa akong pagserbisyo isip kinatibuk-ang presidente sa Relief Society, akong napalambo ang lawom nga gugma alang sa Relief Society nga mga sister niini nga Simbahan, ug ang Ginoo naglugway sa akong panan-awon kon

unsay Iyang gibati kanato ug unsay Iyang gipaabut kanato.

Akong giulohan kini nga mensahe og “Unsay Akong Gipanghinaut nga Masabtan sa Akong Apo nga mga Babaye (ug Apo nga mga Lalaki) mahitungod sa Relief Society.” Ang kinamagulangan nakong apo nga babaye busy nga naghimo sa iyang Personal nga Kauswagan ug nagpalambo og



Ginoo sa pagtukod sa Iyang gingharian, gihatagan siya og mga panudlo kalabut kon unsaon pagpatubo sa iyang pagtuo ug personal nga pagkamatatung, unsaon paglig-on sa iyang pamilya ug sa iyang panimalay, ug unsaon pagserbisyo sa uban.

Nanghinaut ako nga ang akong apo nga mga babaye makasabut nga sukad sa adlaw nga ang ebanghelyo gisugdan sa pagpahiuli niini nga dispensasyon, ang Ginoo nagkinahanglan sa matinud-anong mga babaye sa pag-apil isip Iyang mga disipulo.

Usa lamang ka ehemplo sa ilang talagsaong kontribusyon mao ang misyonaryong buhat. Ang kusog kaayo nga pagtubo sa pagsugod sa Simbahan nahimong posible tungod kay ang matinud-anong mga lalaki andam nga mobiya sa ilang mga pamilya sa pagbiyahe ngadto sa wala ilhing mga dapit ug nag-antus sa mga kawad-on ug kalisud aron sa pagtudlo sa ebanghelyo. Hinoon, kini nga mga lalaki nakasabut nga ang ilang mga misyon dili unta mahimong posible kon wala ang hingpit nga pagtuo ug pakig-uban sa mga babaye sa ilang kinabuhi, kinsa maoy nagpatunhay sa mga panimalay ug mga negosyo ug nanginabuhi alang sa ilang mga pamilya ug sa mga misyonaryo. Ang mga sister miamuma usab sa liboan ka mga kinabig kinsa nagpundok sa ilang mga komunidad. Sila hugot nga mipasalig ngadto sa bag-ong paagi sa kinabuhi, nagtabang sa pagtukod sa gingharian sa Ginoo ug pag-apil sa Iyang buhat sa kaluwasan.

Gisumpay ngadto sa Priesthood

Nanghinaut ako nga ang akong apo nga mga babaye makasabut nga ang Ginoo midasig ni Propeta Joseph Smith sa pag-organisar sa mga babaye sa Simbahan “ubos sa priesthood subay sa sumbanan sa priesthood”⁷ ug sa pagtudlo kanila kon “unsaon nga [sila] makabaton sa mga pribilehiyo, mga panalangin, ug mga gasa sa Pagkapari.”⁸

Sa dihang ang Relief Society opisyal nga natukod, si Emma Smith mipadayon sa iyang calling isip usa ka lider. Siya gitawag isip presidente sa organisasyon, uban sa duha ka mga

mga pamatasan ug mga kinaiya sa matatung nga pagkababaye. Sa dili madugay sila ug ang ilang mga higala modala sa responsibilidad alang niining panag-igsoonay sa tibuok kalibutan.

Nanghinaut ako nga kon unsay akong gisulti niini nga mensahe mohatag kanila ug sa tanan kinsa naminaw o mobasa niini og usa ka klaro nga pagsabut kon unsay anaa sa hunahuna sa Ginoo alang sa Iyang anak nga mga babaye sa dihang gitukod ang Relief Society.

Usa ka Karaang nga Sumbanan sa Pagkadisipulo

Nanghinaut ako nga ang akong apo nga mga babaye mosabut nga ang Relief Society karon gitukod subay sa sumbanan sa pagkadisipulo nga anaa sa karaang Simbahan. Sa dihang ang Manluluwas mitukod sa Iyang Simbahan sa panahon sa Bag-ong Tugon, “ang mga babaye mahinungdanon nga mga partisipante sa [Iyang] pagpangalagad.”¹ Siya mibisita nila ni Marta ug Maria, duha sa Iyang maunungon nga mga sumusunod, didto sa balay ni Marta. Samtang namati si Marta Kaniya ug miserbisyo Kaniya sumala sa naandan nga kustumbre sa ilang panahon, gitabangan Niya si Marta nga makita nga makahimo pa siya og labaw pa niana. Mitabang Siya nila ni Marta ug Maria nga makasabut nga sila makapili “nianang maayong

bahin,” nga dili makuha gikan kanila.² Kining mabination nga komentaryo nagsilbi isip usa ka pagdapit sa pag-apil diha sa pagpangalagad sa Ginoo. Ug sa wala madugay diha sa Bag-ong Tugon, ang lig-on nga pagpamatuod ni Marta sa pagkabalaan sa Manluluwas naghatag kanato og pipila ka panabut ngadto sa iyang hugot nga pagtuo ug pagkadisipulo.³

Samtang atong padayunon ang pagbasa diha sa Bag-ong Tugon, atong makat-unan nga ang mga Apostoles mipadayon sa pagtukod sa Simbahan sa Ginoo. Ato usab nga makat-unan ang mahitungod sa matinuoron nga mga babaye kansang pagkadisipulo nakatabang sa pagtubo sa Simbahan. Misulti si Pablo kalabut sa babaye nga mga disipulo sa mga dapit sama sa Efeso⁴ ug Filipos.⁵ Apan sa dihang ang Simbahan sa Ginoo nawala diha sa apostasiya, kini nga sumbanan sa pagkadisipulo nawala usab.

Samtang ang Ginoo misugod sa pagpahiuli sa Iyang Simbahan pinaagi ni Propeta Joseph Smith, Iyang gibalik pag-apil ang mga babaye diha sa sumbanan sa pagkadisipulo. Pipila ka bulan human ang Simbahan pormal nga natukod, gipadayag sa Ginoo nga si Emma Smith kinahanglang i-set apart isip usa ka lider ug magtutudlo diha sa Simbahan ug isip opisyal nga tigtabang sa iyang bana, ang Propeta.⁶ Sa iyang calling nga motabang sa

tigtambag kinsa miserbisyo uban kaniya diha sa kapangulohan. Imbis pilion pinaagi sa pagboto sa kadaghanan, sama sa naandan diha sa mga organisasyon sa gawas sa Simbahan, kini nga kapangulohan gitawag pinaagi sa pagpadayag, gipaluyohan niadtong ilang pagadumalaon, ug gi-set apart pinaagi sa mga lider sa priesthood aron moserbisyo diha sa ilang mga calling, sa ingon “gitawag sa Dios, pinaagi sa pagpanagna, ug pinaagi sa pagpandong sa mga kamot niadto kinsa adunay pagtugot.”⁹ Ang pagka-organisar ubos sa priesthood mihimong posible sa kapangulohan nga makadawat og giya gikan sa Ginoo ug sa Iyang propeta alang sa piho nga buhat. Ang organisasyon sa Relief Society naka-himo sa balay-tipiganan sa Ginoo sa talento, panahon, ug mga pamaagi nga madumala diha sa kaalam ug kahusay.

Kanang unang grupo sa mga babaye nakasabut nga sila gihatagan og awtoridad sa pagtudlo, pagdasig, ug pag-organisar sa mga sister isip mga disipulo aron pagtabang sa Ginoo diha sa buhat sa kaluwasan. Diha sa ilang unang mga miting ang mga sister gitudloan sa giya nga mga katuyoan sa Relief Society: sa pagpatubo sa pagtuo ug personal nga pagkamatarung, paglig-on sa mga pamilya ug mga panimalay, ug sa pagpangita ug pagtabang niadtong nanginahanglan.

Nanghinaut ako nga ang akong apo nga mga babaye makasabut nga ang organisasyon sa Relief Society importante nga bahin sa pag-andam sa mga Santos alang sa mga pribilehiyo, mga panalangin, ug mga gasa nga makapalagan lamang diha sa templo. Si Presidente Joseph Fielding Smith nagtudlo nga ang Relief Society “mahinungdanong bahin sa gingharian sa Dios dinhi sa yuta” ug “gidesinyo gayud ug gipalihok nga kini makatabang sa matitud-anong mga miyembro aron makabaton og kinabuhing dayon sa gingharian sa atong Amahan.”¹⁰ Atong mahunahuna unsa kaha kadto alang sa mga sister nga maanaa didto sa Red Brick Store ni Joseph Smith niadtong unang mga miting sa Relief Society, nga nag-atubang sa bungtod diin gitukod ang templo samtang ang Propeta



nagtudlo kanila nga “kinahanglan nga adunay pinili nga kapunongan, nga bulag sa tanang kadautan sa kalibutan, pinili, hiyasnon, ug balaan.”¹¹

Nanghinaut ako nga ang akong apo nga mga babaye mohatag og bili sa templo sama sa mga sister sa unang Relief Society, kinsa mituo nga ang mga panalangin sa templo mao ang labing dakong ganti ug labing mahinungdanong tumong sa kada Santos sa Ulahing mga Adlaw nga babaye. Nanghinaut ako nga sama sa unang mga sister sa Relief Society, ang akong apo nga mga babaye maningkamot kada adlaw nga mahimong igo ka hingkod sa paghimo ug paghupot og sagrado nga mga pakigsaad sa templo ug nga kon sila motabong sa templo, sila mamati sa tanang gisulti ug gibuhat didto. Pinaagi sa mga panalangin sa templo, sila masangkapan og gahum¹² ug mapanalanginan sa pagdawat “sa yawe sa kahibalo sa Dios.”¹³ Pinaagi sa mga ordinansa sa priesthood nga makita lamang diha sa mga templo, sila mapanalanginan sa pagtuman sa ilang balaan, mahangturon nga mga responsibilidad, ug sila mosaad sa pagtuman isip mapasaligon nga mga disipulo. Mapasalamaton ako nga usa sa nag-unang mga katuyoan sa Ginoo sa pagtukod sa Relief Society mao ang paghatag sa mga babaye og responsibilidad sa pagtabang sa usag usa nga maandam “alang sa mas dagko pang panalangin sa priesthood nga anaa sa mga ordinansa ug mga pakigsaad sa templo.”¹⁴

Ang Dangpanan ug Impluwensya sa Panag-igsoonay sa Tibuok Kalibutan

Nanghinaut ako nga ang akong apo nga mga babaye makasabut sa importanting impluwensya ug kapasidad sa nindot nga panag-igsoonay sa Relief Society sa tibuok kalibutan. Sukad niadtong 1842 ang Simbahan mikaylap og maayo lapas sa Nauvoo, ug ang Relief Society makita na karon diha sa sobra sa 175 ka mga nasud, diin ang mga sister nagsulti og kapin sa 80 ka mga pinulongan. Matag semana bag-o nga mga ward ug mga branch ang naorganisar, ug bag-ong mga Relief Society nahimong kabahin sa labihan ka lapad nga panag-igsoonay, “mikatap tabok sa mga kontinente.”¹⁵ Sa dihang ang Relief Society medyo diyutay pa ug naorganisar labi na didto sa Utah, ang mga lider niini maka-focus og maayo sa ilang organisasyon ug pagkadisipulo diha sa lokal nga pampublikong mga programa ug konektado sa buhat sa kahupayan. Nagpalambo sila og mga industriya sa panimalay ug naghimo og mga proyekto sa pagpatukod ug mga ospital ug pagpundo og mga bugas. Kadtong mga paningkamot sa unang Relief Society nakatabang sa paghan-ay og mga sumbanan sa pagkadisipulo nga karon gigamit sa tibuok kalibutan. Samtang ang Simbahan nagtubo, ang Relief Society karon nakahimo sa pagtuman sa mga katuyoan niini sa kada ward ug branch, sa kada stake ug district, samtang nagpahiangay sa kaunayng nag-usab-usab nga kalibutan.

Kada adlaw, ang mga sister sa Relief Society sa tibuok kalibutan nakasinati sa tanang matang sa mortal nga mga hagit ug mga kasinatian. Ang mga kababayan-an ug ang ilang mga pamilya karon nagpuyo nga nag-atubang sa wala matuman nga mga gilauman; mental, pisikal, ug espirituhanon nga sakit; mga aksidente; ug kamatayon. Ang pipila sa mga sister nag-antus sa kamingaw ug kasagmuyo tungod kay sila walay mga pamilya nga ilang kaugalingon, ug ang uban nag-antus sa mga sangputanan sa dili maayong mga pagpili nga gihimo sa mga sakop sa pamilya. Ang pipila nakasinati og gubat o kagutom o natural nga mga katalagman, ug ang uban nakakat-on mahitungod sa pakigbisog sa adiksiyon, pagkawalay trabaho, o kakulang sa edukasyon ug pagbansay. Ang tanan niining mga kalisdanan adunay purohan nga mopakunhod sa hugot nga pagtuo ug mohuyang sa kalig-on sa tagsa-tagsa ug sa mga pamilya. Usa sa mga katuyoan sa Ginoo sa pag-organisar sa mga babaye ngadto sa pagkadisipulo mao ang paghatag og kahupayan nga mobayaw kanila pataas sa “tanang babag sa kalipay ug kalamboan sa babaye.”¹⁶ Sa matag ward ug branch, adunay Relief Society nga may mga sister kinsa makapangayo ug makadawat og pagpadayag ug tambag sa mga lider sa priesthood aron sa paglig-on sa usag usa ug sa paghimo og mga solusyon nga magamit sa ilang kaugalingong mga panimalay ug mga komunidad.

Nanghinaut ako nga ang akong apo nga mga babaye makasabut nga pinaagi sa Relief Society, ang ilang pagkadisipulo malugwayan ug sila mahimong moapil uban sa lain diha sa matang sa talagsaon ug bayanihon nga buhat nga gihimo sa Manluluwas. Ang matang sa buhat nga ang mga sister niini nga Simbahan gimandoan nga buhaton sa atong panahon dili gayud gamay o dili mahinungdanon sa Ginoo. Pinaagi sa ilang pagkamatnud-anon, mabati nila ang Iyang pag-uyon ug mapanalanginan sa pagpakig-uban sa Iyang Espiritu.

Ang akong apo nga mga babaye kinahanglan usab nga mahibalo nga ang panag-igsoonay sa Relief Society makahatag og usa ka dapit sa kasiguroan,

dalangpan, ug proteksyon.¹⁷ Samtang ang atong panahon nag-anam og kalisud, ang matnud-anong mga sister sa Relief Society magkahiusa sa pagpanalipod sa mga panimalay sa Zion gikan sa mahait nga mga tingog sa kalibutan ug sa madanihon ug masugyutong impluwensya sa kaaway. Ug pinaagi sa Relief Society, sila matudloan ug malig-on ug dayon mas matudloan ug mas malig-on, ug ang impluwensya sa matarung nga mga babaye makapanalangin og daghan pa nga mga anak sa atong Amahan.

Usa ka Pagkadisipulo kalabut sa Pag-amuma ug Pagpangalagad

Nanghinaut ako nga ang akong apo nga mga babaye makasabut nga ang visiting teaching usa ka pagpahayag sa ilang pagkadisipulo ug importanting paagi sa pagtahud sa ilang mga pakigsaad. Kini nga elemento sa atong pagkadisipulo kinahanglan susama sa pagpangalagad sa atong Manluluwas. Sa unang mga adlaw sa Relief Society, usa ka visiting committee gikan sa kada ward midawat og buluhaton sa pagtan-aw sa mga panginahanglan ug pagkolekta sa mga donasyon nga iapud-apod niadtong nanginahanglan. Sa tanang mga katuigan, ang mga sister sa Relief Society ug ang mga lider nakakat-on matag karon ug unya ug napalambo ang ilang abilidad sa pag-amuma sa uban. Dihay mga panahon nga ang mga sister mas mihatag og importansya sa pagkompleto sa mga pagbisita, pagtudlo sa mga leksyon, ug sa pagbilin og mga pahibalo kon kanus-a sila mianha sa mga panimalay sa ilang mga sister. Kining naandan nga mga buluhaton nakatabang sa mga sister sa pagkat-on og mga sumbanan sa pag-amuma. Sama sa katawhan sa panahon ni Moises nga nag-focus sa pagtipig og taas nga listahan sa mga lagda, ang mga sister sa Relief Society usahay mohatag og daghang sinulat ug dili sinulat nga mga lagda diha sa ilang kaugalingon tungod sa ilang tinguha nga makasabut kon unsaon paglig-on sa usag usa.

Tungod sa daghang panginahanglan alang sa paghupay ug pagluwas sa mga kinabuhi sa mga sister ug sa ilang

mga pamilya karon, ang atong Langitnong Amahan nagkinahanglan kanato nga mosubay og mas maayong dalan ug mopakita sa atong pagkadisipulo pinaagi sa sinserong pag-amuma sa Iyang mga anak. Tungod sa paghuna-huna niining importante nga katuyoan, ang mga lider karon gitudloan sa pagpangayo og mga report mahitungod sa espirituhanon ug temporal nga kaayohan sa mga sister ug sa ilang mga pamilya ug mahitungod sa serbisyo nga gihatag.¹⁸ Karon ang mga visiting teacher adunay responsibilidad nga sa “kinasingkasing ilhon ug higugmaon ang kada sister, tabangan siyang malig-on ang iyang pagtuo, ug hatagan og serbisyo.”¹⁹

Ingon nga may pasalig nga mga disipulo sa Manluluwas, naglambo kita sa atong abilidad sa pagbuhat sa mga butang nga Iyang buhaton kon Siya ania pa unta dinhi. Nahibalo kita nga alang Kaniya ang atong pag-amuma mao ang importante, ug busa kita naningkamot sa pag-focus diha sa pag-amuma sa atong mga sister kay sa paghuman sa mga listahan sa mga butang nga buhatunon. Ang tinuod nga pagpangalagad mas masukod pinaagi sa giladmon sa atong gugmang putli kay sa kahingpit sa atong mga numero. Kita masayud nga kita nagmalampuson sa atong pagpangalagad isip mga visiting teacher kon ang atong mga sister makai-ngon, “Ang akong visiting teacher nagtabang kanako nga molambo sa espirituhanong paagi” ug “Ako nasa-yud nga ang akong visiting teacher

Itu, Brazil



nagpakabana og maayo kanako ug sa akong pamilya” ug “Kon ako adunay mga problema, ako nahibalo nga ang akong visiting teacher molihok nga dili maghulat og hangyoon.” Ang mga lider kinsa nakasabut sa importansya sa pagpangalagad sa uban magtinambagay sa pagpangayo ug pagdawat og pagpadayag mahitungod kon unsaon sa paglig-on sa mga visiting teacher ug kon unsaon sa paghan-ay ug pagtuman sa dinasig nga pagpangalagad.

Dugang pa, ang visiting teaching mao ang sumpay sa katungdanan sa bishop sa pag-amuma sa panon sa Ginoo. Ang bishop ug ang presidente sa Relief Society nagkinahanglan sa serbisyo sa dinasig nga mga visiting teacher sa pagtabang kanila sa pagtuman sa ilang mga responsibilidad. Pinaagi sa pagpangalagad sa mga visiting teacher, ang usa ka presidente sa Relief Society makahibalo sa kahimtang sa kada sister sa ward ug moreport mahitungod sa ilang kahimtang kon siya makigsulti sa iyang bishop.

Si Presidente Thomas S. Monson nagtudlo kanato nga “kon maningkamot kita uban ang hugot nga pagtuo nga walay pagduha-duha sa pagtuman sa mga responsibilidad nga gipabuhat kanato, kon mangita kita sa inspirasyon sa Makagagahum alang sa paghimo sa atong mga responsibilidad, makab-ot nato ang mga milagro.”²⁰ Manghinaut ako nga ang akong apo nga mga babaye moapil sa mga milagro samtang sila motabang sa visiting teaching nga mahimong sumbanan sa pagkadisipulo nga ilhon sa Ginoo kon Siya moanhi pag-usab.

Pagtuman sa mga Katuyoan sa Relief Society

Kini ug ang uban nga importanting mga pagtulun-an mahitungod sa Relief Society anaa karon aron matun-an sa akong apo nga mga babaye diha sa *Anak nga mga Babaye sa Akong Ginghamian: Ang Kasaysayan ug Buhat sa Relief Society*. Kini nga basahon naglangkob og rekord sa kabilin sa Relief Society ug sa mga babaye niini nga Simbahan. Kini mohiusa ug mosuporta sa panag-igsoonay sa tibuok kalibutan uban sa mga katuyoan sa



Relief Society ug sa mga sumbanan ug mga pribilehiyo sa mga disipulo. Kini usa ka saksi sa importansya sa tahas sa mga mga babaye diha sa plano sa kalipay sa atong Amahan, ug kini naghatag ug dili matarug nga sukaranan sa unsay atong gituohan, unsay atong gibuhat, ug unsay atong panalipdan. Ang Unang Kapangulohan nag-awhag kanato sa “pagtuon niini nga basahon ug sa pagtugot nga ang walay sukod nga mga kamatuoran ug ang dinasig nga mga ehemplo niini moimpluwen-sya sa [atong] kinabuhi.”²¹

Kay nasayud nga ang organisasyon sa Relief Society balaanong gimugna, si Presidente Joseph F. Smith misulti sa mga sister sa Relief Society: “Angay alang kaninyo nga modumala sa kalibutan ug modumala labi na ngadto sa mga babaye sa kalibutan. . . . Kamo ang mga ulo,” siya miingon, “dili ang ikog.”²² Samtang ang panahon sa pagbalik sa Ginoo nagkaduol na, nanghinaut ako nga ang akong apo nga mga babaye mahimong lig-on, matinud-anon nga mga babaye kinsa mogamit sa mga baruganan ug mga sumbanan sa Relief Society sa ilang kinabuhi. Samtang ang Relief Society mahimong paagi sa kinabuhi alang kanila, nanghinaut ako nga moalagad sila diha sa panaghiusa sa uban sa pagtuman sa balaang mga katuyoan niini. Ako adunay pagpamatuod sa tinuod nga gipahiuli nga Simbahan ni Jesukristo, ug ako mapasalamaton alang sa sumbanan sa pagkadisipulo

nga gipahiuli sa dihang ang Ginoo midasig kang Propeta Joseph Smith sa pagtukod sa Relief Society. Sa pangalan ni Jesukristo, amen. ■

MUBO NGA MGA SULAT

1. *Anak nga mga Babaye sa Akong Ginghamian: Ang Kasaysayan ug Buhat sa Relief Society* (2011), 3.
2. Tan-awa sa Lucas 10:38–42.
3. Tan-awa sa Juan 11:20–27.
4. Tan-awa sa Mga Buhat 18:24–26; Mga Taga-Roma 16:3–5.
5. Tan-awa sa Mga Taga-Filipos 4:1–4.
6. Tan-awa sa Doktrina ug mga Pakigsaad 25.
7. Joseph Smith, sa *Anak nga mga Babaye sa Akong Ginghamian*, 14.
8. Joseph Smith, sa *History of the Church*, 4:567–68.
9. Mga Artikulo sa Hugot nga Pagtuo 1:5.
10. Joseph Fielding Smith, sa *Anak nga mga Babaye sa Akong Ginghamian*, 113.
11. Joseph Smith, sa *Anak nga mga Babaye sa Akong Ginghamian*, 18.
12. Tan-awa sa Doktrina ug mga Pakigsaad 109:22; tan-awa usab sa Sheri L. Dew, sa *Anak nga mga Babaye sa Akong Ginghamian*, 152.
13. Doktrina ug mga Pakigsaad 84:19; tan-awa usab sa Ezra Taft Benson, sa *Anak nga mga Babaye sa Akong Ginghamian*, 153.
14. *Anak nga mga Babaye sa Akong Ginghamian*, 157.
15. Boyd K. Packer, sa *Anak nga mga Babaye sa Akong Ginghamian*, 118.
16. John A. Widtsoe, sa *Anak nga mga Babaye sa Akong Ginghamian*, 30.
17. Tan-awa sa *Anak nga mga Babaye sa Akong Ginghamian*, 86–97.
18. Tan-awa sa *Handbook 2: Administering the Church* (2010), 9.5.4.
19. *Handbook 2*, 9.5.1.
20. Thomas S. Monson, sa *Anak nga mga Babaye sa Akong Ginghamian*, 107.
21. Unang Kapangulohan, sa *Anak nga mga Babaye sa Akong Ginghamian*, ix.
22. Joseph F. Smith, sa *Anak nga mga Babaye sa Akong Ginghamian*, 78.



Ni Silvia H. Allred

Unang Magtatambag sa Kinatibuk-ang Kapangulohan sa Relief Society

Ang Gugma nga Putli Dili Gayud Mopakyas

Pangamuyo alang sa tinguha nga mapuno sa gasa sa gugmang putli, ang tiunay nga gugma ni Kristo.

Ang akong bana ug ako bag-ohay lang nga mibisita sa siyudad sa Nauvoo, Illinois. Samtang didto nanglingkod kami sa kwarto sa taas sa Red Brick Store, diin didto ang opisina ug negosyo ni Propeta Joseph Smith. Naminaw kami og maayo sa tour guide, kinsa mihatag og pipila ka makasaysayanong mga hitabo sa Pagpahiuli nga nahitabo didto.

Nahunahuna nako ang sinugdanan sa Relief Society ug ang pipila sa mga pagtulun-an nga nadawat sa mga sister sa Relief Society gikan ni Propeta Joseph Smith diha niana gayud nga lawak. Kadto nga mga pagtulun-an nahimong unang mga baruganan diin ang Relief Society natukod. Ang mga katuyoan sa pagpalambo sa pagtuo, paglig-on sa mga pamilya sa Zion, ug sa pagpangita ug sa pagtabang niadtong kinsa nanginahanglan gitukod sukad sa sinugdanan. Kanunay gayud kining nahisubay sa mga pagtulun-an sa atong mga propeta.

Usa niadtong unang mga miting, si Propeta Joseph Smith mikutlo gikan sa mga sinulat ni Pablo ngadto sa mga taga-Corinto. Sa iyang gamhanan nga pakigpulong bahin sa gugmang putli, nagpasabut si Pablo sa hugot nga

pagtuo, paglaum, ug sa gugmang putli, gitapos uban sa “Apan ang labing dako niini mao ang gugma nga putli.”¹

Gihulagway niya ang mga kalidad nga anaa sa gugmang putli. Siya miingon:

“Ang gugma mapailubon, ug mapu-anguron; ang gugma dili masinahon; ang gugma dili tigpaburot, dili bastos, “. . . Dili maakop-akopon, dili masak-anon, o maligutguton;

“Wala magakalipay sa mga buhat nga dili matarung, hinonoo naga-kalipay kini sa mga butang nga maminatud-on;

“Mopailub sa tanang mga butang, motuo sa tanang mga butang, molaum sa tanang mga butang, moantus sa tanang mga butang.

“Ang gugma nga putli dili gayud mopakyas.”²

Namulong ngadto sa mga sister, si Propeta Joseph Smith miingon: “Ayaw limitahi ang inyong mga panan-aw kabahin sa mga hiyas sa inyong mga silingan. . . . Kinahanglan nga inyong ablihan ang inyong mga kalag alang sa uban kon magbuhat kamo og sama kang Jesus. . . . Samtang maglambo kamo sa kainosente ug sa hiyas, samtang maglambo kamo sa pagkamaayo,

ablihi ang inyong mga kasingkasing—ablihi kini alang sa uban—kinahanglan nga magmainantuson kamo ug mosabut sa mga kasaypanan ug sayop sa isigkatawo. Pagkabilihon sa mga kalag sa tawo!”³

Ang pamahayag sa kasulatan nga “Ang gugma nga putli dili gayud mopakyas” nahimong motto sa Relief Society tungod kay naglakip kini sa mga pagtulun-an ug sa responsibilidad nga gihatag ni Propeta Joseph Smith sa mga sister sa Relief Society sa “paghupay sa mga kabus” ug sa “pagluwas sa mga kalag.”⁴

Kining sinugdanan nga mga baruganan gidawat sa mga sister sa Relief Society sa tibuok kalibutan, kay ingon niana ang kinaiyahan sa buluhaton sa Relief Society.

Unsa ang gugmang putli? Sa unsa nga paagi kita makaangkon og gugmang putli?

Si Propeta Mormon nagpasabut sa gugmang putli isip “ang tiunay nga gugma ni Kristo,”⁵ samtang si Pablo nagtudlo nga ang “gugmang putli . . . mao ang magabugkos sa tanan ngadto sa usa ka hingpit nga panagkaangay,”⁶ ug si Nephi nagpahinumdom nato nga “ang Ginoong Dios naghatag og usa ka sugo nga ang tanan nga mga tawo magbaton og gugmang putli kansang gugma nga putli tiunay nga gugma.”⁷

Sa pagribyu sa miaging paghulagway ni Pablo sa gugmang putli, atong nakat-unan nga ang gugmang putli dili usa lang ka lihok o butang nga atong ipanghatag, apan usa ka kahimtang sa pagkatawo, kahimtang sa kasingkasing, mga pagbati nga mamunga og mahigugmaong mga lihok.

Nagtudlo usab si Mormon nga ang gugmang putli gihatag ngadto sa tinuod nga mga disipulo ni Kristo ug nga ang gugmang putli nagputli niadtong kinsa aduna niini.⁸ Dugang pa, atong nakat-unan nga ang gugmang putli balaan nga gasa nga kinahanglang atong tinguhaon ug i-ampo. Kita kinahanglan nga adunay gugmang putli sa atong kasingkasing aron maka-panunod sa celestial nga gingharian.⁹

Uban sa pagsabut nga ang Ginoong nagsugo kanato sa “pagsul-ob sa [atong] mga kaugalingon uban sa

higot sa gugmang putli ni Kristo,”¹⁰ kita mangutana kon unsang mga kalidad ang motabang nato sa pagpalambo og gugmang putli.

Kita kinahanglan unang magbaton og tinguha sa pagpalambo og gugmang putli ug mas mahisama ni Kristo.

Ang sunod nga lakang mao ang pag-ampo. Si Mormon nag-awhag nato sa “pag-ampo ngadto sa Amahan uban sa tibuok kusog sa kasingkasing, nga [kita] unta mapuno niini nga gugma.” Kini nga diosnong gugma mao ang gugmang putli, ug samtang kita napuno uban niini nga gugma, sa ingon “kita mahisama Kaniya.”¹¹

Ang pagbasa matag adlaw sa mga kasulatan makadala sa atong mga hunahuna ngadto sa Manluluwas ug ngadto sa tinguha nga mas mahisama Kaniya.

Sa akong opisina, gipili nakong ibitay ang painting ni Minerva Teichert nga giulohan og *Rescue of the Lost Lamb [Pagluwas sa Nawala nga Nating Karnero]*. Kini nagpakita sa Manluluwas nga nagbarug taliwala sa Iyang mga karnero ug mahigugmaong nagkugos og nating karnero. Nagtabang kini nako sa paghunahuna sa iyang hangyo: “Tagda ang akong mga karnero,”¹² nga alang kanako nagpasabut sa pagpangalagad sa tanang naglibut ninyo ug sa paghatag og espesyal nga pagtagad niadtong nanginahanglan.

Ang Manluluwas mao ang hingpit nga ehemplo kon unsaon sa paghatag og gugmang putli. Sa panahon sa Iyang mortal nga pangalagad mipakita Siya og kalooy sa mga gigutom, sa mga makasasala, sa mga gisakit, ug sa mga masakiton. Nangalagad Siya sa mga kabus ug sa mga adunahan;

Itu, Brazil



sa mga babaye, mga bata, ug mga lalaki; sa pamilya, mga higala, ug mga langyaw. Mipasaylo Siya sa Iyang mga tigpasangil, ug Siya miantus ug nagpakamatay alang sa tanang katawhan.

Sa iyang tibuok kinabuhi gibuhahat usab ni Propeta Joseph Smith ang gugmang putli samtang mihatag siya ug inigsoong gugma ug pagtahud ngadto sa uban. Gibantug siya sa iyang pagkamabination, gugma, kalooy, ug kahingawa alang niadtong naglibut kaniya.

Karon gipanalanginan kita nga makabaton og propeta kinsa ehemplo sa gugmang putli. Si Presidente Thomas S. Monson maoy usa ka ehemplo alang nato ug alang sa kalibutan. Nagsul-ob siya sa kupo sa gugmang putli. Siya mabination, maloloy-on, ug manggihatagon; usa ka tinuod nga tigpangalagad ni Ginoong Jesukristo.

Si Presidente Monson nagtudlo: “Ang gugmang putli mao ang pag-angkon og pailub ngadto sa tawo nga mipakaubos kanato. Kini ang pagbatok sa aghat sa pagkadaling masilo. Kini ang pagdawat sa kahuyang ug mga kasaypanan. Kini ang pagdawat sa mga tawo kon unsa man gayud sila. Kini ang pagtan-aw lapas sa pisikal nga panagway ngadto sa kinaiya nga dili mapalong sa pagdagan sa panahon. Kini ang pagbatok sa aghat sa pagkategoriya sa uban.”¹³

Kon kita adunay gugmang putli, kita andam sa pagserbisyo ug pagtabang sa uban bisan kini hasol ug dili maghunahuna nga pasidunggan o bayran. Kita dili maghulat nga suguon sa pagtabang, tungod kay kini nahimo na nga atong kinaiya. Samtang kita nagpili nga magmabination, mapinanggaon, mahatagon, mapailubon, madawaton, mapasayloon, matuguton, ug dili hakog, atong madiskubrehan nga puno kita sa gugmang putli.

Ang Relief Society naghatag og dili maihap nga mga paagi sa pagserbisyo sa uban. Usa sa labing importanting paagi sa pagbuhat og gugmang putli mao ang pinaagi sa visiting teaching. Pinaagi sa epektibong visiting teaching kita dunay daghang oportunidad

sa paghigugma, pagpangalagad, ug pagserbisyo sa uban. Ang pagpahayag og gugmang putli, o gugma, nagputli ug nagbalaan sa atong mga kalag, nagtabang nato nga mas mahisama sa Manluluwas.

Ako nahibulong samtang ako nagsaksi sa dili maihap nga mga buhat sa gugmang putli nga gihimo kada adlaw sa mga visiting teacher sa tibuok kalibutan kinsa sa walay paghinakog nangalagad sa mga panginahanglan sa kada sister ug sa ilang mga pamilya. Ngadto niining matinuorong mga visiting teacher, ako moingon, pinaagi sa gagmay nga mga lihok sa gugmang putli, kamo nagsunod sa Manluluwas ug kamo naglihok isip himan sa Iyang mga kamot samtang kamo nagtabang, nag-amuma, nagbayaw, naghupay, naminaw, nag-awhag, nagmatuto, nagtudlo, ug naglig-on sa mga sister ubos sa inyong pag-amuma. Tuguti akong makigbahin og mubo nga mga ehemplo sa maong pagpangalagad.

Nag-antus si Rosa sa makaluya nga diabetes ug ubang mga sakit. Mipasakop siya sa Simbahan pipila ka tuig na ang milabay. Siya usa ka inahan nga walay bana nga may bayong-bayong nga anak. Kanunay siya nga ipaospital sulod sa pipila ka adlaw matag karon ug unya. Ang mabination niyang mga visiting teacher dili lamang modala niya sa ospital, apan mobisita ug mohupay niya sa ospital samtang nagbantay usab sa iyang anak nga lalaki sa panimalay ug sa eskwelahan. Ang iyang mga visiting teacher nagbarug isip iyang mga higala ug pamilya.

Human sa unang pila ka mga pagbisita sa usa ka piho nga sister, nadiskubrehan ni Kathy nga kini nga sister dili kahibalo nga mobasa apan gusto nga makakat-on. Mitanyag si Kathy sa pagtabang niya bisan siya nasayud nga kini nagkinahanglan og panahon, pailub, ug pag-unong.

Si Emily usa ka batan-ong asawa kinsa nangita sa kamatuoran. Ang iyang bana, si Michael, dili kaayo interesado sa relihiyon. Sa dihang nasakit si Emily ug naospital og dugay-dugay, si Cali, usa ka Relief Society sister kinsa iya usab nga silingan, midala og



mga pagkaon sa pamilya, mibantay sa ilang gamay nga bata, milimpyo sa ilang balay, ug mipahigayon nga si Emily makadawat og panalangin sa priesthood. Kini nga mga lihoc sa gugmang putli mipahumok sa kasingkasing ni Michael. Mihukom siya sa pagtambong sa mga miting sa Simbahan ug sa pagpakigkita sa mga misyonaryo. Si Emily ug si Michael bag-o lang nga gibunyagan.

“Ang gugma nga putli dili gayud mopakyas. . . . Ang gugmang putli . . . mabination, . . . dili maakop-akupon, . . . mopailub sa tanang mga butang, moantus sa tanang mga butang.”¹⁴

Si Presidente Henry B. Eyring miingon:

“Ang kasaysayan sa Relief Society puno sa mga asoy sa ingon ka makahuluganon nga walay paghinakog nga pag-alagad. . . .

“Kini nga kapunongan naglangkob sa mga kababayan-an kansang pagbati sa gugmang putli nagtubod gikan sa mga kasingkasing nga nausab pinaagi sa pagpasarang ug pinaagi sa paghupot sa mga pakigsaad nga gitanyag lamang sa tinuod nga Simbahan sa Ginoo. Ang ilang pagbati sa tiunay nga gugma naggikan Kaniya sa Iyang Pag-ula. Ang ilang mga buhat sa gugma nga putli gigiyahan sa Iyang ehem-plo—ug nahimong mapasalamaton alang sa Iyang walay kinutuban nga gasa sa kalooy—ug pinaagi sa Balaang Espiritu, nga Iyang gipadala aron

pag-uban sa Iyang mga sinugo sa ilang mga misyon sa kalooy. Tungod niana, sila naghimo ug nakahimo sa pagbuhat og dili sagad nga mga butang alang sa uban ug sa pagpangita og kalipay bisan og daghan ang ilang kaugalingon nga mga panginahanglan.”¹⁵

Ang pagserbisyo ug paghatag og gugmang putli ngadto sa uban nagtabang nato sa pagbuntog sa atong kaugalingong mga kalisud ug naghimo niini nga dili kaayo mahagiton.

Mobalik ako karon sa mga pagtulun-an ni Propeta Joseph Smith ngadto sa mga sister sa unang mga panahon sa Pagpahiuli. Nagsugyot sa mga buhat sa gugmang putli ug sa pagkamaloloy-on, miingon siya: “Kon kamo mopuyo sumala niini nga mga baruganan, unsa ka dako og ka mahimayaon ang inyong ganti sa celestial nga gingharian! Kon kamo mopuyo sumala sa inyong mga pribilehiyo, ang mga anghel dili mapugngan nga mahimo ninyong mga kauban.”¹⁶

Sama sa unang mga panahon didto sa Nauvoo, diin ang mga sister miadto sa pagpangita ug sa pagtabang niadtong nanginahanglan, mao usab kini karon. Ang mga sister sa gingharian mga gamhanang haligi sa espirituhanong kalig-on, maloloy-ong serbisyo, ug debosyon. Ang kugihan nga mga visiting teacher nagbisita ug nag-amuma sa usag usa. Nagsunod sila sa ehemplo sa Manluluwas ug nagbuhat sama sa Iyang gibuhat.

Ang tanang kababayan-an sa Relief Society mahimong mapuno sa gugma, nasayud nga ang ilang gagmay nga mga lihoc sa gugmang putli adunay gahum sa pag-ayo sa uban ug sa ilang kaugalingon. Masayud sila uban sa kasigurohan nga ang gugmang putli mao ang tiunay nga gugma ni Kristo ug dili gayud mopakyas.

Kon inyong basahon ang kasaysayan sa Relief Society, kini modasig ninyo sa pagdiskobre nga kining importanting baruganan sa ebanghelyo usa ka gitagik nga hilo sa tibuok nga basahon.

Akong tapuson uban sa pagdapit sa tanang babaye sa Simbahan sa pagpangamuyo alang sa tinguha nga mapuno sa gasa sa gugmang putli, ang tiunay nga gugma ni Kristo. Gamita ang tanan ninyong mga kapangulahan sa pagbuhat og maayo, magdala og kahupayan ug kaluwasan niadtong naglibut ninyo, lakip ang inyong kaugalingong pamilya. Ang Ginoo mopurong-purong sa inyong mga kahago uban sa kalampusan.

Unta ang atong kahibalo sa dakong gugma sa atong Amahan ug sa Anak alang kanato, ug ang atong hugot nga pagtuo ug pasalamat sa Pag-ula, mopalihok kanato sa pagpalambo ug sa pagbuhat og gugmang putli ngadto sa tanang naglibut kanato. Kini ang akong pag-ampo sa pangalan ni Jesu-kristo, amen. ■

MUBO NGA MGA SULAT

- 1 Mga Taga-Corinto 13:13.
- 1 Mga Taga-Corinto 13:4–8.
- Joseph Smith, sa *Anak nga mga Babaye sa Akong Ginghamarian: Ang Kasaysayan ug Buhat sa Relief Society* (2011), 27.
- Joseph Smith, sa *Anak nga mga Babaye sa Akong Ginghamarian*, 20.
- Moroni 7:47.
- Mga Taga-Colosas 3:14.
- 2 Nephi 26:30.
- Tan-awa sa Moroni 7:48.
- Tan-awa sa Ether 12:34; Moroni 10:21.
- Doktrina ug mga Pakigsaad 88:125.
- Moroni 7:48.
- Tan-awa sa Juan 21:16–17.
- Thomas S. Monson, “Ang Gugma nga Putli Dili Gayud Mopakyas,” *Liahona*, Nob. 2010, 124.
- 1 Mga Taga-Corinto 13:4, 5, 7, 8.
- Henry B. Eyring, “Ang Malungtaron nga Kabilin sa Relief Society,” *Liahona*, Nob. 2009, 121.
- Mga Pagtulun-an sa mga Presidente sa Simbahan: Joseph Smith* (2007), 549.



Ni Barbara Thompson

Ikaduhang Magtatambag sa Kinatibuk-ang Kapangulohan sa Relief Society

Hupot ngadto sa mga Pakigsaad

Samtang kita adunay hugot nga pagtuo diha ni Kristo ug naghupot ngadto sa atong mga pakigsaad, atong madawat ang kalipay nga gipamulong diha sa balaan nga mga kasulatan ug gisaad pinaagi sa atong mga propeta sa ulahing mga adlaw.

Pataas ang imong kasingkasing ug paglipay, ug hupot ngadto sa pakigsaad nga ikaw mihimo.”¹ Dili nako mabasa kining kasulatan nga dili mobati og kalipay. Nagmaya ang akong kasingkasing samtang naghunahuna ko sa mga saad ug sa daghang mga panalangin nga nahimong kabahin sa akong kinabuhi samtang naningkamot ko sa paghupot ngadto sa mga pakigsaad nga akong gihimo ngadto sa Langitnong Amahan.

Tungod kay ang akong mga ginikanan namatay na, importante nga niining tuiga sa paglimpyo sa ilang panimalay aron andamon kini nga mabaligya. Niining milabayng pipila ka bulan, samtang ang akong mga igsoon ug ako nanglimpyo ug nanghapnig sa panimalay sa akong mga ginikanan, nakit-an namo ang mga kasaysayan sa pamilya ug daghang importanting mga papeles ug mga dokumento. Nahimong madanihon ang pagbasa sa personal nga mga kasaysayan ug sa patriyarkal nga mga panalangin sa akong mga ginikanan ug mga apohan.

Napahinumduman ko sa mga pakigsaad nga ilang gihimo ug gihuptan.

Ang akong apohang babaye nga si Ellen Hanks Rymer usa ka batan-ong inahan niadtong 1912 sa dihang iyang nadawat ang iyang patriyarkal nga panalangin. Sa diha nga akong gibasa ang iyang panalangin, kini nga mga linya mipatigbabaw ug mipabilin sa akong hunahuna. “Ikaw gipili gikan sa wala pa ang katukuran sa yuta, ug usa ka pinili nga espiritu nga motungha niining adlaw. . . . Ang imong pagpamatuod mapadako ug ikaw makahimo sa pagpamatuod. . . . Ang tiglaglag naningkamot sa paglaglag kanimo, apan kon ikaw mohupot ngadto sa imong Dios, siya [ang tiglaglag] dili makabaton og gahum sa pagdaut kanimo. Pinaagi sa imong pagkamatinud-anon ikaw makabaton og dakong gahum ug ang tiglaglag mopalayo gikan kanimo tungod sa imong pagkamatarung . . . Kon ang takna sa kahadlok ug mga pagsulay moabut kanimo kon ikaw motago aron mag-ampo ang imong kasingkasing pagahupayon ug ang

mga kalisud mawala.”²

Ang akong apohan nga babaye gisaaran nga kon siya mohupot sa iyang mga pakigsaad ug mopaduol sa Dios, si Satanás dili makabaton og gahum batok kaniya. Makaplagan niya ang kahupayan ug panabang sa iyang mga pagsulay. Kini nga mga saad natuman diha sa iyang kinabuhi.

Karong adlaw buot akong mosulti mahitungod sa (1) importansya sa paghupot ngadto sa mga pakigsaad ug (2) kalipay ug proteksyon nga moabut tungod sa paghupot ngadto sa atong mga pakigsaad.

Ang pipila sa mga ehemplo nga akong gamiton magagikan sa *Anak nga mga Babaye sa Akong Gingharian: Ang Kasaysayan ug Buhat sa Relief Society*. Ang basahon puno sa mga ehemplo sa kababayan-an kinsa nakakaplag og dakong kalipay diha sa paghupot ngadto sa mga pakigsaad.

Ang Importansya sa Paghupot ngadto sa mga Pakigsaad

Ang Bible Dictionary nagsulti nato nga ang usa ka pakigsaad maoy usa ka kontrata nga gihimo tali sa Dios ug sa tawo. “Ang Dios sumala sa iyang kaayo naghan-ay sa mga kasabutan, diin gidawat sa tawo. . . . Ang ebanghelyo gihan-ay sa ingon aron ang mga baruganan ug mga ordinansa pagadawaton pinaagi sa pakigsaad nga magbutang sa tigawat ubos sa dakong obligasyon ug responsibilidad sa pagtahud sa pasalig.”³ Sa hugpong sa mga pulong nga “hupot ngadto sa mga pakigsaad,” ang pulong *hupot* nagpasabut og “lig-on ug hugtanong magpabilin” ngadto sa usa ka butang.⁴

Sa mga kasulatan atong nailhan ang mga lalaki ug mga babaye kinsa nakahimo og mga pakigsaad ngadto sa Dios. Ang Dios naghatag og mga panudlo kon unsay buhaton sa pagtahud niadtong mga pakigsaad, ug dayon samtang kadto nga mga pakigsaad gihuptan, ang gisaad nga mga panalangin nagsunod.

Sama pananglit, pinaagi sa ordinansa sa bunyag, naghimo kita og pakigsaad ngadto sa atong Langitnong Amahan. Nag-andam kita sa atong kaugalingon alang sa bunyag pinaagi

sa pagbaton og hugot nga pagtuo diha ni Ginoong Jesukristo, naghinulsol sa atong mga sala, ug nagpakaandam sa pagdala diha kanato sa pangalan ni Kristo. Naghimo kita og pasalig sa paghupot sa mga sugo sa Dios ug sa paghinumdom sa Manluluwas kanunay. Nakigsaad kita sa “pagtambaya-yong sa usag usa nga mga alantuson, nga sila mahimo nga magaan.” Nagpakita kita nga andam sa pagbangutan uban niadtong nagbangutan ug sa paghupay niadtong nagkinahanglan sa kahupayan.⁵

Sa balaan nga mga templo ang uban nga sagradong mga ordinansa dawaton ug ang uban nga mga pakigsaad himoon. Sa unang mga adlaw sa Pagpahiuli, si Propeta Joseph Smith matinguhaon alang sa mga Santos nga makabaton sa gisaad nga mga panalangin sa templo. Ang Ginoo miingon, “Himoa kini nga balay nga matukod ngadto sa akong ngalan, aron Ako mopadayag sa akong mga ordinansa diha niini ngadto sa akong mga katawhan.”⁶

“Usa sa mga katuyoan sa Ginoo sa pag-organisar sa Relief Society mao ang pag-andam sa Iyang anak nga mga babaye alang sa mas dagko pang panalangin sa priesthood nga anaa sa mga ordinansa ug mga pakigsaad sa templo. Ang . . . mga sister sa Nauvoo nagpaabut sa pagkahuman sa templo uban ang tumang kahinam, kay sila nasayud, sigon sa gisaad ni Propeta Joseph Smith kang Mercy Fielding Thompson, nga ang endowment modala kanila ‘paggawas sa kangitngit ngadto sa hilabihang kahayag.’”⁷

“Kapin sa 5,000 ka mga Santos ang nagdasok sa Templo sa Nauvoo human sa pagpahinungod niini aron madawat nila ang endowment ug ordinansa sa pagbugkos sa dili pa mobiya alang sa ilang biyahe” ngadto sa Salt Lake Valley.⁸ Si Presidente Brigham Young ug daghang mga lider sa Simbahan ug mga nagtrabaho sa templo mihatag sa ilang panahon, adlaw ug gabii, sa pagserbisyo diha sa templo aron kining importanting buhat mapahigayon alang sa mga Santos.

Ang atong mga pakigsaad nagpahunay kanato sa maayong mga panahon o sa malisud nga mga panahon. Si

Presidente Boyd K. Packer mipahinumdom kanato nga “kita mga tawo sa pakigsaad. Kita nakigsaad sa paghatag sa atong mga kapanguhaan sa panahon ug panalapi ug talento—tanang kon unsa kita ug tanang nga atong gipaniagiya—ngadto sa kaayohan sa gingharian sa Dios dinhi sa yuta. Sa yano nga mga pulong, kita nakigsaad sa pagbuhat og maayo. Kita mga tawo sa pakigsaad, ug ang templo mao ang sentro sa atong mga pakigsaad. Kini mao ang tinubdan sa pakigsaad.”⁹

Ang mga kasulatan nagpahimangno kanato, “Ug kini mahimo nga atong pakigsaad—nga kita maglakaw diha sa tanang nga mga ordinansa sa atong Ginoo.”¹⁰

Dagko ang mga panalangin nga atong madawat samtang kita naghupot ngadto sa atong mga pakigsaad.

Kalipay ug Proteksyon Moabut tungod sa Atong Paghupot sa mga Pakigsaad

Diha sa Basahon ni Mormon atong mabasa ang wali ni Haring Benjamin. Gitudloan niya ang katawhan mahitungod ni Jesukristo, nga Siya moanhi sa yuta ug moantus sa tanang matang sa mga kasakit. Gitudloan niya ang katawhan nga si Kristo moula alang sa mga sala sa tanang katawhan ug nga ang Iyang pangalan mao lamang ang pangalan diin ang tawo makaangkon og kaluwasan.¹¹

Human maminaw niining maminindot nga mga pagtulun-an, ang katawhan nahimong mapainubsanon ug naninguha sa ilang tibuok kasingkasing nga maluwas gikan sa sala ug mahimong putli. Sila naghinulsol ug mipadayag sa ilang hugot nga pagtuo diha ni Jesukristo. Sila mihimo og mga pakigsaad ngadto sa Dios nga sila mosunod sa Iyang mga sugo.¹²

“Ang Espiritu sa Ginoo midangat diha kanila, ug sila napuno sa hingpit nga kalipay, ingon nga nakadawat og usa ka kapasayloan sa ilang mga sala, ug nagbaton og kalinaw sa ilang tanlag, tungod sa naghingapin nga hugot nga pagtuo diin sila aduna diha kang Jesukristo.”¹³

Lain nga ehemplo sa kalipay nga nagagikan pinaagi sa pagkamatinudanon sa pagsunod sa mga sugo sa

Dios ug sa pagpakigbahin sa Iyang ebanghelyo ngadto sa uban gipakita ni Ammon. Si Ammon ug ang iyang mga igsoon nahimong mga instrumento sa pagtabang sa liboan ka mga tawo sa pagduol ngadto kang Kristo. Kini ang pipila sa mga pulong nga gigamit ni Ammon sa paghulagway sa iyang mga pagbati samtang daghan nga mga tawo ang gibunyagan ug mihimo og mga pakigsaad ngadto sa Dios:

“Unsa ka dako ang katarungan nga kita maglipay.”¹⁴

“Ang akong hingpit nga kalipay napuno, oo, ang akong kasingkasing tugob sa hingpit nga kalipay, ug ako maglipay diha sa akong Dios.”¹⁵

“Ako dili makasulti sa kinagamyan nga bahin sa akong gibati.”¹⁶

“Wala pay mga tawo nga adunay dako kaayo nga katarungan sa paglipay sama kanato.”¹⁷

Ang paghimo ug paghupot og sagrado nga mga pakigsaad naghimo kanato sa pagbaton sa Balaang Espiritu uban kanato. Kini mao ang Espiritu nga “mopuno sa imong kalag uban sa hingpit nga kalipay.”¹⁸

Ang Ikaduhang Gubat sa Kalibutan nakaingon sa hilabihang pag-antus sa daghan nga mga tawo sa tibuok kalibutan. Ang mga Santos sa Germany misagubang og daghan nga mga pagsulay. Usa ka matinud-anon nga presidente sa Relief Society didto sa Stuttgart, Germany, mao si Sister Maria Speidel. Sa paghisgot sa ilang mga pagsulay, siya miingon: “Ang among pagsalig sa Ginoo ug among pagpamatuod sa iyang Simbahan nahimo nga among haligi sa kusog. . . . Uban sa kamaya among gikanta ang mga kanta sa Zion ug mibutang sa among pagsalig diha sa Ginoo. Maayo niya nga pagkahimo ang tanang butang.”¹⁹

Pag-usab, sa diha nga ang mga miyembro mihupot sa ilang mga pakigsaad, ilang gibati ang kalipay bisan nagsinati og makalilisang nga mga hagit.

Si Sarah Rich usa ka matarung nga babaye nga nagpuyo sa Nauvoo kinsa gitawag sa pagserbisyo diha sa templo sa wala pa ang mga Santos papahawaa gikan sa siyudad. Kini ang iyang mga pulong mahitungod sa mga panalangin

sa mga pakigsaad sa templo: “Daghang panalangin ang among nadawat sa balay sa Ginoo, nga nakahatag kanamo og kalipay ug kahupayan taliwala sa tanan namong kasub-anan ug nakahatag kanamo og hugot nga pagtuo sa Dios, nahibalo nga Siya mogiya kanamo ug mosuporta kanamo sa wala pa mahibaloi nga biyahe nga nagpaabut kanamo sa unahan.”²⁰

Sa sinugdan nahuman sa mga Santos ang Templo sa Kirtland, ug daghan ang miapil sa pagpahinungod. Human sa pagpahinungod, ang templo gidawat sa Ginoo. Ang Ginoo misulti kanila nga “malipay sa hilabihan sa sangputanan sa mga panalangin nga ibu-bu . . . diha sa mga ulo sa [Iyang] mga katawhan.”²¹

Samtang nagkadaghan pang balaang mga templo ang gitukod sa tibuk kalibutan, akong nakita ang mga panalangin nga miabut sa kinabuhi sa mga miyembro. Niadtong 2008 nasaksihan nako ang kalipay sa mga nawong sa usa ka magtiayon gikan sa Ukraine samtang giasoy nila kanako ang mahitungod sa pag-adto sa Freiberg, Germany, aron sa pagdawat sa ilang mga ordinansa sa templo. Ang pagbiyahe ngadto sa templo mokabat og 27 ka oras matag biyahe sa bus alang niining mapahinunguron nga mga miyembro, ug sila dili makahimo sa pag-adto kanunay. Hilabihan ang ilang kalipay nga ang Templo sa Kyiv Ukraine sa dili madugay mahuman na ug sila makahimo na sa pagtambong kanunay. Kana nga templo abli na karon, ug liboan ang nagpahimulos sa mga panalangin didto.

Sa pagbasa gikan sa personal nga kasaysayan sa akong apohan nga babaye, akong nahibaloan ang iyang dako nga kalipay diha sa iyang mga pakigsaad. Ganahan siya nga moadto sa templo ug sa pagpahigayon sa mga ordinansa alang sa liboan ka mga tawo kinsa namatay na. Kini mao ang misyon sa iyang kinabuhi. Miserbisyo siya isip usa ka temple worker sulod sa kapin sa 20 ka tuig diha sa Templo sa Manti Utah. Misulat siya nga siya nakasinati og daghang milagrosong mga pagpang-ayo aron iyang mapadako ang iyang mga anak ug aron sa pagserbisyo sa uban pinaagi sa buhat diha sa



templo. Isip iyang mga apo, kon kami adunay nahibaloan bisan unsa mahitungod ni Lola Rymer, kini mao nga siya usa ka matarung nga babaye kinsa naghupot sa iyang mga pakigsaad ug gusto nga kami mobuhat sa ingon. Kon ang mga tawo moutingkay sa atong mga kabtangan human kita mamatay, makit-an ba nila ang ebidensya nga kita naghupot sa atong mga pakigsaad?

Ang atong pinalanggang propeta, si Presidente Thomas S. Monson, misulti kanato sa miaging kinatibukang komperensya: “Samtang kamo ug ako moadto sa balaan nga mga balay sa Dios, samtang kita mahinumdom sa mga pakigsaad nga atong gihimo sa sulod, mas makaagwanta kita sa mga pagsulay ug mas makabuntog sa matag tintasyon. Niining sagrado nga sanktuwaryo makakaplag kita og kalinaw; mabag-o kita ug malig-on.”²²

Sa makausa pa: “Ipataas ang imong kasingkasing ug paglipay, ug hupot ngadto sa pakigsaad nga ikaw mihimo.”²³ Ang paghupot sa mga pakigsaad usa ka tinuod nga kalipay ug kamaya. Kini kahupayan ug kalinaw. Kini proteksyon gikan sa kadautan sa kalibutan. Ang paghupot sa atong mga pakigsaad motabang kanato sa mga panahon sa pagsulay.

Ako mopamatuod nga samtang kita adunay hugot nga pagtuo diha ni Kristo ug maghupot ngadto sa atong mga pakigsaad, atong madawat ang kalipay nga gipamulong diha sa

balaan nga mga kasulatan ug gisaad pinaagi sa atong mga propeta sa ulahing mga adlaw.

Minahal nga mga sister, gihigugma ko kamo ug nanghinaut nga inyong masinati kining dako nga kalipay diha sa inyong kinabuhi. Sa pangalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 25:13.
2. Patriyarkal nga panalangin nga gihatag ni Walter E. Hanks, Okt. 25, 1912, didto sa Lyman, Wayne County, Utah.
3. Bible Dictionary, “Covenant.”
4. *Merriam-Webster’s Collegiate Dictionary*, 11th ed. (2003), “cleave.”
5. Tan-awa sa Mosiah 18:8–9; tan-awa usab sa Thomas S. Monson, “Unsa may Akong Nabuhat alang sa Usa ka Tawo Karon?” *Liahona*, Nob. 2009, 85–87.
6. Doktrina ug mga Pakigsaad 124:40.
7. *Anak nga mga Babaye sa Akong Ginghamarian: Ang Kasaysayan ug Buhat sa Relief Society* (2011), 131–32.
8. *Anak nga mga Babaye sa Akong Ginghamarian*, 29.
9. Boyd K. Packer, *The Holy Temple* (1980), 170.
10. Doktrina ug mga Pakigsaad 136:4.
11. Tan-awa sa Mosiah 3:5–18.
12. Tan-awa sa Mosiah 4:2; 5:5.
13. Mosiah 4:3.
14. Alma 26:1.
15. Alma 26:11.
16. Alma 26:16.
17. Alma 26:35.
18. Doktrina ug mga Pakigsaad 11:13.
19. Maria Speidel, sa *Anak nga mga Babaye sa Akong Ginghamarian*, 76.
20. Sarah Rich, sa *Anak nga mga Babaye sa Akong Ginghamarian*, 30.
21. Doktrina ug mga Pakigsaad 110:9–10.
22. Thomas S. Monson, “Ang Balaan nga Templo—ang Suga sa Kalibutan,” *Liahona*, Mayo 2011, 93.
23. Doktrina ug mga Pakigsaad 25:13.



Ni Presidente Dieter F. Uchtdorf

Ikaduhang Magtatambag sa Unang Kapangulohan

Ayaw Ko Paghikalimti

Akong pag-ampo ug panalangin nga kamo dili gayud makalimot nga kamo tinuoray nga bililhong anak nga mga babaye sa gingharian sa Dios.

Minahal kong mga sister, dako ang kalipay nga ikauban kamo karon. Kanunay nakong gilantaw kining tinuig nga kinatibukang miting sa Relief Society ug ang talagsaong mga mensahe nga ihatag dinhi. Salamat, mga sister. Bililhon kining dungog alang nako nga masangunan ni Presidente Thomas S. Monson nga mamulong karon ug modugang og pipila ka hunahuna alang sa mga sister sa Simbahan.

Bag-ohay lang naglakaw ko subay sa matahum nga garden kuyog sa akong asawa ug anak nga babaye. Natingala ko sa himaya ug katahum sa mga minugna sa Dios. Ug dayon akong namatikdan, sa tanang mahimayaon nga pagpamukhad, ang pinakagamay nga bulak. Nakahibalo ko sa ngalan niini nga bulak tungod kay sukad sa akong pagkabata duna koy koneksyon niini. Ang bulak ginganlan og forget-me-not [ayaw ko paghikalimti].

Dili ko sigurado nganong kining pinakagamay nga bulak makahuluganon kaayo nako sulod sa katuigan. Dili kini makadani dayon; sayon kining mabaliwala taliwala sa mas dagko ug mas presko nga mga bulak; apanginon kini katahum, inubanan sa kamabulukon nga naghulagway nianang blue

kaayo nga mga panganod—tingali mao kini ang usa ka rason nganong ganahan kaayo ko niini.

Ug dunay halandumon nga hangyo sa ngalan niini. Adunay sugilanon sa German nga sa dihang ang Dios nahuman na og hingalan sa tanang tanom, usa ang wala hinganli. Usa ka gamayng tingog miingon, “Ayaw ko paghikalimti [forget me not], O Ginoo!” Ug ang Ginoo mitubag nga mao kini ang iyang ngalan.

Karon gusto nakong gamiton kining gamay nga bulak isip pasumbingay. Ang lima ka dahon sa gamayng bulak nga forget-me-not nag-aghat kanakong mohunahuna og lima ka butang nga kinahanglan nga dili gayud nato hikalimtan.

Una, ayaw, hikalimti ang pagpailub sa inyong kaugalingon.

Gusto ko kamong sultihan og butang nga unta inyong masabtan sa hustong paagi: Ang Dios nahibalo gayud nga kamo ug ako dili hingpit.

Modugang ko: Ang Dios nahibalo gayud usab nga ang mga tawo nga gituohan ninyong hingpit dili diay hingpit.

Ug gani migahin kita og daghan kaayong panahon ug kusog sa pagkumpara sa atong kaugalingon

sa uban—kasagaran mokumpara sa atong mga kahuyang sa ilang mga kalig-on. Mao kini hinungdan nganong nakamugna kita og mga kalauman alang sa atong kaugalingon nga imposibling makab-ot. Isip resulta, wala gayud nato pasalamat ang maayo natong mga paningkamot tungod kay daw minus ra kini kay sa nabuhat sa uban.

Tanan adunay mga kalig-on ug mga kahuyang.

Maanindot nga kamo adunay kalig-on.

Ug kabahin kini sa inyong mortal nga kasinatian nga kamo adunay mga kahuyang.

Ang Dios gustong motabang nato nga sa katapusan mausab ang atong mga kahuyang ngadto sa kalig-on,¹ apan nahibalo Siya nga nagkinahanglan kini og taas nga panahon. Gusto Niyang mahimo kitang hingpit,² ug kon magpadayon kita sa dalan sa pagkadisipulo, ugma damlag mahimo ra kini. OK ra nga kamo dili pa hingpit. Padayon sa pagpaningkamot niini, apan hununga na sa pagsilot ang inyong kaugalingon.

Minahal nga mga sister, daghan kaninyo ang manggiloloy-on nga walay hunong ug mapailubon sa mga kahuyang sa uban. Palihug hinumdumi usab ang pagkamanggiloloy-on ug pagkamapailubon sa inyong kaugalingon.

Sa pagkakaran, pasalamat ang tanang ginagamayng mga kalampusan sa inyong panimalay, sa mga relasyon sa inyong pamilya, sa inyong edukasyon ug panginabuhi, inyong partisipasyon sa Simbahan ug personal nga kalamboan. Sama sa mga forget-me-not, kini nga mga kalampusan ingon og gamay ra alang ninyo ug kini dili mamatikdan sa uban, apan namatikdan kini sa Dios ug dili kini gamay alang Kaniya. Kon inyong hunahunaon nga ang kalampusan mao lang ang pinakahingpit nga rosas o makadani nga orchid, basin dili ninyo makab-ot ang pinakataam-is nga mga kasinatian sa kinabuhi.

Sama pananglit, ang pag-insister nga kamo dunay “perpekto gayud” nga family home evening matag semana—bisan og ang paghimo niini

makapamisera kaninyo ug sa tanang anaa sa inyong palibut—tingali dili kini pinakamaayong pagpili. Hinoon, pangutan-a ang inyong kaugalingon, “Unsay atong mahimo isip pamilya nga mas makalingaw ug espirituhanon ug mas makapasuod kanato?” Kana nga family home evening—bisan og tingali yano ra ang tuyo ug pagkahimo niini—tingali may mas maayo pang mga resulta nga mohangtud.

Ang atong biyahe padulong sa kahingpitan dugay, apan makakaplag kita og mga katingalahan ug kalipay bisan sa pinakagagmayng lakang niana nga biyahe.

Ikaduha, ayaw hikalimti ang kalainan tali sa maayong sakripisyo ug sa binuang nga sakripisyo.

Ang madawat nga sakripisyo mao ang paghunong sa butang nga maayo alang sa butang nga mas dako og bili.

Ang pagmata og kadiyot aron pagtabang sa batang gidaman maayo nga sakripisyo. Nahibalo na kitang tanan niini. Ang pagtukaw sa tibuok gabii, nagdaot sa atong kaugalingong panglawas, sa pagpanindot og maayo sa isul-ob sa anak nga babaye alang sa Domingo dili kaayo maayo nga sakripisyo.

Ang paggahin og kadiyot sa atong panahon sa pagtuon sa mga kasulatan o pag-andam sa pagtudlo og leksyon maayo nga sakripisyo. Ang paggahin og daghang oras sa pagtahi sa ulohan sa leksyon ngadto sa hinimo nga mga pot holder alang sa matag sakop sa inyong klase tingali dili maayo.

Ang matag tawo ug sitwasyon managlahi, ug ang maayong sakripisyo sa usa ka butang tingali usa ka binuang nga sakripisyo alang sa uban.

Unsaon man nato pag-ila ang kalainan alang sa atong kaugalingong sitwasyon? Mapangutana nato ang atong kaugalingon, “Misaad ba ko nga gamiton ang akong panahon ug kusog alang sa mga butang nga mas importante?” Adunay daghan kaayong maayong mga butang nga buhatunon, apan ang tanan dili nato mahimo. Ang atong Langitnong Amahan malipay kaayo kon atong isakripisyo ang



maayong butang alang sa mas maayong butang nga adunay mahangturing panglantaw. Usahay, nagpasabut gani kana sa pag-alima sa gamay apan matahum nga bulak nga forget-me-not kay sa lapad nga tanaman sa dili ordinaryo nga pagpamukhad.

Ikatulo, ayaw hikalimti nga maglipay karon.

Sa istorya nga maoy ganahan kaayo sa mga bata nga *Charlie and the Chocolate Factory*, ang misteryusong tigbuhat og kendi nga si Willy Wonka nagtago og bulawan nga tiket sa lima sa iyang mga kendi bar ug miingon nga si kinsa man ang makakita sa usa sa mga tiket makadaug pinaagi sa pag-tour sa iyang factory ug tibuok kinabuhi nga hatagan og chocolate.

Nakasulat sa matag bulawan nga tiket mao kini nga mensahe: “Pahalipay kanimo, swerte nga nakakita niining Bulawan nga Tiket . . . ! Talagsaong mga butang ang nagpaabut kanimo! Daghang maanindot nga mga surpresa ang nagpaabut nimo, . . . Misteryoso ug katingalahang mga surpresa . . . molingaw, . . . mopahibulong, ug mopatingala nimo.”³

Sa klasikal nga istorya sa mga bata, ang mga tawo sa tibuok kalibutan nagtinguha pag-ayo nga makakita sa bulawan nga tiket. Ang uban mibati nga ang ilang tibuok umaabut nga

kalipay nagdepende kon makuha ba nila o dili ang bulawan nga tiket. Sa ilang kahinam, ang mga tawo nag-sugod sa paghikalimot sa yano nga kalipay nga sagad nilang makitan sa kendi bar. Ang kendi bar mismo dili na mindot kon wala ang bulawan nga tiket.

Daghan kaayong mga tawo karon ang naghulat sa ilang kaugalingong bulawan nga tiket—ang tiket nga gituohan nilang naggunit sa yawe sa kalipay nga kanunay nilang gipangandoy. Alang sa uban, ang bulawan nga tiket mao ang hingpit nga kaminyoon; alang sa uban, usa ka balay nga gimantala sa magasin; o tingali kagawasan sa kasamok o kabalaka.

Walay sayop sa matarung nga mga pangandoy—naglaum ug nagtinguha kita sa mga butang nga “mahiyason, matahum, o maayo og dungog o dalaygon.”⁴ Ang problema moabut kon atong pugngan ang atong kalipay samtang maghulat kita sa umaabut nga panghitabo—atong bulawan nga tiket—nga moabut.

Usa ka babaye ang nagtinguha gayud labaw sa bisan unsang butang nga maminyo sa templo sa matarung nga naghupot sa priesthood ug mahimong inahan ug asawa. Iya kining gipangandoy sa tibuok niyang kinabuhi, ug ah, pagkatalagsaon ug mahigugmaon unya niya nga asawa. Ang iyang

panimalay mapuno sa mahigugmaon nga pagbati. Walay sakit nga pulong ang malitok. Ang giluto dili gayud mapaig. Ug ang iyang mga anak, imbis mokuyog sa ilang mga barkada, mas mopili sa paggahin sa ilang mga gabii ug katapusan sa semana uban ni Mama ug ni Papa.

Mao kini ang iyang bulawan nga tiket. Mao kini ang usa ka butang diin gibati niya nga magdepende ang tibuok niyang pagpakabuhi. Mao kini ang usa ka butang sa tibuok kalibutan nga iya gayud nga gipangandoy.

Apan wala gayud kini mahitabo. Ug, paglabay sa katuigan, nag-anam siya og pagkalayo, maligutguton, ug gani pungot. Dili niya masabtan nganong dili mohatag ang Dios niining matarung niyang tinguha.

Nagtrabaho siya isip magtutudlo sa elementarya, ug ang pagpakig-uban sa mga bata sa tibuok adlaw nagpahinumdom lang nga ang iyang bulawan nga tiket wala gayud moabut. Sa paglabay sa katuigan nagkagrabe ang iyang kasagmuyo ug pagpalayo. Ang mga tawo dili na ganahan kon anaa siya ug molikay na sila kaniya kutob sa ilang mahimo. Gani iyang gidala ang iyang mga kasagmuyo ngadto sa mga bata sa eskwelahan. Nawala niya ang pagpugong sa iyang kalagot, ug nakigduyog tali sa kapungot ug hilabihan nga kasubo.

Ang trahedyang niini nga istorya mao nga kining minahal nga babaye, sa tanan niyang kasagmuyo sa iyang bulawan nga tiket, napakyas sa pagmatikod sa mga panalangin nga siya *aduna* na. Wala siyay mga anak sa iyang panimalay, apan gilubutan siya niini sa iyang klasrom. Wala siya panalangini og usa ka pamilya, apan ang Ginoo mihatag kaniya og oportunidad nga pipila lang ka tawo ang *aduna*—ang kahigayunan nga maayong makaimpluwensya sa kinabuhi sa gatasan ka mga bata ug mga pamilya isip usa ka magtutudlo.

Ang leksyon dinhi mao nga kon hudton ra nato ang atong adlaw sa paghulat sa maanindot nga mga rosas, dili nato makita ang katahum ug kaanindot sa gagmay kaayong forget-me-not nga naa sa atong palibut.

Wala kini magpasabut nga talikdan nato ang paglaum o lugakan ang atong mga tumong. Ayaw og hunong sa pagpaningkamot alang sa pinakamaayo nga anaa kaninyo. Ayaw og hunong sa pagpanghinaut sa tanang matarung nga tinguha sa inyong kasingkasing. Apan ayaw piyonga ang inyong mga mata ug mga kasingkasing sa yano ug elegante nga katahum sa ordinaryong mga gutlo kada adlaw nga maoy naghimo sa mabulukon, maayo nga kinabuhi.

Ang pinakamalipayong mga tawo nga akong nailhan dili kadtong nakakita sa bulawan nga tiket; sila kadto kinsa, samtang nagtinguha sa takus nga mga tumong, nakadiskobre ug mihatag og dakong bili sa katahum ug katam-is sa mga gutlo kada adlaw. Sila kadto kinsa, pinaagi sa usa ka lakang ngadto sa lain, mibati sa pagpasalamat ug kaanindot sa tibuok nilang kinabuhi. Mao kini sila ang tinuoray nga malipayon.

Ikaupat, ayaw hikalimti ang “ngano” sa ebanghelyo.

Usahay, sa naandan nga dagan sa atong kinabuhi, dili nato tuyuon ang dili pagkakita sa importanting aspeto sa ebanghelyo ni Jesukristo, sama sa tawo nga dili makakita sa matahum, sensitibo nga forget-me-not. Sa atong makugihong mga paningkamot sa pagtuman sa tanang mga katungdanan ug mga obligasyon nga atong gidawat isip mga miyembro sa Simbahan, usahay atong makita ang ebanghelyo isip taas nga listahan sa mga buluhaton nga angay natong idugang sa daan nang taas nga imposibling mga lista sa mga buhatunon, isip usa ka panahon nga sa ubang paagi angay natong ipahaum sa busy natong mga iskedyul. Nag-focus kita sa *unsa* ang gusto sa Ginoo nga atong buhaton ug *unsaon* kaha nato sa paghimo niini, apan kita usahay makalimot kon *ngano*.

Minahal kong mga sister, ang ebanghelyo ni Jesukristo dili usa ka obligasyon; usa kini ka agianan, nga gipakita sa mahigugmaon natong Amahan sa Langit, padulong sa kalipay ug kalinaw niining kinabuhia ug himaya ug dili malitok nga katumanan sa kinabuhing moabut.

Ang ebanghelyo usa ka kahayag nga motuhop sa mortalidad ug mobanwag sa atong dalan.

Ingon nga ang pagsabut sa “unsa” ug sa “unsaon” sa ebanghelyo gikinahanglan, ang mahangturong kainit ug katalagsaon sa ebanghelyo nagagikan sa “ngano.” Kon atong masabtan *ngano* nga ang atong Langitnong Amahan mihatag kanato niini nga sundanan alang sa pagpakabuhi, kon atong mahinumdoman *ngano* nga mipasalig kita sa paghimo niini nga kabahin sa pundasyon sa atong kinabuhi, ang ebanghelyo mohunong nga mahimong palas-anon ug, sa ingon, mahimong kalipay ug kamaya. Mahimo kining bililhon ug matahum.

Dili kita molakaw sa dalan sa pagkadisipulo nga magduko lamang, nga maghunahuna lamang sa mga tahas ug mga obligasyon nga anaa kanato. Dili kita molakaw sa dalan nga dili makakita sa katahum sa mahimayaon nga yutan-on ug espirituhanong mga talan-awon sa atong palibut.

Minahal kong mga sister, pangitaa ang katalagsaon, ang katahum, ug ang mahinamon nga kalipay sa “ngano” sa ebanghelyo ni Jesukristo.

Ang “unsa” ug “unsaon” sa pagkamasulundon nagtimaan sa agianan ug nagbutang kanato sa hustong dalan. Ang “ngano” sa pagkamasulundon mobalaan sa atong mga lihoc, mousab sa naandan ngadto sa pagkatalagsaon. Mopalambo kini sa ginagmay natong mga lihoc sa pagkamasulundon ngadto sa balaang mga lihoc sa pagpahinungod.

Ikalima, ayaw hikalimti nga nahigugma kaninyo ang Ginoo.

Isip usa ka bata, kon motan-aw ko sa gagmayng forget-me-not, akong bation usahay nga ingon og pareho ako nianang gamay nga bulak—gamay ug walay kahulugan. Naghunahuna ko kon makalimtan ba kaha ako sa akong pamilya o sa akong Langitnong Amahan.

Mga tuig human niadto makalingi ako nianang batan-ong lalaki uban sa kalumo ug kalooy. Ug ako nang nahibaloan karon—nga wala gayud ako mahikalimti.



Ug may butang pa akong nahiba-loan: isip usa ka Apostol sa atong Agalon, nga si Jesukristo, makapamahayag ako uban sa tanang kasiguroan ug kombiksyon sa akong kasingkasing—bisan kamo!

Kamo wala hikalimti.

Mga suster, bisan asa pa kamo, bisan unsa pa ang inyong mga kahimtang, wala kamo hikalimti. Bisan unsa pa kangitngit ang inyong mga adlaw, bisan mobati man nga kamo walay kapuslanan, bisan unsa kangiob sa inyong paghunahuna, ang inyong Langitnong Amahan wala makalimot kaninyo. Gani, Siya nahigugma kaninyo sa walay katapusang paghigugma.

Hunahunaa lamang kini: Nailhan kamo ug nahinumduman sa pinakahalangdon, gamhanan, ug mahimaya-yaong Binuhat sa tibuok universe! Gihigugma kamo sa Hari sa walay utlanang kawanangan ug walay katapusang panahon!

Siya nga milalang ug nahibalo sa mga bitoon nakaila kaninyo ug sa inyong ngalan—kamo ang anak nga mga babaye sa Iyang gingharian. Ang Salmista nag-ingon:

“Sa magapalandong ako sa imong mga langit, sa buhat sa imong mga tudlo, sa bulan ug sa mga bitoon, nga imong gibut-an;

“Unsa ba ang tawo, nga ikaw matinagdanon man kaniya? . . .

“Kay gibuhat mo siya nga ubos lamang og diyutay kay sa mga manolunda, ug gipurongpurongan mo siya uban sa himaya ug dungog.”⁵

Gihigugma kamo sa Dios tungod kay kamo Iyang anak. Nahigugma Siya kaninyo bisan usahay kamo tingali mobati og kaguol o makahimo og mga sayop.

Ang gugma sa Dios ug gahum sa gipahiuli nga ebanghelyo makatubos ug makaluwas. Kon tugutan lamang ninyo ang Iyang balaan nga paghigugma sa inyong kinabuhi, makalimpyo kini sa bisan unsang samad, makaayo sa bisan unsang sakit, ug makahupay sa bisan unsang kasubo.

Minahal kong mga suster sa Relief Society, mas duol kamo sa langit kay sa inyong gituohan. Inyong maabtan ang labaw pa kay sa inyong mahunahunaan. Ipadayon ang pagpalambo sa pagtuo ug personal nga

pagkamatarung. Dawata ang gipahiuli nga ebanghelyo ni Jesukristo isip inyong paagi sa pagpakabuhi. Pagmaya sa gasa sa pagkaaktibo niining mahinungdanon ug tinuod nga Simbahan. Hatagi og dakong gibug-aton ang gasa sa pagserbisyo sa balaan nga organisasyon sa Relief Society. Ipadayon ang paglig-on sa mga panimalay ug mga pamilya. Ipadayon ang pagpangita ug pagtabang sa uban kinsa nagkinahanglan sa inyong tabang ug sa tabang sa Ginoo.

Mga suster, adunay butang nga makadasig ug makabayaw kabahin sa gamay nga bulak nga forget-me-not. Manghinaut ko nga mahimo kining simbolo sa gagmayng mga butang nga makahimo sa inyong kinabuhi nga malipayon ug matahum. Ayaw gayud kalimot nga kinahanglan kamong magpailub ug manggiloloy-on sa inyong kaugalingon, nga ang pipila ka mga sakripisyo mas maayo kay sa uban, nga dili kamo kinahanglang maghulat sa bulawan nga tiket aron malipay. Palihug ayaw gayud kalimot nga ang “ngano” sa ebanghelyo ni Jesukristo modasig ug mobayaw kaninyo. Ug ayaw gayud kalimot nga ang inyong Langitnong Amahan nakaila, nahigugma, ug nagpangga kaninyo.

Salamat sa inyong pagka-kamo. Salamat sa dili maihap nga mga buhat sa gugma ug serbisyo nga inyong gihalad ngadto sa daghan kaayo. Salamat sa tanan nga inyo pang buhaton sa paghatag og kalipay sa ebanghelyo ni Jesukristo ngadto sa mga pamilya, sa Simbahan, sa inyong mga komunidad, ug sa mga nasud sa kalibutan.

Mga suster, gihigugma namo kamo. Akong pag-ampo ug panalangin nga kamo dili gayud makalimot nga kamo tinuoray nga bililhong anak nga mga babaye sa gingharian sa Dios, sa sagradong pangalan sa atong hinigugma nga Manluluwas, nga si Jesukristo, amen. ■

MUBO NGA MGA SULAT

1. Tan-awa sa Ether 12:27.
2. Tan-awa sa 3 Nephi 12:48.
3. Roald Dahl, *Charlie and the Chocolate Factory* (1964), 55–56.
4. Mga Artikulo sa Hugot nga Pagtuo 1:13.
5. Salmos 8:3–5.

Indeks sa mga Istorya sa Komperensya

Ang mosunod usa ka lista sa pinili nga mga kasinatian gikan sa mga pakigpulong sa kinatibuk-ang komperensya nga magamit sa personal nga pagtuon, family home evening, ug ubang pagtudlo. Ang numero nagpasabut sa unang pahina sa pakigpulong.

MAMUMULONG	ISTORYA
Elder Richard G. Scott	(6) Si Richard G. Scott mihimo og audio recording sa Basahon ni Mormon alang sa iyang pamilya.
Elder José L. Alonso	(14) Nabalaka nga mga ginikanan nawad-an og anak nga lalaki sa busy nga Siyudad sa Mexico.
Presidente Boyd K. Packer	(16) Boyd K. Packer nakadawat sa iyang patriyarkal nga panalangin.
Presidente Dieter F. Uchtdorf	(19) Si Dieter F. Uchtdorf mitabang sa pagtukod og balay figumanan samtang nagbansay sa pagkapiloto sa air force. Matinud-anon nga magtiayon mipakita og positibo nga impluwensya niadtong naglibut kanila.
Elder David A. Bednar	(24) Aaronic Priesthood nagtudlo og klase sa family history.
Elder Neil L. Andersen	(28) Si James O. Mason ug ang iyang asawa mihukom nga ilangan ang pagpanganak. Sila si Scott ug Becky Dorius misagop og mga bata human sa 25 ka tuig sa kaminyoon.
Elder Carl B. Cook	(33) Si Thomas S. Monson miawhag ni Carl B. Cook sa paghangad. Ang mga sister mibuhi sa “mga salagubangon” ngadto sa panganud pinaagi sa mga helium balloons.
Elder LeGrand R. Curtis Jr.	(35) Dili kaayo aktibo nga mga miyembro nakakita sa katubsanan sa dihang gidapit sa pagbalik ngadto sa Simbahan.
Elder D. Todd Christofferson	(38) Ang mga survivor sa Donner Party nahinumdom sa kabuntagon nga iyang nakita ang Ranso sa mga Johnson.
Elder W. Christopher Waddell	(50) Ang misyonaryo nga si Javier Misiego naila-ila ang tawo nga mibunyag sa iyang amahan.
Presidente Henry B. Eyring	(56) Ang batan-ong Henry B. Eyring ug ang iyang bishop mibisita sa usa ka sister sa ilang ward. Gordon B. Hinckley ug Henry B. Eyring nagribyu sa manuskrito sa lawom na nga gabii.
Presidente Thomas S. Monson	(60) Si Thomas S. Monson nagtuo nga siya ra ang miyembro sa Simbahan sa boot camp. Si Thomas S. Monson nakigsulti sa mga tawo sa bus mahitungod sa Simbahan.
Presidente Henry B. Eyring	(68) Si Henry B. Eyring namulong sa unibersidad diin siya gihangyo nga dili mopakigbahin og pagsaksi ni Jesukristo. Gidala ni Henry B. Eyring ang iyang anak nga mga babaye sa pagbisita og usa ka higala nga himatyon. Usa ka himatyon nga lalaki nagsul-ob og sinina nga pang-Dominggo alang sa panalangin sa priesthood. Mga tuig nga mipalayo sa balay, usa ka lalaki mibasa sa Basahon ni Mormon ug nakaangkon og pagpamatuod.
Elder Tad R. Callister	(74) Usa ka batan-ong babaye mipamatuod ngadto sa iyang amiga sa kamatuoran sa Basahon ni Mormon.
Presidente Thomas S. Monson	(82) Si Thomas S. Monson nakat-on sa gahum sa pag-ampo human makiti pag-usab ang lima ka dolyares nga nawala. Si Thomas S. Monson nadasig sa pagpahibalo sa nga si Peter Mourik nga mamulong sa pagpahinungod sa Templo sa Frankfurt Germany.
Elder Russell M. Nelson	(86) Russian nga mga kinabig mihatag og bili sa kaminyoon sa templo.
Elder Randall K. Bennett	(98) Si Randall K. Bennett mibaliwala sa pasidaan sa kusog nga sulog sa dagat.
Elder J. Devn Cornish	(101) J. Si Devn Cornish milagrosong nakakita og baynte singko sentimos agig tubag sa pag-ampo.
Elder Quentin L. Cook	(104) Si Alma Sonne mikanselar sa mga reservation alang sa <i>Titanic</i> . Si Irene Corbett namatay sa pagsakay sa <i>Titanic</i> .
Silvia H. Allred	(114) Usa ka sister nag-antus og daghang sakit gihupay sa mga visiting teacher. Usa ka tawo nakabig human moserbisyo ang mga visting teacher sa iyang pamilya.
Presidente Dieter F. Uchtdorf	(120) Usa ka babaye nagmahay nga siya wala maminyo ug wala makabaton og mga anak.

Mga Pagtulun-an alang sa Atong Panahon

Ang mga leksyon sa Melchizedek Priesthood ug Relief Society sa ikauapat nga mga Domingo igahin sa “Mga Pagtulun-an sa Atong Panahon.” Ang matag leksyon mahimong andamon gikan sa usa o daghan pang mga pakigpulong nga gihatag diha sa pinaka bag-o nga kinatibuk-ang komperensya (tan-awa ang tsart sa ubos). Ang mga presidente sa stake ug district mahimong mopili kon unsa nga mga pakigpulong ang angayng gamiton, o mahimo nilang ihatag ang responsibilidad ngadto sa mga bishop ug mga presidente sa branch. Ang mga lider kinahanglan mopasabut pag-ayo sa kaimportante sa mga kaigsoonan sa Melchizedek Priesthood ug Relief Society nga magtuon sa parehas nga mga pakigpulong sa samang mga Domingo.

Kadtong motambong sa ikauapat nga Domingo nga mga leksyon giwhag sa pagtuon ug pagdala ngadto sa klase sa pinakabag-ong isyu sa magasin sa kinatibuk-ang komperensya.

Mga Sugyot alang sa Pag-andam og Leksyon gikan sa mga Pakigpulong

Pag-ampo nga ubanan ka sa Balaang Espiritu samtang ikaw magtuon ug motudlo sa (mga) pakigpulong. Mahimong matintal ka sa pag-andam

sa leksyon gamit ang ubang mga materyal, apan ang mga pakigpulong sa komperensya mao ang giaprobahan nga kurikulum. Ang imong buluhaton mao ang pagtabang sa uban nga makat-on ug makasunod sa ebanghelyo sumala sa gitudlo sa pinakabag-o nga kinatibuk-ang komperensya sa Simbahan.

Ribyuha ang (mga) pakigpulong, mangita alang sa mga baruganan ug mga doktrina nga makatubag sa mga panginahanglan sa mga sakop sa klase. Tan-awa usab ang mga istorya, mga pakisayran nga mga kasulatan, ug mga pamahayag gikan sa (mga) pakigpulong nga makatabang kanimo sa pagtudlo niini nga mga kamatuoran.

Paghimo og outline kon unsaon sa pagtudlo ang mga baruganan ug mga doktrina. Ang imong outline kinahanglan maglakip sa mga pangu-tana nga makatabang sa mga sakop sa klase:

- Pangitaa ang mga baruganan ug mga doktrina nga anaa sa (mga) pakigpulong.
- Hunahunaa ang ilang mga kahulugan.
- Ipaambit ang mga pagsabot, mga ideya, mga kasinatian, ug mga pagpamatuod.
- Ipagamit kini nga mga baruganan ug mga doktrina sa ilang mga kinabuhi. ■

MGA BULAN NGA ANG MGA LEKSYON ITUDLO

Nobyembre 2011–
Abril 2012

Mayo 2012–Oktubre 2012

MGA MATERYAL SA LEKSYON ALANG SA IKAUPAT NGA DOMINGGO

Mga pakigpulong nga gimantala sa Nobyembre 2011 *Liahona**

Mga pakigpulong nga gimantala sa Mayo 2012 *Liahona**

*Kini nga mga pakigpulong anaa sa daghang mga pimulongan sa conference.lds.org.

Kinatibuk-ang mga Kapanguloan sa Auxiliary


RELIEF SOCIETY



Silvia H. Allred
Unang Magtatambag



Julie B. Beck
Presidente



Barbara Thompson
Ikaduhang Magtatambag


YOUNG WOMEN



Mary N. Cook
Unang Magtatambag



Elaine S. Dalton
Presidente



Ann M. Dobb
Ikaduhang Magtatambag

PRIMARY



Jean A. Stevens
Unang Magtatambag



Rosemary M. Wixom
Presidente



Cheryl A. Esplin
Ikaduhang Magtatambag

YOUNG MEN



Larry M. Gibson
Unang Magtatambag



David L. Beck
Presidente



Adrián Ochoa
Ikaduhang Magtatambag

SUNDAY SCHOOL



David M. McConkie
Unang Magtatambag



Russell T. Osguthorpe
Presidente



Matthew O. Richardson
Ikaduhang Magtatambag



Usa ka rendering sa artist nga nagpakita sa Provo Tabernacle, nga naguba tungod sa sunog, itukod pag-usab isip ikaduha nga templo sa Provo, Utah, USA.

Ika-181 nga Tunga sa Tuig nga Kinatibuk-ang Komperensya

Sobra sa 100,000 ka mga tawo ang mitambong sa lima ka sesyon sa Ika-181 nga Tunga sa Tuig nga Kinatibuk-ang Komperensya sa Ang Simbahan ni Jesukristo sa mga Santos sa Ulahing mga Adlaw sa Conference Center sa Siyudad sa Salt Lake, Utah, USA, niadtong Oktubre 1 ug 2. Minilyon ang mitan-aw ug nanimaw sa TV, radyo, satellite, ug mga sibya sa Internet.

Atol sa unang sesyon sa Sabado, Oktubre 1, gipahibalo ni Presidente Thomas S. Monson ang lokasyon sa bag-ong unom ka templo. Barranquilla, Colombia; Durban, South Africa; Kinshasa, Democratic Republic of the Congo; Paris, France; Provo, Utah, USA; ug Star Valley, Wyoming, USA.

Pagkahuman niini nga pahibalo, si Presidente Monson midapit sa mga miyembro sa pagtampo sa Church's General Temple Patron Assistance Fund. "Kini nga pundo naghatag og usa ka higayong pagbisita sa templo niadtong kinsa dili makaadto sa templo," siya miingon.

Pagka Sabado sa hapon, gipahibalo ni Elder David A. Bednar sa Korum sa Napulog Duha ka mga Apostoles ang bag-ong seksyon sa youth.lds.org—FamilySearch Youth and Family History (lds.org/familyhistoryyouth). Ang tumong niining bag-o nga seksyon mao ang pagtabang sa mga batan-on

sa pagdiskobre sa family history ug moserbisyo sa ilang katigulangan pinaagi sa pagpangita sa ilang mga rekord. (Tan-awa ang artikulo sa pahina 128.)

Atol usab niini nga sesyon, si Elder Claudio R. M. Costa gi-released gikan sa Kapangulohan sa Seventy. Gipaluyohan ngadto sa Kapangulohan sa Seventy mao si Elder Tad R. Callister (tan-awa sa pahina 128 alang sa iyang biography). Dose ka mga Seventy ug Area Seventy ang gi-released o gitudlo nga mahimong emeritus (tan-awa sa pahina 23 alang sa mga pagpaluyo ug pag-release).

Atol sa iyang pakigpulong sa Dominggo sa buntag, gipahinumdu-man ang tanan ni Presidente Henry B. Eyring, Unang Magtatambag sa Unang Kapangulohan, sa panawagan nga—gihimo niadtong Abril sa kinatibuk-ang komperensya karong tuiga—nga ang tanang mga miyembro moapil sa adlaw sa pagserbisyo karong 2011 (tan-awa sa Henry B. Eyring, "Mga Oportunidad sa Paghimo og Maayo," *Liahona*, Mayo 2010, 22).

Ang mga miyembro sa tibuok kalibutan naminaw sa komperensya sa 93 ka mga pinulongan. Alang sa impormasyon kon kanus-a maanaa ang mga bersyon sa teksto, audio, ug video sa lain-laing mga pinulongan, bisitaha ang lds.org/general-conference/when-conference-materials-will-be-available. ■

Anak nga mga Babaye sa Akong Gingharian: Usa ka Makasaysayanong Buhat sa LDS nga mga Babaye Karon

Ni Chelsee Niebergall

Mga Magasin sa Simbahan

Anak nga mga Babaye sa Akong Gingharian: Ang Kasaysayan ug Buhat sa Relief Society, usa ka bag-ong libro nga giandam ubos sa direksyon sa Unang Kapangulohan, naglangkob sa rekord sa kabilin sa Relief Society ug sa kababayan-an sa Simbahan, miingon si Julie B. Beck, kinatibuk-ang presidente sa Relief Society, atol sa Septyembre 2011 nga kinatibuk-ang miting sa Relief Society.

"Kini mohiusa ug mosuporta sa panag-igsoonay sa tibuok kalibutan uban sa mga katuyoan sa Relief Society ug sa mga sumbanan ug mga pribilehiyo sa mga disipulo." siya miingon. "Kini usa ka saksi sa importansya sa tahas sa mga mga babaye diha sa plano sa kalipay sa atong Amahan, ug kini naghatag ug dili matarug nga sukaranan sa unsay atong gituohan, unsay atong gibuhat, ug unsay atong panalipdan" (pahina 113 niini nga isyu).

Si Sister Beck miingon nga ang basahon makahatag og pundasyon sa pagkatawo sa kababayan-an isip anak nga mga babaye sa Dios. Samtang ang mga tawo magtuon sa basahon, siya miingon, ilang makita kon sa unsang paagi ang Relief Society makatandog sa kinabuhi sa kada sister.

Sa Unsang Paagi ang Libro Nahimo

Ang proyekto nagisugod isip buluhaton gikan sa Unang Kapangulohan. Si Susan W. Tanner, kanhi kinatibuk-ang presidente sa Young Women, gi-set apart sa pagsulat sa libro. Si Sister Beck ug ang iyang mga magtatambag, sila si Silvia H. Allred ug Barbara



Thompson, gi-assigned sa pagdumala sa proyekto ug sa pagtrabaho uban ni Sister Tanner, mga editor, tigdesinyo, ug sa uban aron sa pagtino sa mga sulod niini sumala sa espiritu sa pagpa-dayag. “Wala pa gyud ko katrabaho og proyekto nga gigihayan sa Espiritu kay niini,” miingon si Sister Beck.

Lakip niana nga proseso mao ang pagdesisyon kon unsa sa liboang mga istorya sa kasaysayan ang kinahanglang ilakip sa libro. Si Sister Beck, iyang mga magtatambag, ug si Sister Tanner nagribyu sa mga minute sa miting sa unang Relief Society sa Nauvoo ug sa uban pang mga kasaysayan ug mga panghitabo kabahin sa Relief Society ug sa kababayan-an sa Simbahan.

Sister Beck miingon nga ang resulta dili mao ang matang sa kronolohiya nga kasaysayan kon dili usa ka espirituhanon nga kasaysayan sa kababayan-an sa Simbahan ug sa Relief Society.

“Atong gitun-an ang atong kasaysayan tungod kay kini makatabang nga kita mag-usab,” miingon si Sister Beck sa iyang pakigpulong niadtong Septiyembre 2010 nga kinatibuk-ang miting sa Relief Society. “Sa katapusan, ang bili sa kasaysayan dili kaayo sa mga petsa, mga panahon, o mga dapit niini. Kini bililhon kay kini nagtudlo kanato sa mga baruganan, mga katuyoan, ug mga sumbanan nga atong kinahanglan nga sundon, ug kini nagtabang kanato nga makaila kon kinsa kita kon unsa ang atong buhaton ug naghiusa kanato sa paglig-on sa mga panimalay sa Zion ug sa pagtukod sa gingharian sa Dios dinhi sa yuta” (“Anak nga mga Babaye sa Akong Ginghamian: Ang Kasaysayan ug ang Buhat sa Relief Society,” *Liahona*, Nob. 2010, 115).

Samtang ang libro nagsunod sa dagan sa panahon [time line], ang mga pagtulun-an niini gipresentar sa mga kapitulo sumala sa hilisgutan. Kini naggamit og mga istorya ug mga panig-ingnan gikan sa mga kasulatan ug sa panahon karon, gikan sa mga pulong sa mga propeta, ug sa mga lider sa Relief Society aron sa pagtudlo sa importanting mga mensahe.

Ang Impluwensya sa Libro

Miingon si Sister Beck nga pinaagi sa libro ang mga suster makakat-on kon unsaon pagkab-ut sa mga katuyoan sa Relief Society sa ilang kinabuhi mismo ug isip kaigsoonan sa kababayan-an nga mga disipulo nga nagtuman sa pakigsaad.

“Sila makakat-on kon unsay ipasabut nga mopalambo sa pagtuo ug personal nga pagkamatarung, molig-on sa mga pamilya ug panimalay, ug mangita ug motabang niadtong nanginahanglan,” miingon si Sister Beck sa usa ka interbyu sa magasin sa Simbahan. “Kon ang mga suster mismo makakaplag sa buhat sa Relief Society, sila makasabut kon unsa ka dako ang impluwensya sa mga babaye sa kalamboan sa Simbahan, sa karaan ug sa ulahing mga adlaw, ug sila masayud sa ilang katuyoan ug sa ilang pagkatawo.”

Si Sister Beck nagtuo nga kadtong mobasa sa libro makakat-on pinaagi sa panig-ingnan ug lagda kon unsaon sa pagpaminaw sa Espiritu Santo ug sa pagdawat og personal nga pagpadayag. Sila usab malig-on ug madasig sa ilang inadlaw-adlaw nga pagpakabuhi ug sa mga pasulay ug kalisdanan.

“Adunay talagsaong kalig-on sa basahon—talagsaong kalig-on nga mahimo natong sundon,” miingon si Sister Beck. “Busa atol sa lisud nga mga panahon, maglaum ko nga ang mga tawo moandam sa libro ug mokuha ug mobasa og usa ka istorya o panig-ingnan nga makapalig-on kanila.”

Si Sister Beck miingon usab nga ang basahon maanaa sa panimalay sa mga miyembro sa Simbahan pinaagi sa mga suster, apan siya nagtuo nga ang libro mahimong importante nga kapanguhaan sa lalaki ug babaye. Kini makatabang sa batan-on nga babaye

kon unsaon nila nga maapil sa tibuok kalibutan nga panag-igsoonay sa mga kababayan-an, ug kini makapahiusa sa bana ug asawa sa ilang balaanong buhat sa paggiya sa ilang pamilya ug sa pagserbisyo sa Simbahan.

Pagkahuman og tuon sa libro, si Dale Cook, presidente sa Syracuse Utah Bluff Stake, miingon nga importante kini nga kapanguhaan sa pagtabang usab sa mga lalaki, dili lang sa mga babaye sa Simbahan nga makasabut sa ilang tahas isip mga disipulo ni Kristo. “Inyong mabasa ug makita kon sa unsang paagi [ang Relief Society] may kalabutan ug masumpay sa priesthood,” miingon si Presidente Cook. “Kini nakatabang kanako sa pagkaamgo sa gahum nga anaa sa akong kapikas ug [sa unsang paagi] nga [mas] mohigugma ug motabang ug mosuporta kaniya.”

Kabahin sa Libro

Ang libro usa ka kapanguhaan alang sa personal nga pagtuo ug sa pagtudlo sa panimalay, sa Relief Society, ug sa ubang mga kalihokan sa Simbahan. Kini ipadala ngadto sa mga bishop ug mga presidente sa branch, kinsa makig-alayon sa mga presidente sa Relief Society sa pagdesisyon kon unsaon sa pag-apud-apod ang mga libro nga kini mahimong panalangin ngadto sa mga suster sa ward ug branch.

Ang libro gipaabut nga naa sa hapit duha ka dosenang mga pinulongan sa katapusan sa Enero 2012. Daghan niini anaa na sa internet, diin ang mga miyembro makakita og mga video, maki-pagbahin og mga kinutlo, ug makabasa og mga sugyot kon unsaon sa paggamit ug pagpakigbahin sa mga mensahe niini nga libro. Adto sa lds.org/relief-society/daughters-in-my-kingdom. I-klik ang “[Additional Languages \(PDF\)](#)” sa tunga-tunga sa pahina ubos sa “[Related Resources](#).” Usa ka listahanan sa mga pinulongan nga anaa na niini makita sa tuo nga bahin sa sunod pahina. Ang website sa katapusan hubaron ngadto sa daghang pinulongan.

Usa ka hardbound nga edisyon sa libro ang giplanohan sa English, Portuguese, ug Spanish sa katapusan sa tuig ug makuha pinaagi sa Distribution Services ug store.lds.org. ■

Bag-ong Site nga Makatabang sa mga Batan-on sa Pagsugod ssa Family History

Ang bag-ong seksyon sa FamilySearch Youth ug Family History sa youth.lds.org (lds.org/familyhistory/youth) nagtinguha sa pagtabang sa mga batan-on sa pagdiskobre sa family history ug pagserbisyo sa ilang kati-gulangan pinaagi sa pagpangita sa ilang mga rekord.

Ang site nagpakita og mga kapanguhaan nga nagtudlo sa mga batan-on unsaon nila sa pagsugod gamit ang FamilySearch. Gamit ang lima ka yanong mga lakang ang mga batan-on matudloan unsaon pag-siksik sa ilang family tree, paghimo og mga rekord sa pamilya, ug pag-andam og mga ngalan nga dad-on ngadto sa templo. Ang site naglakip usab og mga ideya kon sa unsang paagi ang family history magamit sa mga klase ug korum isip paagi sa pagserbisyo sa uban.

Ang bag-ong seksyon anaa sa English, Portuguese, ug Spanish sa karon. Dugang mga pinulongan ang maanaa sa mosunod nga mga bulan. ■



Ang Kompetisyon sa Art Nagdapit sa mga Batan-on nga Mopakita

Ang Church History Museum nag-imbatar sa mga batan-on nga nag-edad og 13 hangtud 18 nga moapil sa unang Internasyonal nga Kompetisyon sa Art alang sa Kabatan-onan.

Ang mga artist kinahanglang magmugna nga mopahayag sa kahulugan sa “tindog ug pakita” (tan-awa sa D&P 115:4–6).

Ang artwork kinahanglang namugna human sa Enero 1, 2009. Ang mga sumasalmot kinahanglang 13 anyos inigka Enero 1, 2012, ug makasumiter og usa ka buhat sa art sa internet gikan Enero 2, 2012, hangtud sa deadline—Biyernes, Hunyo 1, 2012. Ang pinaka dako nga sukod kay 84 ka pulgada (213 cm) sa pinakataas nga dimensyon. Ang tanang artistic media ug mga estilo dawaton sa kompetisyon.

Ang impormasyon sa pagsumiter anaa sa lds.org/youthartcomp.

Ang mga nakadaug pagahangyoon nga ipadala ang orihinal nga art ngadto sa museyo aron ipakita atol sa pasundayag gikan sa Nobyembre 16, 2012, hangtud Hunyo 17, 2013. ■



Elder Tad R. Callister

Sa Kapangulohan sa Seventy

Si Elder Tad Richards Callister, bag-ong gipaluyohan ngadto sa Kapangulohan sa Seventy ug miyembro sa Ikaduhang Korum sa Seventy, mipasabut nga usa sa tumong sa Kaigsoonan mao ang pagpahinabo sa “tinuod nga kalamboan” sa Simbahan. “Kana nagpasabut nga mas daghang tawo nga dili lang motambong sa miting sa sakrament apan moambit usab sa sakrament, modawat sa mga ordinasa nga gitanyag sa Simbahan, ug motuman sa ilang mga pakigsaad,” siya miingon.

Nagtinguha nga makatabang sa mga lider sa Simbahan niana nga paningkamot, si Elder Callister mapasalamaton nga ang Ginoo naghatag kaniya og mga oportunidad sa pagserbisyo og daghang calling. “Nakasinati sa kasinatian sa mga tawo ang akong ikatrabaho—mga presidente sa stake ug mga bishop ug mga presidente sa elders quorum—unta kini mas makapasensitibo ug makapasayud kanako sa ilang mga panginahanglan,” siya mipasabut.

Si Elder Callister nagserbisyo isip full-time nga misyonaryo sa Eastern Atlantic States Mission, presidente sa elders quorum, stake mission president, magtatambag sa presidente sa stake, bishop, presidente sa stake, regional representative, Area Seventy, presidente sa Canada Toronto East Mission (2005–08), ug nagserbisyo isip Presidente sa Pacific Area sa dihang gitawag isip Kapangulohan sa Seventy.

Natawo ngadto kang Reed ug Norinne Callister niadtong Disyembre 1945, sa Glendale, California, USA, si Elder Callister nakadawat og degree sa accounting sa Brigham Young University niadtong 1968. Siya migradwar og law sa University of California Los Angeles niadtong 1971. Niadtong 1972 iyang naangkon ang LLM (master’s) degree sa tax law sa New York University. Gikan 1972 hangtud 2005 nagtrabaho siya isip abogado, ug nagsulat og mga libro kabahin sa Pag-ula ug Apostasiya ug Pagpahiuli.

Iyang giminyoan si Kathryn Louise Saporiti niadtong Disyembre 1968 sa Templo sa Los Angeles California. Sila adunay unom ka mga anak.

Si Elder Callister miila sa kamot sa Ginoo sa iyang kinabuhi. “Ang gugma sa Manluluwas hilabihan kaayo nga sa akong hunahuna Siya ug ang atong Amahan sa Langit ganahan kaayo nga mopanalangin kanato bisan sa pinaka gamayng kaayohan nga atong nahimo, tungod kay mao kana ang ilang kinaiya.” ■



GILTRATOHAN NI MATTHEW REIER

Templo sa San Salvador El Salvador

Ang maanindot nga templo sa El Salvador gipahimungod niadtong Agosto 21, 2011, ang pinakaulahi sa 135 ka mga templo nga gigamit sa tibuok kalibutan. Sa mga templo, si Presidente Howard W. Hunter (1907–95) miingon sa iyang pakigpulong sa kinatibuk-ang komperensya niadtong Okubre 1994, “Magmahimo kitang katawhan nga magtambong sa templo. Tambong sa templo pirmo kon itugot sa personal nga kahimitang. Pagbutang og templo sa inyong balay aron makita sa inyong mga anak.” (“Exceeding Great and Precious Promises,” Ensign, Nob. 1994, 8).



“**A**kong ipamatuod ninyo nga kini nga buhat tinuod, nga ang atong Manluluwas buhi, ug Siya naggiya ug nagdumala sa Iyang Simbahan dinhi sa yuta,” miingon si Presidente Thomas S. Monson sa panapos sa ika-181 nga Tunga sa Tuig nga Kinatibuk-ang Kompetensya. “Akong ibilin ninyo ang akong pagsaksi ug pagpamatuod nga ang Dios atong Mahangturong Amahan buhi ug nahigugma kanato. Siya gayud atong Amahan, ug Siya personal ug tinuod. Hinaut nga kita mahibalo ug makasabut nga andam Siya sa pagpaduol nato, nga andam gayud Siya sa pagtabang nato, nga Siya nahigugma gayud nato, ug Siya daghan gayud og gihimo ug andam nga mobuhat alang nato.”